

# ವ್ಯಕ್ತರಣಾ ಪಠ್ಯನವು

(ಸಾಧಕಂಗಡ ಪರಿಚಯ)

ಅಪ್ಪಚೆಟ್ಟೋಳಂಡ ವನು ವಸಂತ



ಕರ್ನಾಟಕ ಸರ್ಕಾರ

ಜಯಕಂಠ

# ವಿತ್ತರಕ್ ಪತ್ರ್ನವು

(ಸಾಧಕಂಗಡ ಪರಿಚಯ)

ಅಪ್ಪಚೆಟ್ಟೋಳಂಡ ವನು ವಸಂತ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

2

"ETHARAK PATHNAVU"-

A book on few renowned persons,  
collected and written by Mrs. Appachettolanda Vanu Vasantha,  
Ballamavati Village, Ballamavati Post, Via : Napoklu,  
Kodagu District.

Published by The Karnataka Kodava Sahithya Academy,  
Madikeri, during November 2005.

First Edition : 2005

ಆದ್ಯ ಮುದ್ರಣ : 2005

All Rights Reserved

ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್

Price : Rs. 20-00

ಕ್ರಯ : ಇರ್ವದ್ ಉರ್ಪಿಯ

ಪ್ರಕಟಣೆ ಸಮಿತಿ :

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ  
ಶ್ರೀ ಮುದ್ದಿಯಡ ಕುಶ ಪೊನ್ನಪ್ಪ  
ಶ್ರೀಮತಿ ತೀತಿರ ರೇಖಾ ವಸಂತ  
ಶ್ರೀಮತಿ ಪಾಲೇರ ರಾಣಿ ಅಪ್ಪಣ್ಣ

ಬೋಳಿ ಪಡ್ತಾನವು :

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸ್ಕೌಟ್ ಕಟ್ಟಡ, ಜಿಲ್ಲಾ ಕ್ರೀಡಾಂಗಣ, ಮಡಿಕೇರಿ - 571 201

ಅಚ್ಚುಕಾರ :

ರಾಜೇಶ್ ಪವರ್ ಪ್ರೆಸ್

ದರ್ಬ, ಪುತ್ತೂರ್, ದ. ಕ.

ಫೋನ್ : (08251) 231696, 231697

## ಅಧ್ಯಕ್ಷಿಣಿರ ತಕ್ಕ

ಕತೆ, ಕವನ, ನಾಟಕ, ವೈಚಾರಿಕ ಲೇಖನತರನ್ನತ ಎಳ್ತಾ ಕೊಡವತಕ್ಕಲ್ ದಿನತಂಜಿ ದಿನಕ್ ಬೊಳಚಿ ಕಂಡಂಡುಳ್ಳದ್ ಕುಸಿರ ವಿಷಯ. ಆಚೇಂಗಿ, ಪಲತರ ವಿವರ - ವಿಶೇಷತೆರನ್ನತ ವಿಷಯಕ್ ಎಳ್ತಾಕಾರ ಮುತುವರ್ಜಿ ಇಡುವದ್ ಕಮ್ಮಿ. ನಂಗಡ ಮಿಂಞಾತಾರ ಪೀಳಿಗಕ್ ಬೋಂಡಿಯಾನಂತ ವಿವರತಾರ ಪುಸ್ತಕ ಪೊರಬುದ್ದದ್ ಕೈಬೆರತ ಲೆಕ್ಕ ಮಾಡುವಚ್ಚಕ್ ಮಾತ್ರ. ಕೊಡವ, ಕೊಡಗ್, ಕೊಡವಾಮೆಕ್ ಸಮ್ಮಂದಪಟ್ಟ ಸಂಗತಿ ಮಾತ್ರ ಎಳ್ತಾ ರೂಪತ ಪೊರಬುದ್ದಕ ಪೋರ. ಪ್ರಪಂಚತಾರ ಪಲಬಗೆರ ವಿಷಯ - ವಿಶೇಷತೆಯೊ ಕೊಡವತಕ್ಕಲ್ ಪುಸ್ತಕ ರೂಪತ ಬೊಳಿಕ್ ಬಂದಕ ನಲ್ಲದ್. ಈ ಪೋಲೆ, "ಎತ್ತರಕ್ ಪತ್ತಾನವು" ಎಣ್ಣುವ ಕೈ ಎಳ್ತಾ ಅಕಾಡೆಮಿಕ್ ಬಂದಲ್ಲಿ, ಇದಾನ ಅಂಜೆಡಾತಿತ್ ಸೆರಿ ಕೂಟಾನದಾಚಿ.

ಎತ್ತರಕ್ ಪತ್ತಾನಯಿಂದ ವಿವರತಾನ ಅಂಜಿತ್ ಎಳ್ತಾದಾನ ಎಳ್ತಾಕರ್ತಿ ಶ್ರೀಮತಿ ಅಪ್ಪಚಿಟ್ಟೋಳಂಡ ವನು ವಸಂತ ಅಯಿಂಗಕ್ ನಂಗಡ ಶುಭಾಶಯ. ಓದುಗ ಮಾಜನ ಪುಸ್ತಕ ಎಡಾತಂಡ್ ಓದಿತ್, ಅಕಾಡೆಮಿರ ಸಾಹಿತ್ಯ ಸೇವೆಕ್ ಒತ್ತಾಸೆ ತರಂಡೂಂದೆಣ್ಣೆತ್ ಕೇಟವ. ಅಲ್ಲತೆ, ಓದಿತಾಪದು ತಂಗಡ ಅಭಿಪ್ರಾಯತಾನ ಅಯೆಚಿ ತಂದಕ ನಲ್ಲದ್.

ಮಡಿಕೇರಿ  
21-11-2005

- ಉಳ್ಳಿಯಡ ಡಾಟಿ ಪೂವಯ್ಯ  
ಅಧ್ಯಕ್ಷಿಣಿ, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

## ಎಳ್ತೊ ಕರ್ತೀರ ತಕ್ಕೊ

ಇಂದೇತಾರ ಮಕ್ಕ ನಾಳೆರ ಪ್ರಜೆಯ. ಅಯಿಂಗಡ ಭವಿಷ್ಯ ಚಾಯಾಂಡೊಂದಾಚೇಂಗಿ, ಅಯಿಂಗಡ ಬೊಳಚೆಯೂ ಕ್ರಮಪೋಲೆ ಇರಂಡು. ಮಕ್ಕಕ್ ಚೆರ್ಪತೇ ನಾಡಾರ, ದೇಶತಾರ, ಪರದೇಶತಾರ ಪೆದಪೋನ ವ್ಯಕ್ತಿಯಡ ಜೀವನಚರಿತ್ರೆ ಎಣ್ಣೆ ಕೊಡತತೇಂಗಿ, ಅಯಿಂಗಕ್ ನಂಗಳೂ ಅನ್ನನೆ ಎಂತೇಂಗೊಂದ್ ಸಾಧನೆ ಮಾಡಂಡೊಂದ್ ಎಣ್ಣೆ ವ ಪುರಾಡ್ ಬಪ್ಪ. ಕೊಡವತಕ್ಕೊರ ಬೊಳಾಚೆ ಚೆರಿಯ ಮಕ್ಕಡಲ್ಲಿಂಜೇ ಆಕಂಡು ಎಣ್ಣೆ ವ ಕಾರಣತ್ ಈ ಪುಸ್ತಕ ಎಳೊದಿಯೆ. ಈ ಪುಸ್ತಕತುಳುಳ್ಳ ಇಚ್ಚೆಕೇ ವ್ಯಕ್ತಿಯ ಪೆನಪೋನವು ಅಲ್ಲ, ಲೆಕ್ಕ ಇಲ್ಲ ತಚ್ಚೆಕ್ ಉಂಡ್. ನಾನ್ ಓದಾನ ಕೆಲವು ವ್ಯಕ್ತಿಯಡ, ಅದಾಲೂ ಬಾಲ್ಯತೇ ಅಯಿಂಡ ಭವಿಷ್ಯ ತೀರ್ಮಾನ ಆಪನ್ನತ ಗುಣವಿಶೇಷತೆ ಕಾಟಾನನ್ನತ ಕೆಲವು ವ್ಯಕ್ತಿಯಡ ಚರಿತ್ರನ ದುಂಬು ಚುರ್ಕಿತ್ ಎಳೊದಿಯೆ. ಈ ಲೇಖನತುಳು ಎಲ್ಲ ವಿಷಯವೂ ಬಾಲಭಾರತಿ ಪ್ರಕಾಶನತಾರ ಮಕ್ಕಡ ಪುಸ್ತಕ ಪಿಂಞ ಬೋರೆ ಬೋರೆ ಲೇಖನ ಪಿಂಞ ಅರಾಂಜ ಪೆರಿಯವು... ಇನ್ನತಯಿಂಗಡ ಕೈಲ್ ಸಂಗ್ರಹ ಮಾಡಾನ ವಿಷಯ ಅಲ್ಲತೆ, ನಾಡ ಸ್ವಂತ ಎಳ್ತೊ ಅಲ್ಲ. ಎಚ್ಚೆಕೋ ವಿಷಯ ಬುಟ್ಟ್ ಪೋಯಿತಿಕ್ಕು. ಮಕ್ಕಳ ದೃಷ್ಟಿಲ್ ಬೆಚ್ಚೆಂಡ್, ಆಪಚ್ಚೆಕ್ ಚುರ್ಕಿತ್ ಎಳೊದಿಯೆ. ಎಳ್ತೊಲ್ ಎನ್ನೇಂಗಿ ಲೋಪ, ದೋಷ ಉಂಡೇಂಗಿ, ಅದ್ ಅರಿಯತೆ ಆನದಾಯಿತುಂಡ್. ಓದುಗ ಅಭಿಮಾನಿಯ ಇದಾನೆಲ್ಲ ಅರಾಂಜಿತ್ ಸಹಕರಿಚೆಡಂಡೊಂದ್ ಕೇಟಿವಿ. ಎಳ್ತೊಕ್ ಒತ್ತಾಸೆ ತಂದಂಡುಳ್ಳ ಕೊಡವ ಸಾಹಿತ್ಯ ಅಕಾಡೆಮಿಕ್ ವಂದನೆ.

- ಅಪ್ಪಚಿಟ್ಟೋಳಂಡ ವನು ವಸಂತ

## ಒಳ್ಳೆ ಪಾಳೆಲಾ...

5

(1)	ಫೀಲ್ಡ್ ಮಾರ್ಷಲ್ ಕೆ. ಎಂ. ಕಾರ್ಯಪ್ಪ	-	1
(2)	ಜನರಲ್ ತಿಮ್ಮಯ್ಯ	-	5
(3)	ಹರದಾಸ ಅಪ್ಪಚ್ಚ ಕವಿ	-	10
(4)	ಬಿ. ಡಿ. ಗಣಪತಿ	-	14
(5)	ಡಾ  ಐ. ಮಾ. ಮುತ್ತಣ್ಣ	-	17
(6)	ಮಹಾತ್ಮ ಗಾಂಧೀಜಿ	-	20
(7)	ಜವಾಹರಲಾಲ್ ನೆಹರು	-	24
(8)	ಇಂದಿರಾ ಗಾಂಧಿ	-	29
(9)	ಲಾಲ್ ಬಹಾದ್ದೂರ್ ಶಾಸ್ತ್ರಿ	-	32
(10)	ಬಾಬೂ ರಾಜೇಂದ್ರ ಪ್ರಸಾದ್	-	37
(11)	ಸುಭಾಷ್ ಚಂದ್ರ ಬೋಸ್	-	40
(12)	ಬಾಲ ಗಂಗಾಧರ ತಿಲಕ್	-	44
(13)	ರವೀಂದ್ರನಾಥ ಠಾಕೂರ್	-	46
(14)	ಜಗದೀಶ್ ಚಂದ್ರ ಬೋಸ್	-	49
(15)	ಹೋಮಿ ಜಹಾಂಗೀರ್ ಬಾಬಾ	-	52
(16)	ವಲ್ಲಭಭಾಯಿ ಪಟೇಲ್	-	56
(17)	ವಿನಾಯಕ ದಾಮೋದರ ಸಾವರ್ಕರ್	-	60
(18)	ಭಗತ್‌ಸಿಂಗ್	-	64
(19)	ಚಂದ್ರಶೇಖರ ಆಜಾದ್	-	69
(20)	ಜಯಪ್ರಕಾಶ ನಾರಾಯಣ್	-	73
(21)	ಶಿವಾಜಿ	-	75
(22)	ಕುವೆಂಪು (ಡಾ  ಕೆ. ವಿ. ಪುಟ್ಟಪ್ಪ)	-	78
(23)	ಮೈಕೆಲ್ ಫ್ಯಾರಡೆ	-	80
(24)	ಆಲ್ಬರ್ಟ್ ಐನ್‌ಸ್ಟೈನ್	-	83
(25)	ಸರ್ ಎಂ. ವಿಶ್ವೇಶ್ವರಯ್ಯ	-	88
(26)	ಸರ್ ಐಸಾಕ್ ನ್ಯೂಟನ್	-	91

6

(27)	ಮೇರಿ ಕ್ಯೂರಿ	-	93
(28)	ಜೈಥಾಗೋರಾಸ್	-	97
(29)	ಆರ್ಕಿಮಿಡೀಸ್	-	99
(30)	ಥಾಮಸ್ ಆಲ್ವ ಎಡಿಸನ್	-	102
(31)	ಕೋಪರ್ನಿಕಸ್	-	108
(32)	ಮದನ ಮೋಹನ ಮಾಳವೀಯ	-	111
(33)	ಡಾ  ಎಸ್. ರಾಧಾಕೃಷ್ಣನ್	-	114
(34)	ಲೂಯಿ ಪ್ಯಾಶ್ಚರ್	-	117
(35)	ಸರ್ ಸಿ. ವಿ. ರಾಮನ್	-	120
(36)	ಡಾ  ಬಿ. ಆರ್. ಅಂಬೇಡ್ಕರ್	-	123
(37)	ಅರವಿಂದ ಫೋಷ್	-	126
(38)	ಝಾನ್ಸಿರಾಣಿ ಲಕ್ಷ್ಮೀಬಾಯಿ	-	130
(39)	ಶ್ರೀನಿವಾಸ ರಾಮಾನುಜಂ	-	133
(40)	ಡಾ  ಎ. ಪಿ. ಜೆ. ಅಬ್ದುಲ್ ಕಲಾಂ	-	136
(41)	ಮದರ್ ಥೆರೆಸಾ	-	143
(42)	ರಾಮಕೃಷ್ಣ ಪರಮಹಂಸ	-	146
(43)	ಸಂತ ಕಬೀರದಾಸ	-	150
(44)	ಸ್ವಾಮಿ ವಿವೇಕಾನಂದ	-	153
(45)	ಕನಕದಾಸ	-	157
(46)	ಬಸವಣ್ಣ	-	162
(47)	ತ್ಯಾಗರಾಜ	-	166
(48)	ಬಂಕಿಮಚಂದ್ರ ಚಟರ್ಜಿ	-	169
(49)	ತೆನಾಲಿ ರಾಮಕೃಷ್ಣ	-	172
(50)	ಸಿಸ್ಟರ್ ನಿವೇದಿತಾ	-	177
(51)	ದೀನದಯಾಳ್ ಉಪಾಧ್ಯಾಯ	-	180
(52)	ಪಂದ್ಯಂಡ ಬೊಳ್ಳಪ್ಪ	-	184



## ಎತ್ತರಕ್ ಪತ್ನಾವು



### ಫೀಲ್ಡ್ ಮಾರ್ಷಲ್ ಕೆ. ಎಂ. ಕಾರ್ಯಪ್ಪ

- ಪುಟ್ಟನ ದಿನ - 1899ನೇ ಇಸವಿ ಜನವರಿ 28  
ಪುಟ್ಟನ ಜಾಗ - ಶನಿವಾರಸಂತೆ, ಕೊಡಗ್ ಜಿಲ್ಲೆ, ಕರ್ನಾಟಕ  
ಅಪ್ಪ - ಮಾದಪ್ಪ  
ಕಣ್ಮರ - 1993ನೇ ಇಸವಿ 14ನೇ ಮೇ

ಕೊಡಂದೇರ ಒಕ್ಕತ್ ಪುಟ್ಟಿತ್ ಒಕ್ಕಕೂ, ನಾಡ್‌ಕೂ, ದೇಶಕೂ ಪ್ರಪಂಚತೇ ಕೇಳಿ ಕೊಂಡ ಬಂದಿತ್ "ಯುಗಪುರುಷ" ಎಣ್ಣೆ ಚಿಟ್ಟಂಡ ಫೀಲ್ಡ್ ಮಾರ್ಷಲ್ ಕೊಡಂದೇರ ಎಂ. ಕಾರ್ಯಪ್ಪ ಮಡಿಕೇರಿರ ಸೆಂಟ್ರಲ್ ಹೈಸ್ಕೂಲ್‌ಲ್ ಓದ್‌ಚಿ. ಹೈಸ್ಕೂಲ್‌ಲಿಪ್ಪಕ ಓದುವಾತ್ ಮಾತ್ರ ಅಲ್ಲತೆ, ಕಳಿ-ತೆಳಿ-ಕ್ರೀಡೆಲೂ ಮಿಂಗಳಿಂಜತ್. ಹಾಕಿ, ಕ್ರಿಕೆಟ್, ಕುದುರೆ ಸವಾರಿ, ಟೆನ್ನಿಸ್, ಪೋಲೊ, ಸ್ವಾಶ್ ಇನ್ನತ ಕಳಿಲೆಲ್ಲ ಗಟ್ಟಿಗನಾಯಿತಿಂಜತ್. ಅಕ್ಕತರ ಸ್ಕೂಲ್‌ರ ಮುಖ್ಯೋಪಾಧಿ ಡಬ್ಲ್ಯು. ಹೆಚ್. ವಿಟ್‌ವರ್ಥ್‌ಕ್ ವಿದ್ಯಾರ್ಥಿ ಕಾರ್ಯಪ್ಪನ ದುಂಬ ಕುಸಿ ಇಂಜತ್. ಇಂಗ್ಲೆಂಡ್‌ಕ್ ಪೋನ ಪಿಂಗಳ ಕೂಡ ಮುಖ್ಯೋಪಾಧಿ, ಶಿಷ್ಯಂಡ ಕೂಡ ಕಾಗದ ವ್ಯವಹಾರ ಮಾಡಿಯಂಡಿಂಜತ್. ಹಿಂದೂ ದೇಶತರ ಜನಳ ಕಮ್ಮಿ ತರತ್ ಕಂಡಂಡಿಂಜ ಆ ಕಾಲತ್, ಬ್ರಿಟಿಷ್‌ಕಾರನಾನ ಪ್ರಿನ್ಸಿಪಾಲ್, ಚೆರಿಯ ಬಯತ್‌ರ ವಿದ್ಯಾರ್ಥಿ



2 / ಎತ್ತರಕ್ ಪತ್ತನವು

ಸೆರಿ ಸಮಾನತ್ ಕಂಡಿತಿಪ್ಪಕ, ಫೀ ಮಾ| ಕಾರ್ಯಪ್ಪ ಅದೆಚ್ಚಕ್ ಶಿಸ್ತಾರ, ಗತ್ತಾರ ವ್ಯಕ್ತಿತ್ವಯಿಂಜ ವಿದ್ಯಾರ್ಥಿ ಆಯಿತಿಂಜಿತಿಕ್ಕು. ಬಯ್ಯಂಜಿ ಚೆನ್ನೆರ ಪ್ರೆಸಿಡೆನ್ಸಿ ಕಾಲೇಜ್ ಕೂಡ್ಚಿ.

ಒಂದನೆ ಪ್ರಪಂಚ ಮಾಪಡೆ ಆನ ಪಿಂಞ ಹಿಂದೂ ದೇಶಕಾರಳ ಸೈನ್ಯತ್ಲಾ ಕಮೀಷನ್ಡ್ ಅಧಿಕಾರಿಯಳಾಯಿತ್ ಎಡ್ಪಕ್ ಸುರು ಮಾಡ್ಚಿ. ಅಕ್ಕ ಭಾರತ, ಬರ್ಮ ದಂಡೂ ದೇಶತ್ ಕೂಡಿತ್ ನುಪ್ಪತ್ತೊಯಿಂಬದ್ ಬಾಲೆಕಾರಳ ಆಯ್ಕೆ ಮಾಡ್ಚಿ. ಅಕ್ಕ ಕೊಡಗ್ ಚೀಫ್ ಕಮೀಷನರ್ ಆಯಿತಿಂಜ ಕೋಬ್ ಎಣ್ಣುವ ಬ್ರಿಟಿಷ್ ಅಧಿಕಾರಿ, ಕೊಡಗ್ಂಜ ದಂಡ್ ಕೊಡವ ಮಕ್ಕಳ ಆಯ್ಕೆ ಮಾಡ್ಚಿ. ಒಬ್ಬೊ ಚೆಪ್ಪುಡಿರ ಪೊನ್ನಪ್ಪ, ಇಂಞೊಬ್ಬ ಕೊಡಂದೇರ ಕಾರ್ಯಪ್ಪ. ಬಯ್ಯಂಜಿ ತರಬೇತಿ ಆಯಿತ್ ಆಯ್ಕೆ ಆನ ಆರ್ ಆಳ್‌ಲೂ ಈ ದಂಡ್ ಕೊಡವ ಮಕ್ಕ ಇಂಜತ್. ಅಲ್ಲಿಂಜ ಏದೇ ರೆಜಿಮೆಂಟ್‌ಲ್ ಇರಡ್, ಏದೇ ಜಾಗತ್ ಇರಡ್, ಕಾರ್ಯಪ್ಪ ತಾಂಡ ಶಿಸ್ತಾನುಂಡ್ ಬಲ್ಯ ಪೆದ ಎಡ್ತತ್. ಅಲ್ಲಿಯೇ ಕ್ವೆಟ್ಟಾ ಸ್ಪಾಫ್ ಕಾಲೇಜ್‌ಲ್ ಪದವಿ ಪಡ್ಂದ ಆದ್ಯ ಭಾರತೀಯ ಕಾರ್ಯಪ್ಪ. ಮಿಲಿಟ್ರಿಲ್ ಗ್ರೇಡ್ ಸೆಕೆಂಡ್‌ರ ಚಾಕ್ರಿ ಪಡ್ಂದ ಆದ್ಯ ಭಾರತೀಯನೂ ಕಾರ್ಯಪ್ಪ. ಬಯ್ಯಂಜಿ ಆದ್ಯ ಆರ್ಮಿ ಕಮಾಂಡರ್, ಸ್ವತಂತ್ರ ಭಾರತತ್‌ರ ಆದ್ಯ ಕಮಾಂಡರ್ ಇನ್ ಚೀಫ್ ಸಹ ಕಾರ್ಯಪ್ಪನೆ ಆಚಿ. ಚೀನಾ, ಜಪಾನ್, ಅಮೇರಿಕಾ, ಕೆನಡಾ, ಇಂಗ್ಲೆಂಡ್, ಫ್ರಾನ್ಸ್ - ಇನ್ನತ ದೇಶಕೆಲ್ಲ ಪೋಯಿತ್ ಅನುಭವ ಪಡ್ಂದಿತ್ ಬಾತ್. ಇರಾನ್, ಇರಾಕ್, ಸಿರಿಯಾ... ಇನ್ನತ ದೇಶತ್‌ಲೆಲ್ಲ ಸೇವೆ ಮಾಡ್ಚಿ. 14-12-1948 ಲ್ ಸ್ವತಂತ್ರ ಭಾರತತ್‌ರ ಆದ್ಯ ಕಮಾಂಡರ್ - ಇನ್ - ಚೀಫ್ ಆಪದೂ, ತಾಂಡ ಪುಟ್ವಾನ ನೆಲ ಕೊಡಗ್ ಬಂದಿತ್, ಅವ್ವನೆಲಕ್ ಕೈ ತೊತ್ತಿತ್, ಡೆಲ್ಲಿಲ್ ಮಹಾತ್ಮ ಗಾಂಧಿರ ಸಮಾಧಿಕೂ ತೊತ್ತಿತ್ ಬಾತ್. ಗಾಂಧೀಜಿರನ್ನತ ಮಾಪುರುಷಂಡ ತ್ಯಾಗತ್‌ನುಂಡ್ ನಾನಿಂದ್ ಈ ಪದವಿ ಪಡ್ಂದಿಯೇಂದ್ ಎಣ್ಣುವ ಯಿಂಜತ್. 1953 ಲ್ ನಿವೃತ್ತಿಯಾಚೆಂಗಿಯೂ, ನಿವೃತ್ತ ಜೀವನ ನಡ್ತೆ ಜನ ಸೇವೆ, ದೇಶ ಸೇವೆ ಮಾಡಿಯಂಡೇ ಇಂಜತ್. ಅಲ್ಲಿಂಜ ಆಸ್ಟ್ರೇಲಿಯ ಪಿಂಞ ನ್ಯೂಜಿಲ್ಯಾಂಡ್‌ರ ಹೈ ಕಮೀಷನರ್ ಆಯಿತಿಂಜತ್. ಅಲ್ಲಿಯೂ ಜನಪ್ರಿಯತೆ ಪಡ್ಂದಿತ್, ನಂಗಡ ದೇಶತ್‌ರ ಬೀರ್ಯತ್‌ನ ಅಲ್ಲಿಯತ್‌ರ ಜನಕ್ ಸಿರಿಯಾಯಿತ್ ಪರಿಚಯ ಮಾಡಿ ಕೊಡ್ತತ್.

ಅಲ್ಲಿಂಜ 1962 ಲ್ ನಡ್ಂದ ಚೀನಾ ಪಡೆರ ಸಂದರ್ಭತ್ ವರುವನೆಕೆ ಇಂಜ ಬಾಲೆಕಾರಳೆಲ್ಲ ತಾಂಡ ಭಾಷಣತ್‌ರ ಪುರ್ಡ್‌ಲ್ ಬೆನ್ನೊತ್ಟ್ಟಿ ಒಪ್ಪಿತ್ ಪಡೆಭೂಮಿಕ್ ಅಯೆಚ್ತ್. ಜೊತೆಲ್ ತಾನೂ ತಯಾರಾಯಿತೇ ಪೋಚಿ. ತನ್ನ

ತಾನ್ ಎಕ್ವಿಲಿಟಿ ವಯಸಾನ ವ್ಯಕ್ತಿಂದ್ ಎಣ್ಣಿಯೋವಕ್ ಇಷ್ಟಪಡುವಯಿಂಜಿಲೆ. ಪತ್ರಿಕೆಕ್ ಲೇಖನ ಎಳೆದುವಯಿಂಜತ್. ಎಳ್ತ್ ಕಡೊಪ ಆಯಿತೂ, ಓದುವಯಿಂಡ ಮನಸ್ಸಕ್ ಮುಟ್ಟುವನೆಕಿಯೂ ಇಪ್ಪಯಿಂಜತ್. 1979 ಲ್ ವಿಶೇಷ ಬೆಂದು ವಾಯಿತ್ ಇಂಗ್ಲೆಂಡ್‌ಕಾರ ಕಾರ್ಯಪ್ಪನ ಕಾಕ್‌ಚಿಟ್ಟಿತಿಂಜತ್. ಅಂದಾಕಣೆ ದಾರ್‌ನೋ ಅನ್ನನೆ ಭಾರತತಿಂಜ ಕಾಕಿತಿಂಜಿಲೆ. ಇಂಗ್ಲೆಂಡ್‌ರ ರಾಜಕುಮಾರ ಚಾರ್ಲ್ಸ್ ಪಿಂಞ ಡಯಾನಂಡ ಮಂಗಲ ಕಾಗದತ್‌ನ ಪ್ರಪಂಚತ್‌ರ ವಿಶೇಷಪಟ್ಟಿ 100 ಜನಕ್ ಮಾತ್ರ ಅಯಿಚಿತಿಂಜತ್. ಅದಲ್ ಕಾರ್ಯಪ್ಪನೂ ಒಬ್ಬೊ. ಅಯಿಂಗ ಮಾಡ್‌ನ ವಿಶೇಷ ಸೇವೆಕಾಯಿತ್ ಗೌರವ ಫೀಲ್ಡ್ ಮಾರ್ಷಲ್ ಪದವಿ ಕೊಡ್‌ತಿತ್ ಗೌರವ ಕೊಡ್‌ತತ್ ಭಾರತ ದೇಶ. ಫೀಲ್ಡ್ ಮಾರ್ಷಲ್ ಕಾರ್ಯಪ್ಪ ಎಣ್ಣಿವಯಿಂಜತ್, ಸೈನಿಕಂಗ ಮಾತ್ರ ಶಿಸ್ತುಕಾರ ಆಚೇಂಗಿ ಪೋರ. ದೇಶ ನಂದಾಂಡಿಕೆ ದೇಶತುಳ್ಳ ಎಲ್ಲರೂ ಶಿಸ್ತುಲ್ ಬದ್‌ಕಂಡೊಂದ್. ಶಿಸ್ತು ಎಣ್ಣಿವಾಂಗ್ ಸೆರಿಸಮಾನ ಅರ್ಥತ್‌ರ ಶಬ್ದ ಅಲ್ಲೇಂಗಿ ಉದಾರಣೆ ಕಾರ್ಯಪ್ಪ. ದೇಶಪ್ರೇಮಿ ಎಣ್ಣಿವಾಂಗ್ ವ್ಯಕ್ತಿ ಯೊಬ್ಬಂಡ ಉದಾರಣೆ ಕೊಡ್‌ಕಂಡಿಕೆ ಅದ್ ಕಾರ್ಯಪ್ಪ. ತಾಂಡ ಬಾಳ್‌ರ ಪ್ರತಿ ಸೆಕೆಂಡ್ ಮಿನಿಟ್‌ಲೂ ಶಿಸ್ತುಪಾಲನೆ ಮಾಡ್‌ನವು. ಭಾರತೀಯ ಸೈನ್ಯತ್‌ನ ವಿಶ್ವಮಟ್ಟತ್‌ಲ್ ನಲ್ಲ ಸೈನ್ಯಾಂದ್ ಕಾಕ್‌ಚಿಟ್ಟಿವಕ್ ಕಾರ್ಯಪ್ಪಂಡ ಶಿಸ್ತುರ ನೈಪೇ ಕಾರಣ. ಬಲ್ಯ ದೇವಭಕ್ತ, ದೇಶಭಕ್ತ. ತಾಂಡ ಪೆತ್ತವ್ವನೇ ಕೊಡ್‌ಗೇಂದ್ ಭಕ್ತಿ ಪ್ರೀತಿಲ್ ಕೊಡ್‌ಗಾರ ಜನಳ, ಕೊಡವಾಮೆನ, ಕೊಡ್‌ಗಾರ ನೆಲ-ಜಲ-ಪರಿಸರತ್‌ನ ಪೂಜೆ ಮಾಡ್‌ನವು; ಕಂಡಾನ ಕಂಡನೆಕೆ ಪರಿವಂತ ಖಂಡಿತವಾದಿ, ಸಮಾಜಸೇವಕ, ದೂರದೃಷ್ಟಿ ಇಂಜಂವೊ. ತಡಿರೊಳ್‌ಲ್ ಜ್ವಾಲಾಮುಖಿರನ್ನೆತ ಶಕ್ತಿ!

ಜನ ಪರ್‌ಂದದ್ :

- (1) ಪ್ರೊ! ಆರ್. ಎಸ್. ಕೌಶಲ್ : “ಕಾರ್ಯಪ್ಪ ಒರ್ ವಿಶೇಷಪಟ್ಟಿ ಸಿಪಾಯಿ. ಅಯಿಂಡ ಬಟ್ಟೆಬೊಳಿಲ್ ಭಾರತ ಸೈನ್ಯ ಪ್ರಪಂಚತ್‌ರ ಏದ್ ಸೇನೆಕೂ ದಂಡನೆ ಸ್ಥಾನತ್‌ಲಿಲ್ಲೆ. ಕಾಶ್ಮೀರತ್‌ಲ್ ಬೀಜುವ ಕಾತ್‌ರ ದಿಕ್ಕನ ಬದ್‌ಲಾಕ್‌ನಂವೊ ಕಾರ್ಯಪ್ಪ.”
- (2) ಲಂಡನ್ ಪ್ರೆಸ್ಸ್ ಪತ್ರಿಕೆ : ಇಂಡಿಯಾತ್‌ಂಜಿ ನಂಗ ಕಂಡ ರಾಜತಾಂತ್ರಿಕಂಗಡ ಕೂಟ್‌ಲ್ ಎಲ್ಲಾಕ್‌ಂಜಿ ಸಮರ್ಥ ಕಾರ್ಯಪ್ಪ.
- (3) ಆಮೆರಿಕ ಪ್ರೆಸಿಡೆಂಟ್ ಹ್ಯಾರಿ ಟ್ರೂಮನ್ : “ಪಡೆ ಕಾಲತೂ, ಶಾಂತಿ ಕಾಲತೂ ಕಾರ್ಯಪ್ಪ ಇಂಡಿಯಾತ್‌ಲೂ, ಬರ್ಮಾತ್‌ಲೂ, ಮಧ್ಯಪ್ರಾಚ್ಯತ್‌ಲೂ ಮಾಡ್‌ನ ಸೇವೆಕೂ, ಅಯಿಂಡ ಸಮರ್ಥ ನಾಯಕತ್ವಕೂ, ಕಷ್ಟಕಾಲತ್ ಕಾಟ್‌ನ

ಬುದ್ಧಿವಂತಿಕೆಕೂ ಮೆಚ್ಚಿತ್ 20-7-1942 ಲ್ ಅಮೆರಿಕ ಕಾಂಗ್ರೆಸ್ ತೀರ್ಮಾನ ಎಡ್ತ ಪೋಲೆ, ಈ ಗೌರವ ಕೊಡ್ತಂಡುಳ್ಳೊ. ಕಾರ್ಯಪ್ಪ ಸೈನಿಕನಾಯಿತೂ, ವೀರನಾಯಿತೂ, ಶಾಂತಿದೂತನಾಯಿತೂ, ಮಾನವೀಯ ಹೃದಯ ಉಳ್ಳವ ನಾಯಿತೂ ಕಾರ್ಬಾರ್ ನೀಸ್‌ನಾಂಗ್ ಯೋಗ್ಯಪಟ್ಟಿ ಇನಾಂ ಇದ್."

- (4) ಆಸ್ಟ್ರೇಲಿಯಾತ್‌ರ ಎಡ್‌ಲೈಡ್ ಎಡ್ವರ್ಡ್ಸ್‌ಸರ್ ಪತ್ರಿಕೆ: ಈ ಭೂಖಂಡತ್‌ಲ್ ಕಾರ್ಯಪ್ಪನಂತ ಮುಂದಾಲೋಚನೆ ಉಳ್ಳ ಜಂಟಲ್ ಮೇನ್‌ನ ಮರ್‌ಪಾಲೆ.
- (5) ಸಿಡ್ನಿ ಮಾರ್ನಿಂಗ್ ಹೆರಾಲ್ಡ್ : ಎಲ್ಲಾ ಹೈಕಮಿಷನರ್‌ಕಿಂಜ ಪೆರ್ತ್ ಜನ ಮೆಚ್ಚಿಗೆ ಪಡ್‌ಂದವು ಕಾರ್ಯಪ್ಪ. ನಂಗಡ ದೇಶಕ್ ಇಂಡಿಯಾತ್‌ನ ಸೆರಿಕ್ ಪರಿಚಯ ಮಾಡ್‌ನವು ಕಾರ್ಯಪ್ಪ.
- (6) ಜನರಲ್ ಸಿಂಹಜಿ : ಸೇನಾಪಡೆಕ್ ಪುದಿಯ ರೂಪ ಕೊಡ್‌ತಿತ್, ಶಕ್ತಿ ಸಾಮರ್ಥ್ಯ, ಸ್ಥಿರತೆ ಕೊಂಡ ಬಂದವು ಕಾರ್ಯಪ್ಪ.
- (7) 14-11-1959 ಸ್ವರಾಜ್ಯ ಪತ್ರಿಕೆ : ಒಳಮರೆ ಇಲ್ಲತೆ ನೇರೆ ಪರಿಯುವೊ ಕಾರ್ಯಪ್ಪಂಡ ಕೂಡ ಇಡೀ ಭಾರತತ್‌ರ ಜನಸಾಮಾನ್ಯಂಗ ಉಂಡ್.
- (8) ಚೀನಾ ಯುದ್ಧತ್‌ರ ಸುದ್ದಿ ಕೇಟದು ಕಾರ್ಯಪ್ಪ ಡೆಲ್ಲಿಕ್ ಪಾರ್‌ಚಿ. ವಿಮಾನ ತ್‌ಂಜಿ ಇಳಿವಾಂಗ್ ಮಿಂಞಾಲೆ, "ಭಾರತ ಸೈನ್ಯತ್‌ರ ತಪ್ಪನ ಸೆರಿ ಪಡ್‌ತಿತ್ ಬಟ್ಟೆಬೊಳಿ ಕಾಟುವಕ್ ನಿವೃತ್ತ ಕಮಾಂಡರ್ - ಇನ್ - ಚೀಫ್ ಕಾರ್ಯಪ್ಪ ಬೆಂಗಳೂರ್‌ಂಜಿ ಬಂದಂಡುಂಡ್ ಎಚ್ಚರ"ಂದ್ ಚೀನಾ ಗೂಡಚರ್ಯ ರಿಪೋರ್ಟ್ ಎತ್ತುವದು, ರಾಜಧಾನಿ ಪೀಕಿಂಗ್‌ಲ್ ಮನೆಮನೆಲೂ ಗುಲು ಗುಲು ತಕ್ ಸುರುವಾಚಿ.
- (9) ಪಾಕಿಸ್ತಾನ ಯುದ್ಧ ಆಪಕ, ದಾಡದೂ ಅನುಮತಿಕ್ ಕಾಕತೆ, ನಿವೃತ್ತ ಜನರಲ್ ಪಡೆಭೂಮಿಕೇ ನುಗ್ಗಿರ್‌ತ್. "ನಾಡ ದೇಶಕ್ ಶತ್ರು ನುಗ್ಗಿತಿಪ್ಪಕ ನಾಕ್ ದಾಡ ಅನುಮತಿ ಬೋಂಡಿಯೆ" ಎಣ್ಣೆತ್ ರಾಣ್, ಹನುಮಾನ್ ಘಾಟ್, ಬಿರ್‌ಸಿಲ್‌ಪುರ, ಫಿರೋಜ್‌ಪುರ, ಅವ್ಯತಸರ, ಸಿಯಾಲ್‌ಕೋಟ್, ಪಟಾನ್‌ಕೋಟ್, ಮುಜಾಫರಾಬಾದ್ ಪೂಂಚ್, ಗಿಲ್‌ಗಿಟ್...- ಇನ್ನತ ಪಡೆಭೂಮಿಲ್ ಬಿರುಗಾಳಿರನೆಕೆ ಸುತ್ತಿತ್, ಸೈನಿಕಂಗಕ್ ಪುರಾಡ್ ಕೊಡ್‌ತತ್. ಪಡೆಭೂಮಿಕ್ ಕಾರ್ಯಪ್ಪ ಬಂದ ಸುದ್ದಿನ ವೈರಲೆಸ್‌ಲ್ ಅರ್‌ಂಜ ಪಾಕಿಸ್ತಾನಿ ಸೈನ್ಯ, ಬೊಡಿಬೆಪ್ಪಕ್ ನೇತ್‌ನ ತೋಕ್‌ಲ್ ಗೌರವರಕ್ಕೆ ಕೊಡ್‌ತದ್ ಪ್ರಪಂಚತ್‌ರ ಪಡೆಕಳ ಇತಿಹಾಸತ್‌ಲೆ ವಿಶೇಷ ಸಂಗತಿ. (ಶತ್ರು ಪಡೆರ ಸೇನಾಧಿಕಾರಿಯ ಪಂಡ್ ಕಾರ್ಯಪ್ಪಂಡ ಗರಡಿಲ್ ಪಳಗ್‌ನವು) □



## ಜನರಲ್ ತಿಮ್ಮಯ್ಯ

ಪುಟ್ಟಾನ ದಿನ	-	1906ನೇ ಇಸವಿ ಮಾರ್ಚ್ 31
ಪುಟ್ಟಾನ ಜಾಗ	-	ಮಡಿಕೇರಿ, ಕೊಡಗ್
ಅಪ್ಪ	-	ತಿಮ್ಮಯ್ಯ
ಅವ್ವ	-	ಚೇತವ್ವ (ಸೀತಮ್ಮ)
ಕಣ್ಮರೆ	-	1965ನೇ ಇಸವಿ ಡಿಸೆಂಬರ್ 18

ಕೊಡಂದೇರ ಒಕ್ಕತ್ ಪುಟ್ಟಾನ, ಜನರಲ್ ತಿಮ್ಮಯ್ಯಂಡ ನೇರಾನ ಪೆದ ಸುಬ್ಬಯ್ಯ. ಸ್ಕೂಲ್‌ಲ್ ಕೊಡಂದೇರ ಸುಬ್ಬಯ್ಯ ತಿಮ್ಮಯ್ಯಂದ್ ಕೊಡ್‌ತಿಂಜತ್. ಅನ್ನನಾಯಿತ್ ಸುಬ್ಬಯ್ಯಂದೆಣ್ಣುವ ಈ ಬಂಬೊ, ತಿಮ್ಮಯ್ಯಂದ್ ಇಡೀ ಪ್ರಪಂಚತೇ ಪೆದ ಎಡ್‌ತತ್. ಇಯಂಗ ಮೂಂದ್ ಅಣ್ಣ ತಮ್ಮಣಿಗಳೊ ಪಟ್ಟಾಳಕಾರಂಗಳೇ. ಅಣ್ಣ ಪೊನ್ನಪ್ಪ, ಸುಭಾಷ್‌ಚಂದ್ರ ಬೋಸ್‌ರ ಆಜಾದ್ ಹಿಂದ್ ಸೈನ್ಯತ್ ಕರ್ನಲ್ ಆಯಿಂಜತ್. ತಮ್ಮಣಿ ಸೋಮಯ್ಯ ಮೇಜರ್ ಆಯಿಂಜತ್. 1948 ಲ್ ನಡ್‌ಂದ ಭಾರತ - ಪಾಕಿಸ್ತಾನ ಪಡೆಲ್ ವೀರಮರಣ ಪಡ್‌ಂದತ್. ಈ ಸಂಸಾರಕಾರ, ಅಂದೇತ ಕಾಲತ್ ಬ್ರಿಟಿಷ್‌ಕಾರಡ ನಡ್‌ಪು, ಶಿಸ್ತ್, ಸಂಸ್ಕೃತಿಕ್ ಕುಸಿಪಟ್ಟಿತ್, ಮಕ್ಕಳ ಬ್ರಿಟಿಷ್ ಸಂಸ್ಕೃತಿಲೇ ಬೊಳ್‌ತಂಡೂಂದ್ ಗೇನ ಮಾಡಿತ್, ಕೂನೂರರ ಸೇಂಟ್ ಜೋಸೆಫ್ ಸ್ಕೂಲ್‌ಲ್ ಪ್ರೈಮರಿ ವಿದ್ಯಾಭ್ಯಾಸ ಕೊಡ್‌ತತ್. ಅಲ್ಲಿಂಜ ಪೊನ್ನಪ್ಪನೂ, ತಿಮ್ಮಯ್ಯನೂ ಬೆಂಗಳೂರರ ಪೆದಪೋನ ಸ್ಕೂಲ್ ಬಿಷಪ್

ಕಾಟನ್‌ಕ್ ಕೂಡ್‌ಚಿ. ಅಲ್ಲಿಯತ್‌ರ ವಿದೇಶಿ ಪಿಂಞ ಆಂಗ್ಲೊ - ಇಂಡಿಯನ್ ಮಕ್ಕ್ ಇಯಂಗಳ ಕಂಡಿತ್ - "ಎನ್ನೊಂಗಿಲ್ಲಿ ಈ ನೀಗ್ರೋವಳೆಲ್ಲ ಕೂಟಿಯವೊ ಎನ್ನೊ"ಂದ್ ಕುತ್ತ ಪರ್‌ಂದತ್. ಅನ್ನನೆ ಪರ್‌ಂದ ಕ್‌ಣ್ಣಂಡ ತಕ್ಕ್ ತ್‌ರವಕ್ ಮಿಂಞಾಲೇ ಪೊನ್ನಪ್ಪಂಡ ಕೈ ಅವಂಡ ದವಡೆ ಮುರಿಯ ಬಾಟಿರ್‌ತಿಂಜತ್. ಇದ್‌ನ ಕಂಡ ಬೋರೆ ಮಕ್ಕ್ ಇಯಂಗಡ ಮೇಲೆ ಬೂವಕ, ಅಯಿಂಗಳೆಲ್ಲ ತಿಮ್ಮಯ್ಯ ಪೊಜ್ಜಿತ್ ಅಡಿಕ್‌ಟ್ಟತ್. ಈ ದಂಡ್ ಅಣ್ಣ ತಮ್ಮಣಂಗಡ ಆತ್ಮಾಭಿಮಾನ ಕಂಡಿತ್ ಪ್ರಿನ್ಸಿಪಾಲ್‌ಕೂ, ಉಪಾದ್ರಿಯಕೂ ಆಶ್ಚರ್ಯ ಆಕತೆ ಇಂಜಿಲೆ.

ತಿಮ್ಮಯ್ಯ ಚಿರ್‌ಪತ್‌ಲೇ ಬಲ್ಯ ಸಾಸಕಾರ ಕ್‌ಣ್ಣನಾಯಿತಿಂಜತ್. ಹಾಕಿ, ಫುಟ್‌ಬಾಲ್, ಟೆನಿಸ್ ಕಳಿಲೆಲ್ಲ ಇಂವೊ ಮಿಂಞಾಲಿಂಜತ್. ಸ್ಕಾಟ್ ತರಬೇತಿನೊ ಪಡ್‌ಂದತ್. ಅನ್ನನೆ ನಿಷ್ಠೆ, ಪ್ರಾಮಾಣಿಕತೆನೋ ಬೊಳ್‌ತಿಯಂಡತ್. ಇದ್ ಮಿಂಞಾಕ್ ಪಟ್ಟಾಳತ್ ಕೂಡಿತ್ ಜನರಲ್ ಸ್ಲಾನಕೆತ್ತನೆ ಎತ್ತುವಕ್ ಸಹಾಯ ಮಾಡ್‌ಚಿ. ಬಿಷಪ್ ಕಾಟನ್ ಸ್ಕೂಲ್‌ರ ವಿದ್ಯಾಭ್ಯಾಸ ತ್‌ರವಕ್, ತಿಮ್ಮಯ್ಯಂಗ್ ಪದ್‌ನಾರ್ ಬಯತ್. ಅದಾನದು, ಡೆಹರಾಡೂನ್‌ಲ್ ಪುದಿಯದಾಯಿತ್ ತೊರ್‌ಂದ ರಾಯಲ್ ಇಂಡಿಯನ್ ಮಿಲಿಟರಿ ಸ್ಕೂಲ್‌ಕ್ ಕೂಡ್‌ಚಿ. ಅಧಿಕಾರಿ ಪದವಿಕ್ ಓದುವಕ್ ಆ ಕಾಲತ್ ಇಂಗ್ಲೆಂಡ್‌ಕೇ ಪೊಂಡುಯಿಂಜತ್. ಅನ್ನನೆ ಪೋಪಯಿಂಗಳ ಭಾರತತ್‌ರ ವೈಸ್‌ರಾಯ್ ಆಯ್ಕೆ ಮಾಡಂಡುಯಿಂಜತ್. ಎಚ್ಚೆಕೋ ಆಯಿರ ಜನ ವಿದ್ಯಾರ್ಥಿಯಡಾತ್ ಆಯ್ಕೆ ಆನಯಿಂಗ ಬೋರಿ ಆರಾಘ್. ಅದ್‌ಲ್ ತಿಮ್ಮಯ್ಯನೂ ಒಬ್ಬೊ. ಇಂಗ್ಲೆಂಡ್‌ರ ಸ್ಯಾಂಡ್‌ಹರ್ಸ್ತ್ ಎಣ್ಣವಲ್ಲಿ ಇಂಜ ಕಾಲೇಜ್‌ಲ್ ಶಿಕ್ಷಣ ಪಡ್‌ಂದತ್. ಅಲ್ಲಿಯತ್‌ರ ಅಧಿಕಾರಿಯಡ ಕೈಲ್ ಬೆನ್ನ್ ತಟ್‌ಚಿಟ್ಟಂಡ್ 'ಸೆಕೆಂಡ್ ಲೆಫ್ಟಿನೆಂಟ್' ಪದವಿಕ್ ಆಯ್ಕೆ ಆಯಿತ್ ಭಾರತಕ್ ಬಾತ್. ಅಕ್ಕ್ ಇಸವಿ 1926. ಅಲ್ಲಿಂಜ ಬೆಂಗಳೂರ್, ಹೈದರಾಬಾದ್ ಇನ್ನನೆ ಸೇವೆ ಮಾಡ್‌ಚಿ. ತಾನ್ ಅಧಿಕಾರಿ, ಬೋರೆಯಿಂಗೆಲ್ಲ ಸಿಪಾಯಿಯ ಎಣ್ಣವ ಭೇದಭಾವ ಇಲ್ಲತೆ, ಅಯಿಂಗಡ ಕೂಡೆ ಎಲ್ಲ ಪ್ರೀತಿ ವಿಶ್ವಾಸತ್ ಚಾಯಿಲಿಪ್ಪ ಯಿಂಜತ್. ಅನ್ನನಾಯಿತ್ ಸಿಪಾಯಿಯಡೆಲ್ಲಡೆ ಪ್ರೀತಿ ವಿಶ್ವಾಸ ಪಡ್‌ಂದಂಡತ್. ಅಲ್ಲಿಂಜ ಹೈದರಾಬಾದ್ ರೆಜಿಮೆಂಟ್‌ಲಿಪ್ಪಕಲೇ ಒರ್ ಕಾಲ ಬಾಗ್‌ದಾದ್‌ಕ್ ಪೋಯಿತ್ ಬಾತ್.

ಅಕ್ಕ್ ನಲ್ಲ ಸ್ವಾತಂತ್ರ್ಯ ಪೋರಾಟತ್‌ರ ಸಮಯ. ಬ್ರಿಟಿಷ್ ಆರ್ಮಿಲಿಂಜ ಭಾರತೀಯ ಸೈನಿಕಂಗಳೆಲ್ಲ ಒರ್ ತರತ್‌ರ ಧರ್ಮಸಂಗಟ. ಬ್ರಿಟಿಷ್ ಆರ್ಮಿ ಲಿಂಜಂಡ್ ಅಯಿಂಗಳೂ ಕೆಲಸ ಮಾಡಂಡು, ಅವ್ವನಾಡ್‌ನೋ ಬುಟ್ಟ್‌ಕೊಡ್‌ಪ ಕಯ್ಕಲೆ. ಅನ್ನತ ಪರಿಸ್ಥಿತಿಲೇ ಒರ್ ದಿನ ಒರ್ ಸ್ವಾತಂತ್ರ್ಯ ಪೋರಾಟಕಾರ

ತಿಮ್ಮಯ್ಯನ ಒರ್ ಪ್ರಶ್ನೆ ಕೇಟಿತ್ - "ಬ್ರಿಟಿಷ್ ಆರ್ಮಿರ ಬಟ್ಟೆ ಇಟ್ಟಿಂಡ ಒರ್ ಭಾರತೀಯಂಡ ಮನಸ್‌ಕ್ ಎನ್ನನೆ ಆಪ?" ಅಂವೊ ತಮಾಸಿಲ್ ಕೇಪೋಂದ್ ಗೇನ ಮಾಡ್‌ನ ತಿಮ್ಮಯ್ಯ ತಮಾಸಿಲೇ ಪರ್‌ಂದತ್. ಆಚೇಂಗಿ ಆ ಮನುಷ್ಯ - ನಾನ್ ತಮಾಸಿಕ್ ಕೇಟಿಂಡಿಲ್, ನೇರಾನ ಉತ್ತರ ಎಣ್ಣೆ ಎಣ್ಣೆ ಚಿ. ಇದೇ ವಿಷಯ ಚರ್ಚೆ ಮಾಡಿಯಂಡಿಂಜತ್. ಅಲ್ಲಿಂಜ ಆ ಮನುಷ್ಯ ತಿಮ್ಮಯ್ಯನೋ, ಕೂಟ್ ಕಾರಳೋ ಮನೆಕ್ ಕಾಕಿತ್, ಅಯಿಂಗಕ್ ಪರಿಚಯತ್‌ರ ಕಾರ್ಡ್ ಕೊಡ್‌ತತ್. ಅದಲ್ ಪೆದ ನೋಟ್‌ನ ತಿಮ್ಮಯ್ಯ ಬೊತ್ತಿಪೋಚಿ. ಅದ್ ಮೋತಿಲಾಲ್ ನೆಹರು ಆಯಿತಿಂಜತ್. ಪಿತ್ಯಾಂದ್ ಅಯಿಂಡ ಮನೆಕ್ ಪೋನ ತಿಮ್ಮಯ್ಯ ಪಿಂಞ ಕೂಟ್‌ಕಾರ, "ನಂಗ ಕೆಲಸಕ್ ರಾಜೀನಾಮೆ ಕೊಡ್‌ತಿತ್ ಸ್ವಾತಂತ್ರ್ಯ ಪೋರಾಟಕ್ ಬಪ್ಪ"ಂದೆಣ್ಣೆ ಚಿ. ಅಕ್ ಮೋತಿಲಾಲ್ ನೆಹರು, "ಬೋಂಡ, ಬ್ರಿಟಿಷ್‌ಕಾರ ಪೋನ ಪಿಂಞ ನಂಗಡ ದೇಶತ್‌ರ ರಕ್ಷಣೆ ನಂಗಲೇ ಮಾಡಂಡುವಲ್ಲ, ಬ್ರಿಟಿಷ್ ಆರ್ಮಿಲೇ ಇಂಜಂಡ್, ಅನುಭವ ಪಡ್‌ಂದೋಳಿ. ನಿಂಗಡನ್ನತ ವೀರಂಗಡ ಅವಶ್ಯಕತೆ ಅಕ್ ಬೋಂಡಿಯಾಪ" ಎಣ್ಣೆ ಚಿ. ಅಲ್ಲಿಂಜ ಅಲಹಾಬಾದ್‌ಂಜ ಸಾಂಡಿಮಾನ್ ಕೋಟೆಕ್ ವರ್ಗ ಆಚಿ. ಅಲ್ಲಿ ಶಸ್ತ್ರಾಸ್ತ್ರ ಬೆಪ್ಪ ಕೋಂಬರೆರ ಬೀಗತ್‌ರ ಕೈನ ಬ್ರಿಟಿಷ್ ಅಧಿಕಾರಿ ತಿಮ್ಮಯ್ಯಂಗ್ ಕೊಡ್‌ತತ್. ಬ್ರಿಟಿಷ್ ಅಧಿಕಾರಿಯಕ್ ಭಾರತೀಯ ಅಧಿಕಾರಿಯಡ ಮೀದ ನಂಬಿಕೆ ಇಪ್ಪಯಿಂಜಿಲೆ. ಆಚೇಂಗಿ, ತಿಮ್ಮಯ್ಯ ಅಯಿಂಡ ನಂಬಿಕೆನೋ ಪಡ್‌ಂದಿತಿಂಜತ್. ಸಾಂಡಿಮಾನ್‌ಲಿಪ್ಪಕ ಸಿಖ್ಖಿಂಗ್, ತಿಮ್ಮಯ್ಯಂಡ ಹೈದರಾಬಾದ್ ರೆಜಿಮೆಂಟ್‌ಕಾರಳ ಹಾಕಿಲ್ ನುಪ್ಪದ್ ಗೋಲ್‌ಟ್ಕಿತ್ ಚೋಪ್‌ಚಿಡಲೂಂದ್ ತಮಾಸಿ ಮಾಡ್‌ಚಿ. ಇದ್‌ನ ಕೇಟಿ ತಿಮ್ಮಯ್ಯ, ನಲ್ಲ ಕಳಿಕಾರಳ ಕಾಕಿಯಂಡ್, ತಾನೇ ಸ್ವತಃ ಅಯಿಂಗಕ್ ತರಬೇತಿ ಮಾಡಿತ್, ಬಲ್ಯ ಟೂರ್ನಮೆಂಟ್‌ಕ್ ಏರ್ಪಾಡ್ ಮಾಡ್‌ಚಿ. ಆ ಟೂರ್ನಮೆಂಟ್‌ಲ್ ಹೈದರಾಬಾದ್ ರೆಜಿಮೆಂಟ್, ಸಿಖ್ ರೆಜಿಮೆಂಟ್‌ನ 3-2 ಗೋಲ್‌ಲ್ ಚೋಪ್‌ಚಿಟ್ಟತ್.

ತಿಮ್ಮಯ್ಯ ಕೈಟ್ಟಾತ್‌ಲಿಪ್ಪಕ, ಮನೆಯಪಂಡ ಕಾರ್ಯಪ್ಪಂಡ ಮೋವ 'ನೀನಾ' ಎಣ್ಣುವ ಕನ್ನಿನ ಮಂಗಲಾಚಿ. ಅದೇ ಸಮಯತ್ ಅಲ್ಲಿ ಭೂಕಂಪ ಆಚಿ. ಅಕ್ ತಿಮ್ಮಯ್ಯ ದಂಪತಿಯ ಬಲ್ಯ ಸೇವೆ ಮಾಡ್‌ಚಿ. 'ನೀನಾ' ಮಾಡ್‌ನ ಸೇವೆಕ್ ಬ್ರಿಟಿಷ್ ಸರ್ಕಾರ "ಕೈಸರ್ - ಇ - ಹಿಂದ್" ಎಣ್ಣುವ ಬಿರ್‌ದ್ ಕೊಡ್‌ತತ್. ಭೂಕಂಪತ್ ಚತ್‌ಪೋನ ಜನಡ ಚಾವುನ ಪೂರ್‌ಪಯಿಂಗಳೇ ಇಂಜಿಲೆ. ಹೈದರಾಬಾದ್ ರೆಜಿಮೆಂಟ್‌ರ ಸೈನಿಕಂಗ ನಂಗ ಹೆಣತ್‌ನ ತೊಡುಲೇಂದ್ ದೂರ ದೂರ ನಿಂದಂಡಿಂಜತ್. ತಿಮ್ಮಯ್ಯ, ಚಾವುನ ಟ್ರಕ್‌ಲ್ ಇಟ್ಟಿಂಡ್, ತಾನೇ ಸಾಗ್ ಚಿಡುವಕ್ ಸುರು ಮಾಡುವಕ್, ಬೋರೆಯಿಂಗ ಇಣ್‌ಚಿಟ್ಟಿಂಡ್, ಅಯಿಂಗಳೂ

ಕೈ ಕೂಟ್ಚಿ. 1937 ಲ್ ತಿಮ್ಮಯ್ಯಂಗ್ ಕ್ಯಾಪ್ಟನ್ ಪದವಿ ಕ್ಕೆಟ್ಚಿ. ಕೈಟ್ಚಾತಿಂಜ ಮಡ್ರಾಸ್‌ರ ಟ್ರೈನಿಂಗ್ ಕೋರ್ಸ್ ವರ್ಗ ಆಚಿ. ಅಲ್ಲಿಯೂ ಬಲ್ಯ ಪೆದ ಎಡ್‌ತತ್. 1939 ಲ್ ದಂಡನೆ ಪ್ರಪಂಚ ಮಾಪಡೆರ ಸಮಯತ್ ತಿಮ್ಮಯ್ಯ ಸಿಂಗಾಪುರಕ್ ಪೋಂಡಿಯಾಚಿ. ಅಲ್ಲಿಂಜ ಆಗ್ರಾಕ್ ಬಾತ್. 1942 ಲ್ “ಭಾರತ ಬುಟ್ಟಿತ್ ಪೋಯಿ” ಚಳುವಳಿಲ್ ಕ್ರಾಂತಿ ವೀರಂಗಳ ಬಡಿಪಕ್ ಸೈನ್ಯ ಬಳಸುವಯಿಂಜತ್. ಒಮ್ಮೆ ಆಗ್ರಾತ್, ಅನ್ನನೇ ಗಲಾಟೆಲ್ ಜನಳ ದವುತುವಕ್ ಬೊಡಿ ಬೆಪ್ಪಕೆಣ್ಣಾಚಿ. ಆಚೇಂಗಿ, ತಿಮ್ಮಯ್ಯ ಜನಕ್ ಬುದ್ಧಿ ಎಣ್ಣೆತೇ ಆ ಜಾಗತ್‌ಂಜ ಅಯೆಪಯಿಂಜತ್. ಇದ್‌ನ ಕಂಡ ಬ್ರಿಟಿಷ್ ಅಧಿಕಾರಿ, “ಎನ್‌ಂಗ್ ಅಯಿಂಗಕ್ ಬೊಡಿ ಬೆಪ್ಪಂಜಿ ಕೊಲ್ಲುಲೇ”ಂದ್ ಕೇಟತ್. ದಾರ್ಕ್ ಬೊಡಿ ಬೆಕ್ಕಡ್...? ಅಯಿಂಗ ನಾನ್ ಎಣ್ಣಾನನಕೆ ಕೇಪಲ್ಲಾಂದೆಣ್ಣವಕ, ಬ್ರಿಟಿಷ್ ಅಧಿಕಾರಿ ಚೆಡಿನ ಎರ್‌ಕಿಯವಂಡಿ ಯಾಚಿ. ಪುನಃ ಕೈಟ್ಚಾಕ್ ಪೋಯಿತ್, ಸ್ವಾಘ್ ಟ್ರೈನಿಂಗ್ ಎಡ್‌ತಂಡ್, ಸೈನ್ಯ ಎಡ್‌ತಂಡ್ ಬರ್ಮಾಕ್ ಪೋಚಿ. ಜಪಾನ್‌ಕಾರ ಭಾರತತ್‌ರ ಮೇಲೆ ಯುದ್ಧಕ್ ಬಂದಂಡಿಂಜ ಸಂದರ್ಭತ್, ತಿಮ್ಮಯ್ಯ ಒರ್ ಬ್ರಿಗೇಡ್‌ನ ಯುದ್ಧಕ್ ಉಳಾಪಾಚಿ. ಇಯಂಗಡ ಯುದ್ಧ ತಂತ್ರಕ್ ಬೊತ್ತಿತ್ ಜಪಾನ್ ಬಯ್ಯಕ್ ಪೋಚಿ. 1945 ಲ್ ತಿಮ್ಮಯ್ಯಂಗ್ ಬ್ರಿಗೇಡಿಯರ್ ಪದವಿ ಕ್ಕೆಟ್ಚಿ. ಅದೇ ಸಮಯತ್ “ಡಿಸ್ಟಿಂಗ್ವಿಷ್ಡ್ ಸರ್ವಿಸ್ ಆರ್ಡರ್” (ಡಿ.ಎಸ್.ಒ.) ಎಣ್ಣುವ ವಿಶೇಷ ಬಿರ್‌ದಾನ್ ಬ್ರಿಟಿಷ್ ಸರ್ಕಾರ ತಿಮ್ಮಯ್ಯಂಗ್ ಕೊಡ್‌ತತ್. ಸ್ವಾತಂತ್ರ್ಯ ಕ್ಕೆಟ್ಚಿನ ದಂಡೇ ತಿಂಗತ್ ಭಾರತ - ಪಾಕಿಸ್ತಾನ ಯುದ್ಧ ನಡ್‌ಂದತ್. ಪನ್ನೊಂದ್ ಆಯಿರ ಅಡಿ ಎತ್ತರತ್‌ರ ಜಾಗತ್ ಕೋಟಕಾಲತ್ ಯುದ್ಧ ಮಾಡಂಡು. ಟ್ಯಾಂಕರ್ ಕೊಡಿಕ್ ಎಡ್‌ತ ಪೋಂಡು, ಹಿಮ ದುಂಬ್‌ನ ಜಾಗ, ಟ್ಯಾಂಕರ್ ಚಾರುವ, ಹೇರ್‌ಪಿನ್ ತಿರುವುಳ್ಳ ರಸ್ತೆ, ಚೆನ್ನ ತಪ್ಪಾಚೇಂಗಿ ಆಯಿರಾಯಿರ ಅಡಿ ಕುಂಡ್‌ಕ್ ಬೂವಂಡು. ಒರ್ ಲೋಟ ಟೀ ಮಾಡಂಡೂಂದಾಚೇಂಗಿ, ನೀರ್‌ನ ಕೊದ್‌ಪಾಚಿಡುವಕ್ ಬೋಂಡಿಯಾನ ಸಮಯ ಅಂಜಿ ಗಂಟೆ! ಆಮ್ಮ ಜನಕ ಕಮ್ಮಿ, ಶ್ವಾಸ ಬಲಿಪಕ್ ಕಷ್ಟ. ಇನ್ನತ ಸಂದರ್ಭತೂ ಧೈರ್ಯ ಕೆಡತ, ಪತ್ತೊಯಿಂಬದ್ ಆಯಿರ ಅಡಿಕೂ ಆಮ್ಮ ಜನಕ ಇಲ್ಲತೆ ವಿಮಾನತ್ ಪೋಯಿತ್, ಭಾರತೀಯ ಸೈನಿಕಂಗಳ ತೀನಿ ಕೊಡ್‌ತಿತ್, ಕಾಶ್ಮೀರ ಕಣಿವೆನ ಉಳಿಚಿಟ್ಟಂಡತ್ ವೀರ ತಿಮ್ಮಯ್ಯ. ಆ ಸಮಯತ್ ಕಾಶ್ಮೀರತ್ ಜನಳ ನಿಂಗಳ ಆಳುವಕ್ ನಾಯಕ ದಾರ್ ಬೋಂಡಿಯೇಂದ್ ಕೇಟತೇಂಗಿ, ಜನ “ಜನರಲ್ ತಿಮ್ಮಯ್ಯ” ಎಣ್ಣುವಯಿಂಜತ್‌ಲೊ. ಅಲ್ಲಿಂಜ ತಿಮ್ಮಯ್ಯ ನ್ಯಾಷನಲ್ ಡಿಫೆನ್ಸ್ ಅಕಾಡೆಮಿರ ಕಮಾಂಡೆಂಟ್ ಆಚಿ. 1953 ಲ್ ಲೆಫ್ಟಿನೆಂಟ್ ಜನರಲ್ ಆಚಿ. ಈ ಸಮಯತ್ ಭಾರತೀಯ ಸೈನ್ಯತ್, ಬ್ರಿಟಿಷ್‌ಕಾರಡ ಸುಮಾರೆಲ್ಲ ನಡ್‌ಪುನ

ನಿರ್ವಹಿಸಿಟ್ಟಿತ್ತು. ಕೊರಿಯಾತ್‌ಲ್ ಯುದ್ಧ ಬಂಧಿಯಳ ಬುಡುಗಡೆ ಮಾಡುವಕ್ ವಿಶ್ವಸಂಸ್ಥೆ ಗೊತ್ತ್ ಮಾಡ್‌ನ, ಸಮಿತಿಕ್, ತಿಮ್ಮಯ್ಯ ಅಧ್ಯಕ್ಷನಾಯಿತ್ ಆರ್ ತಿಂಗತ್ ಸಮಸ್ಯೆನ ಸರಿಪಡ್‌ತಚಿ. ಇದ್‌ಂಗ್ ಭಾರತ ಸರಕಾರ "ಪದ್ಮಭೂಷಣ" ಪ್ರಶಸ್ತಿ ಕೊಡ್‌ತತ್. 1957 ಮೇ 8 ಲ್ ಭಾರತತ್ ಜನರಲ್ ಆಯಿತ್ ಅಧಿಕಾರ ವಹಿಸಿಯಂಡತ್. ಆಪ್ರಿಕಾತ್ ಇಥಿಯೋಪಿಯಾತ್ ಸೈನಿಕಂಗಕ್ ಶಿಕ್ಷಣ ಕೊಡ್‌ಪಲ್ಲಿಕ್ ಪೋಯಿತಿಂಜತ್. ಸೇನೆಯಿಂಜ ನಿವೃತ್ತಿ ಆನ ಪಿಂಞ ಸಹ ಸೈಪ್ರಸ್ ದ್ವೀಪಕ್ ಶಾಂತಿಪಾಲನೆಕ್ ಜನರಲ್ ತಿಮ್ಮಯ್ಯನ ಅಯೆಚತ್.

1964ನೇ ಜುಲೈಲ್ ವಿಶ್ವಸಂಸ್ಥೆ ಸೇನೆರ ಸೇನಾನಿಯಾಯಿತ್ ಆಯ್ಕೆ ಆಚಿ. ಸೈಪ್ರಸ್ ದ್ವೀಪತ್ ಮಾಡ್‌ನ ಸೇವೆಕಾಯಿತ್ ಸೈಪ್ರಸ್ ದೇಶ 1966 ಜೂನ್ 6 ಲ್ ತಿಮ್ಮಯ್ಯಂಡ ಚಿತ್ರವಳ್ಳ ಪೋಸ್ಟಲ್ ಸ್ಟ್ಯಾಂಪ್ ಬುಡ್‌ಗಡೆ ಮಾಡ್‌ಚಿ. ಕೊಡ್‌ಗರ್ ವೀರ ಪುತ್ರ ಜನರಲ್ ತಿಮ್ಮಯ್ಯ ಸೈಪ್ರಸ್‌ಲೇ ಹೃದಯಾಘಾತತ್ ಮರಣಪಟ್ಟಿತ್. ವಿಶ್ವಸಂಸ್ಥೆರ ವಿಮಾನತ್ ಚಾವುನ ಭಾರತಕ್ ಎಡ್‌ತಂಡ್ ಬಾತ್. ವಿಮಾನ ನಿಂದಲ್ಲಿ ಎಲ್ಲ ಅಯಿಂಗಡ ಆಖೀರಿ ದರ್ಶನಕ್ ಜನ ಬಪ್ಪಯಿಂಜತ್. ಬೆಂಗಳೂರ್‌ಲ್ ವಿಮಾನ ನಿಲ್ದಾಣಕ್ ಪೋಪ ರಸ್ತೆಕ್ "ಜನರಲ್ ತಿಮ್ಮಯ್ಯ ರಸ್ತೆ" ಎಣ್ಣೆತ್ ಪೆದ ಬೆಚ್ಚಿತ್ ಗೌರವ ಕೊಡ್‌ತತ್. ಕೊಡ್‌ಗಲ್ ಮಡಿಕೇರಿಲ್ ಜನರಲ್ ತಿಮ್ಮಯ್ಯಂಡ ಪ್ರತಿಮೆ ಪ್ರತಿಷ್ಠಾಪನೆ ಮಾಡಿತ್ ಗೌರವ ಕಾಟಿತ್. ಬಪ್ಪಕಾಲ ತಾರೀಕ್ 31-3-2006 ಲ್ ಕೊಡ್‌ಗರ್ ವೀರ, ಬಂಬ ಕೊಡವೊ ಜನರಲ್ ತಿಮ್ಮಯ್ಯ ಪುಟ್ಟಿತ್ ನೂರ್ ಕಾಲ ದುಂಬುವ. □





## ಹರದಾಸ ಅಪ್ಪಚ್ಚ ಕವಿ

- ಪುಟ್ಟಾನ ದಿನ - 1868ನೇ ಇಸವಿ ಸೆಪ್ಟೆಂಬರ್  
ಪುಟ್ಟಾನ ಜಾಗ - ಕಾರಂದಾಡ್ ಗ್ರಾಮ, ಪಾರಾಣೆ, ಕೊಡಗ್  
ಅಪ್ಪ - ಮೇದಪ್ಪ  
ಅಮ್ಮ - ಬೆಳ್ಳವ್ವ  
ಕಣ್ಮರೆ - 1944ನೇ ಇಸವಿ ನವೆಂಬರ್ 21

ಕೊಡಗ್‌ರ ಆದಿಕವಿ, ನಾಟಕಕಾರ, ಹರದಾಸ ಅಪ್ಪನವರವರ ಅಪ್ಪಚ್ಚ ಕವಿ ಕೊಡವ ಸಾಹಿತ್ಯತರ ಮೂಲಪುರುಷ. ನಾಪೋಕ್ಲರ ಮಕ್ಕಿಲ್ ಇಂಜ ಪಟ್ಟಿ ಕಣ್ಣಂಡ ಕೂಡ ಇಯಂಗಡ ವಿದ್ಯಾಭ್ಯಾಸ ಸುರುವಾಚಿ. ತಾಂಡ ಏಳನೆ ಬಯತ್‌ಲೇ ಜೈಮಿನಿ ಭಾರತತರ ಕೆಲವು ಪದ್ಯ, ಸಂಸ್ಕೃತ ಶ್ಲೋಕ, ಇನ್ನತಾನೆಲ್ಲ ಪಡ್‌ಚಿತ್ ಎಣ್ಣುವ ಯಿಂಜತ್. ಅಲ್ಲಿಂಜ ವೀರಾಜಪೇಟೆಲ್ ಮೂಂದನೆ ಕ್ಲಾಸ್‌ಕೆತ್ತನೆ ಓದ್‌ಚಿ. ನಾಲನೆ ಕ್ಲಾಸ್‌ಕ್ ಪೋಪಕ್ ಪಣಕಾಸ್‌ರ ಸ್ಥಿತಿ ಸೆರಿ ಇಲ್ಲತೆ, ಪೂರ್ತಿ ಓದುವ ಕಯ್ಯತೆ ಕೆಲಸ ತೇಡುವಕ್ ಕೂಡ್‌ಚಿ. ಅಕ್ಕೆಲ್ಲ ನಾಲನೆ ಕ್ಲಾಸ್ ಓದ್‌ಚೆಂಗೆ ಸಹ ನಲ್ಲ ಕೆಲಸ ಕೊಟ್ಟುವಯಿಂಜತ್. ನಾಲನೆ ಕ್ಲಾಸ್ ಓದ್‌ನಯಿಂಗಕ್ ಕೆಲಸ ಮಾಡುವಚ್ಚಕ್ ಭಾಷೆರ ಜ್ಞಾನ ಪಿಂಚ್ ವ್ಯವಹಾರ ಜ್ಞಾನ ಇಪ್ಪಯಿಂಜತ್. ಚೆನ್ನಂಗ್ ದಿವಸತ್ ಮಡಿಕೇರಿರ ಮುಜರಾಯಿ ಇಲಾಖೆಲ್ ಕೆಲಸ ಕೊಟ್ಟ್‌ಚಿ. ಸಮಯ ಕೊಟ್ಟವಕೆಲ್ಲ ಪುಸ್ತಕ ಓದುವೊ, ಪಾಟ್ ಪಾಡುವೊ, ಇನ್ನತ ನಲ್ಲ ಅಭ್ಯಾಸತಾನ ಬೊಳ್‌ತಿ

ಯಂಡತ್. ಚೆರಿಯ ಬಯತ್‌ಲೇ ನಲ್ಲ ಪಾಟ್‌ಕಾರನಾಯಿತಿಂಜತ್. 1890 ಲ್ ತಿಪಟೂರ್ ನಾಟಕ ಕಂಪೆನಿಕಾರ ಮಡಿಕೇರಿಕ್ ಬಂದಿತಿಪ್ಪಕ, ಅಯಿಂಡ ನಾಟಕ ನೋಟಿತ್ ತಾನೂ ನಾಟಕ ಮಾಡಂಡು ಎಣ್ಣುವ ಆಸೆಲ್, ನಾಟಕ ಕಂಪೆನಿರ ನಟನೆಕಾರಳ ಪರಿಚಯ ಮಾಡಿಯಂಡ್, ಕೆಲವು ಪದ್ಯತ್‌ನೋ, ಅದ್‌ಂಡ ರಾಗತ್‌ನೋ ಪಡ್‌ಚಿತ್ ಅಯಿಂಗಕ್ ಕಾಟುವಕ್, ಅಯಿಂಗ ಕುಸಿಪಟ್ಟಿತ್, ಇಯಂಗಕ್ ಚೆರಿಯ ಚೆರಿಯ ನಟನೆ ಮಾಡುವಕ್ ಕೊಡ್‌ತತ್. ಒಂದ್ ದಂಡ್ ತಿಂಗತೆ ಕವಿ, ನಲ್ಲ ನಟನೆಕಾರನೂ, ಪಾಟ್‌ಕಾರನೂಂದ್ ಎಣ್ಣ್ ಚಿಟ್ಟಿಂಡತ್. ಆ ಕಾಲತ್ ಕೊಡಗ್‌ರ ಸಾಹಿತಿಯಾಯಿತಿಂಜ ಪೆಂಕಟಾದ್ರಿ, ಶಾಮರಾಯ ಎಣ್ಣುವ ಯಿಂಗ ಅಪ್ಪಚ್ಚ ಕವಿಕ್ ಗುರುವಾಯಿತಿಂಜತ್. ಅಯಿಂಗಡ ಕೈಲ್ ಕವನ ಎಳ್ದುವಕ್‌ಳ ಪ್ರಾಸ ಎಲ್ಲ ಪಡ್‌ಚಂಡ್, ಕವನ ಎಳ್ದುವಕ್ ಸುರು ಮಾಡ್‌ಚಿ. ಅದೇ ಸಮಯತ್, ಕೊಡಗ್ ಬುಟ್ಟಿತ್ ಬೋರೆ ಜಾಗಕ್ ಪೋಯಂಡಿಂಜ ಒರ್ ನಾಟಕ ಕಂಪೆನಿಕಾರಡ ಕೈಯಿಂಜ ನಾಟಕತ್ ಉಪಯೋಗ ಮಾಡುವನ್ನತ ಸಾಮಾನ್ (ರಂಗ ಪರಿಕರ) ಎಲ್ಲ ಕ್ರಯಕ್ ಎಡ್‌ತಂಡ್, ಏಳ್ ಜನ ಸಿನೇತಕಾರಂಗಳ ಜೊತೆ ಕೂಟಿಯಂಡ್, ಆದ್ಯವಾಯಿತ್ "ಚಂದ್ರಹಾಸ" ಎಣ್ಣುವ ನಾಟಕತ್‌ನ ಮಡಿಕೇರಿ ಸ್ಕೂಲ್‌ರ ಸಭಾಂಗಣತ್ ಮಾಡಿತ್ ಕಾಟ್‌ಚಿ. ಅಪ್ಪಚ್ಚ ಕವಿರ ರಾಜಂಡ ನಟನೆ ಜನಮೆಚ್ಚುಗೆ ಪಡ್‌ಂದತ್.

1894 ಲ್ ಇಯಂಗಕ್ ಮಡಿಕೇರಿಂಜ ಭಾಗಮಂಡಲಕ್ ವರ್ಗ ಆಚಿ. ಅಲ್ಲಿ ಸುಮಾರೆಲ್ಲ ಬಲ್ಯ ಬಲ್ಯ ಪುರಾಣ ಗ್ರಂಥ ಓದಿತ್, ಸಂಸ್ಕೃತ ಪಿಂಞ ಕನ್ನಡ ಭಾಷೆರ ಜ್ಞಾನ ಅಭಿವೃದ್ಧಿ ಮಾಡಿಯಂಡತ್. ಅಲ್ಲಿಂಜ ತಾನೇ ಸ್ವಂತ ಕನ್ನಡ ಪಾಟ್, ನಾಟಕ ಎಳ್ದುವಕ್ ಸುರು ಮಾಡ್‌ಚಿ. ಆ ಸಮಯತ್ ಭಾಗಮಂಡಲತ್ ಸ್ಕೂಲ್‌ರ ಅಧಿಕಾರಿ ಆಯಿತಿಂಜ ರಘುನಾಥರಾಯ ಎಣ್ಣುವಯಿಂಗ ಇಯಂಗಡ ಪದ್ಯ, ನಾಟಕ ಎಲ್ಲ ಓದಿತ್ ಕುಸಿಪಟ್ಟಿತ್. ನಿಂಗ ಎನ್ನೊಂಗ್ ನಿಂಗಡ ಕೊಡವ ಭಾಷೆಲೇ ಎಳ್ದುವಕ್‌ಗಾ? ಅನ್ನನೆ ಎಳ್ದೊಚ್ಚೆಂಗಿ ಮಿಂಞಕ್ ಅದ್ ಕೊಡವ ಜನಾಂಗಕೇ ಒರ್ ಬಲ್ಯ ಆಸ್ತಿ ಆಪಾಂದ್ ಎಣ್ಣ್ ಚಿ. ರಘುನಾಥರಾಯಂಡ ಈ ವಿಶ್ವಾಸತ್‌ರ ತಕ್ಕೇ ಅಪ್ಪಚ್ಚ ಕವಿಕ್ ಪುರ್‌ಡ್ ಕೊಡ್‌ತತ್. ರಾಷ್ಟ್ರಕವಿ ಕುವೆಂಪು ಇಂಗ್ಲಿಷ್‌ಲ್ ಸಾಹಿತ್ಯ ರಚನೆ ಮಾಡಿಯಂಡಿಪ್ಪಕ, ಐರೀಷ್ ಕವಿ ಅವ್ವ ಭಾಷೆಲೇ ಸಾಹಿತ್ಯ ರಚನೆ ಮಾಡುವಕ್ ಎಣ್ಣಿತ್, ಕುವೆಂಪು ಎನ್ನನೆ ಕನ್ನಡತ್‌ರ ಶ್ರೇಷ್ಠ ಕವಿ ಆಪಕ್ ಕಾರಣಕರ್ತನಾಚೋ, ಅನ್ನನೇ ನಂಗಡ ಅಪ್ಪಚ್ಚ ಕವಿ ಕೊಡವ ಸಾಹಿತ್ಯತ್‌ರ ಮೂಲಪುರುಷನಾಪಕ್ ಕಾರಣಕರ್ತನಾನ ರಘುನಾಥರಾಯನ ನಂಗ ಇಲ್ಲಿ ಗೇನ ಮಾಡಿಯವೆಂಡು. ಅಂದ್‌ಂಚೇ ಕೊಡವ ಭಾಷೆಲ್ ಕವನ, ನಾಟಕ ಎಳ್ದುವಕ್

ಸುರು ಮಾಡ್ಚಿ. 1906 ಲ್ "ಯಯಾತಿ ರಾಜಂಡ ನಾಟಕ" ಎಣ್ಣುವ ಪೌರಾಣಿಕ ನಾಟಕ ಎಳ್‌ದಿತ್, ಮಂಗಲೂಲ್ ಮುದ್ರಣ ಮಾಡ್ಚಿ. ಅಲ್ಲಿಂಜ "ಸುಬ್ರಹ್ಮಣ್ಯ ಸ್ವಾಮಿ ನಾಟಕ", "ಸಾವಿತ್ರಿ ನಾಟಕ", "ಶ್ರೀ ಕಾವೇರಿ ನಾಟಕ" ಎಣ್ಣುವ ನಾಟಕವೂ ಕೂಡಿತ್ "ನಾಲ್ ನಾಟಕ" ಬೊಳಿ ಕಂಡತ್. ಇದ್‌ನೆಲ್ಲ ಮುದ್ರಣ ಮಾಡುವಕ್ ಸಾಹಿತ್ಯಪ್ರೇಮಿಯ ಸಹಾಯ ಮಾಡ್ಚಿ.

1908 ನೇ ಇಸವಿಲ್ ಅಪ್ಪಚ್ಚಕವಿ ಕೊಡಗ್‌ರ ಕವಿ, ನಾಟಕಕಾರ, ನಟನೆಕಾರ ನಾಯಿತ್ ಪೆದ ಮಾಡ್ಚಿ. ಈ ನಾಲ್ ನಾಟಕವೂ ಕೊಡಗ್‌ರ ಸುಮಾರ್ ಜಾಗ ಅಲ್ಲತೆ, ಕೊಡಗ್‌ಂಜ ಪೊರ್‌ಮೆ ಕೂಡ ಪ್ರದರ್ಶನ ಕಂಡತ್. ಸ್ವತಃ ನಟನೆ ಮಾಡುವ ಯಿಂಜ ಅಯಿಂಗಡ ನಟನೆನೋ, ಅಯಿಂಗ ಪಾಡುವ ಪಾಟ್‌ನೋ ಕೊಡಗ್‌ರ ಜನ ಮಾತ್ರ ಅಲ್ಲತೆ, ಪೊರ್‌ಮೆತರಯಿಂಗ ಕೂಡ ಕೊಂಡಾಡ್ಚಿ. ಅಕ್ಕತಾರ ಪತ್ರಿಕೆ "ಮದ್ರಾಸ್ ಮೆಯಿಲ್"ಲ್ ಕೂಡ ಅಪ್ಪಚ್ಚಕವಿನ ಒರ್ ನಲ್ಲ ನಟ, ವಿದ್ವಾಂಸಂದ್ ಕೊಂಡಾಡಿತ್ ಎಳ್‌ದ್‌ನದ್ ಅಂದೇತ ಕಾಲಕ್ ಚೆರಿಯ ವಿಷಯವೊಂದು ಅಲ್ಲ.

ಚೆನ್ನಂಗೇ ಸಮಯತ್ ಅಯಿಂಗಡ ನಾಟಕ ಕಂಪನಿಲ್ ನಷ್ಟ ಆಚಿ, ಅಯಿಂಡ ಮನೆಕ್ ತಿತ್ ಬುದ್ಧಿತ್, ಸುಮಾರ್ ನಷ್ಟ ಅನುಭವಿಚಿಡಂಡಿಯಾಚಿ. ಅಲ್ಲಿಂಜ ಪುಳಿತೋಟ ಮಾಡಿತೂ, ಹರಿಕಥೆ ಮಾಡಿತೂ ಆರ್ಥಿಕ ಸ್ಥಿತಿನ ಚೆನ್ನಂಗ್ ಸುಧಾರ್ ಚಿಟ್ಟಂಡತ್. ಅಯಿಂಗ ಹರಿಕಥೆ ಮಾಡುವಕ ನಾನ್ "ಹರದಾಸ" ಎಣ್ಣುವಯಿಂಜತ್. ಇನ್ನನೆ ಅಪ್ಪಚ್ಚಕವಿ "ಹರದಾಸ ಅಪ್ಪಚ್ಚಕವಿ" ಆಚಿ. ಪೊಲಾಕ ಎದ್ದನೆಕೆ ಪಿಂಞ ಬೈಟ್ ಬುದ್ಧವಕ, ದೇವಡ ಪಾಟ್ ಪಾಡುವ ಅಭ್ಯಾಸ ಇಂಜತ್. ಅನ್ನನೆ ಒಮ್ಮ ಪೊಲಾಕ ನೇರ್ತೆ ಎದ್ದಿತ್ ಪಾಡಿಯಂಡಿಪ್ಪಕ (ಬೆಂದ್‌ಕಡ ಮನೆಕ್ ಪೋನಲ್ಲಿ) ಒರ್ ಸರ್ಪ ಪಾಂಬು ಮಂಡೆ ತೂಕಿಯಂಡ್ ನೃತ್ಯ ಮಾಡುವಯಿಂಜತ್‌ಲೊ. ಎನ್ನಂಗೋ, ಕಣ್ಣ್ ತೊರ್‌ಂದಿತ್ ನೋಟುವಕ, ಕಂಡ ಪಾಂಬುನ ಕಂಡಿತ್ ಮನೆರ ಯಜಮಾನನ ಕಾಕಿತ್ ಕಾಟುವಕ, ಅವೊ ದೇವಳ ಗೇನ ಮಾಡಿಯಂಡ್, ಎದಿಕೆ ಪಡಿನ ತೊರ್‌ಂದಿತ್ ಒರ್ ಬರಿಕ್ ನಿಂದತ್‌ಲೊ. ಪಾಟ್ ನಿಂದ್‌ಪೋನ ಪಿಂಞ ಅಲ್ಲಿ ಎಂತ ಕೆಲಸ ನಾಗಂಗ್? ಮೆಲ್ಲೆ ತೆರ್‌ಂಗಿತ್ ಪೋಚಿಲೊ.

ಅನ್ನನೆ ದಾರ್‌ನಾಚೇಂಗೂ ಕುಸಿಪಡ್‌ತುವನ್ನತ ಆಕರ್ಷಕ ವ್ಯಕ್ತಿತ್ವ, ತಕ್ಕ್ - ಬಾಕ್, ಎಲ್ಲಾರ್‌ನೋ ಮರ್‌ಳ್ ಮಾಡುವನ್ನತ ಪಾಟ್‌ಕಾರನೂ ಆಯಿತಿಂಜತ್. ಅಯಿಂಗಡ ಸಮಯತ್ ಕೊಡಗ್‌ಲ್ ಅಧಿಕಾರಿ ಆಯಿತಿಂಜ, ಪಂಜೆ ಮಂಗೇಶರಾಯ ಅಯಿಂಗ ಸ್ವತಃ ಕವಿಯಾಯಿತೂ, ಅಪ್ಪಚ್ಚಕವಿರ ಕವನತಾರ ಚಾಯಿನ ಕೊಂಡಾಡುವ ಯಿಂಜತ್. ಆ ಕಾಲತ್ ಕೊಡವ ಬೋರೆ ಧರ್ಮಕಾರಳ, ಪರದೇಶಕಾರಳ ಅನುಕರಣೆ

ಮಾಡಿಯಂಡುಂಡೂಂದ್ ನೊಂಬಲಪಟ್ಟುಂಡ್ ಇನ್ನನೆ ಎಣ್ಣೆತ್. "ಎಂಗಡ ಆದಿ ಧರ್ಮತೂ, ಆಚಾರ ವ್ಯವಹಾರತೂ ಎಂಗ ನಡ್ಂದ್ ಬಕ್ಕುಂಡುವೇ ಹೊರತು, ರಾಜ ದರ್ಬಾರುಂಡ್ಂದ್ ಪರದೇಶಿಯಡ ಪೊರಪಾಡ್ಕೂ ಆಚಾರಕೂ ಕೊದಿಚಿತ್ ಆ ರೀತಿ ನಡ್ಪದ್ ಮಾದೇವಿ ಕಾವೇರಮ್ಮೆಕ್ ಪ್ರೀತಿಯಿರಾಂದ್ ನಂಬುವಿ". ಇನ್ನನೆ ಅಕ್ಕಲೇ ಕೊಡವ ಸಂಸ್ಕೃತಿ, ಆಚಾರ ವಿಚಾರ ಬುಡುವಕಾಗಾಂದ್ ಅಭಿಪ್ರಾಯಪಟ್ಟು ಅಪ್ಪಚ್ಚಕವಿನ ನಂಗ ಎಂದೂ ತುದಿಕಂಡು. ಚೆನ್ನಂಗ್ ವಯಸ್ಸಾಪದು ಕೆಮಿ ಕೇಕತಾಚಿ. ಅಲ್ಲಿಂಜಲೂ ಹರಿಕಥೆ ಮಾಡಿಯಂಡ್ ಇಂಜತ್. ತಾಂಡ ಎಳವತ್ತಾರನೇ ಬಯತ್ಲ್ ಮರಣಪಟ್ಟತ್.

ಒರ್ ಭಾಷೆಕ್ ಸಾಹಿತ್ಯವೇ ಇಲ್ಲತ ಸಮಯತ್, ಸ್ವಂತ ಶಕ್ತಿಲ್ ಸಾಹಿತ್ಯ ಸೃಷ್ಟಿ ಮಾಡ್ನ ಅಪ್ಪಚ್ಚಕವಿನ ಗೇನ ಮಾಡುವಕ ಆಶ್ಚರ್ಯ ಆಪ. ಇಂದ್ ನಂಗಡ ಕೊಡವ ಸಾಹಿತ್ಯ ಅದೆಚ್ಚಕೋ ಬೊಳ್ಂದಿತ್. ಅದ್ನ ಇಂಚ್ಚಕ್ ಬೊಳ್ತುವಕ್ ಪೇಚಾಡಂಡು. ಬೋರೆ ಭಾಷೆರ ಪತ್ರಿಕೆ, ಪುಸ್ತಕತಾರ ಚೊತೆಕ್ ಕೊಡವ ಪತ್ರಿಕೆ, ಪುಸ್ತಕತಾನೋ ಓದಿತ್, ಭಾಷಾಜ್ಞಾನ, ಭಾಷಾಭಿಮಾನ ಬೊಳ್ತಿಯವಂಡು. □



## ಬಿ. ಡಿ. ಗಣಪತಿ

- ಪುಟ್ಟಾನ ದಿನ - 1920ನೇ ಇಸವಿ ಜೂನ್ 16  
ಪುಟ್ಟಾನ ಜಾಗ - ಬೆಸಗೂರ್, ಪೊನ್ನಂಪೇಟೆ, ಕೊಡಗ್  
ಅಪ್ಪ - ದೇವಯ್ಯ  
ಅವ್ವ - ಮಾಚವ್ವ  
ಮರಣ - 1998ನೇ ಜೂನ್ 16

ಬಾಚಮಾಡ ಒಕ್ಕತ್ ಪುಟ್ಟಾನ ಗಣಪತಿ, ಚೆರ್ಪತ್‌ಂಚೆ ಆದರ್ಶವಾದಿ ಆಯಿತ್ ಬೊಳ್‌ಂದಯಿಂಗ. ಬೆಸಗೂರ್‌ರ ಪ್ರೈಮರಿ ಸ್ಕೂಲ್‌ಲ್ ಪ್ರಾಥಮಿಕ ವಿದ್ಯಾಭ್ಯಾಸ. ಅಲ್ಲಿಂಜ ಪೊನ್ನಂಪೇಟೆರ ಮಿಡ್‌ಲ್‌ಸ್ಕೂಲ್, ವೀರಾಜಪೇಟೆರ ಸರ್ಕಾರಿ ಹೈಸ್ಕೂಲ್‌ಲ್ ಓದ್‌ಚಿ. ಪ್ರತಿ ಕ್ಲಾಸ್‌ಲೂ ಫೆಸ್ಟ್ ಕ್ಲಾಸ್‌ಲೇ ವಾಸಾಯಂಡ್ ಬಂದಂಡಿಂಜತ್. ಪೂಕಾಸ್ ತೊಂದರೆನಗುಂಡ್ ಮಿಂಞಕ್ ಓದುವಕ್ ಕಯ್ಯತಾಚಿ. ಅಂದಕಲೂ, ಓದುವ ಅಭ್ಯಾಸ ಮಾತ್ರ ಬುಟ್ಟಿತಿಂಜಿಲೆ. ಚೆರ್ಪತ್‌ಲೇ ಪುರಾಣ ಕಥೆ ಕೇಟಿತೂ, ಓದಿತೂ ನಲ್ಲ ವ್ಯಕ್ತಿ ಆಕಂಡು, ಸಮಾಜಕ್ ಬಲ್ಯ ಸೇವೆ ಮಾಡಂಡು ಎಣ್ಣುವ ಗುರಿ ಬೆಚ್ಚಂಡಿಂಜತ್. ಪೊನ್ನಂಪೇಟೆರ ಶಾರದ ಆಶ್ರಮಕ್ ಪೋಯಿತ್ ಅಲ್ಲಿ ಇಂಜ ಪ್ರತಿ ಪುಸ್ತಕತ್‌ನೋ ಓದಿತಿಂಜತ್. ಬದ್‌ಕರ್ ಉದ್ದಕ್ಕೂ ಲೆಕ್ಕ ಇಲ್ಲತಚ್ಚಕ್ ಪುಸ್ತಕ ಓದಿತಿಂಜತ್. ಏದೇ ಪದವಿಲ್ ಕೊಟ್ಟುವಾಂಗಿಂಜ ಜಾಸ್ತಿ ಜ್ಞಾನ ನಲ್ಲ ಪುಸ್ತಕ ಓದುವಾತ್ ಕೊಟ್ಟಚಿ. ಇನ್ನನೆ ಆಶ್ರಮತ್‌ರ ಸಾವಾಸ

ಇಂಜಾಂಗ್, ಮಿಂಘಾಕ್ ತಾನ್ ಆಶ್ರಮಕ್ ಕೂಡಂಡು, ಸತ್ಯಂಗತ್ ಬದ್‌ಕಂಡು, ಸಂಸಾರಸ್ಥನಾಪಕಾಗಾಂದೆಲ್ಲ ಗೇನ ಮಾಡುವಯಿಂಜತ್. ಆಚೇಂಗಿ, ಕುಟುಂಬತ್ ಪರಿಸ್ಥಿತಿ ಸೆರಿ ಇಲ್ಲತಾಂಗ್ ಅನ್ನತ ಆಸೆನೆಲ್ಲ ಒರ್ ಬರಿಕ್ ಬುಟ್ಟಿತ್ ಚಾಕ್ರಿ ತೇಡ್‌ಚಿ. 1937ನೇ ಇಸವಿಲ್ ಸಹಕಾರಿ ಇಲಾಖೆಲ್ ಸಂಘತ್‌ರ ಮೇಲ್ವಿಚಾರಕ ನಾಯಿತ್ ಕೆಲಸ ಕೊಟ್ವಚಿ. ತಿಂಗಕ್ ಐಂಬದ್ ಉರ್‌ಪಿಯ ಸಂಬಳತ್‌ರ ಕೆಲಸ. ಈ ಕೆಲಸ ಕೊಟ್ಟಿತ್ ಚೆನ್ನಂಗೇ ಸಮಯತ್ “ಕೊಡಗು” ವಾರಪತ್ರಿಕೆಲ್ ಉಪಸಂಪಾದಕ ಬೋಂಡೂಂದೆಣ್ಣುವ ಜಾಹೀರಾತ್ ನೋಟ್‌ಚಿ. ಎಳ್ತಕಾರನಾಪ ಸೊಪನಕ್ ಸೆರಿ ಆಯಿತ್, ಪತ್ರಿಕೋದ್ಯಮತ್ ಎಂತೇಂಗೋರ್ ಸಾಧನೆ ಮಾಡೊಲೂಂದೆಣ್ಣುವ ಗೇನತ್, ಐಂಬದ್ ಉರ್‌ಪಿಯ ಸಂಬಳತ್‌ರ ಕೆಲಸ ಬುಟ್ಟಿತ್, ಇರುವತ್ತಂಜಿ ಉರ್‌ಪಿಯ ಸಂಬಳತ್‌ರ ಕೆಲಸಕ್ ಕೂಡ್‌ಚಿ. ಗಣಪತಿ ಅಯಿಂಗಡ ಕೂಡ ಕೆಲಸಕ್ ಕೂಡ್‌ನ ಅದೆಚ್ಚಕೋ ಜನ, ಬಲ್ಯ ಬಲ್ಯ ಪದವಿಕ್ ಎತ್ತ್‌ಚಿ. ಅಯಿಂಗಕಿಂಜ ಎಚ್ಚಕೋ ಗಟ್ಟಿಗನಾಯಿತಿಂಜ ಗಣಪತಿ ಅಯಿಂಗಡ ಸಂಬಳ ನೂರ್ ಉರ್‌ಪಿಯಕ್ ಎತ್ತುವಕ್ ಇರುವದ್ ಕಾಲ ಬೋಂಡಿಯಾಚಿ. ಆಚೇಂಗಿ, ಅದ್‌ಂಗಾಯಿತ್ ಒನ್ನಾಂದೂ ವ್ಯಸನಪ್ಪಾಲ್. ಬದ್‌ಲಾಯಿತ್, ತಾಂಡ ಮನಸಾಕ್ ತೃಪ್ತಿ ಕೊಟ್ಟುವನ್ನತ ಕೆಲಸ ಮಾಡಿಯಂಡುಳ್ಳಂದ್ ಕುಸಿ ಇಂಜತ್. ಪತ್ರಿಕೋದ್ಯಮತ್‌ರ ಅನುಭವವೂ ಇಂಜಿಲೆ. ಧೈರ್ಯತ್ ಕೆಲಸಕ್ ಕೂಡಿತ್ತಾಚಿ. ಬಯ್ಯಂಜಿ ಪತ್ರಿಕೋದ್ಯಮಕ್ ಸಮ್ಮಂಧಪಟ್ಟ ಪುಸ್ತಕ ಓದಿತ್, ಅರ್ಥ ಮಾಡಿ ಯಂಡ್ ಜ್ಞಾನ ಪಡ್‌ಂದತ್. 1941 ಲ್ ಸ್ವಾತಂತ್ರ್ಯ ಪೋರಾಟ ಜೋರಾಯಿ ತಿಂಜತ್. ಪತ್ರಿಕೆರ ಸಂಪಾದಕ ಪಂದ್ಯಂಡ ಬೊಳ್ಳಿಯಪ್ಪ ಪಿಂಘ ಅಯಿಂಡ ಪೋಣ್ಣ್ ಸೀತಾ ಬೊಳ್ಳಿಯಪ್ಪ ಜೈಲ್‌ಕ್ ಪೋನ ಸಂದರ್ಭತ್ ಸಂಪಾದಕನಾಯಿತ್ ಅಧಿಕಾರ ವಹಿಯಂಡತ್. 1942 ಲ್ ಬ್ರಿಟಿಷ್ ಸರ್ಕಾರತ್‌ರ ವಿರುದ್ಧ, ಕೊಡಗು ಪತ್ರಿಕೆಲ್ ಎಳ್‌ದ್‌ನ ಸಂಪಾದಕೀಯಕಾಯಿತ್, ಆರ್ ತಿಂಗ ಜೈಲ್ ಶಿಕ್ಷೆ ಆಚಿ. ಪತ್ರಿಕೆ ಪ್ರಕಟಣೆ ನಿರ್ವಹಿಚಿಟ್ಟಿತ್. ಜೈಲ್‌ಂಜ ಪೋರಾಠೆ ಬಂದ ಪಿಂಘ “ಕೊಡಗು ಕಂಪೆನಿ”ಲ್ ಪತ್ರಿಕೆ ನಡ್‌ತುವಕ್ ಬಂಡವಾಳ ಇಲ್ಲತೆ, ಚಂದಾದಾರಳ ತೇಡಿಯಂಡ್ ಇಡೀ ಕೊಡಗ್‌ನ ಸುತ್ತಿಚಿ. 1945 ಲ್ ಪ್ರಭಾವಶಾಲಿ ವ್ಯಕ್ತಿಯ ಬೋರೆ ಪತ್ರಿಕೆ ಮಾಡುವಾಂ ದೆಣ್ಣೆತ್, ಸಂಪಾದಕನಾಯಿತ್ ಬರಂಡೂಂದೂ, ಸಂಬಳ ಜಾಸ್ತಿ ತಪ್ಪಾಂದೂ ಕೇಟಂಡತ್. ಆಚೇಂಗೂ, ಪ್ರಾಮಾಣಿಕತೆನ ಬುಟ್ಟಿತ್ ಪೋಯಿಲೆ. 1952 ಲ್ ಆಲ್ ಇಂಡಿಯಾ ರೇಡಿಯೋ ಡೆಲ್ಲಿಂಜ ಚಾಕ್ರಿಕ್ ಕೂಡುವಕ್ ಕಾಗದ ಬಾತೇಂಗಿಯೂ, ಪೋಕತೆ ಕೊಡಗು ಪತ್ರಿಕೆಲೇ ನಿಂದತ್, ನೈಚತ್. ಸ್ವಾತಂತ್ರ್ಯ ಕೊಟ್ಟಿತ್ ಚೆನ್ನಂಗ್ ಸಮಯತ್ ಸರಕಾರತ್‌ರ ಮುಖ್ಯ ಕಾರ್ಯದರ್ಶಿ ಆಯಿತಿಂಜ

ಶ್ರೀ ಐ. ಸಿ. ಸುಬ್ಬಯ್ಯ ಅಯಿಂಗ ರಾಜಕೀಯ ಪಿಂಞ ಪತ್ರಿಕಾ ರಂಗತರ ಸೇವೆಕ್ ಪತ್ರಿಕಲ ಆಯಿತ್ ಪತ್ತ್ ಏಕ್ ಜಾಗ ಮಂಜೂರ್ ಮಾಡಿತಪ್ಪೀಂದ್ ಎಣ್ಣಾನಕಲೂ ಬೋಂಡಾಂದೆಣ್ಣ್ ಚಿ. ಬಿ. ಡಿ. ಜಿ. ಆ ಜಾಗ ಬೋರೆ ಸ್ವಾತಂತ್ರ್ಯ ಪೋರಾಟಗಾರಂಗ್ ಕೊಟ್ಟ್ಚಿ. ಎಚ್ಚೆಕೋ ಸಂಘ - ಸಂಸ್ಥೆ, ಬಲ್ಯ ಬಲ್ಯ ವ್ಯಕ್ತಿಯ ಅಯಿಂಡ ಪರವಾಯಿತ್ ಪತ್ರಿಕೆಲ್ ಲೇಖನ ಎಳೊದುವಕ್ ಆಸೆ ಕಾಟುವಯಿಂಜತ್, ರೋಪು ಇಡುವ ಯಿಂಜತ್. ಆಚೀಂಗೂ ನ್ಯಾಯತರ ಪರವಾಯಿತ್ ಪತ್ರಿಕೆಲ್ ಎನ್ನತ ವಿಚಾರ ಎಳೊದುವಕೂ ಬೊತ್ತತೆ, ಪತ್ರಿಕೆರ ಘನತೆ ಗೌರವತನ ಕಾಪಾಡ್ಚಿ. ಇನ್ನನೆ ಬೊಳ್ತಿಯಂಡ್ ಬಂದ "ಕೊಡಗು ಪತ್ರಿಕೆ" 30-4-1973ಲ್ ಬೊಳ್ಳಿನಮ್ಮ ಕಂಡತ್. ಪತ್ರಿಕೋದ್ಯಮತರ ಜೊತೆಲೇ ಸಾಹಿತ್ಯ ಸೇವೆನೋ ಮಾಡಿಯಂಡ್ ಬಂದ ಗಣಪತಿ ಅಯಿಂಗ, ಸುಮಾರ್ ನಾಪದ್ (40) ಪುಸ್ತಕ ಎಳೊದಿತ್. 1982 ಲ್ 'ಕೊಡವರು, ಅವರ ಸಂಸ್ಕೃತಿ ಮತ್ತು ಸಂಪ್ರದಾಯ' ಪಿಂಞ 'ಮಾನವ' ಎಣ್ಣುವ ದಂಡ್ ಪುಸ್ತಕಕ್ ಕರ್ನಾಟಕ ಸಾಹಿತ್ಯ ಅಕಾಡೆಮಿ ಪ್ರಶಸ್ತಿ ಕೊಟ್ಟಿತ್. ಪತ್ರಿಕಾರಂಗತ್ ಇರುವದ್ ಕಾಲಕಿಂಜ ಜಾಸ್ತಿ ಸೇವೆ ಮಾಡ್ನಾಂಗ್ "ಪತ್ರಿಕಾ ಅಕಾಡೆಮಿ ಪ್ರಶಸ್ತಿ" ಕೊಟ್ಟಿತ್. ಸತ್ಯಶೋಧನೆ ಎಣ್ಣುವ ಗ್ರಂಥಕ್ ರಾಜ್ಯ ಸರ್ಕಾರತರ ಇನಾಂ ಕೊಟ್ಟಿತ್. ಇದೆಲ್ಲಾಂಗ್ಂಜ ಬಲ್ಯ ಪ್ರಶಸ್ತಿ ಎಣ್ಣಕ, ನಾಡ್‌ರ ಬಲ್ಯ ಎಳೊಕಾರ, ತತ್ವಜ್ಞಾನಿ, ರಾಷ್ಟ್ರಾದ್ಯಕ್ಷ ಡಾ| ಎಸ್. ರಾಧಾಕೃಷ್ಣನ್ ಕೂಡ ಅಯಿಂಡ ಪುಸ್ತಕ ಓದಿತ್ ವಿಮರ್ಶೆ ಮಾಡಿತ್ ನಲ್ಲ ಅಭಿಪ್ರಾಯ ಎಣ್ಣದ್. ಒರ್ ಎಳೊಕಾರಂಗ್ ಇದ್‌ಂಗ್ಂಜ ಬಲ್ಯ ಪ್ರಶಸ್ತಿ ಇಲ್ಲೆ. ಇನ್ನನೆ ತಾಂಡ ಬದ್‌ಕ್‌ನೆಲ್ಲ ಸಾಹಿತ್ಯ ಸೇವೆಕಾಯಿತೇ ಬೆಚ್ಚಿ ಬಿ. ಡಿ. ಗಣಪತಿ ಎಳೊವತ್ತೆಟ್ಟಿನೇ ಬಯತ್‌ಲ್ ಮರಣಪಟ್ಟಿತ್.

ಪಣವೇ ಬದ್‌ಕ್‌ಲ್ ಮುಖ್ಯ ಅಲ್ಲ, ಜ್ಞಾನ ಪಿಂಞ ಆತ್ಮತ್ಯಪ್ಪಿಯೇ ಮುಖ್ಯಂದ್ ಕಾಟಿ ತಂದ ಬಿ. ಡಿ. ಗಣಪತಿರ ಆದರ್ಶ ಈ ಸಮಾಜತ್ ಮೋಳ್‌ಕೇರಂಡು. □



## ಡಾ| ಐ. ಮಾ. ಮುತ್ತಣ್ಣ

- ಪುಟ್ಟಾನ ದಿನ - 1920ನೇ ಇಸವಿ  
ಪುಟ್ಟಾನ ಜಾಗ - ಮೈತಾಡಿ ಗ್ರಾಮ, ವೀರಾಜಪೇಟೆ ತಾಲ್ಲೂಕ್,  
ಕೊಡಗ್ ಜಿಲ್ಲೆ  
ಅಪ್ಪ - ಮಾದಪ್ಪ  
ಅವ್ವ - ಮುತ್ತವೆಂವ್ವ  
ಕಣ್ಮರೆ - 2002ನೇ ಇಸವಿ ಜನವರಿ 3

ಐಚಿಕ್ಕಿರ ಒಕ್ಕತ್ ಪುಟ್ಟಾನ ಡಾ| ಮುತ್ತಣ್ಣ, ಚೆರಿಯ ಜಿಲ್ಲೆ ಕೊಡಗಲ್ ಪುಟ್ಟಿತ್, ಅಂತರರಾಷ್ಟ್ರೀಯ ಮಟ್ಟತ್ ಕೇಳಿ ಎಡ್ತದ್ ಚೆರಿಯ ಸಾಧನೆ ಒಂದೂ ಅಲ್ಲ. ಮಿಡ್ಲ್ ಸ್ಕೂಲ್ ಪಿಂಞ ಹೈಸ್ಕೂಲ್ ವಿದ್ಯಾಭ್ಯಾಸ ಎಲ್ಲ ಮಡಿಕೇರಿ, ವೀರಾಜಪೇಟೆಲ್ ಮಾಡ್ಚಿ. ಮದ್ರಾಸ್ ವಿಶ್ವವಿದ್ಯಾನಿಲಯತ್ಂಜ “ಕನ್ನಡ ವಿದ್ವಾನ್” ಪದವಿ ಪಡ್ಂದ ಆದ್ಯ ಕೊಡಗರ್ ವಿದ್ಯಾರ್ಥಿ. ವಿದ್ಯಾರ್ಥಿ ಆಯಿತಿಪ್ಪಕಲೇ ಕವನ, ಲೇಖನ ಎಳ್ತದವಯಿಂಜತ್. ಇಂಗ್ಲಿಷ್, ಕನ್ನಡ ಪಿಂಞ ಕೊಡವ ಮೂಂದ್ ಭಾಷೆಲೂ ಎಳ್ತದಿತ್ ತ್ರಿಭಾಷಾ ಸಾಹಿತಿಂದ್ ಪೆದ ಎಡ್ತಿ ತಿಂಜತ್. ಎಳ್ತಕಾರನಾಂಡು ಎಣ್ಣುವ ಗುರಿ ಬೆಚ್ಚಂಡೇ ಸಂಸ್ಕೃತ ಸಹ ಪಡ್ಚಿತ್. ಒಮ್ಮ ನಾಪೋಕ್ಲಲ್ ನಡ್ಂದ ಸಾಹಿತ್ಯ ಸಮ್ಮೇಳನತ್ ಭಾಗವಹಿಸಿತ್, ಅಲ್ಲಿ ಶಿವರಾಮ ಕಾರಂತನ್ನತ ಸಾಹಿತಿಗಳ ಕಂಡಿತ್ ಇಂಞಚ್ಚಕ್ ಪುರ್ಡ್ ಪುಟ್ಟಚಿ.




ಒಬ್ಬ ವ್ಯಕ್ತಿ ಒರ್ ವಿಷಯತ್ ಕೇಳಿ ಎಡ್‌ಪದೇ ಕಷ್ಟ. ಅನ್ನತಲ್ಲಿ ಡಾ| ಮುತ್ತಣ್ಣ ಅಯಿಂಗ ಸಾಹಿತಿ, ಸಂಶೋಧಕ, ಶ್ರೇಷ್ಠ ಕವಿ, ಅಂತರ ರಾಷ್ಟ್ರೀಯ ಮಟ್ಟತ್‌ರ ಇತಿಹಾಸಕಾರ, ಬಲ್ಯ ಶಿಕ್ಷಣ ತಜ್ಞ ಪಿಂಞ ನಲ್ಲೋರ್ ದಾರ್ಶನಿಕನೂ ಆಯಿ ತಿಂಜತ್. ಮಡಿಕೇರಿ ಹೈಸ್ಕೂಲ್‌ರ ಉಪಾಧ್ಯಾಯಾಯಿತ್ ಕೆಲಸ ಮಾಡಿಯಂಡಿಪ್ಪಕ "ಎ ಟೈನಿ ಮಾಡೆಲ್ ಸ್ಟೇಟ್ ಆಫ್ ಸೌತ್ ಇಂಡಿಯಾ" (A Tiny Model State of South India) ಎಣ್ಣುವ ಐತಿಹಾಸಿಕ ಇಂಗ್ಲಿಷ್ ಪುಸ್ತಕ ಎಳ್‌ದ್‌ಚಿ. ಈ ಗ್ರಂಥ ಜನಪ್ರಿಯವು ಆಚಿ. ರಾಷ್ಟ್ರೀಯ ಸಾಹಿತ್ಯ ಕ್ಷೇತ್ರತ್ ಮುತ್ತಣ್ಣಂಗ್ ಒರ್ ಸ್ಥಾನವೂ ಕೊಟ್‌ಚಿ. ಚೆನ್ನಂಗ್ ಸಮಯ "ಸತ್ಯಾರ್ಥಿ" ಎಣ್ಣುವ ಪತ್ರಿಕೆ ನಡ್‌ತಿಯಂಡಿಂಜತ್. ಅಲ್ಲಿಂಜ ಚೆನ್ನಂಗ್ ಸಮಯ ಬಾಂಬೆಲೂ ಪತ್ರಕರ್ತ ನಾಯಿತ್ ಕೆಲಸ ಮಾಡಿಯಂಡಿಂಜತ್. ಸತ್ಯಕ್ ನೇರೆ ಎಳ್‌ದುವಯಿಂಜ ಅಯಿಂಡ ಎಳ್ತ್, ಅಯಿಂಗಕ್ ಸುಮಾರ್ ವಿರೋಧಿಯಳ ಸೃಷ್ಟಿ ಮಾಡ್‌ಚಿ. ಇದ್‌ಲಿಂಜ ಬುಡ್‌ಂಜಿತ್, ಕೆಲಸಕ್ ರಾಜೀನಾಮೆ ಕೊಡ್‌ತಿತ್, ಉತ್ತರ ಭಾರತಕ್ ಪೋಯಿತ್, ಅಲ್ಲಿ ಸುಮಾರೆಲ್ಲ ಕಾಲೇಜ್‌ಲ್ ಉಪನ್ಯಾಸಕನಾಯಿತ್ ಕೆಲಸ ಮಾಡಿಯಂಡೇ, ಇತಿಹಾಸ ಸಂಶೋಧನೆರ ಕಾರ್ಯ ಮಾಡುವಯಿಂಜತ್. ಅಲ್ಲಿಂಜ 1960ನೇ ಇಸವಿಲ್ ಆಫ್ರಿಕಾಕ್ ಪೋಚಿ. ಅಲ್ಲಿ ಇಥಿಯೋಪಿಯಾ ದೇಶತ್ ಶಿಕ್ಷಣಾಧಿಕಾರಿ ಯಾಯಿತ್ ಕಾರ್ಬಾರ್ ಮಾಡಿಯಂಡಿಂಜತ್. ಇದೇ ಸಮಯತ್ ಇಥಿಯೋಪಿಯಾತ್‌ರ ರಾಜನಾಯಿತಿಂಜ ಹೈಲಿಸೆಲಾಸೆಕ್ ಪಾರ ಎಣ್ಣಿ ಕೊಡ್‌ತದ್ ನೇರಾಯಿತೂ ಬಲ್ಯ ವಿಷಯವೆ. ಅಲ್ಲಿಯತ್‌ರ "ಇಥಿಯೋಪಿಯನ್ ಹೆರಾಲ್ಡ್" ಎಣ್ಣುವ ಪತ್ರಿಕೆಲ್ ಇಡೀ ಪ್ರಪಂಚತ್ ಒರೇ ತರತ್‌ರ ಶಿಕ್ಷಣ ಇರೊಂಡು ಎಣ್ಣುವ ವಿಷಯತ್ "ಅವರ್ ಎಜುಕೇಷನ್" ಎಣ್ಣುವ ವೈಚಾರಿಕ ಲೇಖನತ್‌ನ ಧಾರಾವಾಹಿರ ಮಾದರಿಲ್ ಅಂಜಿ ಕಾಲಕೆತ್ತನೆ ಪ್ರಕಟಪಡ್‌ತ್‌ಚಿ. ಅದ್‌ನ ಓದ್‌ನ ಪ್ರಪಂಚತ್‌ರ ಎಲ್ಲ ಶಿಕ್ಷಣ ತಜ್ಞಂಗಡ ದೃಷ್ಟಿ ಮುತ್ತಣ್ಣಂಡ ಮೇಲೆ ಇಂಜತ್. ಆಫ್ರಿಕಾತ್‌ಂಜ ಇಂಗ್ಲೆಂಡ್‌ಕ್ ಪೋಚಿ. ಅಲ್ಲಿ ಬ್ರಿಟಿಷ್ ಲೈಬ್ರರಿಲ್ ಚರಿತ್ರರ ದಾಖಲೆನೆಲ್ಲ ಪರಿಶೀಲನೆ ಮಾಡ್‌ಚಿ. ಆನಗುಂಡ್, ಕೊಡಗ್‌ರ ಇತಿಹಾಸಕ್ ಸಂಬಂಧಪಟ್ಟನೆಕೆ ಸುಮಾರ್ ಸಂಶೋಧನಾ ಗ್ರಂಥ ಎಳ್‌ದುವಕ್ ಪ್ರಯೋಜನ ಆಚಿ. 1967ನೇ ಇಸವಿಲ್ ಕೆನಡಾಕ್ ಪೋಚಿ. ಅಲ್ಲಿಯತ್‌ರ ರಾಷ್ಟ್ರೀಯತೆ ಪಡ್‌ಂದತ್. ಸುಮಾರ್ ನುಪ್ಪತ್ತಮೂಂದ್ ಕಾಲ ಕೆನಡಾತ್ ಇಂಜತ್. ಅಲ್ಲಿ ಇಂಡೊ-ಕೆನಡಿಯನ್ ಸಂಘಟನೆರ ಮುಖ್ಯ ಸದಸ್ಯನಾಚಿ.

ಡಾ| ಮುತ್ತಣ್ಣ ಸುಮಾರ್ ನಾಪದಾಂಗೂ ಜಾಸ್ತಿ ಪುಸ್ತಕ ಎಳ್‌ದಿತ್. ಅದ್‌ಲೆಲ್ಲ ಕೊಡಗ್, ಕೊಡವ ಸಂಸ್ಕೃತಿ ಇದ್‌ಂಗೇ ಆದ್ಯ ಸ್ಥಾನ. ಇಯಂಗಡ "ಹಿಸ್ಟರಿ ಆಫ್ ಮಾಡರ್ನ್ ಕರ್ನಾಟಕ" ಎಣ್ಣುವ ಗ್ರಂಥಕ್ ಡಾಕ್ಟರೇಟ್ ಕೊಟ್‌ಚಿ. ಇಂಞೊಂದ್

ವಿವಾದಾತ್ಮಕ ಗ್ರಂಥ "ಟಿಪ್ಪುಸುಲ್ತಾನ್ ಎಕ್ಸ್‌ಪೋಸೆಡ್", ಟಿಪ್ಪುಸುಲ್ತಾನ್ ಕೊಡಗಲ್ ನಡಾತಾನ ಆಕ್ರಮಣಾತ್‌ರ ವಿಷಯತ್‌ ಎಳಾಡ್‌ನದ್. 1963 ಲ್ ಆದಿಕವಿ ಹರದಾಸ ಅಪ್ಪಚ್ಚಕವಿರ "ನಾಲ್‌ನಾಟಕ" ಕನ್ನಡಕ್ ಅನುವಾದ ಮಾಡ್‌ಚಿ. ಈ ಪುಸ್ತಕಕ್ ಕರ್ನಾಟಕ ಸಾಹಿತ್ಯ ಅಕಾಡೆಮಿ ಪ್ರಶಸ್ತಿ ಕೊಟ್‌ಚಿ. ಕೊಡವ - ಕನ್ನಡ ಡಿಕ್ಷನರಿ (ಕೈಪುಡಿ) ಅದ್ಯವಾಯಿತ್‌ ರಚನೆ ಮಾಡ್‌ನಯಿಂಗಳು ಇಯಂಗಳೇ. ಇಚ್ಚಕೆಲ್ಲ ಸಾಧನೆ ಮಾಡ್‌ನ ಮುತ್ತಣ್ಣಂಡ ಕವನ, ಲೇಖನ, ಪುಸ್ತಕ ವಿದೊಂದಾಂಗೂ ಸ್ಕೂಲ್ ಕಾಲೇಜ್‌ಲ್ ಪಠ್ಯ ಪುಸ್ತಕ ಆಪನ್ನತ ಅವಕಾಶ ಕೊಟ್‌ನದೇ ಇಲ್ಲೆ. ಬಲ್ಯ ವಿದ್ಯಾಂಸನಾಯಿತಿಂಜಕಲೂ, ನಾನೋರ್ ಸಾಮಾನ್ಯ ಮನುಷ್ಯ ಎಣ್ಣುವಯಿಂಜ ಡಾ| ಮುತ್ತಣ್ಣಂಗ್ ವಿದ್ಯೆರ ಕೂಡ ವಿನಯ ಕೂಡ ಇಂಜತೇಂದ್ ಅರ್ಥ ಆಪ. ಎಂಬತ್ತ ದಂಡನೆ ಬಯತ್‌ಲ್ ಮೈಸೂರ್‌ಲ್ ಮರಣಪಟ್ಟಿ ಡಾ| ಮುತ್ತಣ್ಣಂಡ ಚಾವು ಕೊಡಗ್‌ಕೂ, ಸಾಹಿತ್ಯ ಲೋಕಕೂ ಬಲ್ಯೋರ್ ನಷ್ಟವೇ ಸರಿ.

ಸ್ವಂತ ಸಂಪಾದನೆ ಎಕ್ಕೊಲು ಬಲ್ಯ ಸಂಪಾದನೆ ಎಣ್ಣುವಯಿಂಜ ಮುತ್ತಣ್ಣ, ತಾನ್ ಸಂಪಾದನೆ ಮಾಡ್‌ನ ಎಳ್ತ, ವಿದ್ಯೆ ಪಿಂಞ ಸಂಶೋಧನೆ ಎಲ್ಲನೋ ನಂಗಕ್ ಬುಟ್ಟಿತ್‌ ಪೋಯಿತ್. □



## ಮಹಾತ್ಮ ಗಾಂಧೀಜಿ

- ಪುಟ್ನನ ದಿನ - 1869ನೇ ಇಸವಿ ಅಕ್ಟೋಬರ್ 2  
ಪುಟ್ನನ ಜಾಗ - ಪೋರ್ಬಂದರ್, ಗುಜರಾತ್  
ಅಪ್ಪ - ಕರಮಚಂದ್ ಗಾಂಧಿ  
ಅವ್ವ - ಪುತಲೀ ಬಾಯಿ (ಪುತ್ಲಿಬಾಯಿ)  
ಕಣ್ಮರೆ - 1948ನೇ ಇಸವಿ ಜನವರಿ 30

ಗಾಂಧೀಜಿರ ಪೂರ್ತಿ ಪೆದ, ಮೋಹನದಾಸ ಕರಮಚಂದ್ ಗಾಂಧಿ. ಚಿರಿಯ ಕ್ಷಣನಾಯಿತಿಪ್ಪಕ ದುಂಬ ಇಗಾಣ ಸ್ವಭಾವ. ದಾಡ ಕೂಡೆಯೂ ಜಾಸ್ತಿ ಕೂಡುವ ಯಿಂಜಿಲೆ, ತಕ್ಕೂ ಪರೆವಯಿಂಜಿಲೆ. ಸ್ಕೂಲ್ ಬುಟ್ಟಿದು ಮನೆಕ್ ಓಡಿ ಬಪ್ಪ ಯಿಂಜತ್. ಮನೆಲ್ ಕಾಯಿಲಕಾರ ಅಪ್ಪಂಡ ಸೇವೆ ಮಾಡುವದ್ ಗಾಂಧೀಜಿಕ್ ದುಂಬ ಕುಸಿ. ಚಿರಪತಿಪ್ಪಕ ಓದ್ನ ಶ್ರವಣಂಡ ಕಥೆ, ಅಪ್ಪ ಅವ್ವಂಡ ಸೇವೆ ಮಾಡುವಕ್ ಇಂಬು ಕೊಡ್ತತ್. ಚಿರಪತ್ ನೋಟನ ಸತ್ಯ ಹರಿಶ್ಚಂದ್ರ ನಾಟಕ ಸತ್ಯತಾರ ಬಟ್ಟೆಲ್ ನಡಪ್ಚಿಟ್ಟತ್. ಕ್ಷಣನಾಯಿತಿಪ್ಪಕ "ಇರಾಟ್" ದುಂಬ ಪೋಡಿ. ಪೀಡೆ, ಪಿಶಾಚಿ, ಪಾಂಬು ಇನ್ನತ ಕಲ್ಪನೆಲ್ ಬೊತ್ತುವಯಿಂಜತ್. ಅದ್ನ ಕೆಲಸಕರ್ತಿರ ಕೂಡ ಎಣ್ಣೆ ಚಿ. ಅಕ್ಕ ಅವ, ಅನ್ನನೆ ಪೋಡಿ ಆಪಕೆಲ್ಲ 'ರಾಮ' 'ರಾಮ' ಎಣ್ಣೆಯಂಡಿರ್ ಅಕ್ಕ ಪೋಡಿ ಆಪಲೆಂದ್ ಎಣ್ಣೆ ಕೊಡ್ತತ್. ಅದೇ ರಾಮನಾಮ ಗಾಂಧೀಜಿರ ಪ್ರಾಣ ಪೋಪಲ್ಲಿ ಕೆತ್ತನೆಯೂ ರಕ್ಷಾಮಂತ್ರ ಆಯಿಂಜತ್.

ಚಾವಕಲೂ 'ಹೇ ರಾಮ್' ಎಣ್ಣೆ ತೇ ಪ್ರಾಣತ್ಯಾಗ ಮಾಡ್‌ನಾನ ನಂಗ ಇಲ್ಲಿ ಗೇನ ಮಾಡಿಯವಲು.

ಒಮ್ಮೆ ಮೋಹನದಾಸ ಓದಿಯಂಡಿಪ್ಪಕ ಸ್ಕೂಲ್‌ಕ್ ಇನ್ಸ್‌ಪೆಕ್ಟರ್ ಬಾತ್. ಮಕ್ಕಕೆಲ್ಲ ಅಂಜಿ ಇಂಗ್ಲಿಷ್ ಶಬ್ದ ಎಳೆದುವಕ್ ಎಣ್ಣೆಚಿ. ಕೆಟಲ್ (Kettle) ಎಣ್ಣುವ ಶಬ್ದತಾರ ಸ್ವೆಲ್ಲಿಂಗ್‌ನ ಮೋಹನದಾಸ ತಪ್ಪು ಎಳೆದಿತಿಂಜತ್. ನೋಟನ ಮಾಸ್ಪರ್ ಪಕ್ಕತ ಕ್ಲಾಂಡ ನೋಟಿಯಂಡ್ ಎಳೆದೇಂದ್ ಸನ್ನೆ ಮಾಡ್‌ನಕಲೂ, ಗಾಂಧೀಜಿ ಮುಂಡತೇ ಇಂಜತ್. ಇನ್ಸ್‌ಪೆಕ್ಟರ್ ಪೋನ ಪಿಂಞ ಮಾಸ್ಪರ್ ಮೋಹನದಾಸಂಗ್, ಎಣ್ಣೆನಾನ ಅರ್ಥ ಮಾಡಿಯವತ ದಡ್ಡ ಎಣ್ಣಿಯಂಡ್ ಬಜ್ಜತ್. ಆಚೇಂಗಿ ಮೋಹನದಾಸಂಗ್ ತಾನ್ ಮಾಡ್‌ನದ್ ತಪ್ಪುಂದ್ ಆಯಿಲೆ. ಕಾಪಿ ಮಾಡ್‌ವದ್ ತಪ್ಪು. ಮಾಸ್ಪರ್ ಮಕ್ಕ ಕಾಪಿ ಮಾಡತನ್ನನೆ ನೋಟಿಯವಂಡು. ಅಂತಲ್ಲಿ ಮಾಸ್ಪರೇ ಕಾಪಿ ಮಾಡ್‌ಂದ್ ಎಣ್ಣುವದ್ ಸೆರಿ ಅಲ್ಲಾಂದ್ ಮೋಹನದಾಸ ಗೇನ ಮಾಡ್‌ಚಿ. ಅಚ್ಚಕ್ ಚಿರಿಯ ವಯಸ್‌ಲೇ ಮನ್‌ಸಲ್ ಪುಟ್ವಾನ ಸತ್ಯ ನೀತಿರ ವಿಷಯ ಬಲ್ಯಂವೊನಾನನೆಕೆ, ಬಲ್ಯ ಮರವಾಯಿತ್ ಬೊಳ್‌ಂದತ್. ಅದೇ ಸತ್ಯ, ನೀತಿ, ಅಹಿಂಸೆರ ಬಟ್ವೆಲ್ ಗಟ್ಟಿ ಆಯಿತಿಂಜ ಬ್ರಿಟಿಷ್ ಸರ್ಕಾರತನ ಪೊಡಿ ತಟ್ವೆಚಿ.

ಸ್ಕೂಲ್‌ಲ್ ಡ್ರಿಲ್ ಖಡ್ಡಾಯ ಆಯಿತಿಂಜತ್. ಒರ್ ದಿನ ಅಪ್ಪಂಡ ಸೇವೆ ಮಾಡಿಯಂಡ್ ಸಮಯವೇ ಗೊತ್ತಾಗತೆ ಡ್ರಿಲ್‌ಕ್ ತಪ್ಪೆಚಿ. ಮಾಸ್ಪರ್ ಎನ್ನಾಂಗ್ ಬಂದ್‌ಲೇಂದ್ ಕೇಪಕ, ಸತ್ಯ ಎಣ್ಣೆನಕಲೂ, ಉಪಾದ್ರಿ ನೀನ್ ಪೊಟ್ವ್ ಪರೆವಿ ಯಾಂದೇ ಎಣ್ಣೆಚಿ. ಸತ್ಯವಂತನಾನ ಮೋಹನದಾಸಂಗ್ ದಾರೇಂಗಿ ಪೊಟ್ವ್ ಪರೆವಿ ಯಾಂದ್ ಎಣ್ಣೆರತೇಂಗಿ ಎಲ್ಲಾಂಗಿಂಜ ನೊಂಬಲ ಆಪಯಿಂಜತ್. ಈ ಘಟನೆ ಆನ ಪಿಂಞ ಸತ್ಯವಂತನಾಂಡುವೇಂಗಿ ಎಚ್ಚರತಲೂ ಇರೊಂಡು ಎಣ್ಣುವಾನ ಪಡ್‌ಚತ್. ವೈಷ್ಣವ ಆಯಿತಿಂಜ ಗಾಂಧಿ ಮನೆತನಕಾರ ಯರ್ಚಿ, ಕಳ್ಳನೆಲ್ಲ ತೊಡುವಯಿಂಜಿಲೆ. ಯರ್ಚಿ ತಿಂಬ ಒರ್ ಕ್ಲಾಂಡ ಸಿನೇಚಾರ ಆನ ಪಿಂಞ ಆ ಕ್ಲಾಂಡ ಗಾಂಧೀಜಿನೋ ಅಂಪೊಂಡ ಅಣ್ಣನೋ ಯರ್ಚಿ ತಿಂಬ್‌ಚಿಡುವಕ್ ನೋಟ್‌ಚಿ. ನಾನ್ ಯರ್ಚಿ ತಿಂಬಾಂಗೇ ಇಚ್ಚಕ್ ಬಲಿಷ್ಠನಾಯಿತುಳ್ಳೊ, ಧೈರ್ಯ ವಂತನಾಯಿತುಳ್ಳೊ; ಬಲಿಷ್ಠಂಗಳಾಚೇಂಗಿ ಮಾತ್ರ ಬ್ರಿಟಿಷ್ ಓಡ್‌ಚಿಡುವಕ್ ಕಯ್ಯುವೊಂದ್ ಎಣ್ಣೆತ್ ಅಯಿಂಗಳ ಮಿನ್‌ಕ್‌ಚಿ. ಅಕ್ಕಲೇ ದೇಶಕ್ ಸ್ವಾತಂತ್ರ್ಯ ಕೊಂಡಬರೊಂಡು, ಬ್ರಿಟಿಷ್‌ಕಾರಳ ದವುತಂಡು ಎಣ್ಣುವ ಪುರ್‌ಡ್‌ಲ್ ಅಣ್ಣನೂ, ತಮ್ಮಣನೂ ಯರ್ಚಿ ತಿಂದತ್. ವಾಂತಿ ಮಾಡ್‌ಚಿ. ಬೀಡಿ ಬಲ್‌ಚತ್. ದುಡ್ಡಿಲ್ಲ ತಾಪಕ ಮನೆಲಿಂಜ ಚೂರ್ ಪಾರ್ ಪೊನ್ನಾನ ಕಟ್ಟತ್. ಇದೆಲ್ಲ ಮಾಡ್‌ನದ್

ದೇಶಕಾಯಿತ್ ಅಲ್ಲತೆ ಗೌಜಿ ಮಾಡುವಕಾಯಿತ್ ಅಲ್ಲ. ಚೆನ್ನಂಗೇ ದಿವಸತ್ ಆ ಕಣ್ಣ ಎಣ್ಣಾನದ್ ಪೊಟ್ವೊಂದ್ ಗಾಂಧೀಜಿಕ್ ತೋಂದ್‌ಚಿ, ತಾಂಡ ಆತ್ಮಕ್ ವಿರುದ್ಧವಾಯಿತ್ ನಡಂದಂಡುಳ್ಳ ಕಾರ್ಬಾರ್‌ನುಂಡ್ ಗಾಂಧೀಜಿಕ್ ಪಾಪಪ್ರಜ್ಞೆ ಕಾಡುವಯಿಂಜತ್. ದೇವಡ ಸಮಾನ ಉಳ್ಳ ಅಪ್ಪ-ಅವ್ವಂಗ್ ಮೋಸ ಮಾಡಿಯಂ ದುಳ್ಳಂದ್ ಗೇನ ಮಾಡ್‌ನ ಗಾಂಧೀಜಿ ಕಾಯಿಲಕಾರ ಅಪ್ಪಂಡ ಮಿಂಞತ್ ಮಾಡ್‌ನ ತಪ್ಪುನ ಎಣ್ಣುವ ದೈರ್ಯ ಇಲ್ಲತೆ, ಕಾಗದತ್ ಎಳಾದಿತ್ ಅಪ್ಪಂಡ ಕೈಲ್ ಕೊಡ್‌ತತ್. ಅದನ್ನೆಲ್ಲ ಓದ್‌ನ ಅಪ್ಪ ಕಣ್ಣೀರ್‌ಟ್ಟಿತ್. ಕಾಗದ ಓದಿತ್ ಅಪ್ಪ ಪೊಯ್ಯುವಾಂದ್ ಗೇನ ಮಾಡ್‌ನ ಗಾಂಧೀಜಿಕ್ ಅಪ್ಪ ಮೊರ್‌ಡುಮಾನ ಕಂಡಿತ್ ಪೊಜ್ಜಾಂಗಿಂಜ ನೊಂಬಲಾಚಿ. ಬದ್‌ಕ್‌ಲ್ ಇನ್ನತ ತಪ್ಪು ಪುನಃ ಮಾಡುವಕಾಗಾಂದ್ ಮನ್‌ಸಾಲೇ ನಿರ್ಧಾರ ಮಾಡ್‌ಚಿ.

ಮಿಂಞಕ್ ಲಾಯರ್ ಓದುವಕ್ ಇಂಗ್ಲೆಂಡ್‌ಕ್ ಪೋನಲ್ಲಿ ಯರ್ಚಿ ಪೋಡ್, ಮುಟ್ಟೆ ಸಹ ತಿಂದಾಲೆ. ಒರ್ ತುಳಿ ಕಳ್ಳ ಕುಡ್‌ಚಿಲೆ. ಇದ್ ಗಾಂಧೀಜಿರ ಬಾಲ್ಯತರ್ ಗಟ್ಟಿ ನಿರ್ಧಾರತರ್ ಪರಿಣಾಮ. ಇಂಗ್ಲೆಂಡ್‌ಲ್ ಶೀತ ಜಾಸ್ತಿಯಾಯಿತ್ ಬ್ರಾಂಕೈಟ್‌ಸ್ ಆಯಿತಿಂಜತ್. ಡಾಕ್ಟರ್ ಯರ್ಚಿ ತಿಂಗತೆ ಪೋನಕ ನೀನ್ ಚತ್ ಪೋಪಿಯಾಂದ್ ಎಣ್ಣೆಚಿ. ಚಾವಂಡು ಎಣ್ಣುವದೇ ದೈವವಿಧಿ ಆನಕ, ನಾನ್ ಚಾವಿ ಅಲ್ಲತೆ, ಇಂಗ್ಲೆಂಡ್‌ಕ್ ಬಪ್ಪಾಂಗ್ ಮಿಂಞ ಅಪ್ಪಂಡ ಕಾಲ್ ಪುಡ್‌ಚಿತ್ ಮಾಡ್‌ನ ಪ್ರತಿಜ್ಞೆನ ಮುರಿಪಾಲೆ ಎಣ್ಣೆಚಿ ಗಾಂಧೀಜಿ, ತಾಂಡ ಆತ್ಮ ಶಕ್ತಿರ ಬಲತ್ ಪುನಃ ಆರೋಗ್ಯವಂತ ನಾಚಿ. ಇಂಗ್ಲೆಂಡ್‌ಲ್ ಅಲ್ಲಿಯತರ್ ಜನಡ ಮಾದಾರಿಯೇ ವೇಷ, ಭಾಷೆ ಇರೊಂಡೂಂದ್ ಗೇನ ಮಾಡ್‌ನ ಗಾಂಧೀಜಿ ದುಂಬ ದುಡ್ಡ್ ಖರ್ಚ್ ಮಾಡಿತ್ ಸೂಟ್, ಬೂಟ್, ಟೈ ಎಲ್ಲ ಎಡ್‌ತತ್. ಒರ್ ಡಾನ್ಸ್ ಮಾಸ್ಟರ್‌ರಲ್ಲಿಕ್ ಪೋಯಿತ್ ಡಾನ್ಸ್ ಪಡಿಪಕ್ ಸುರು ಮಾಡ್‌ಚಿ. ಸಂಗೀತ ವಾದ್ಯ ಪಡಿಪಕೂ, ಇಂಗ್ಲಿಷ್ ಪಿಂಞ ಫ್ರೆಂಚ್ ಭಾಷೆಲ್ ತಕ್ಕ್ ಪರೆವಕ್ ಪಡಿಪ ಕ್ಲಾಸ್‌ಕೂ ಕೂಡ್‌ಚಿ. ಇದೆಲ್ಲ ಮೂಂದ್ ತಿಂಗ ಮಾಡ್‌ಚಿ. ಅದಾನದು ಒರ್ ದಿವಸ ಗೇನ ಮಾಡ್‌ಚಿ. ಇಂಗ್ಲೆಂಡ್‌ಕ್ ಲಾಯರ್ ಓದುವಕ್‌ಂದ್ ಬಂದಿತ್, ಅಣ್ಣ ಕಷ್ಟಪಟ್ಟಿತ್ ದುಡ್ಡ್ ಕೂಟಿತ್ ನಾಕ್ ಓದೋಕ್ ಅಯೆಚಂಡಿಪ್ಪಕ, ನಾನ್ ಇಚ್ಚೆಲ್ಲ ದಾಳಾದೂಳಿ ಮಾಡುವದ್ ಸೆರಿಯಾಂದ್ ಗಾಂಧೀಜಿರ ಒಳ್‌ಮನ್‌ಸ್ಸ್ ಕೇಟಿತ್. ಅಂದಾಂಜ ಕಮ್ಮಿ ದುಡ್ಡ್‌ಲ್ ಸರಳ ಜೀವನ ನಡ್‌ತುವಕ್ ಸುರು ಮಾಡ್‌ಚಿ. ಅಲ್ಲಿಂಜ ಕಡೇಕೆತ್ತನೆಯೂ ಅದೇ ಸರಳತೆನ ಉಳ್‌ತಿಯಂಡತ್.

ಇಂಗ್ಲೆಂಡ್‌ಂಜ ವಾಪಾಸ್ ಬಂದ ಪಿಂಞ ಏದೇಂಗಿ ಕೇಸ್ ಕ್‌ಟ್ಟುವಾಂದ್ ತೇಡಿಯಂಡಿಂಜತ್. ಅಕ್ಕ ದಕ್ಷಿಣ ಆಫ್ರಿಕಾತ್‌ಂಜ ಭಾರತೀಯಂಗ ಒರ್ ಕೇಸ್‌ಕ್

ಅಲ್ಲಿಕ್ ಬಪ್ಪಕ್ ಮಾಡ್‌ಚಿ. ಅಲ್ಲಿಂಜ ಗಾಂಧೀಜಿರ ಜೀವನತ್‌ರ ದಿಕ್ಕೇ ಬದಲಾಚಿ. ಅಲ್ಲಿ ಭಾರತೀಯಂಗಕೂ, ನೀಗ್ರೊ ಜನಕೂ ಬ್ರಿಟಿಷ್‌ಕಾರ ಕೊಡ್‌ಪ ಕಷ್ಟತ್‌ನ ಕಣ್ಣಾರೆ ಕಂಡಿತ್ ಪೋರಾಟಕ್ ಮೊಳಿ ಇಟ್ಟಿತ್. ಅಹಿಂಸೆರ ಬಟ್ಟೆಲ್ ಗೆಲುವು ಪಡ್‌ಂದತ್. ಅಲ್ಲಿಂಜ ವಾಪಾಸ್ ಬಪ್ಪಕ ಅಲ್ಲಿಯತ್‌ರ ಜನ ಕೊಡ್‌ತ ಎಚ್ಚಿಕೋ ಪಣ, ಪೊನ್ನ ಎಡ್‌ತವತನೆಕೆ ವಾಪಾಸ್ ಬಾತ್. ಬಪ್ಪಕ ಅಹಿಂಸೆಲ್ ಪಡ್‌ಂದ ಗೆಲುವುರ ಅನುಭವತ್‌ನ ಎಡ್‌ತಂಡ್ ಬಾತ್. ಅದ್‌ಲೇ ಭಾರತಕ್ ಸ್ವಾತಂತ್ರ್ಯ ಕೊಂಡ ಬಾತ್. ಅದ್‌ಂಗಾಯಿತ್ ಗಾಂಧೀಜಿ ಪಟ್ಟ ಕಷ್ಟ ಚೆರಿಯದಲ್ಲ. 1915 ಲ್ ದಕ್ಷಿಣ ಆಫ್ರಿಕಾತ್‌ಂಜ ಭಾರತಕ್ ಬಂದ ಗಾಂಧೀಜಿ ಅಲ್ಲಿಂಜ 32 ಕಾಲ ಉಪವಾಸ, ಸತ್ಯಾಗ್ರಹ, ಜೈಲ್‌ವಾಸ ಇದ್‌ಲೇ ವಯಂಗಿತ್ ನಂಗಡ ದೇಶಕ್ ಸ್ವಾತಂತ್ರ್ಯ ಕೊಂಡ ಬಾತ್. 1924 ಸೆಪ್ಟೆಂಬರ್ 18 ಲ್ 21 ದಿನತ್‌ರ ಉಪವಾಸ ಸತ್ಯಾಗ್ರಹ ಮಾಡಿತಿಂಜತ್. ಅದೂ ದೇಶಕಾಯಿತ್, ಈ ದೇಶತ್‌ರ ಜನಕಾಯಿತ್. ಇನ್ನನೆ ಮೋಹನದಾಸ ಒಮ್ಮೆ ಮಾಡ್‌ನ ತಪ್ಪುನ ಇಂಇಂಮ್ಮೆ ಮಾಡತೆ, ಆತ್ಮಸಾಕ್ಷಿಕ್ ಸರಿಕಂಡನೆಕೆ ಸತ್ಯತ್ ಅಹಿಂಸೆರ ಬಟ್ಟೆಲ್ ಬದ್‌ಕರ ಉದ್ದ ಕೂ ನಡ್‌ಂದತ್. ಅದ್‌ಂಡ ಪರಿಣಾಮತ್ ಇಡೀ ದೇಶತ್‌ರ ಕಣ್ಣಿ ಆಚಿ. ನಂಗಡೆಲ್ಲೆಡ ಪ್ರೀತಿರ ಬಾಪೂಜಿ ಆಚಿ. ರಾಜಕೀಯ ಭಿನ್ನಾಭಿಪ್ರಾಯತ್‌ನುಂಡ್ ಅಚ್ಚಕ್ ಬಲ್ಯ ಮಹಾತ್ಮಂಗೂ, ಅಜಾತಶತ್ರುಕೂ ಶತ್ರು ಉಂಡಾಂದ್ ಲೋಕವೇ ಬೇರ್‌ಚಿಡುವನೆಕೆ ನಾಥೂರಾಮ್ ಗೋಡ್ಲೆ ಎಣ್ಣುವ ವ್ಯಕ್ತಿರ ಬೊಡಿಕ್ ಬಲಿಯಾಚಿ. ಮಹಾತ್ಮ ಹುತಾತ್ಮನಾಚಿ!

ಗಾಂಧೀಜಿ ಕಾಟಿತಂದ ಸತ್ಯಾಗ್ರಹತ್‌ನ ಇಂದ್ ಹಿಂಸಾಮಾರ್ಗತ್ ಜನ ಬಳಸಿ ಯೆಂಡುಂಡಾ? ಉಪವಾಸತ್‌ನ ನಂಗಡ ಸ್ವಾರ್ಥ ಸಾಧನೆಕಾಯಿತ್ ಉಪಯೋಗ ಮಾಡಿಯೆಂಡುಂಡಾ? ಮನುಷ್ಯನಾನ ಪಿಂಇ ತಪ್ಪು ಮಾಡುವದ್ ಮಾಮೂಲ್. ಆಚೀಂಗಿ ಅದ್‌ನ ತಿದ್ದಿಯೆಂಡ್ ಒಮ್ಮೆ ಮಾಡ್‌ನ ತಪ್ಪುನ ಪುನಃ ಮಾಡತನ್ನನೆ, ಸತ್ಯವಂತನೂ, ನೀತಿವಂತನೂ ಆಯಿತ್ ಬಾಪೆಂಡು ಎಣ್ಣುವದೇ ಗಾಂಧೀಜಿರ ಜೀವನತ್‌ರ ಸಂದೇಶ. □



## ಜವಾಹರಲಾಲ್ ನೆಹರು

ಪುಟ್ಟಿನ ದಿನ	- 1889ನೇ ಇಸವಿ ನವಂಬರ್ 14
ಪುಟ್ಟಿನ ಜಾಗ	- ಅಲಹಾಬಾದ್
ಅಪ್ಪ	- ಮೋತಿಲಾಲ ನೆಹರು
ಅಮ್ಮ	- ಸ್ವರೂಪರಾಣಿ
ಕಣ್ಮರ	- 1964ನೇ ಇಸವಿ ಮೇ 27

ನೆಹರು ಮನೆತನತರ ಮೂಲ ಕಾಶ್ಮೀರ. ಮೂಲಪುರುಷ ರಾಜಕೌಲ. ರಾಜಕೌಲ, ಕಾಶ್ಮೀರಿ ಪಿಂಞ ಪಾರ್ಸಿ ಭಾಷೆರ ಪಂಡಿತನಾಯಿತಿಂಜತ್. ಅನ್ನನಾಯಿತ್ ಡೆಲ್ಲಿರ ರಾಜ ಫರುಖಸೀ ರಾಜಕೌಲನ ಸನ್ಮಾನ ಮಾಡಿತ್, ಡೆಲ್ಲಿಕ್ ಬಂದಿತ್ ಇಪ್ಪನೆಕೆ ಸಲಹೆ ಮಾಡ್ಚಿ. ಯಮುನಾ ಪೊಳೆರ ಕರೆಲ್ ಇಪ್ಪಕ್ ಜಾಗ ಕೊಡ್ತತ್. ಹಿಂದಿ ಭಾಷೆಲ್ 'ನೆಹರು' ಎಣ್ಣೆಚೀಂಗಿ ಕಾಲುವೆ. ಯಮುನಾ ಪೊಳೆರ ಕಾಲುವೆರ ಪಕ್ಕತ್ ರಾಜಕೌಲಂಡ ಮನೆ ಇಂಜಾನಗುಂಡ್ ಮನೆತನತರ ಪೆದ 'ನೆಹರು' ಎಣ್ಣೆಯುಂಡ್ ಆಚಿ.

ಮೋತಿಲಾಲ ನೆಹರು ಅಲಹಬಾದ್ ಹೈಕೋರ್ಟ್ ಲಾಯರ್ ಆಯಿತ್ ಬಲ್ಕ ಪೆದ ಪಣ ಎಲ್ಲ ಸಂಪಾದನೆ ಮಾಡಿತಿಂಜತ್. ಧಾರಾಳಿಯೂ, ಧೈರ್ಯ ಶಾಲಿಯೂ, ಚಿಡಿಹಾರನೂ ಆಯಿತಿಂಜ ಅಪ್ಪನ ಕಂಡಕ ಜವಾಹರಲಾಲಂಗ್ ದುಂಬು ಪೋಡಿ. ಜವಾಹರಲಾಲ ಪುಟ್ಟಿತ್ ಸುಮಾರ್ ಕಾಲ ಆನ ಪಿಂಞ ದಂಡ್ ತಂಗೆಯ

ಪುಟ್ಟಿಯೆ. ಅನ್ನನಾಯಿತ್ ಒಬ್ಬನೆ ದುಂಬ ಕೋಪಟೆಲ್ ಬೊಳಂದತ್. ಜವಾಹರಲಾಲ ಆರ್ ಬಯತ್‌ರಂವೊನಾಯಿತಿಪ್ಪಕ ಅಪ್ಪಂಡ ಮೇಜ್‌ರ ಮೇಲೆ ಕಂಡ ದಂಡ್ ಫೌಂಟನ್ ಪೆನ್‌ಲ್ ಒಂದಾನ ಎಡ್‌ತಂಡತ್. ಅಪ್ಪಂಗ್ ದಂಡ್ ಪೆನ್ನ್ ಎನ್ನಂಗುಳ್ಳ ಎಣ್ಣುವ ಮಕ್ಕಳಿರ ಗೇನ. ಅಪ್ಪ ಬಂದಿತ್ ನೋಟುವಕ ಒರೇ ಪೆನ್ನ್. ಎಲ್ಲರ್‌ನೋ ಕೇಟತ್. ಎಡ್‌ತಕಲೂ ಮುಂಡತೆ ಅಳತಿಂಜತ್ ಜವಾಹರ. ಕಡೆಕೂ ಪೆನ್ನ್‌ಕಳ್ಳ ಕಟ್ಟಿಬುದ್ದತ್. ಒಬ್ಬನೇ ಮೊಂವೊಂದ್ ಮುಂಡತೆ ಬುಟ್ಟಲೆ. ಸೆರಿಕ್ ಕೋಲಲ್ ಬಾಟ್‌ಚಿ. ಅಪ್ಪ ಸಮಾಧಾನ ಮಾಡಿತ್ ಮದ್ದ್ ಇಟ್ಟತ್. ಬೋರೆಯಿಂಗಡ ವಸ್ತುನ ಕೇಕತೆ ಎಡ್‌ಪಕಾಗ ಎಣ್ಣುವ ಪಾಠ ಪಡ್‌ಚಿತ್.

ಮೋತೀಲಾಲ ನೆಹರುರ ಸಹಾಯಕನಾಯಿತಿಂಜ ಮುನ್ಸಿ ಮುಬಾರಕ್ ಅಲಿ ಎಣ್ಣುವ ಪೆರಿಯ ಮನುಷ್ಯ ಜವಾಹರಲಾಲನ ಕಳಪ್‌ಚಿಡುಮಯಿಂಜತ್. 1857ರ ಕ್ರಾಂತಿ ಕತೆನ ರಸತ್ ಎಣ್ಣುವಯಿಂಜತ್. ಅಂವೊನ ಜವಾಹರಲಾಲ್‌ಕ್ ದುಂಬ ಕುಸಿಯಿಂಜತ್. ಪುರಾಣ ಕತೆ ಕೇಪದ್ ದುಂಬ ಕುಸಿಯಿಂಜತ್. ನಮ್ಮೆ, ನಾಳ್, ಮಂಗಲಕ್ ಪೋಪಂದೆಣ್ಣುವಕ ಎಲ್ಲಿಲ್ಲತ ಕುಸಿ. ಕುದುರೆ ಸವಾರಿ ಕುಸಿ ಇಂಜಾಂಗ್ ಅಪ್ಪ ನಲ್ಲ ಕುದುರೆ ಎಡ್‌ತ ಬಂದಿತ್ ಕೊಡಿತಿಂಜತ್. ಒಮ್ಮೆ ಕುದುರೆ ಸವಾರಿ ಪೋನ ಜವಾಹರಲಾಲ್ ವಾಪಾಸ್ ಬರತೆ ಕುದುರೆ ಮಾತ್ರ ಬಂದಿತ್ ಮನೆ ಜನಳೆಲ್ಲ ಗಾಬರಿ ಮಾಡಿತಿಂಜತ್. ಬಯ್ಯಂಜ ಬಂದ ಮೊಂವೊನ ಕಂಡಿತ್ ಎಲ್ಲರೂ ತಬ್ಬಿಯಂಡತ್. ಸದ್ಯ ಬಚಾವಾನಲ್ಲಾಂದ್ ಗೇನ ಮಾಡ್‌ಚಿ ಜವಾಹರ. ಎನ್ನಂಗೆಣ್ಣುಕ, ಮನೆಲ್ ಅಪ್ಪ ಪೊಯ್ಯುವಾಂದ್ ಅಂವೊ ಗೇನ ಮಾಡಿತಿಂಜತ್. ಇನ್ನನೆ ಜವಾಹರ ಬಾಲ್ಯತ್ ಕೊದಿ ಕೋಪಟೆಲ್ ಬೊಳಂದತ್. "ಆನಂದ ಭವನ" ಎಣ್ಣುವ ಒರ್ ಅರಮನೆರನ್ನತ ಮನೆನ ಎಡ್‌ತಂಡ್ ಎಚ್ಚಕೋ ಬೆಲೆ ಉಳ್ಳ ಅಲಂಕಾರತರ ವಸ್ತು ಎಲ್ಲ ದೇಶ ವಿದೇಶತಿಂಜ ಎಡ್‌ತ ಬಂದಿತ್ ಅಲಂಕಾರ ಮಾಡ್‌ಚಿ. ಜವಾಹರಲಾಲಂಗ್ ಮನೆಲೇ ಪಾಟ ಎಣ್ಣುವ ವ್ಯವಸ್ಥೆ ಮಾಡಿತಿಂಜತ್. ಫರ್ಡಿನೆಂಡ್ ಬ್ರುಕ್ಸ್ ಎಣ್ಣುವ ಉಪಾದ್ರಿರ ಪ್ರಭಾವತ್ ವಿಜ್ಞಾನ, ಧರ್ಮ ಇನ್ನತ ವಿಷಯತ್ ಆಸಕ್ತಿ ಪುಟ್ಟ್‌ಚಿ. ಪತ್ತ್ ಬಯತ್‌ಕೆತ್ತನೆ ಮನೆಲೇ ಓದ್‌ಚಿ ಜವಾಹರಲಾಲ್. 1905 ಮೇ 13 ಲ್ ಅಪ್ಪ ಅಪ್ಪ ತಂಗೆರ ಕೂಡ ಲಂಡನ್‌ಕ್ ಪೋಚಿ. ಅಪ್ಪ ಅಲ್ಲಿ ತಾಂಡ ಶಿಫಾರಸ್‌ಲ್ ಅಲ್ಲಿಯತ್‌ರ ಬಲ್ಯ ವಿದ್ಯಾಸಂಸ್ಥೆ ಆನ 'ಹ್ಯಾರೊ' ಸ್ಕೂಲ್‌ಕ್ ಕೂಟ್‌ಚಿ. ಅಂವೊನ ಅಲ್ಲಿ ಬುಟ್ಟಿತ್ ಪೋಪಾಂಗ್ ಮಿಂಞ ಅಪ್ಪ ಮೊಂವೊಂಗ್ ಸುಮಾರ್ ಬುದ್ಧಿವಾದ ಎಣ್ಣ್‌ಚಿ. "ನಾನೆಚ್ಚಕೇ ದುಡ್ಡ್ ಸಂಪಾದನೆ ಮಾಡ್‌ನಕಲೂ ನೀಕ್ ನಲ್ಲ ವಿದ್ಯೆ ತರತೆ ಆ ಪಣಕ್ ಸಾರ್ಥಕತೆ ಇಲ್ಲೆ. ಪದಾನಂಜಿ ಬಯತ್‌ಕೆತ್ತನೆ ನಿನ್ನ ಒರ್ ದಿನವೂ ಬುಟ್ಟಿತಿಂಜಿಲೆ. ನಿನ್ನ ಬುಟ್ಟಿತಿಪ್ಪದ್



ನೀಕೂ ಕಷ್ಟ, ನಂಗಕೂ ಕಷ್ಟ, ಆಚೀಂಗಿ ನೀನ್ ಕೀರ್ತಿವಂತನಾಯಿತ್ ಬದ್ಕಂಡು. ನೀಡ ಪೆದ ಚರಿತ್ರಲ್ ಶಾಶ್ವತ ಆಯಿತಿರಂಡೂಂದ್ ನಂಗಡ ಆಸೆ. ಉಂಬಕ್ ತಿಂಬಕ್ ಪಣ ಎಚ್ಚಕ್ ಬೋಂಡೇಂಗಿಯೂ ಖರ್ಚ್ ಮಾಡ್. ಆಚೀಂಗಿ ಪಾಳ್ ಉದ್ದೇಶಕ್ ಪಣ ಖರ್ಚ್ ಮಾಡತೆ. ನೀನ್ ನಲ್ಲ ವ್ಯಕ್ತಿ ಆಪಿಯ ಎಣ್ಣುವ ನಂಬಿಕೆ ನಾಕುಂಡ್”.

ಅಪ್ಪ ಎಣ್ಣನ್ನನೇ ಮೋಂವೊ ಕೇಟಿತ್. ಹ್ಯಾರೋ ಸ್ಕೂಲ್‌ರ ಹೀರೋ ಆಚಿ. ಪ್ರತಿಯೊಂದಾತೂ ಮಿಂಞಾತ್‌ಲಿಂಜ ಜವಾಹರನ ಹ್ಯಾರೋ ಸ್ಕೂಲ್‌ರ ಪ್ರಿನ್ಸಿಪಾಲ್ ಹೊಗಳಿತ್ ಮೋತಿಲಾಲ್ ನೆಹರುಕ್ ಕಾಗದ ಎಳಾದ್‌ಚಿ. ಅಪ್ಪಂಡ ಜನ್ಮ ಸಾರ್ಥಕ ಆಚೀಂದಾಚಿ ಮೋತಿಲಾಲ್‌ಕ್. ಇನ್ನನೇ ಜವಾಹರ ಲಂಡನ್‌ಲ್ ಇಂಜಚ್ಚಕ್ ಕಾಲವು ಅಪ್ಪ ಮೋಂವೊಂಗ್ ಕಾಗದತ್‌ರ ಮೂಲಕ ಮೋಂವೊಂಗ್ ಗೊತ್ತಿಲ್ಲತ ಎಚ್ಚಕೋ ವಿಷಯತ್‌ರ ಅರಿವಿಕೆ ಕೊಡ್‌ಪಯಿಂಜತ್. ಅನ್ನನೆ ಎಳಾದುವಯಿಂಜ ಕಾಗದತ್‌ರ ಜಾಸ್ತಿ ವಿಷಯ ಬೋಂಡಿಯಾಚೀಂಗಿ ಜವಾಹರಲಾಲ್‌ರ ಆತ್ಮಕತೆ ಓದಂಡು. ಅಪ್ಪಂಡ ಕಾಗದತ್‌ರ ಮೂಲಕವೇ ಭಾರತತ್ ಎನ್ನತೆಲ್ಲ ರಾಜಕೀಯ ನಡ್‌ಂದಂಡುಂಡ್‌ಂದ್ ಸಹ ಅರ್‌ಂಜವಯಿಂಜತ್. ಭಾರತೀಯಂಗಡ ಮೇಲೆ ದೌರ್ಜನ್ಯ ಮಾಡುವಯಿಂಜ ಬ್ರಿಟಿಷ್‌ಕಾರಡ ವಿಷಯ ಅರಿವಕ ಚೋರೆ ಕೊದಿಪ ಯಿಂಜತ್. ಅದೇ ಚೆಡಿಲ್ ಅಪ್ಪಂಗ್ ವಾಪಾಸ್ ಕಾಗದ ಎಳಾದುವಯಿಂಜತ್. ಅಕ್ಕ ಅಪ್ಪ ಮೋಂವೊಂಗ್ ಬುದ್ಧಿ ಎಣ್ಣೆತ್ ವಿದ್ಯಾಭ್ಯಾಸ ಪೂರ್ತಿ ತೇತಂಡ್, ಇಂಞ ಭಾರತಕ್ ಬಂದಿತ್ ದೇಶ ಸೇವೆ ಮಾಡಲೂಂದ್ ಎಳಾದುವಯಿಂಜತ್.

1910 ಲ್ ಜವಾಹರಲಾಲ ಪದವಿ ಪಡ್‌ಂದತ್. ಅಲ್ಲಿಂಜ ದಂಡ್‌ಕಾಲ ನ್ಯಾಯಶಾಸ್ತ್ರ ಓದಿತ್ ‘ಬಾರ್ ಆಟ್‌ಲಾ’ ಎಣ್ಣಕ ವಕೀಲನಾಪಕ್ ಅರ್ಹತೆ ಪಡ್‌ಂದತ್. 1912 ಲ್ ಜವಾಹರಲಾಲ್ ನೆಹರು ಭಾರತಕ್ ವಾಪಾಸ್ ಬಾತ್. 1916 ಲ್ ಕಮಲ ಎಣ್ಣುವ ಕನ್ನಿರ ಜೊತೆಲ್ ಮಂಗಲಾಚಿ. ಗಾಂಧೀಜಿನ ಕಂಡ ಪಿಂಞ ಅಯಿಂಗಡ ಭಾಷಣ ಕೇಟ ಪಿಂಞ ಪುರ್‌ಡ್ ಕ್ಷತ್ಯನ ಜವಾಹರ ಸತ್ಯಾಗ್ರಹಕ್ ಕೂಡುವೀಂದ್ ಎಣ್ಣುವಕ ಅಪ್ಪಂಗ್ ನೊಂಬಲಾಚಿ. ಒಂದುಳ್ಳ ಮೋಂವೊ ಸತ್ಯಾಗ್ರಹ, ಚೈಲ್‌ಂದ್ ಪೋಪಲ್ಲಾಂದ್ ಬೇಜಾರಾಚಿ. ಆಚೀಂಗೂ ಮೋಂವೊ ತಾಂಡ ನಿರ್ಧಾರ ಬದ್‌ಲ್ ಮಾಡುಲೆಂದ್ ಅರ್‌ಂಜಿತ್ ಅಪ್ಪ ಮೋತಿಲಾಲ್ ನೆಹರು ಕೂಡ ಗಾಂಧೀಜಿರ ಬಟ್ಟೆ ಪುಡ್‌ಚತ್. ಅರಮನೆರನ್ನತ ಮನೆನ ಕಾಂಗ್ರೆಸ್ ಸಂಸ್ಥೆಕ್ ಬುಟ್ಟ್ ಕೊಡ್‌ತತ್. ಅದಾಲಿಂಜ ನಲ್ಲ ಕ್ರಯತ್‌ರ ಸಾಮಾನ್ ತೀರ ಮಾರ್‌ಚಿ. ವೈಭವತ್‌ರ ಜೀವನತ್‌ನ ಬುಟ್ಟಿತ್ ಸರಳ ಜೀವನ, ಖಾದಿ ಬಟ್ಟೆ, ಸರಳತೆರ ಊಣ್ ತೀನಿ ಎಲ್ಲ ಸುರು ಮಾಡಿಯಂಡತ್. ಎಲ್ಲಾಂಗ್‌ಂಜ

ಮೋಂವೊ ಜೈಲ್‌ಕ್ ಪೋಚೇಂಗಿ ನೆಲತ್ ಎನ್ನನೆ ಬುದ್ಧವೋಂದ್ ಗೇನ ಮಾಡಿತ್, ತಾನೇ ಮನೆಲ್ ನೆಲತ್ ಬುದ್ಧಂಡ್ ನೋಟುವಯಿಂಜತ್. ಅನ್ನತ ಅಪ್ಪನ ಪಡ್‌ಂದ ಜವಾಹರಲಾಲ ಪುಣ್ಯವಂತ. ಜವಾಹರಲಾಲ್ ಹಳ್ಳಿ ಹಳ್ಳಿಕೂ ಪೋಯಿತ್, ಅಯಿಂಗಡ ಕೂಡೆ ಇಂಜಿತ್, ಉಂಡಿತ್ ಅಯಿಂಡ ಕಷ್ಟ ಸುಖ ಅರಂಜತ್. ಇಚ್ಚಕ್ ಕಾಲ ತಾನ್ ಬದ್‌ಕ್‌ನ ವೈಭವತ್‌ರ ಬದ್‌ಕ್‌ಕ್ ಜವಾಹರ್‌ಕ್ ಇಾಣ ಆಚಿ. ದೇಶತ್‌ಲ್ ಜನ ಇನ್ನತ ಹೀನ ಸ್ಥಿತಿಲಿಪ್ಪಕ ನಂಗ ಸುಖಿತ್ ಇಂಜತಲ್ಲ? ಇಲ್ಲೆ ಇಂಇ ಇನ್ನತ ತಪ್ಪು ನಡ್‌ಪಾಲೆ. ದೇಶಕಾಯಿತ್ ಎನ್ನತ ತ್ಯಾಗಕಾಚೇಂಗೂ ತಯಾರಾಂಡು ಎಣ್ಣಿಯಂಡ್ ಮನಸಾಲೆ ಗೇನ ಮಾಡಿಯಂಡತ್. ಅಚ್ಚಕ್ ಬಲ್ಯರಿಕೆ, ದರ್ಪ ಧಾರಾಳತ್ ಇಂಜನ್ನತ ಮೋತಿಲಾಲ್ ಚೆರಿಯ ಜೀವನಕ್ ಒಗ್ಗಿಯಂಡದ್ ಎಲ್ಲಾಕೂ ಆಶ್ಚರ್ಯ ಆಚಿ.

1920 ಲ್ ಅಸಹಕಾರ ಚಳುವಳಿಲ್ ಮೋತಿಲಾಲ್ ಪಿಂಇ ಜವಾಹರಲಾಲ್ ನೆಹರು ದಂಡಾಳೂ ಜೈಲ್‌ಲಾಚಿ. ಲಖನೌ ಜೈಲ್‌ಲ್ ಅಪ್ಪನೋ, ಮೋಂವೊನೋ ದಂಡಾಳನೋ ಆರ್ ತಿಂಗ ಶಿಕ್ಷೆಲ್ ಒಳ್‌ಕ್‌ಟ್ಪತ್. ಅಂಇೂರ್ ಉರ್‌ಪಿಯ ದಂಡ ಮಾತ್ರ ಕೊಡ್‌ಪಾಲೆಂದ್ ಎಣ್ಣಾನಾಂಗ್, ಪೋಲೀಸ್ ಜಪ್ತಿಕ್ ಆನಂದ ಭವನಕ್ ಪೋಪಕ ಅಲ್ಲಿ ಜವಾಹರಲಾಲ್‌ರ ಮೋವ ಇಂದಿರಾನ, ಮುನ್ಸಿ ಮುಬಾರಕ್ ಆಲಿ ಭಾರತತ್‌ರ ಬಾವುಟ ಪುಡ್‌ಚಂಡ್ ಚಳುವಳಿರ ಕಳಿ ಕಳಚೆಂಡಿಂಜತ್. ಅಕ್ಕ ಬಂದ ಪೋಲೀಸ್‌ಕಾರಳ ಕಂಡ ನಾಲ್ ಬಯತ್‌ರ ಇಂದಿರಾ “ಅಂದರ್ ಮತ್ ಆನಾ ರೆಹರೊ....” (ನಿಂದೋಳಿ ಒಳಕ್ ಬಕ್ತಿ) ಎಣ್ಣಿಯಂಡ್ ಕೂತ್ ಕೊಡ್‌ತಾಲೊ. ಜವಾಹರಲಾಲ್‌ಕ್ ಈ ತಕ್ಕ್ ಕೇಟಿತ್ ದುಂಬ ಕುಸಿ ಆಚಿ. ಇನ್ನನೆ ಮಕ್ಕತಿಂಜ ಮುದುಕಂಗಡಲ್ಲಿ ಕೆತ್ತನೆ ಚಳುವಳಿ ಮಾಡುವಯಿಂಜತ್. ಜೈಲ್‌ಲ್ ಜವಾಹರಲಾಲ್, ಓದುವೊ, ರೂಂನ ಒಡ್‌ಕುವೊ, ಓದುವಕ್ ಗೊತ್ತಿಲ್ಲತ ಕೈದಿಯಕ್ ಪಡ್‌ಪಾಚಿಡುವೊ, ಇನ್ನತೆಲ್ಲ ಮಾಡುವಯಿಂಜತ್. ಇನ್ನನೆ ತಾಂಡ ಜೀವನತ್‌ರ ಇರುವದ್ ಇರುವತ್ತಂಜಿ ಕಾಲತ್‌ನ ಜೈಲ್‌ಲೇ ಕಯಿಚತ್. ಅವ್ವಂಗ್ ಸೌಖ್ಯ ಇಲ್ಲತಿಪ್ಪಕ, ಚಾವಕ, ಪೊಣ್ಣ್‌ಕ್, ಅವ್ವಂಗ್ ಎಲ್ಲ ಸೌಖ್ಯ ಇಲ್ಲತಿಪ್ಪಕ ಎಲ್ಲ ಜೈಲ್‌ಲೇ ಇಂಜ ಜವಾಹರಲಾಲ್‌ಕ್ ಓರೊಮ್ಮ ತಾಂಡ ಮೇಲೆ ತಾಂಗೇ ಜಿಗುಪ್ಪೆ ಬಪ್ಪಯಿಂಜತ್. ಒಬ್ಬನೇ ಮೋಂವೊನಾಯಿತ್ ಅಪ್ಪ ಅಪ್ಪನ ನೋಟಿ ಯಂಡ್‌ಲೆ. ಒಂದೂ ಸಂಪಾದನೆ ಮಾಡ್‌ಲೆ. ಕೈಪುಡ್‌ಚೆ ಪೊಣ್ಣ್‌ಕ್ ಒರೂ ಸುಖ ಕೊಡ್‌ತಾಲೆ. ಮೋವಡ ಕೂಡೆ ಅವಡ ಬೊಳಚೆನ ನೋಟುವಕ್ ಇಂಜಿಲೆ, ಎಣ್ಣಿಯಂಡೆಲ್ಲ ಗೇನ ಮಾಡುವಕ ದುಂಬ ಚೆಡಿ ಬಪ್ಪಯಿಂಜತ್. ಆಚೇಂಗಿ ಬೋರೆ ಜನಡ ಕಷ್ಟ ನೋಟುವಕ, ಪ್ರಾಣತ್‌ನೇ ದೇಶಕಾಯಿತ್ ತ್ಯಾಗ ಮಾಡ್‌ನ ಜನಳ

ನೋಟುವಕ ನಾಡದೆಂತ ಬಲ್ಯ ವಿಷಯಾಂದ್ ಸಮಾಧಾನ ಮಾಡಿಯವಯಿಂಜತ್. ಮನಸ್ಸಕ್ ದುಂಬ ಬೇಜಾರಾಪಕ ಎಳಾದುವಕ್ ಸುರು ಮಾಡ್ಚಿ. ಇನ್ನನೆ ಜೈಲ್ಲ್ ಎಳಾದ್ನ ಎಳ್ತ್ ಇಂದ್ ಒರ್ ಆಸ್ತಿ ಆಯಿತುಂಡ್. “ನೆಹರುರ ಆತ್ಮಕತೆ”, “ಆನಿಮಲ್ಸ್ ಇನ್ ಪ್ರಿಸನ್”, “ಡಿಸ್ಕವರಿ ಆಫ್ ಇಂಡಿಯಾ” ಇದೆಲ್ಲ ಜವಾಹರಲಾಲ್ ಎಳ್ತ್ಕ್ ಚೆನ್ನಂಗ್ ಉದಾರಣೆ. ಓರೊಮ್ಮ ಅಪ್ಪ, ಅಪ್ಪ, ಮೋಂವೊ, ಮೈಮ ಎಲ್ಲರೂ ಬೋರೆ ಬೋರೆ ಜೈಲಿಪ್ಪಯಿಂಜತ್. ಇನ್ನನೆ ದೇಶಕಾಯಿತ್ ತಾಂಡ ಸ್ವಂತ ವೈಭವತಾರ ಬದ್ಕನೆಲ್ಲ ತ್ಯಾಗ ಮಾಡ್ನ ಎಚ್ಚೆಕೋ ದೇಶಾಭಿಮಾನಿಯಡ ತ್ಯಾಗತಾರ ಫಲವಾಯಿತ್ ಸ್ವಾತಂತ್ರ ಕ್ಷಾಪ್ಪಿ. ಸ್ವತಂತ್ರ ಭಾರತತಾರ ಆದ್ಯ ಪ್ರಧಾನಮಂತ್ರಿ ಆಯಿತ್ ಜವಾಹರಲಾಲ್ ನೆಹರು ಅಧಿಕಾರ ವಹಿಸಿಯಂಡತ್. ಅಲ್ಲಿಂಜ ಸುಮಾರ್ ಪದಾನೇಳ್ ಕಾಲ ಪ್ರಧಾನಿ ಆಯಿತಿಂಜಂಡ್ ದೇಶ ಸೇವೆ ಮಾಡ್ಚಿ. ಪಂಚವಾರ್ಷಿಕ ಯೋಜನೆ ಕೊಂಡ ಬಾತ್. ಮಕ್ಕಡ ಮೀದ ದುಂಬ ಪ್ರೀತಿಯಿಂಜ ಜವಾಹರಲಾಲ್ ನೆಹರು ಅಯಿಂಗಡ ಪುಟ್ಟಾನ ದಿನತಾನ “ಮಕ್ಕಡ ದಿನ” ಎಣ್ಣಿಯಂಡ್ ಆಚರಣೆ ಮಾಡುವಕ್ ಸುರು ಮಾಡ್ಚಿ. ಮಕ್ಕ ನೆಹರುನ ಪ್ರೀತಿಲ್ ‘ಚಾಚಾ’ಂದ್ ಕಾಕುವಯಿಂಜತ್. ಡೆಹ್ರಾಡೂನ್ಲ್ ವಿಶ್ರಾಂತಿಲಿಪ್ಪಕಲೇ ಹೃದಯಾಘಾತತ್ ಮರಣಪಟ್ಟತ್.

ಪೊನ್ನಾರ ಬಟ್ಟಳತ್ ಉಂಡಂಜಿಂಜ ಜವಾಹರಲಾಲ್ ನೆಹರು ದೇಶಕಾಯಿತ್ ಎಲ್ಲ ವೈಭವತಾನ ತ್ಯಾಗ ಮಾಡ್ಚಿ. ಜೀವನತಾರ ಸುಮಾರ್ ಭಾಗತಾನ ಜೈಲ್ಲ್ ಕಳಂದಂಡ್ ಸ್ವಾತಂತ್ರ ಕಾಯಿತ್ ಪೋರಾಡ್ಚಿ. ಅನ್ನತ ದೇಶಭಕ್ತನ ನಂಗಡ ಬದ್ಕಲ್ ಎಕ್ಕಾಲೂ ನೆನತಿಯವಂಡು. □



## ಇಂದಿರಾ ಗಾಂಧಿ

- ಪುಟ್ಟಾನ ದಿನ - 1917ನೇ ಇಸವಿ, ನವಂಬರ್ 19  
 ಪುಟ್ಟಾನ ಜಾಗ - ಅಲಹಾಬಾದ್, ಉತ್ತರ ಪ್ರದೇಶ  
 ಅಪ್ಪ - ಜವಹರಲಾಲ್ ನೆಹರೂ  
 ಅಮ್ಮ - ಕಮಲ ನೆಹರೂ  
 ಕಣ್ಮರೆ - 1984ನೇ ಇಸವಿ ಅಕ್ಟೋಬರ್ 31

ನಂಗಡ ದೇಶತಾರ ಆದ್ಯ ಪ್ರಧಾನಮಂತ್ರಿರ ಮನೆಲ್ ಮೂಡಿಕುಂಞಿ ಯಾಯಿತ್ ಪುಟ್ಟಾನ ಇಂದಿರಾ ಪ್ರಿಯದರ್ಶಿನಿ, ಕಣ್ಣ ಕುಂಞಿರ ಮಾದಾರಿಲ್ ಬೊಳ್ಂದತ್. ತಾತ ಮೋತಿಲಾಲ್ ನೆಹರುರ ಮಡಲ್ ಅಳತಂಡ್ ತಾಂಡ ಅಪ್ಪ ಅಮ್ಮ ಎನ್ನಂಗ್ ಜೈಲ್ಕ್ ಪೋಪೊ ಎಣ್ಣೆಯಂಡ್ ಕೇಟವಯಿಂಜತ್. ಆ ಚೆರಿಯ ಇಂದಿರ ಮೂಂದ್ ಬಯತ್‌ರ ಇಂದಿರಾಂಡ್ ಕೂಡ ಕಳಿಪಕ್ ಜೊತೆಗಾರ ನಾಯಿತ್ ಲಾಲ್ ಬಹಾದ್ದೂರ್ ಶಾಸ್ತ್ರಿ ಇಪ್ಪಯಿಂಜತ್. ಅಯಿಂಗ ದಂಡಾಳೂ ಕೂಡಿಯಂಡ್ ಸತ್ಯಾಗ್ರಹತ್‌ರ ಕಳಿ ಕಳಿಪಯಿಂಜತ್. ಸತ್ಯಾಗ್ರಹಿ ಗೊಂಬೆಯೆಲ್ಲೆ ಮೆರವಣಿಗೆ ಪೊರಡುಚಿಡುವೊ, ಮೆರವಣಿಗೆ ಬಂದಂಡಿಪ್ಪಕ ಎದಿಕೆ ಬರಿಲಿಂಜ ಕುದುರೆ ಸೈನಿಕಂಗಳೊ, ತೋಕ್ ಪುಡ್‌ಚೆಯಿಂಗಳೊ (ಗೊಂಬೆ) ಬಂದಿತ್ ಸತ್ಯಾಗ್ರಹಿಯಳ ಪೊಜ್ಜಿ ಬೂಕಿತ್ ಎಲ್ಲಾರನೋ ಗಾಡಿಲ್ ದುಂಬ್‌ಚಿಟ್ಟಂಡ್ ಜೈಲ್ಕ್ ಪೋಪೊ. ಇದ್ ಇಂದಿರ ಮೂಂದ್ ಬಯತ್‌ಲಿಪ್ಪಕ ಕಳಿಪಯಿಂಜ ಕಳಿ. ಮೂಂದ್ ಬಯತ್‌ರ ಬುದ್ಧಿ ನೂರ್‌ಕೆತ್ತನೆ ಎಣ್ಣುವನೆಕೆ ಇಂದಿರಾಗಾಂಧಿ ಸತ್ಯಾಗ್ರಹ, ಚಳುವಳಿ ರನ್ನತ ವಾತಾವರಣತೇ ಬೊಳ್ಂದತ್.


ಪತ್ತನೆ ಬಯತ್‌ಲಿಪ್ಪಕ ಯಮುನಾ ಪೊಳೆರ ಆ ಕರೆಲ್ ಇಂಜ ಕುಷ್ಟ, ರೋಗಿಯಡ ಆರೋಗ್ಯ ಕೇಂದ್ರಕ್ ಸೈಕಲ್‌ಲ್ ಪೋಯಿತ್ ನಾರಾಚಿ ರಜ ದಿವಸತ್ ರಂದ್ ಕುಷ್ಟ ರೋಗಿಯಡ ಸೇವೆ ಮಾಡುವಯಿಂಜತ್. ಇನ್ನೆ ಇಂದಿರಾ ತಾಂಡ ಪತ್ತನೇ ಬಯತ್‌ಲೇ ಸಮಾಜ ಸುಧಾರಣೆಕ್ ಮೊಟ್ವೊಟ್ಟಿತ್. ಸ್ವದೇಶಿ ಚಳುವಳಿಲ್ ಗಾಯ ಆನಯಿಂಗಕ್ ಮನೆಲ್ ಕಮಲ ನೆಹರು ಸೇವೆ ಮಾಡುವಕ ಇಂದಿರಾನೂ ಚೊತೆ ಕೂಡುವಯಿಂಜತ್. ಅಸಹಕಾರ ಚಳುವಳಿ ಆಪಕ ಮನೆರ ಪೆರಿಯಯಿಂಗ ಎಲ್ಲ ಭಾಗವಹಿಸಿತಿಂಜತ್. ಅಕ್ಕ ಪನ್ನೆರಂಡ್ ಬಯತ್‌ರ ಇಂದಿರಾಂಗ್ ಮುಂಡ ತಿಪ್ಪಕ್ ಕಯ್ಯತಾಚಿ. 'ವಾನರ ಸೇನೆ' ಎಣ್ಣಿವ ಮಕ್ಕಡ ಸಂಘ ಕಟ್ಟಿತ್, ಸ್ಕೋಗನ್ ಕೂಗುವೊ, ಗಾಯ ಆನಯಿಂಗಳ ತಕ್ಷಣ ಉಪಚಾರ ಮಾಡುವೊ, ಸ್ವದೇಶಿ ವಸ್ತು ಮಾರಾಟ ಮಾಡುವೊ ಇನ್ನತನೆಲ್ಲ ಮಾಡುವಯಿಂಜತ್. ಪತ್ತ ನೂರ್ ಆಯಿರ ಕಣಕ್‌ಲ್ ಸುರುವಾನ ವಾನರ ಸೇನೆ, ಅರುವದ್ ಆಯಿರಕ್ ಮುಟ್ವೊಚಿ. ಇಂದಿರಾ ಅಕ್ಕಲೇ ನಾಯಕಿ ಲಕ್ಷಣ ಕಾಟ್‌ಚಿ, ಜನಸೇವೆ, ದೇಶ ಸೇವೆರ ಲಕ್ಷಣ ಅಯಿಂಗ ಡಲ್ಲಿಂಜತ್. ಇಂದಿರಾ ಪದ್‌ನಾಲನೆ ಬಯತ್‌ಲ್ ತಾತನ ಕಳಂದಂಡತ್. ಅಕ್ಕ ಪೂನಾತ್ ಬೋರ್ಡಿಂಗ್ ಸ್ಕೂಲ್‌ಕ್ ಕೂಡ್‌ಚಿ. ರೂಪತ್‌ಲ್ ರತಿ, ಐಶ್ವರ್ಯತ್ ಲಕ್ಷ್ಮಿರ ಮಾದಾರಿ ಇಂಜಕಲೂ ಬಾಲ ಯೋಗಿನಿರ ಮಾದಾರಿ ಸಮಯ ಕೊಟ್ಟವಕೆಲ್ಲ ಪೂನಾತ್ ಕೊಳಚಿ ಪ್ರದೇಶತ್‌ನ ಶುದ್ಧ ಮಾಡುವಕ್ ಪೋಪಯಿಂಜತ್. ಸಮಾಜಸೇವೆ ಚೋರೆಲ್ ಪರಂಜಂಡಿಂಜತ್.

1934 ಲ್ ರವೀಂದ್ರನಾಥ ಠಾಗೋರ್‌ರ ಶಾಂತಿನಿಕೇತನಕ್ ಕೂಡ್‌ಚಿ. ಅಲ್ಲಿ ಸಂಗೀತ, ಪೈಂಟಿಂಗ್‌ರನ್ನತ ಕಲೆನೋ ಪಡ್‌ಚತ್. ಮೋವ ಶಾಂತಿನಿಕೇತನತ್ ಇಪ್ಪಕ, ಜೈಲೊಲಿಂಜ ಅಪ್ಪ ಜವಾಹರಲಾಲ್ ನೆಹರು ಮೋವಕ್ ಕಾಗದ ಎಳಾದಿತ್ ಪ್ರಪಂಚತ್‌ರ ಚರಿತ್ರೆ, ಬದ್‌ಕ್‌ಲ್ ಆಪದ್ - ಪೋಪದ್ ಸುಮಾರೆಲ್ಲ ವಿಷಯ ಎಣ್ಣಿ ಕೊಡ್‌ತತ್. ಆ ಕಾಗದ ಎಲ್ಲ ಒಟ್ಪ್ ಮಾಡಿತ್ "ಲೆಟರ್ ಫ್ರಂ ಎ ಫಾದರ್ ಟೂ ಎ ಡಾಟರ್" (A letter from a Father to a daughter) ಎಣ್ಣಿವ ಪುಸ್ತಕ ಬೊಳಿ ಕಂಡಿತ್.

1936 ಲ್ ಕಮಲ ನೆಹರುಕ್ ಕ್ಷಯರೋಗ ಜಾಸ್ತಿಯಾಯಿತ್ ಚತ್‌ಪೋಚಿ. ಮೋವ ದುಃಖ ಮರಕಡ್‌ಂದ್ ಇಂದಿರಾನ ಆಕ್ಸ್‌ಫರ್ಡ್‌ಲ್ ಓದುವಕ್ ಅಯೆಚತ್. ಅಲ್ಲಿಂಜ 1941 ಲ್ ಭಾರತಕ್ ವಾಪಾಸ್ ಬಾತ್. ಗಾಂಧೀಜಿರ ಪ್ರಭಾವ ಇಂದಿರಾಂಡ ಮೇಲೆಯೂ ಆಚಿ. ಇದ್‌ಂಡ ಪರಿಣಾಮ ಇಂದಿರಾ ಮುಂದಾಳೆತನತ್ ಕೆಲವು ಮಕ್ಕ ಕೂಡಿಯಂಡ್, ಹಿಮಾಚಲ ಪ್ರದೇಶತ್, ತಡ್‌ಪ ಕಯ್ಯತ ಕೋಟತ್‌ರ ನಡುಲ್ ನಾಲ್ ಮೈಲ್ ಉದ್ದತ್‌ರ ರೋಡ್ ಮಾಡ್‌ಚಿ. ಅದೇ ಪುರ್‌ಡ್‌ಲ್ ಇಂದಿರಾ ದೇಶ ನಿರ್ಮಾಣ ಕಾರ್ಯಕೂ ಇಳೊಂಜತ್. 1941ನೇ

ಮಾರ್ಚ್‌ನ ಫಾರ್ಮ್ ಬಾಲಕಾರ ಫಿರೋಜ್ ಗಾಂಧಿರ ಕೂಡ ಇಂದಿರಾಗಾಂಧಿ ಮಂಗಲ ಕಯಿಂಜತ್. 1944 ಲ್ ಮೋಂವೊ ರಾಜೀವ್ ಗಾಂಧಿ, 1946 ಲ್ ಸಂಜಯಗಾಂಧಿಯೂ ಪುಟ್ ಚಿ. 1947 ಲ್ ಸ್ವಾತಂತ್ರ್ಯ ಕ್ ಟ್ಟಿತ್ ಅಪ್ಪ ಪ್ರಧಾನ ಮಂತ್ರಿ ಆಚೀಂಗಿಯೂ ಭಾರತ ಪಾಕಿಸ್ತಾನ ಬೋರೆ ಬೋರೆ ಆನಂತ ಸಮಯತ್ ಪರಿಸ್ಥಿತಿ ಚಾಯಿಲಿಂಜಲೆ. ಅಕ್ ಸಂಜಯಗಾಂಧಿ ಚೆರಿಯ ಕುಂಞಿಯಾಚೀಂಗೂ ಕುಂಞಿನ ಬುಟ್ಟಿತ್ ನಿರಾಶ್ರಿತಂಗಕ್ ಆಶ್ರಯ ಕೊಡ್ ಪ ಕಾರ್ಯ ನಡತ್ ಚಿ. ಅಯಿಂಗಡ ಮನೆಲೆ ಒರ್ ನಿರಾಶ್ರಿತಂಗಡ ಶಿಬಿರ ಮಾಡ್ ಚಿ. ಈ ಸಮಯತ್ ಒಮ್ಮೆ ಡೆಲ್ಲಿರ ಒರ್ ರಸ್ತೆಲ್ ಒರ್ ಮುಸ್ಲಿಂ ಕುಟುಂಬತ್ ಸುತ್ತ ಎಚ್ಚಕೋ ಜನ ಕತ್ತಿ ಪುಡ್ ಚಿತ್ ನಿಂದಿಂಜತ್. ಅಕ್ ಅಲ್ಲಿಕ್ ಇಂದಿರಾ ಬಾತ್. ಬೆಂಬರತ್ ನಿಂದಿತಿಂಜವೊ ಒಬ್ಬೊ ಅಯಿಂಗಡ ಶಾಲ್ ಪುಡ್ ಚಿ ಬಲ್ ಚತ್. ಒಮ್ಮೆ ರೋಷತ್ ತಿರಿತ್ ನೋಟುವಕ್ ಅಂವೊ ಮುಂಡತೆ ನಿಂದಾರ್ ಚತ್. ಮನೆರೊಳ್ ಕ್ ನುಗ್ಗಿತ್ ಒಳಲಿಂಜ ಪೊಣ್ಣಾಳ್ ಮಕ್ಕಳ ಕಾಕಿಯಂಡ್ ಪೊರಮೆ ಬಾತ್. ವಾಪಾಸ್ ಬರಣೆಕ್ ಜೀಪ್ ಡ್ರೈವರ್ ಬೊತ್ತಿತ್ ಓಡಿರ ತಿಂಜತ್. ಅಲ್ಲಿಂಜ ತಾನೆ ಜೀಪ್ ಎಡ್ ತಂಡ್ ಬಂದಿತ್ ಅಯಿಂಗಳ ನಿರಾಶ್ರಿತಂಗಡ ಶಿಬಿರಕ್ ಬುಟ್ಟಿತ್. ಅಕ್ಲೆ ಅಯಿಂಗಕೆಲ್ಲ ಇಂದಿರಾಗಾಂಧಿ ನೆಹರುರ ಮೋವಾಂದ್ ಗೊತ್ತಾಯಿ. ಇದೇ ಮುಂದಾಳ್ ತನ, ಧೈರ್ಯ ಇಂದಿರಾಗಾಂಧಿರ ಜೀವನ ಉದ್ದಕೂ ಕಾಂಬಕ್ ಕ್ ಟ್ಟುವ. ಸ್ವತಂತ್ರ್ ಭಾರತತ್ ವಾರ್ತಾ ಮಂತ್ರಿಯಾಯಿತಿಂಜತ್. ಆ ಸಮಯತ್ ಭಾರತ ಪಾಕಿಸ್ತಾನಕ್ ನಡ್ ಂದ ಯುದ್ಧತ್ ವಿನಿವರಣೆ ಕೊಡ್ ಪಕಾಯಿತ್ ಪೊಣ್ಣಾಳ್ ಯುದ್ಧ ಪ್ರದೇಶಕ್ ಪೋಪಕ್ ಕಯ್ಯಾಂದೆಣ್ಣ ಕಲೂ ಕೇಕತೆ ಹಟಲ್ ಯುದ್ಧ ಭೂಮಿಕ್ ಪೋಯಿತ್ ಅಲ್ಲಿಯತ್ ಸುದ್ದಿನ ಆಕಾಶವಾಣಿಲ್ ಎಣ್ಣ ಚಿ. ದೇಶ ಅವಡ ಧೈರ್ಯ ಸಾಸಕ್ ಬೆರಗಾಯಿತಿಂಜತ್. ದಂಡನೆ ಪ್ರಧಾನಮಂತ್ರಿಯಾಯಿತಿಂಜ ಲಾಲ್ ಬಹಾದ್ದೂರ್ ಶಾಸ್ತ್ರಿ ಚತ್ ಪೋನ ಪಿಂಞ ಇಂದಿರಾಗಾಂಧಿ ಭಾರತತ್ ಆದ್ಯ ಮಹಿಳಾ ಪ್ರಧಾನಿ ಆಯಿತ್ ಅಧಿಕಾರ ವಹಿಸಿಯಂಡತ್. ದೇಶಕಾಯಿತ್ ಎಚ್ಚಕೋ ನಲ್ಲ ಕಾರ್ಬಾರ್ ಮಾಡ್ ಚಿ. ಮುಂದ್ ಕುರಿ ಪ್ರಧಾನಿಯಾಯಿತ್ ಆಯ್ಕೆ ಆನ ಇಂದಿರಾಗಾಂಧಿ ತಾಂಡದೇ ದಂಡಾಳ್ ಅಂಗರಕ್ ಕಂಗಳಾನ ಸತ್ತ್ವಂತ್ ಸಿಂಗ್ ಪಿಂಞ ಬಿಯಾರಿತ್ ಸಿಂಗ್ ಎಣ್ಣವ ದ್ರೋಹಿಯಡ ಬೊಡಿಕ್ ಬಲಿಯಾಚಿ.

ಸಾಧನೆ ಮಾಡುವಕ್ ಕ್ ಣ್ಣ ಮಕ್ಕ, ಮೂಡಿ ಮಕ್ಕ ಎಣ್ಣವನ್ನತ ಭೇಧಭಾವ ಇಲ್ಲೆ. ಧೈರ್ಯ, ಪುರ್ವ್, ಸೇವಾ ಮನೋಭಾವ, ಉಂಡೆಂಗಿ ದಾರಾಚೀಂಗೂ ದೇಶತ್ ಪೆದತ್ ಪ್ರಪಂಚತೆ ಮಿಂಞಕ್ ಕೊಂಡ ಬರೋಲೂಂದ್ ಎಣ್ಣವಕ್ ಇಂದಿರಾಗಾಂಧಿರ ಜೀವನವೇ ಒರ್ ಸಾಕ್ಷಿ. □



## ಲಾಲ್ ಬಹಾದ್ದೂರ್ ಶಾಸ್ತ್ರಿ

- ಪುಟ್ಟಾನ ಜಾಗ - ಮೊಗಲ್ ಸರಾಯಿ, ಉತ್ತರಪ್ರದೇಶ  
ಪುಟ್ಟಾನ ದಿನ - 1904ನೇ ಇಸವಿ ಅಕ್ಟೋಬರ್ 2  
ಆಪ್ತ - ಶಾರದಾ ಪ್ರಸಾದ್  
ಅವ್ಯ - ರಾಮ್ ದುಲಾರಿ  
ಕಣ್ಮರೆ : 1966ನೇ ಇಸವಿ ಜನವರಿ 11

ಶಾರದಾ ಪ್ರಸಾದ್ ಸುರೂಲ್ ಸ್ಕೂಲ್‌ಲ್ ಉಪಾದಿ, ಆಯಿತಿಂಜತ್. ಬಯ್ಯಜಿ ರೈಲ್ವೇ ಇಲಾಖೆಕ್ ಕೂಡ್‌ಚಿ. ಲಾಲ್ ಬಹಾದ್ದೂರ್ ಒಂದರೆ ಬಯತ್‌ರ ಕುಂಞಿಯಾಯಿತಿಪ್ಪಕಲೇ ಅಪ್ಪನ ಕಳಂದಂಡತ್. ಅವ್ಯ, ಲಾಲ್ ಬಹಾದ್ದೂರ್‌ನೋ, ಅಯಿಂಗಡ ದಂಡ್ ಅಕ್ಕಂಗಳೋ ಕೂಟಿಯಂಡ್ ತಾಮನೆಕ್ ಪೋಚಿ. ಗರೀಬನಾಚೆಂಗಿಯೂ ಶಿಸ್ತಾಕಾರನಾಯಿತಿಂಜ ತಾತ, ಕರ್‌ಮೋಂವೊನೋ ಶಿಸ್ತಲೇ ಚಾಕ್‌ಚಿ. ಆರನೆ ಕ್ಲಾಸ್‌ಕ್ ಬಪ್ಪಕ ಲಾಲ್‌ಬಹಾದ್ದೂರ್‌ನ ಅವ್ಯಂಡ ತಂಗೆರಲ್ಲಿ ಓದುವಕ್ ಬುಟ್ಟತ್. ಅಲ್ಲಿ ತಂಗೆರ ವಡಿಯ ಎಣ್ಣಕ ಲಾಲ್ ಬಹಾದ್ದೂರ್‌ರ ಕುಂಞಪ್ಪ, ಮುನ್ಸಿಪಾಲಿಟಿಲ್ ಗುಮಾಸ್ತನಾಯಿತಿಂಜತ್. ಮನೆಲ್ ಬಡತನ ಇಂಜಕಲೂ ಅಯಿಂಗ ಪ್ರಾಮಾಣಿಕನೂ, ಸತ್ಯವಂತನೂ ಆಯಿತಿಂಜತ್. ಅದೇ ಗುಣತನ ಲಾಲ್‌ಬಹಾದ್ದೂರ್ ಪಡ್‌ಚತ್. ಅಯಿಂಗಡ ಕುಂಞಪ್ಪನೂ ಸಹ ಲಾಲ್‌ಬಹಾದ್ದೂರ್‌ನ ಅಪ್ಪನಿಲ್ಲತ ಕಣ್ಣ, ಅಂವೊಂಗ್ ವಿದ್ಯಾಭ್ಯಾಸಕ್

ಅನುಕೂಲ ಮಾಡಿ ಕೊಡ್ಕಂಡು ಎಣ್ಣೆತ್ ಪ್ರೀತಿಲ್ ಕಂಡತ್. ಎಲ್ಲಾಡ ಕೂಡ ಪ್ರೀತಿ ವಾತ್ಸಲ್ಯತ್ ನಡ್ಂದವದೂ, ಖರ್ಚ್ ಜಾಸ್ತಿ ಮಾಡತೆ ಸರಳ ಜೀವನ ನಡ್ತ್ವದ್ ಲಾಲ್ ಬಹಾದ್ದೂರ್ಕ್ ಅಂವೊಂಡ ಕುಂಞಪ್ಪ ಪಡ್ಪಾಚಿಟ್ಟದೆ. ಕುಂಞಪ್ಪ ತಾಂಡ ಮಕ್ಕಕ್ ಕೊಡ್ಪನೆಕೇ ಲಾಲ್ ಬಹಾದ್ದೂರ್ಕೂ ಮೂಂದ್ಕಾಸ್ ಕೊಡ್ಪಯಿಂಜತ್. ಆ ದುಡ್ಡ್ನ ತಿಂಡಿ ತಿಂಬಕೋ, ಬೋರೆ ಎಂತಾಂಗಾಚೇಂಗೂ ಪಾಳ್ ಮಾಡತೆ ಕೂಟಿತ್ ಬೆಚ್ಚಿತ್ ಅವ್ವಂಗ್ ಕೊಡ್ಪಯಿಂಜತ್. ಅವ್ವಂಡ ಕೂಡ ಇಪ್ಪಕ ಅವ್ವ ರಾಮಾಯಣ, ಮಹಾಭಾರತತರ್ ಕತೆ ಎಲ್ಲ ಎಣ್ಣೆ ಕೊಡ್ತಿತ್, ಮನ್ಸಲ್ ನಲ್ಲರಿಕೆನ ಬಿತ್ತಚಿ. ಅವ್ವ ಎಣ್ಣಾನ ತಕ್ಕನ ಲಾಲ್ ಬಹಾದ್ದೂರ್ ಏದೇ ಸಂದರ್ಭತೂ ಮೀರುವಯಿಂಜಿಲೆ. ಅವ್ವ “ಎಲ್ಲಾರ್ಕೂ ನಲ್ಲಂವೊನಾಯಿತ್ ಬಾಳ್” ಎಣ್ಣುವ ತಕ್ಕನ ಪುನಃ ಪುನಃ ಎಣ್ಣೆಯಂಡಿಪ್ಪಯಿಂಜತ್. ಆ ತಕ್ಕನ ಅರ್ಥ ಮಾಡಿಯಂಡ ಲಾಲ್ ಬಹಾದ್ದೂರ್ ತಾಂಡ ಪ್ರಾಣ ಪೋಪಲ್ಲಿ ಕೆತ್ತನೆಯೂ ಎಲ್ಲಾಕೂ ನಲ್ಲಂವೊನಾಯಿತೇ ಬದ್ಕಚಿ.

ಲಾಲ್ ಬಹಾದ್ದೂರ್ ಹೈಸ್ಕೂಲ್ಕ್, ವಾರಣಾಸಿರ ಹರಿಶ್ಚಂದ್ರ ಹೈಸ್ಕೂಲ್ಕ್ ಕೂಡ್ಚಿ. ಸ್ಕೂಲ್ ದೂರ ಉಂಡೇಂಗೂ ನಡ್ಂದಂಡೇ ಪೋಪಯಿಂಜತ್. ಅವಂಗ್ ಸ್ವಾಭಿಮಾನ ಜಾಸ್ತಿ. ಎಕ್ಕೊಲು ತಾಂಡ ಆತ್ಮಗೌರವಕ್, ಘನತೆಕ್ ಕುಂದ್ ಬಪ್ಪನೆಕೆ ನಡ್ಪದೇ ಇಂಜಿಲೆ. ಒಮ್ಮೆ ಅಯಿಂಡ ಊರ್ಂಜ ಚೆನ್ನಂಗ್ ದೂರತ್ ಕಾಲತರ್ ನಮ್ಮೆ ನಡ್ಪದಿಂಜತ್. ಅಲ್ಲಿಕ್ ಪೋಕಂಡುವೇಂಗಿ ನಾಲೆ ದಾಟಂಡು. ದೋಣಿಲೇ ಪೋಂಡು. ಪೋಪಕ ಎಲ್ಲಾಡ ಜೊತಲ್ ದೋಣಿಲೇ ಪೋಚಿ. ವಾಪಾಸ್ ಬಪ್ಪಕ ದೋಣಿಕ್ ಕೊಡ್ಪಕ್ ದುಡ್ಡಿಂಜಿಲೆ. ಎಲ್ಲರೂ ವಾಪಾಸ್ ಪೊರ್ಡುವಕ, “ನಿಂಗಲ್ಲ ಪೋಯಿ, ನಾನ್ ಇಂಞೂ ಚೆನ್ನ ನೇರ ನಮ್ಮೆ ನೋಟಿತ್ ಬಪ್ಪಿಂದ್” ಸಿನೇತಂಗಕೆಲ್ಲ ಎಣ್ಣೆಚಿ. ಅಯಿಂಗಲ್ಲ ಪೋಯಿ ತಾಪದು, ಚೆನ್ನಂಗ್ ಇರ್ಟಾನ ಪಿಂಞ ನಾಲೆನ ಈಜಿತ್ ಮನೆಕ್ ಬಾತ್. ದುಡ್ಡಿಲ್ಲೆಂದ್ ಎಣ್ಣೆ ತಿಂಜಕ ಸಿನೇತಂಗ ಕೊಡ್ಪಯಿಂಜತ್. ಆಚೇಂಗಿ ಕೇಪಕ್ ಸ್ವಾಭಿಮಾನ. ಸ್ವಾಭಿಮಾನತರ್ ರಕ್ಷಣೆಕಾಯಿತ್ ಧೈರ್ಯ ಬೆಚ್ಚಂಡಿಂಜತ್.

ಕಳಿ ಎಣ್ಣೆಕ ಲಾಲ್ ಬಹಾದ್ದೂರ್ಕ್ ದುಂಬ ಕುಸಿ ಇಂಜತ್. ಹಾಕಿ ಸ್ಪಿಕ್ ಎಡ್ಪಕ್ ದುಡ್ಡಿಲ್ಲತೆ, ಮರತರ್ ಕೊಂಬೆನ ಕೊಕ್ಕೆರನೆಕೆ ಮಾಡಿಯಂಡ್, ಹಾಕಿ ಕಳಿಪಯಿಂಜತ್. ಹೈಸ್ಕೂಲಿಪ್ಪಕ ನಲ್ಲ ನಲ್ಲ ಪುಸ್ತಕ ಓದುವ ಅಭ್ಯಾಸ ಬೊಳ್ತಿಯಂಡತ್. ಬಲ್ಯ ಬಲ್ಯ ವ್ಯಕ್ತಿಯಡ ಜೀವನಚರಿತ್ರೆ ಎಲ್ಲ ಓದಿತ್ ಅಯಿಂಗಡ ನಲ್ಲ ಗುಣ, ವಿಚಾರತ್ನೆಲ್ಲ ಪಡ್ಚಂಡತ್.



ಮಧ್ಯತ್ ಸ್ಕೂಲ್ ಬುಟ್ಟಿತ್ ಸ್ವಾತಂತ್ರ್ಯ ಪೋರಾಟಕ್ ಇಳೊಂಜತ್. ಬಯ್ಯಂಜಿ ಪುನಃ ವೇದಾಂತ ವಿಷಯತ್ ಏರ ಪತ್ ಚಿತ್ 'ಶಾಸ್ತ್ರಿ' ಎಣ್ಣುವ ಪರೀಕ್ಷೆಲ್ ಪಾಸಾಚಿ. ಈ ಪರೀಕ್ಷೆ ಪದವಿ ಪರೀಕ್ಷೆಕ್ ಸಮ. ಅಂದೊಂಜ ಲಾಲ್ ಬಹಾದ್ದೂರ್ ಪದತ್ ಮಿಂಞತ್ 'ಶಾಸ್ತ್ರಿ' ಪದ ಕೂಡ್ ಚಿ. ಲಲಿತ ಎಣ್ಣುವ ಕನ್ನಿನ ಮಂಗಲ ಕಯಿಂಜತ್. ಸ್ವಾತಂತ್ರ್ಯ ಪೋರಾಟತ್ ಸುಮಾರ್ ಕುರಿ ಜೈಲ್ ಕ್ ಪೋಕಂಡಿಯಾಚಿ. ಸಾಧು ಸ್ವಭಾವತ್ ಶಾಸ್ತ್ರಿ ಗಾಂಧೀಜಿರ ಮಾದಾರಿ ಅಹಿಂಸಾ ಚಳುವಳಿಕಾರ ಆಯಿತಿಂಜತ್. ಜೈಲಾಲಿಪ್ಪಕ ಒಮ್ಮೆ ಆಯಿಂಡ ಮೋವಕ್ ದುಂಬ ಕಾಯಿಲ ಆಯಿತಿಂಜಕಲೂ ಮನೆಕ್ ಪೋಂಡೂಂದ್ ಜೈಲರ್ ನ ಕೇಟ್ ಲೆ. ವಿಷಯ ಅರ್ಂಜ ಜೈಲರೇ ಒರ್ ವಾರ ಮನೆಕ್ ಪೋಪಕ್ ಅನುಮತಿ ಕೊಡ್ ತತ್. ಚಾವಕಾನ ಮೋವಳ ಬುಟ್ಟಿತ್, ಒರ್ ವಾರ ಕಯ್ಯುವದೇ ಜೈಲ್ ಕ್ ಪೋರಾಟ್ ರಾತ್. ಜೈಲಾಲೂ ಸಮಯ ಪಾಳ್ ಮಾಡತೆ 'ವಿಜ್ಞಾನಿ ಮೇರಿ ಕ್ಯೂರಿ'ರ ಜೀವನಚರಿತ್ರನ ಇಂಗ್ಲಿಷ್ ಅಂಜ ಹಿಂದಿಕ್ ಅನುವಾದ ಮಾಡ್ ಚಿ. "ಡೆಲ್ಲಿ ಬುಟ್ಟಿತ್ ಪೊರಡಿ" ಎಣ್ಣುವ ಮುನ್ಸೂರ್ ಪುಟತ್ ಪುಸ್ತಕವು ಜೈಲಾಲಿಪ್ಪಕಲೇ ಎಳೊದಿಯೆ.

ಸ್ವಾತಂತ್ರ್ಯ ಕ್ ಟ್ಪಾನ ಪಿಂಞ ಭಾರತತ್ ರೈಲ್ವೆ ಮಂತ್ರಿ ಆಯಿತಿಂಜತ್. ಅಕ್ಕ ಒರ್ ರೈಲ್ ಅಪಘಾತ ಆಯಿತ್ ಸುಮಾರ್ ಜನ ಚಿತ್ತಿತ್, ಎಚ್ಚಕೋ ಜನಕ್ ಗಾಯ ಆಚಿ. ಅದನೆಲ್ಲ ನೋಟಿತ್ ಮನಸ್ ನೊಂದಿತ್, ಮಂತ್ರಿ ಪದವಿಕ್ ರಾಜೀನಾಮೆ ಕೊಡ್ ತತ್. ಅಪಘಾತಕ್ ರೈಲ್ವೆ ಮಂತ್ರಿ ಕಾರಣ ಅಲ್ಲತ ಪೋಚೇಂಗಿಯೂ, ನೈತಿಕ ಜವಾಬ್ದಾರಿ ತಾಂಡದೇ ಎಣ್ಣಿತ್ ರಾಜೀನಾಮೆ ಕೊಡ್ ತತ್. ಎಕ್ಕೊಲು ನಿಸ್ವಾರ್ಥಿಯಾಯಿತ್ ಜನ, ದೇಶ ಸೇವೆಕಾಯಿತೇ ಗೇನ ಮಾಡುವಯಿಂಜದಲ್ಲತೆ, ಅಧಿಕಾರ, ಪಣ, ಅಂತಸ್ತ್, ಪದ ಇಂತಂಗಾಯ್ ಆಸೆ ಪಟ್ಟದೇ ಇಲ್ಲೆ.

ನೆಹರು ಮರಣಪಟ್ಟಿ ಪಿಂಞ ಪ್ರಧಾನಮಂತ್ರಿಯಾನ ಲಾಲ್ ಬಹಾದ್ದೂರ್ ಶಾಸ್ತ್ರಿ ದಿನಕ್ ಪದಾನೆಟ್ ಗಂಟೆ ಕೆಲಸ ಮಾಡುವಯಿಂಜತ್. ಜನಡ ಕಷ್ಟ ಸುಖ ವಿಚಾರಣೆ ಮಾಡುವಕಾಯಿತ್ ಎಕ್ಕಾಲು ಪೊಲಾಕ ಸಾರ್ವಜನಿಕ ಭೇಟಿ ಕಾರ್ಯಕ್ರಮ ಬೆಚ್ಚಂಡಿಂಜತ್. ಎಚ್ಚಕ್ ಬಲ್ಯ ಪದವಿಲಿಂಜಕಲೂ ಮನೆಲ್ ಪೋಣ್ಣ್ ಮಕ್ಕಳ ಪ್ರೀತಿಲ್ ಕಾಂಬಯಿಂಜತ್. ಅಯಿಂಡ ತಪ್ಪನ ತಿದ್ದುವಯಿಂಜತ್. ಒಮ್ಮೆ ಶಾಸ್ತ್ರಿರ ಮೋಂವೊಂಗ್ ಸ್ಕೂಲ್ ಮಕ್ಕ, ಬೋರೆ ಮಂತ್ರಿಯಡ ಮಕ್ಕ ಎಲ್ಲ ಕಾರಲೇ ಬಪ್ಪ, ನೀನೆನ್ನೊಗ್ ನಡೊಂದಂಡ್ ಬಪ್ಪೊಂದ್ ತಮಾಸಿ ಮಾಡ್ ಚಿ. ಮೋಂವೊ ಬೇಜಾರ್ ಲ್ ಮನೆಕ್ ಬಂದಿತ್ ಅಪ್ಪಂಡ ಕೂಡ ಎಣ್ಣ್ ಚಿ. ನಾಳೆಂಜ ನಾನೂ

ಕಾರ್ಲೇ ಸ್ಕೂಲ್‌ಕ್ ಪೋಪೀಂದ್. ಸುರುಲೂ 'ಪೋ ಆಂಗ್‌ನ್' ಎಣ್ಣೆ ಚಿ ಅಪ್ಪ. ಅಪ್ಪಂಡ ಸ್ವಭಾವ ಗೊತ್ತಿಂಜ ಮೋಂವೊ ಅಪ್ಪ ಇಚ್ಚಕ್ ಸುಲಭತ್ ಒತ್ತಾರ್ ತಲ್ಲಾಂದ್ ಆಶ್ಚರ್ಯಪಟ್ಟಿತ್, ಪೋಪಕ್ ಪೊರ್‌ಡುವಕ ಶಾಸ್ತ್ರಿ ಎಣ್ಣೆ ಚಿ ಆಚೇಂಗಿ, ನಾಳೆ ನಾಡ ಮಂತ್ರಿ ಪದವಿ ಪೋಯಿರ್‌ತೇಂಗಿ ನೀನ್ ಪುನಃ ನಡಂದಂಡೇ ಪೋಂಡು. ಅಕ್ಕ ಎಲ್ಲರೂ ಅಪ್ಪ ಮಂತ್ರಿ ಆಯಿತಿಪ್ಪಕ ಮೋಂವೊ ಕಾರ್ಲ್ ಮೆರಂದತ್, ಇಕ್ಕ ನಡಂದಂಡ್ ಬಪ್ಪಾಂದೆಣ್ಣವ... ಎಣ್ಣೆ ಚಿ. ಅಕ್ಕ ಮೋಂವೊನೂ ಅರ್ಥ ಮಾಡಿಯಂಡ್ ಪದವಿ ಶಾಶ್ವಿತ ಅಲ್ಲ, ನಡಂದಂಡೇ ಪೋಪೀಂದ್ ಎಣ್ಣೆ ಚಿ.

ಇಂಚೊಮ್ಮ ಮಂತ್ರಿ ಆಯಿತಿಪ್ಪಕ ಬೋರೆ ಕ್ವಾಟರ್ಸ್ ಕೊಡ್‌ತತ್. ಅದಲ್ ಬಲ್ಯ ಅನುಕೂಲ ಇಂಚಿಲೇಂದ್ ಮನೆ ಸೆರಿ ಕೂಟುವಕ್ ಇಲಾಖೆಂಜ ಜನಳ ಅಯೆಚತ್. ಅಕ್ಕ ಇಲಾಖೆಕ್ ಫೋನ್ ಮಾಡಿತ್, ಕೆಲಸಕಾರಳ ವಾಪಾಸ್ ಕಾಕ್‌ಚಿಡಿ, ಈ ಮನೆಲೇ ನಾನೆನ್ನ್ ಶಾಶ್ವಿತ ಇರಂಡುವಾ, ನಾಡ ಮಂತ್ರಿ ಪದವಿ ತೇಂದ ಪಿಂಞ ನಾಡ ಮನೆಕೇ ಪೋಂಡುವಲ್ಲಾಂದೆಣ್ಣೆ ಚಿ. ಇಲಾಖೆಕಾರಕ್ ಆಶ್ಚರ್ಯ ಆಚಿ. ಚಿರಿಯತ್‌ಲ್, ಓದ್‌ನ ಮಹಾತ್ಮಂಗಡ ಜೀವನಚಿರಿತ್ರೆರ ನಲ್ಲ ನಲ್ಲ ಅಂಶತ್ ನೆಲ್ಲ ತಾಂಡ ವ್ಯಕ್ತಿತ್ವತ್ ಕೂಟಿಯಂಡ್ ನಲ್ಲೋರ್ ವ್ಯಕ್ತಿತ್ವ ಬೊಳುತಿಯಂಡ್ 'ಅಜಾತಶತ್ರು' ಎಣ್ಣೆ ಕ ಶತ್ರುಪೇ ಇಲ್ಲತಂವೊಂದ್ ಎಣ್ಣೆ ಚಿಟ್ಟಿಂಡತ್ ಲಾಲ್ ಬಹಾದ್ದೂರ್ ಶಾಸ್ತ್ರಿ.

ಪ್ರಧಾನಮಂತ್ರಿ ಆಯಿತಿಪ್ಪಕ 1906 ಲ್ ಪಾಕಿಸ್ತಾನತ್ ಕೂಡ ಯುದ್ಧ ನಡಂದತ್. ಅಕ್ಕ "ಜೈಜವಾನ್, ಜೈಕಿಸಾನ್" ಎಣ್ಣೆ ವ ಘೋಷಣೆ ಮಾಡಿತ್ ಯುದ್ಧ ಮಾಡುವ ಪಟ್ಟಾಳಕಾರಂಗಕ್ ಪುರ್‌ಡ್ ಕೊಡ್‌ತತ್. ಅಯಿಂಡ ಕೂಡೇ ಕೂಳ್ ಬೊಳೆವ ರೈತನೂ ಪಟ್ಟಾಳಕಾರಂಡಚ್ಚಿಕೇ ವಿಶೇಷ ವ್ಯಕ್ತಿಲೆಂದ್ ಕಾಟ್‌ಚಿ. ರಷ್ಯಾತ್‌ರ ಪ್ರಧಾನಮಂತ್ರಿ ಕೊಸಿಗಿನ್ ದಂಡೂ ದೇಶತ್‌ರ ಮಧ್ಯ ಶಾಂತಿ ಒಪ್ಪಂದ ಮಾಡ್‌ಚಿಡುವಕಾಯಿತ್ ಭಾರತತ್‌ರ ಪ್ರಧಾನಿ ಲಾಲ್ ಬಹಾದ್ದೂರ್ ಶಾಸ್ತ್ರಿನೋ, ಪಾಕಿಸ್ತಾನ ಪ್ರಧಾನಿ ಅಯುಬ್‌ಖಾನ್‌ನೋ ತಾಷ್ಕೆಂಟ್‌ಕ್ (ಉಚ್ಚೆಕಿಸ್ತಾನತ್‌ರ ರಾಜಧಾನಿ) ಕಾಕ್‌ಚಿಟ್ಟಿತ್, ತಕ್ ಪರಂದತ್. ಶಾಂತಿ ಒಪ್ಪಂದಕ್ ದಂಡ್ ನಾಯಕಂಗಳೂ ಸೈನ್ ಇಟ್ಟಿತ್. ಭಾರತ ಪಾಕಿಸ್ತಾನತ್‌ರ ಮಧ್ಯತ್‌ರ ಜಗಳ ತೇಂದತ್, ನಾಳೆ ನಾನ್ ಪೊರ್‌ಡುವೀಂದ್ ಕುಸಿಲ್ ಭಾರತಕ್ ಫೋನ್ ಮಾಡಿತ್ ಶುಭ ಸಮಾಚಾರ ಅರ್‌ಪಿತ್ ನೆಮ್ಮದಿಲ್ ವರ್‌ಚಿ. ವರ್‌ನ ಲಾಲ್ ಬಹಾದ್ದೂರ್ ಶಾಸ್ತ್ರಿ ಪಿತ್ಯಾಂದ್ ಪೊಲಾಕ ಎದ್ದದೇ ಇಲ್ಲೆ. ವರ್‌ಕತೇ ಹೃದಯಾಘಾತ ಆಯಿತ್ ಚತ್ ಪೋಯಿತಿಂಜತ್. ಪುರ್‌ಸೊತ್ತಿಲ್ಲತ ಕೆಲಸ ಮಾಡಿತೂ, ಕಷ್ಟ, ಬಡತನ

ಸಹಿಸಿತೂ ಚೋತಿತಿಂಜ ಹೃದಯ ಕೆಲಸ ಮಾಡುವಾನೇ ನಿವ್ವಚಿತ್ಪರಾತ್. ಎಲ್ಲಡೋ ಪ್ರೀತಿರ 'ಲಾಲ' ಕಣ್ಮರೆ ಆಯಿರಾತ್. ಆಚೇಂಗೂ, ಇಂದೆಕೂ ತಾಂಡ ಆದರ್ಶತ್‌ನ ನಂಗಕೆಲ್ಲ ಬುಟ್ಟಿತ್ ಪೋಯಿತ್. ಪಯಿಚವಂಗ್ ಒರ್ ಮೀನ್ ಕೊಡ್‌ತತೇಂಗಿ ಅಂದ್ ಅಂವೊ ಅದ್‌ನ ತಿಂದ್‌ರುವ. ಪುನಃ ನಾಳೆ ಕೆಲ ಪಯಿಪ. ಅದ್‌ಂಗ್ ಅಂವೊಂಗ್ ಮೀನ್ ಪುಡಿಪಕ್ ಪಡ್‌ಪ್‌ಚಿಡಿ. ಅಕ್ಕ ಅಂವೊ ಇಂಞ ಮಿಂಞಕ್ ಪಯಿಚಂಡಿಪ್ಪಲೇಂದ್ ಎಣ್ಣೊನ ಮಹಾತ್ಮ, ಲಾಲ್ ಬಹಾದ್ದೂರ್ ಶಾಸ್ತ್ರಿ. ನಯಿಚಿತ್ ತಿಂಗಂಡು ಎಣ್ಣುವ ಸ್ವಾಭಿಮಾನತ್‌ರ ಪಾಠ ಎಲ್ಲಾಕೂ ಮಾಡ್‌ಚಿ ಶಾಸ್ತ್ರಿ.

ಜೀವನತ್ ಸರಳತೆ, ಗೇನ ಮಾಡುವಾತ್ ಶ್ರೀಮಂತಿಕೆ ಇರಂಡು ಎಣ್ಣುವದ್ ಲಾಲ್ ಬಹಾದ್ದೂರ್ ಶಾಸ್ತ್ರಿರ ನೀತಿ. □



## ಬಾಬೂ ರಾಜೇಂದ್ರ ಪ್ರಸಾದ್

- ಪುಟ್ಟನ ದಿನ - 1884ನೇ ಇಸವಿ ಡಿಸೆಂಬರ್ 3  
 ಪುಟ್ಟನ ಜಾಗ - ಜೇರಾದೋಯಿ, ಬಿಹಾರ ರಾಜ್ಯ  
 ಅಪ್ಪ - ಮಹಾದೇವ ಸಹಾಯ್  
 ಅಮ್ಮ -  
 ಕಣ್ಮರೆ - 1963ನೇ ಇಸವಿ ಫೆಬ್ರವರಿ 22

ರಾಜೇಂದ್ರ ಪ್ರಸಾದ್‌ಕ್ ಆರ್ ವಯಸ್ಸ್ ಆಪಕ ಮನೆಲೇ ಅಕ್ಷರಾಭ್ಯಾಸ ಆಚಿ. ಒರ್ ಮೌಲ್ವಿನ ಕಾಕ್‌ಚಿಟ್ಟಿತ್ ಫಾರಸಿ ಭಾಷೆಲ್ ಓ ನಾಮ ಎಳೊದ್ ಚಿಟ್ಟಿತ್. ಹಳ್ಳಿರ ಬದ್‌ಕ್‌ಲ್ ಗರೀಬ - ಬಲ್ಯಂವೊ ಎಣ್ಣವ ಭೇದಭಾವ ಇಲ್ಲತೆ, ಬಾಲ್ಯ ಕಯಿಚತ್.

ಒಮ್ಮೆ ಕಲ್ಕತ್ತಾತ್‌ರ ಪ್ರೆಸಿಡೆನ್ಸಿ ಕಾಲೇಜ್‌ಲ್ ಓದಿಯಂಡಿಪ್ಪಕ ಪರೀಕ್ಷೆಕ್ ಅಳಾಪಾಂಗ್ ಮಿಂಞ ಒರ್ ಪರೀಕ್ಷೆ ಮಾಡಿತ್ ಅದ್‌ಲ್ ಪಾಸಾನಯಿಂಗಳ ಮಾತ್ರ ಪರೀಕ್ಷೆಕ್ ಅಳಾಪ್‌ಚಿಡುವ ಪದ್ಧತಿಯಿಂಜತ್. ಆ ಪ್ರಿಪರೇಟರಿ ಪರೀಕ್ಷೆರ ಫಲಿತಾಂಶತ್‌ನ ಪ್ರಿನ್ಸಿಪಾಲ್ ಓದಿತ್ ಎಣ್ಣಿಯಂಡಿಂಜತ್. ಅದ್‌ಲ್ ಪಾಸಾನ ಮಕ್ಕಡ ಎಲ್ಲ ಪೆದ ಇಂಜತ್. ರಾಜೇಂದ್ರಂಡ ಪೆದ ಇಂಜಿಲೆ. ಅದ್‌ನ ಕಂಡಿತ್ ರಾಜೇಂದ್ರ ಎದ್‌ ನಿಂದಿತ್ ನಾಡ ಪೆದ ಇಲ್ಲೆ ಎಣ್ಣೊಚಿ. ನೀನ್ ಪಾಸಾಯಿತ್‌ಲ್ಲೆ ಎಣ್ಣೊಚಿ ಪ್ರಿನ್ಸಿಪಾಲ್. ಅದ್ ಸಾಧ್ಯ ಇಲ್ಲೆ ಸರ್, ನಾನ್ ಚಾಯಿಲ್ ಎಳೊದಿಯೆ,

ನಾನ್ ಪಾಸಾಯಿತೇ ಇರಂಡು ಎಣ್ಣೆ ಚಿ. ಪ್ರಿನ್ಸಿಪಾಲ್ ಇಂಗ್ಲಿಷ್ ಕಾರ, ಅಂವೊಂಗ್ ಚೆಡಿ ಬಾತ್. ಪಾಸಾಚೆಂಗಿ ಪೆದ ಇಪ್ಪಯಿಂಜತ್. ಜಾಸ್ತಿ ತಕ್ಕ ಪರಂದಕ ನೀಕ್ ದಂಡ ಇಡುವಿ ಎಣ್ಣೆ ಚಿ. ನಾನ್ ಪಾಸಾಯಿತೇ ಇಪ್ಪಿ. ಪೆದ ಬುಟ್ಟ್ ಪೋಯಿತಿಕ್ಕು ದಯಬೆಚ್ಚಿತ್ ನೋಟಿ ಸರ್ ಎಣ್ಣೆ ಚಿ ರಾಜೇಂದ್ರ. ಪ್ರಿನ್ಸಿಪಾಲ್ ಕ್ ಚೆಡಿ ಬಂದಿತ್ ಅಂಜಿ ಉರ್ಪಿಯ ದಂಡ ಎಣ್ಣೆ ಚಿ. ಪುನಃ ಕೇಟತ್ ರಾಜೇಂದ್ರ. ಪತ್ತ ಉರ್ಪಿಯ ದಂಡ ಎಣ್ಣೆ ಚಿ. ದಂಡ ನುಪ್ಪದ್ ಉರ್ಪಿಯಕೆತ್ತನೆ ಎತ್ತುವಕ ಪಡಿರಲ್ಲಿ ಗುಮಾಸ್ತ ಮುಂಡತಿರೊಂದ್ ಸನ್ನೆ ಮಾಡ್ ಚಿ. ರಾಜೇಂದ್ರ ಪ್ರಸಾದ್ ಎಲ್ಲರೊಂಜಿ ಏರ ಮಾರ್ಕ್ ಲ್ ಪಾಸಾನ ವಿಷಯತ್ ಅರ್ಪ್ ಚಿ. ಪ್ರಿನ್ಸಿಪಾಲ್ ಕ್ ಕಣ್ಣಿನ ಬೆರಗಾಯಿತ್ ನೋಟ್ ಚಿ, ಬೆನ್ನ ತಟ್ಟ್ ಚಿ. ತಾನ್ ಎಳೆದ್ ಉತ್ತರತ್ ಮೇಲೆ ಅಚ್ಚಕ್ ವಿಶ್ವಾಸ ಇಂಜತ್ ರಾಜೇಂದ್ರ ಪ್ರಸಾದ್ ಕ್. ರಿಸಲ್ಟ್ ಪೈಲಾಯಿ ತೊಂದ್ ಅರ್ಂಜದೇ ಮಿಂಞ ಬಯ್ಯ ಗೇನ ಮಾಡತೆ ಪ್ರಾಣ ಕಳೆಂದವನ್ನತ ಮಕ್ಕಕ್ ರಾಜೇಂದ್ರ ಪ್ರಸಾದ್ ರ ವಿದ್ಯಾರ್ಥಿ ಜೀವನತ್ ನಡೆಂದ ಈ ಘಟನೆ ಪಾರ ಪಡೆಪ್ ಚಿಡುವನ್ನತದ್.

ಇಂಞೊಮ್ಮ ಕಲ್ಕತ್ತಾ ಕಾಲೇಜ್ ಲ್ ಓದಿಯಂಡಿಪ್ಪಕ ಪರೀಕ್ಷೆ ರ ಪ್ರಶ್ನೆ ಪತ್ರಿಕೆ ಲ್ ಏಳ್ ಪ್ರಶ್ನೆ ಕೊಡತಿತ್ ಅಂಜಂಗ್ ಉತ್ತರ ಎಳೆದೊಂದ್ ಇಂಜತ್. ರಾಜೇಂದ್ರ ಪ್ರಸಾದ್ ಏಳ್ ಪ್ರಶ್ನೆ ಕೊ ಸೆರಿಯಾನ ಉತ್ತರವೇ ಎಳೆದಿತ್ ಏದೇಂಗಿ ಅಂಜಿ ಉತ್ತರಕ್ ಮಾರ್ಕ್ ತಾರೊಂದ್ ಎಳೆದ್ ಚಲೊ. ಇನ್ನೆ ರಾಜೇಂದ್ರ ಪ್ರಸಾದ್ ತಾಂಡ ವಿದ್ಯಾರ್ಥಿ ಜೀವನತ್ ಎಕ್ಕೊಲು ಆದ್ಯ ಸ್ಥಾನತೇ ಪಾಸಾಪ ಯಿಂಜತ್. ರಾಜೇಂದ್ರ ಪ್ರಸಾದ್ ಸ್ಕೂಲ್ ಲಿಪ್ಪಕಲೇ ರಸಿಕಬಾಬೂ ಎಣ್ಣವ ಉಪಾದ್ರಿ ಅಂವೊಂಗ್, ಚಾಯಿಲ್ ಓದ್, ಕಷ್ಟ ಪಟ್ಟಿತ್ ಓದ್ ಚೆಂಗಿ ನೀನ್ ಎಲ್ಲಾರೊಂಜಿ ಏರ ಮಾರ್ಕ್ ಎಡೆಪಿಯಾಂದ್ ಪುರೊಡ್ ಕೊಡೆಪಯಿಂಜತ್. ಅನ್ನನೇ ರಾಜೇಂದ್ರ ನಡೆಂದಂಡತ್. ಅಲ್ಲಿಂಜ ಕಾಲೇಜ್ ಕ್ ಪೋಪಕಲೂ ಬುದ್ಧಿವಾದ ಎಣ್ಣೆ ತೇ ಅಯೆಚತ್. ಕಾಲೇಜ್ ಕ್ ಕೆಟ್ಟ ಸಹವಾಸ ಮಾಡ್ ಚೆಂಗಿ ನಲ್ಲ ಮಾರ್ಕ್ ಎಡೆಪಕಯ್ಯಲೊಂದ್ ಉಪಾದ್ರಿ ಎಣ್ಣ ತಕ್ಕನ ಚಾಯಿಲ್ ಗೇನ ಬೆಚ್ಚೆಂಡ್ ಚಾಯಿಲ್ ಓದಿತ್ ಇಡೀ ವಿಶ್ವವಿದ್ಯಾನಿಲಯಕೇ ಆದ್ಯತ್ ಪಾಸಾಯಿತ್ ಮನೆಕಾರಕೂ, ಊರ್ಕೂ ಕೀರ್ತಿ ಎಡೆತಂಡ್ ಬಾತ್.

ಮನೆರ ಜವಾಬ್ದಾರಿ ಪೂರ್ತಿ ಅಣ್ಣ ಮಹೇಂದ್ರ ಪ್ರಸಾದ್ ರ ಮೇಲೆ ಇಟ್ಟಿತ್ ರಾಜೇಂದ್ರ ಪ್ರಸಾದ್ ದೇಶ ಸೇವೆಕ್ ನಿಂದತ್. ಎಂ.ಎ., ಎಲ್.ಎಲ್.ಬಿ. ಮಾಡಿತ್ ಲಾಯರ್ ಆಂಡೊಂದ್ ಅಣ್ಣ ಎಣ್ಣೆ ಚಿ. ಅನ್ನನೇ ಪರೀಕ್ಷೆಕ್ ತಯಾರಿ ಮಾಡ್ ಚಿ. ಆಚೆಂಗಿ ದುಡ್ಡ್ ಕ್ ತೊಂದರೆ ಇಂಜಾಂಗ್ ಅಣ್ಣಂಗ್ ಪಣತಾರ ತೊಂದರೆ

ಕೊಡ್‌ಪಕಾಗಾಂದ್ ಗೇನ ಮಾಡಿತ್, ಚಿನ್ನಂಗ್ ದಿನ ಸಿಟಿ ಕಾಲೇಜ್‌ಲ್ ಪ್ರೊಫೆಸರ್ ಆಯಿತ್ ಕೆಲಸ ಮಾಡ್‌ಚಿ. ಅಲ್ಲಿಂಜ ಮನೆಲೇ ಮಕ್ಕಕ್ ಟ್ಯೂಷನ್ ಕೊಡ್‌ಪಕ್ ಸುರು ಮಾಡ್‌ಚಿ. ಬಯ್ಯಂಜಿ ಶಮ್‌ಸುಲ್ ಹುದಾ ಎಣ್ಣುವ ಲಾಯರ್‌ರ ಜೊತೆಲ್ ಕೆಲಸ ಮಾಡಿತ್ ಅನುಭವ ಪಡ್‌ಂದಿತ್ ಬಿ. ಎಲ್. ಪರೀಕ್ಷೆ ಪಾಸ್ ಮಾಡ್‌ಚಿ. ರಾಜೇಂದ್ರ ಪ್ರಸಾದ್ ಕೋರ್ಟ್‌ಲ್ ವಾದ ಮಾಡುವಾನ ನೋಟಿತ್ ಕುಸಿಯಾನ ಜಡ್ ಅಂವೊನ ಲಾ ಕಾಲೇಜ್‌ಕ್ ಪ್ರೊಫೆಸರ್ ಆಯಿತ್ ಮಾಡ್‌ಚಿ. ಸಂಪಾದನೆ ಚಾಯಿಲ್ ನಡ್‌ಂದಂಡ್ ಇಂಜ ಸಮಯತ್ ಗೋಪಾಲಕೃಷ್ಣ ಗೋಖಲೆರ ಪರಿಚಯ ಆಚಿ. ಅಯಿಂಗಡ ತಕ್ಕ್ ಕೇಟಿತ್ ಪ್ರಸಾದ್‌ಕ್ ತಾನೂ ಸ್ವಾತಂತ್ರ್ಯ ಪೋರಾಟಕ್ ಇಳಿಯಂಡೂಂದ್ ತೋಂದ್‌ಚಿ. ಆಚೇಂಗಿ ಆರ್ಥಿಕವಾಯಿತ್ ಬಡತನ ಇಂಜ ಮನೆಲ್ ಅಣ್ಣಂಡ ಮೇಲೆ ಎಲ್ಲ ಜವಾಬ್ದಾರಿ ಎನ್ನನೆ ಬುಡುವೋಂದ್ ಗೇನ ಮಾಡಿತ್ ರಾಜೇಂದ್ರ ಪ್ರಸಾದ್ ಅಣ್ಣಂಡ ಮಿಂಞತ್ ಎಣ್ಣುವಕ್ ಕಯ್ಯತೆ, ಅಣ್ಣಂಗೋರ್ ಕಾಗದ ಎಳ್‌ದಿತ್ ಬೆಚ್ಚಿತ್ ಪೊರಮೆ ಪೋಚಿ. ಮನೆಕ್ ಬಂದದು ಅಣ್ಣ ತಮ್ಮಣನ ತಬ್ಬಿಯಂಡತ್, ದಂಡಾಳೂ ಮೊರ್‌ಟತ್. ಅಲ್ಲಿಂಜ ತಮ್ಮಣಂಡ ಸಂಸಾರತರ್ ಜವಾಬ್ದಾರಿ ಸಮೇತ ವಹಿಸಿಯಂಡ್ ರಾಜೇಂದ್ರ ಪ್ರಸಾದನ ದೇಶ ಸೇವೆಕ್ ಬುಟ್ಟ್ ಕೊಡ್‌ತತ್. ರಾಜೇಂದ್ರ ಪ್ರಸಾದ್‌ರ ಪೋರಾಟತ್ ಅಣ್ಣ ಮಹೇಂದ್ರ ಪ್ರಸಾದ್‌ರ ತ್ಯಾಗವೇ ಮುಖ್ಯಪಟ್ಟದ್. ಎಲ್ಲ ಪೋರಾಟ ತ್ಯಾಗತರ್ ಪ್ರತಿಫಲವಾಯಿತ್ ರಾಜೇಂದ್ರ ಪ್ರಸಾದ್ ಸ್ವತಂತ್ರ ಭಾರತತರ್ ಆದ್ಯ ರಾಷ್ಟ್ರಾಧ್ಯಕ್ಷ ಆಚಿ. ಎಳುವದ್ ಬಯತ್ ದುಂಬ್‌ಚೇಂಗಿಯೂ ತನ್ನ ತಾನ್ ವಿದ್ಯಾರ್ಥಿಯೆಂದೇ ಎಣ್ಣಿಯವಯಿಂಜ ರಾಜೇಂದ್ರ ಪ್ರಸಾದ್‌ಕ್, ಪುದಿಯ ಪುದಿಯ ಭಾಷೆ ಪಡಿಪತ್ ಆಸಕ್ತಿ ಇಂಜತ್. ಹಜಾರಿಬಾಗ್ ಜೈಲಿಲಿಪ್ಪಕ ಸಂಸ್ಕೃತ ಪಡ್‌ಚತ್. ಸ್ಕೂಲ್ ಕಾಲೇಜ್‌ಲಿಪ್ಪಕಲೇ ಉರ್ದು, ಪರ್ಶಿಯ ಪಡ್‌ಚಿತಿಂಜತ್. ಕಲ್ಕತ್ತಾತ್ ಲಾಯರ್ ಆಯಿತಿಪ್ಪಕ ಬಂಗಾಳಿ ಭಾಷೆ ಪಡ್‌ಚತ್. ಅಲ್ಲಿಂಜ ಕನ್ನಡ ಪಡಿಪಕ್ ಪ್ರಯತ್ನ ಪಟ್ಟಿತಿಂಜತ್. ಆಚೇಂಗಿ ಚಾಯಿಲ್ ಪಡಿಪಕ್ ಕಯಿಂಜಿಲೆ.

ಅಹಂಕಾರ ಇಲ್ಲತೆ, ಬೀವನತ್ ಇಂಞೂ ಪಡಿಪದ್ ಸುಮಾರುಂಡ್ ಎಣ್ಣಿಯಂಡೇ ಬದ್‌ಕ್‌ನ ರಾಜೇಂದ್ರ ಪ್ರಸಾದ್‌ರ ಬದ್‌ಕ್ ನಂಗಡ ಬದ್‌ಕ್‌ಲೂ ಬಟ್ಟೆ ಬೊಳಿ ಕಾಟಡ್. □



## ಸುಭಾಷ್‌ಚಂದ್ರ ಬೋಸ್

- ಪುಟ್ಟನ ದಿನ - 1897ನೇ ಇಸವಿ ಜನವರಿ 23  
 ಪುಟ್ಟನ ಜಾಗ - ಕಟಕ್, ಒರಿಸ್ಸಾ ರಾಜ್ಯ  
 ಅಪ್ಪ - ಜಾನಕೀನಾಥ ಬೋಸ್  
 ಅಮ್ಮ - ಪ್ರಭಾವತಿ ಬೋಸ್  
 ಕಣ್ಮರೆ - 1945ನೇ ಇಸವಿ ಆಗಸ್ಟ್ 18  
 (ಆಗಸ್ಟ್ 22ಂಗೆ ಟೋಕಿಯೊ ರೇಡಿಯೊ  
 ಮರಣಪಟ್ಟಿ ವಿಷಯ ಪ್ರಸಾರ ಮಾಡ್‌ಚಿ)

ಭಾರತಕ್ಕೆ ಸ್ವಾತಂತ್ರ್ಯ ಕೊಟ್ಟವಾಂಗ್ ಮಿಂಞಾ ಕ್ರಾಂತಿಕಾರಿ ಸ್ವಾತಂತ್ರ್ಯ  
 ಪೋರಾಟಾಕಾರಕೆಲ್ಲ ಒರ್ ಸ್ಫೂರ್ತಿಯಾಯಿತಿಂಜ ವ್ಯಕ್ತಿ, ಮಹಾನಾಯಕ,  
 ನೇತಾಜಿ ಸುಭಾಷ್‌ಚಂದ್ರ ಬೋಸ್. ಅಪ್ಪ ಅಮ್ಮಂಗ್ ಒಟ್ಟು ಪದ್‌ನಾಲ್ ಮಕ್ಕ.  
 ಅಯಿಂಗಡಾಲ್ ಒಯಿಂಬದನೆ ಮೋಂವೊ ಸುಭಾಷ್‌ಚಂದ್ರ. ದುಂಬ ಚುರ್‌ಕ್,  
 ಬುದ್ಧಿವಂತ ಎಲ್ಲ ತರತಾಲೂ ತಿತ್ತರನ್ನತ ಕಣ್ಣಂದ್ ಎಲ್ಲರೂ ಎಣ್ಣಮಯಿಂಜತ್.  
 ಚೆರಿಯತ್‌ಲೇ ಬ್ರಿಟಿಷ್ ಸ್ಕೂಲ್‌ಲ್ ಇಂಗ್ಲಿಷ್ ಮೀಡಿಯಂಲ್ ಓದ್‌ಚಿ. ರಿವನ್‌ಪು  
 ಕೊಲೇಜೆಟ್ ಸ್ಕೂಲ್‌ಲ್ ಪತ್ತನೆಲ್ ವಿಶ್ವವಿದ್ಯಾಲಯತೇ ದಂಡನೆ ರ್ಯಾಂಕ್‌ಲ್  
 ಪಾಸಾಚಿ. ಕಲ್ಕತ್ತಾ ಪ್ರೆಸಿಡೆನ್ಸಿ ಕಾಲೇಜ್‌ಕ್ ಕೂಡ್‌ಚಿ. ಅಲ್ಲಿ ಹಿಂದೂ ಸಂಸ್ಕೃತಿಕೂ,  
 ಬ್ರಿಟಿಷ್ ಸಂಸ್ಕೃತಿಕೂ ಇಂಜ ವ್ಯತ್ಯಾಸ ನೋಟಿತ್ ಮನ್‌ಸ್‌ಲ್ ಗೊಂದಲ ಪುಟ್‌ಚಿ.

ಏದ್ ಸೆರಿ ಏದ್ ತಪ್ಪಂದ್ ಗೊತ್ತಾಯಿಲೆ. ಅನ್ನತ ಸಮಯತ್ ಶ್ರೀ ರಾಮಕೃಷ್ಣ ಪರಮಹಂಸಂಡ ತತ್ವತರ ಪ್ರಭಾವ ದೇಶತ್‌ಲೆಲ್ಲ ಪಬ್ಬೆಚಿ. ಅಕ್ಕ ಸುಭಾಷ್ ಚಂದ್ರಂಗ್ ನಾನೂ ದೇವಳ ಕಾಂಗೊಂಡು ಎಣ್ಣುವ ಆಸೆ ಮನ್‌ಸಲ್ ಬೊಳಂದತ್. ಚೆನ್ನಂಗ್ ದಿನ ತಾಂಡ ರೂಂರ ಒಳ್‌ಲೇ ಅಘತಂಡ್ ಧ್ಯಾನ ಮಾಡ್‌ಚಿ. ಸಮಾಧಾನ ಆಕತೆ ಮಧ್ಯರಾತ್ರಿಲ್ ಮನೆಬುಟ್ಟಿತ್, ಗುರುನ ತೇಡಿಯಂಡ್ ಪೋಚಿ. ಸೆರಿಯಾನ ಗುರುನ ಕಾಟ್ವಲೆ. ಮಾಂಯಾವಿಯಳ ಕಂಡತ್, ಅಧಿಕಾರತರ ಆಸೆವುಳ್ಳ ಗುರು ವೇಷಧಾರಿಯಳ ಕಂಡತ್, ದೇವಸ್ಥಾನತ್‌ಲೆಲ್ಲ ವ್ಯಾಪಾರ ಮನೋಭಾವನೆವುಳ್ಳ ಪೂಜಾರಿಯಳ ಕಂಡತ್. ಆರ್ ತಿಂಗೆತ್ತನೆ ಕಾಡ್‌ಮೇಡ್, ತೀರ್ಥಕ್ಷೇತ್ರ ಅಲಂದಿತ್, ಚೋತಿತ್ ವಾಪಾಸ್ ಮನೆಕ್ ಬಾತ್. ಮೋಂವೊನ ಕಳಂದಂಡ್ ದುಃಖತ್‌ಲಿಂಜ ಅವ್ವ ಮನೆಕ್ ವಾಪಾಸ್ ಬಂದ ಮೋಂವೊನ ಬಾತಿತ್ ತಬ್ಬಿಯಂಡತ್. “ಅಮ್ಮಾ, ಮಹಾಭಾರತತರ ಕುರುಕ್ಷೇತ್ರತ್‌ಲಾ ಅರ್ಜುನಂಗ್ ಶ್ರೀಕೃಷ್ಣ ವಿಶ್ವರೂಪ ಕಾಟ್‌ಚೆಲ್ಲ, ಆ ವಿಶ್ವರೂಪ ನಾನೂ ನೋಟೊಂಡು ಅಮ್ಮಾ” ಎಣ್ಣೆಚಿ ಮೋಂವೊ. ಖಂಡಿತಾ ಆ ಶ್ರೀಕೃಷ್ಣ ನೀಕ್ ಅನುಗ್ರಹ ತಪ್ಪ. ನೀನೂ ಸ್ವಾಮಿ ವಿವೇಕಾನಂದಂಡ ಮಾದಾರಿ ಬಲ್ಯ ವ್ಯಕ್ತಿಯಾಪಿ ಯಾಂದ್ ಅವ್ವ ಆಶೀರ್ವಾದ ಮಾಡ್‌ಚಿ. ಪದ್‌ನಾರ್ ವಯಸ್‌ಲಾ ಈ ಘಟನೆ ನಡಂದ ಪಿಂಞ ಪುನಃ ಕಾಲೇಜ್‌ಕ್ ಕೂಡ್‌ಚಿ.

ಒಮ್ಮೆ ಅರವಿಂದ ಘೋಷ್ ಎಣ್ಣೊನ ತಕ್ಕ ಸುಭಾಷ್‌ಚಂದ್ರಂಡ ಮೇಲೆ ಬಲ್ಯ ಪರಿಣಾಮ ಮಾಡ್‌ಚಿ. “ಮಕ್ಕಡಾತ್ ಚೆನ್ನಂಗಾಳಾಚೆಂಗೂ ಬಲ್ಯಜನ ಆಂಡು. ಅದ್ ನಿಂಗಕಾಯಿತ್ ಅಲ್ಲ, ದೇಶಕಾಯಿತ್. ಭಾರತದೇಶ ಪ್ರಪಂಚತರ ಎಲ್ಲ ದೇಶತರ ಮಧ್ಯತ್ ಮಂಡೆ ನೇತಿತ್ ನಿಪ್ಪನೆಕೆ ಆಂಡು. ಭಾರತಮಾತೆನ ಬ್ರಿಟಿಷ್‌ಕಾರಡ ಕೈಲಿಂಜ ಬುಡ್‌ತುವಕ್ ತ್ಯಾಗ ಮಾಡಿ, ಪ್ರಾಣ ಕೊಡ್‌ಪಕೂ ತಯಾರಾಂಡು” ಎಣ್ಣೊನ ತಕ್ಕನ ತಾಂಡ ಜೀವನತ್ ನಡತಿತ್ ಕಾಟ್‌ಚಿ ಸುಭಾಷ್‌ಚಂದ್ರ ಬೋಸ್.

ಸುಭಾಷ್‌ಚಂದ್ರ 1919 ಲ್ ಎಂ.ಎ. ಪರೀಕ್ಷೆಕ್ ಓದಿಯಂಡಿಪ್ಪಕ, ಅಪ್ಪ ಇಂಗ್ಲೆಂಡ್‌ಕ್ ಪೋಯಿತ್ ಸಿವಿಲ್ ಸರ್ವಿಸ್ ಪರೀಕ್ಷೆ ಎಳೆದುವಿಯಾಂದ್ ಕೇಟಿತ್. ಸಿವಿಲ್ ಸರ್ವಿಸ್ ಪರೀಕ್ಷೆ ಪಾಸ್ ಮಾಡ್‌ಚೆಂಗಿ ಬಲ್ಯ ಅಧಿಕಾರಿಯಾಯಿತ್ ಕೆಲಸ ಕೊಟ್ಟುವಯಿಂಜತ್, ಬಲ್ಯ ಸಂಬಳವೂ ಇಂಜತ್. ದೇಶ ಸೇವೆ ಮಾಡಂಡೂಂದ್ ಬೋಸ್ ನಿರ್ಧಾರ ಮಾಡಿತಿಂಜಕಲೂ ಇಂಗ್ಲೆಂಡ್‌ಕ್ ಪೋಪಕ್ ಒತ್ತಂಡತ್. ಪರೀಕ್ಷೆಲ್ ನಾಲನೇ ರ್ಯಾಂಕ್‌ಲ್ ಪಾಸಾಚಿ. ದೇಶಸೇವೆ ಮಾಡುವದಾ... ಬ್ರಿಟಿಷ್ ಅಧಿಕಾರಿಯಾಯಿತ್ ಸುಖ ಪಡುವದಾ...? ದಂಡಾತ್ ಒಂದಾನ ಆಯ್ಕೆ



ಮಾಡಂಡಿಂಜತ್. ಸುಭಾಷ್ಚಂದ್ರ ದೇಶಸೇವೆನೇ ಆಂಜಂಡತ್. ದೇಶಬಂಧು ಚಿತ್ತರಂಜನ್‌ದಾಸ್‌ರ ಕೂಡ ಕೂಡ್‌ಚಿ. ಚಿತ್ತರಂಜನ್‌ದಾಸ್ ಕಲ್ಕತ್ತಾತ್‌ರ ಮೇಯರ್ ಆಚಿ. ಸುಭಾಷ್ಚಂದ್ರ ಬೋಸ್ ಆಡಳಿತಾಧಿಕಾರಿಯಾಚಿ. ಆ ಅಧಿಕಾರ ಸ್ಥಾನಕ್ ತಿಂಗಕ್ ಮೂಂದಾಯಿರ ಸಂಬಳ ಇಂಜತ್. ಆಚೀಂಗಿ ಬೋಸ್ ಒಂದರೆ ಆಯಿರ ಮದಿ ಎಣ್ಣೆ ಚಿ. ಪುರಸಭೆರ ಆಡಳಿತತ್ ಸುಮಾರ್ ಬದಲಾವಣೆ ಮಾಡ್‌ಚಿ. ಇದ್‌ನ ಕಂಡ ಬ್ರಿಟಿಷ್ ಸರ್ಕಾರಕ್ ಕಣ್ಣುರಿಯಾಚಿ. ಬೋಸ್‌ನ ಅರೆಸ್ತ್ ಮಾಡಿತ್ ಬರ್ಮಾತ್‌ರ ಮಾಂಡಲೆ ಜೈಲ್‌ಕಾಟ್ತ್. ಅಲ್ಲಿಂಜ ಸುರುವಾಚಿ, ಬೋಸ್‌ರ ಜೈಲ್ ವಾಸ. ಎಚ್ಚೆಕೋ ಕುರಿ ಜೈಲ್‌ಂಜ ಪೊರ್‌ಮೆ ಬಪ್ಪಕ ಕಾಯಿಲಕಾರನಾಯಿತೇ ಪೊರ್‌ಮೆ ಬಪ್ಪಯಿಂಜತ್. ಕಾರಣ ಇಲ್ಲತೆ ಅರೆಸ್ತ್ ಮಾಡುವಾನ ಸಹಿಸುವಕ್ ಕಯ್ತೆ ಉಪವಾಸ ಮಾಡುವೀಂದ್ ಬೊತ್‌ಚಿಟ್ತ್. ಅದ್‌ಂಗ್ ಬೊತ್ತಿತ್ ಬೋಸ್‌ನ ಅಂಪೊಂಡ ಮನೆಲೇ (House arrest) ಪಾರ ಬೆಚ್ಚಿತಿಂಜತ್. ನಾಪದ್ ದಿನ ತಾಂಡ ರೂಂಲೇ ಇಂಜ ಸುಭಾಷ್ಚಂದ್ರ ದಾರೂ ನನ್ನ ತಕ್ ಪರಿಚಿಡುವದ್ ಬೋಂಡ, ನಾಡ ರೂಂಕ್ ಬಪ್ಪದೂ ಬೋಂಡ, ನಾನ್ ಯೋಗಾಭ್ಯಾಸ ಮಾಡಿ ಯಂಡುಳ್ಳೊ, ಉಂಬಕ್ ತಿಂಬಕ್ ಪಡಿರಲ್ಲಿಯೇ ಬೆಚ್ಚಿರೀಂದ್ ಎಣ್ಣೆತಿಂಜತ್. ಅಯಿಂಗ್ ರೂಂಲ್ ಉಂಡಾಂದ್ ಪತ್ರ್ ನಿಮಿಷಕ್ಕೊಮ್ಮ ಪಾರಕಾರಂಗ್ ಕ್‌ಡಿಕೆಲ್ ನೋಟುವಯಿಂಜತ್. ಅಕ್ಕೆಲ್ಲ, ಪಡಿಕೆ ಬೆನ್‌ಟ್ಚಿತ್ ಪದ್ಮಾಸನತ್ ಮೂರ್ತಿರ ಮಾದಾರಿ ಅಳತಿಪ್ಪಯಿಂಜ ಬೋಸ್‌ನ ಕಾಂಬಯಿಂಜತ್. ನಾಪದ್ ದಿನತ್‌ಲ್ ಮೂಡ್ ದುಂಬ ಗಡ್ಡ ಮೀಸೆ ಬೊಳ್‌ಂದತ್. ನಾಪತ್ತೊಂದನೆ ದಿನ ಸುಭಾಷ್ಚಂದ್ರ ಬೋಸ್ ಒರ್ ಮೌಲ್ವಿರ ವೇಷತ್ ಕಾವಲುಗಾರಂಡ ಮಿಂಞತೇ ಪೊರ್‌ಮೆ ಪೋಚಿ. ಚೆನ್ನ ನೇರಾಪದೂ ಕಾವಲುಗಾರ ಕ್‌ಡಿಕೆಲ್ ನೋಟುವಕ ಅಲ್ಲಿ ದಾರೂ ಇಂಜಿಲೆ.

ಮನೆಲಿಂಜ ತಪ್ಪೆಚಿಟ್ಪಂಡ ಒಯಿಂಬದ್ ತಿಂಗತ್‌ರ ಮೇಲೆ ಜರ್ಮನಿಂಜ ಬೋಸ್ ರೇಡಿಯೋತ್ ತಕ್ ಪರ್‌ಂದತ್. ಹಿಟ್ಲರ್‌ರ ಕೂಡ ಒಪ್ಪಂದ ಮಾಡಿ ಯಂಡ್ ಆಜಾದ್ ಹಿಂದ್ ಫೌಜ್ ಎಣ್ಣುವ ಸೈನ್ಯ ಕಟ್ಟ್‌ಚಿ. ಅಲ್ಲಿಂಜ ಜಪಾನ್‌ಕ್ ಪೋಯಿತ್ ಅಲ್ಲಿಯೂ ಸಹಾಯಿ ಎಡ್‌ತಂಡ್ ನುಪ್ಪದ್ ಆಯಿರ ಜನತ್‌ರ ಸೈನ್ಯ ಕಟ್ಟಿತ್ "ಚಲೋ ದಿಲ್ಲಿ" ಎಣ್ಣೆತ್ ಯುದ್ಧಕ್ ಪೊರ್‌ಟತ್. ಆ ಪಡೆಲ್ ಪೊಣ್ಣಾಳ್‌ರ ಒರ್ ತುಕಡಿಯೂ ಇಂಜತ್. ಅದ್‌ಂಡ ನಾಯಕಿ ಕರ್ನಲ್ ಲಕ್ಷ್ಮಿ ಸೆಹಗಲ್ ಅಯಿಂಗ್ ಇಕ್ಕಲೂ ಉಂಡ್. ಅಂಡಮಾನ್ ನಿಕೋಬಾರ್ ದ್ವೀಪತ್‌ನ ಪುಡ್‌ಚಿತ್ ಅಲ್ಲಿ ಆದ್ಯತ್ "ಆಜಾದ್ ಹಿಂದ್" ಸರ್ಕಾರ ಆಡಳಿತಕ್ ಬಾತ್. ಬರ್ಮಾ ಗಡಿ ದಾಟಿತ್ ಆಜಾದ್ ಹಿಂದ್ ಸೈನಿಕಂಗ ಭಾರತಕ್ ಕಾಲ್‌ಟ್ತ್. ಮಣಿಪುರಕ್ ಬಂದೆತ್ತುವದೂ ಅಯಿಂಗಕ್ ಬಪ್ಪಕುಳ್ಳ ಆಹಾರ, ಶಸ್ತ್ರಾಸ್ತ್ರ ಎಲ್ಲ ಸೆರಿಕ್ ಬರತೆ

ಸೈನ್ಯ ಬಯ್ಯಕ್ ನಿಕ್ಕಂಡಿಯಾಚಿ. ಅದೇ ಸಮಯತ್ ಜಪಾನ್‌ರ ಮೇಲೆ ರಷ್ಯ ಪಡೆ ಸಾರ್‌ನದ್ ಗೊತ್ತಾಚಿ. ಜಪಾನ್ ಚೋತ್‌ಪೋಚೇಂಗಿ ಆಜಾದ್ ಹಿಂದ್ ಎನ್ನನೆ ಪೋರಾಟತ್ ಮಿಂಞಾಕ್ ನಿಪ್ಪೊಂದ್ ನೇತಾಜಿಕ್ ಚಿಂತೆ ಸುರುವಾಚಿ. ಆಚೇಂಗಿಯೂ ಆಜಾದ್ ಹಿಂದ್ ಸೇನೆಕ್ ಪುರ್‌ಡಾರ ತಕ್ಕ್ ಪರ್‌ಂದತ್. ನಿಂಗಡೆಲ್ಲಾಡ ತ್ಯಾಗ ಬಲಿದಾನ ಅಮರವಾಯಿತಿಪ್ಪ. ನಂಗಕ್ ಪ್ರತಿಫಲ ಕೊಟ್ಟಿ ತಿಲ್ಲೆಂದ್ ಬೇರಪಡತಿ. ಭಾರತಕ್ ಸ್ವಾತಂತ್ರ್ಯ ಖಂಡಿತಾ ಕೊಟ್ಟವ, ನಿರಾಸೆ ಪಡತೆ ಧೈರ್ಯವಾಯಿತಿರಿ. ಮಂಡೆ ನೇತಿತ್ ನಿಲ್ಲೆಂದ್ ಎಣ್ಣಾನ ನೇತಾಜಿರ ತೊಂಡೆ ದುಃಖತ್ ಕೆಟ್‌ಚಿ.

ಜಪಾನ್ ಚೋತತ್‌ಂದ್ ಸುದ್ದಿ ಬಂದ ದಂಡನೆ ದಿನ ಬ್ಯಾಂಕಾಕ್‌ಂಜ ಪ್ಲೇನ್ ಪತ್ತಿತ್ ಎಲ್ಲಿಕೋ ಪೋಚಿ. ಜೊತಲ್ ಆಜಾದ್ ಹಿಂದ್‌ರ ಉಪದಂಡ ನಾಯಕ ಆಯಿತಿಂಜ ಹಬೀಬ್ - ಉರ್ - ರೆಹಮಾನ್ ಕೂಡ ಇಂಜತ್. ಅದಾನ ಅಂಜಿ ದಿವಸತ್ ಟೋಕಿಯೋ ರೇಡಿಯೊ 18-8-1945 ಲ್ ವಿಮಾನ ಅಪಘಾತತ್ ಸುಭಾಷ್‌ಚಂದ್ರ ಬೋಸ್ ಮರಣಪಟ್ಟತ್ ಎಣ್ಣುವ ವಿಷಯತ್‌ನ ಪ್ರಸಾರ ಮಾಡ್‌ಚಿ. ಆಚೇಂಗಿ ಇಂದೆಕೂ ಆ ಮಹಾವೀರ ಎನ್ನನೆ ಚತ್ತತ್‌ಂದ್ ಪ್ರಮಾಣ ಇಲ್ಲೆ. ಅದ್‌ಂಡ ವಿಷಯತ್ ಇಂದೆಕೂ ಸಂಶೋಧನೆ ನಡ್‌ಂದಂಡೇ ಉಂಡ್. ನೇತಾಜಿ ಸುಭಾಷ್‌ಚಂದ್ರ ಬೋಸ್ ಸೈನಿಕಂಗಡ ಕೂಡೇ ನಡ್‌ಂದ್ ಬಪ್ಪಕ ಅಯಿಂಗೆಲ್ಲ ಬೋಂಡಾಂದೆಣ್ಣ ಕಲೂ ಕೇಕತೆ, ನಿಂಗೆಲ್ಲ ಕಷ್ಟ ಪಟ್ಟಿಂಡಿಪ್ಪಕ ನಾನ್ ಸುಖ ಪಡ್ಪದಾ ಕಯ್ಯಾಂದ್ ಎಣ್ಣುವಯಿಂಜತ್‌ಲೊ. ಭಾರತ ಸ್ವತಂತ್ರ್ ಆನ ಪಿಂಞ ಎಂತ ಮಾಡುವಿರಾಂದ್ ಆಜಾದ್ ಹಿಂದ್‌ರ ಅಧಿಕಾರಿ ಒಬ್ಬೊ ಕೇಪಕ, ಸ್ವಾತಂತ್ರ್ಯ ನಾಡ ಕೈಕ್ ಕೊಟ್‌ಚೇಂಗಿ ಅದ್‌ನ ಮಹಾತ್ಮ ಗಾಂಧೀಜಿಕ್ ಕೊಡ್‌ತಿತ್ ನಾನ್ ಹಿಮಾಲಯಕ್ ಪೋಯಿತ್ ತಪಸ್ಸ್ ಮಾಡುವಿಂದೆಣ್ಣ ಚಲೊ. ಅಧಿಕಾರ ಮೋಹ ಇಲ್ಲತೆ, ದೇಶಕಾಯಿತ್, ದೇಶತ್‌ರ ಜನಕಾಯಿತ್ ಪೋರಾಡಿತ್ ಬಲಿಯಾನ ವೀರ ಈ ಸುಭಾಷ್‌ಚಂದ್ರ ಬೋಸ್.

ಸುಭಾಷ್‌ಚಂದ್ರ ಬೋಸ್‌ರ ನಿಸ್ವಾರ್ಥತೆ, ದೇಶಪ್ರೇಮ ಎಲ್ಲಾಡಲ್ಲಿಯೂ ಬೊಳ್‌ಂದಕ ದೇಶ ನಂದಾಪ. □



## ಬಾಲ ಗಂಗಾಧರ ತಿಲಕ್


- ಪುಟ್ಟಾನ ದಿನ - 1856ನೇ ಇಸವಿ ಜುಲೈ 23  
 ಪುಟ್ಟಾನ ಜಾಗ - ರತ್ನಗಿರಿ, ಮಹಾರಾಷ್ಟ್ರ  
 ಅಪ್ಪ - ಗಂಗಾಧರ  
 ಅಮ್ಮ - ಪಾರ್ವತಿ ಬಾಯಿ  
 ಕಣ್ಮರೆ - 1920ನೇ ಇಸವಿ ಆಗಸ್ಟ್ 1

'ಬಾಳ'ಂಡ ನೇರಾನ ಪೆದ ಬಳವಂತರಾವ್, ಅಮ್ಮ ಕೊದಿಕ್ 'ಬಾಳ' ಎಣ್ಣೆಯಂಡ್ ಕಾಕುವಯಿಂಜತ್. ಅದೇ ಪೆದ ಸ್ಕೂಲಾಕ್ ಕೂಡುವಕಲೂ ಕೊಡ್ತತ್. ಬಾಳಂಡ ಗೇನಶಕ್ತಿ ಭಾರೀ ಚಾಯಿಲಿಂಜತ್. ಸ್ಕೂಲಾಲ್ ಮಾಡ್ನ ಪಾಠ್ನನ ಎಳಾದಿಯವದೇ ಇಂಜಿಲೆ. ಸ್ಕೂಲಾಕ್ ಕೂಡ್ವಕ್ ಮುಪ್ಪಡೇ ಸುಮಾರ್ ಸಂಸ್ಕೃತ ಶ್ಲೋಕ ಪಡ್ಚಿತಿಂಜತ್. ದಿನಕೋರ್ ಶ್ಲೋಕ ಪಡ್ಚಿತ್ ಎಣ್ಣೆ ಚೀಂಗಿ ಅಪ್ಪ, ಅವಂಗ್ ಒರ್ ಪೈಸ ಕೊಡ್ಪಯಿಂಜತ್. ಒಮ್ಮ ಸ್ಕೂಲಾಲ್ ಮಾಸ್ತರ್ ಇಲ್ಲತಿಪ್ಪಕ ಕ್ಲಾಸ್ ರೂಂಲ್ ಮಕ್ಕ ಎಲ್ಲ ಕೂಡಿಯಂಡ್ ಕಡಲೆ ತಿಂದಿತ್ ತೋಲಾನ ಕ್ಲಾಸ್ ಇಡೀ ಚಾಡಿತಿಂಜತ್. ಮಾಸ್ತರ್ ಬಂದದು ಕ್ಲಾಸ್ ರೂಂ ಕ್ಲೀನ್ ಮಾಡುವಕ್ ಎಣ್ಣೆ ಚಿ. ಮಕ್ಕಡ ಕೂಡ ಕೂಡಿತ್ ಕಡಲೆ ತಿಂದದ್ ನೇರಾಚೀಂಗಿಯೂ ಬಾಳ, ತೋಲಾನ ಮಾತ್ರ ಪೊರಮೆ ಕನ್ಚಿತಿಂಜತ್. ಆನಗುಂಡ್, ನಾನ್ ತೋಲ್ ಕ್ಲಾಸ್‌ರೊಳಲ್ ಇಟ್ಟಿತಿಲ್ಲೆ, ಅದ್‌ಂಗ್ ನಾನ್ ಕ್ಲೀನ್ ಮಾಡುಲೇಂದ್ ಎಣ್ಣೆ ಚಿ.

ಉಪಾದ್ರಿಕ್ ಚೆಡಿ ಬಾತೇಂಗಿಯೂ ಅಂವಂಡ ಅಪ್ಪ ಶಿಕ್ಷಣಾಧಿಕಾರಿ ಆಯಿತಿಂಜಾಂಗ್ ಅಂವೊಂಗ್ ಶಿಕ್ಷೆ ಕೊಡೊಕತೆ, ಅಂವೊಂಡ ಅಪ್ಪಂಗ್ ಒರ್ ಕಾಗದ ಅಯೆಚತ್. ಆ ಕಾಗದಕ್ ಉತ್ತರ ಆಯಿತ್ ಅಂವಂಡ ಅಪ್ಪ ಇಂಇಶೋರ್ ಕಾಗದ ಎಳೊದೊಚಿ. ಅದೊಲ್ “ನಾಡ ಮೊಂವೊಂಗ್ ಪೊಟ್ ಪರವ ಅಭ್ಯಾಸ ಇಲ್ಲೆ.” ಎಣ್ಣೆತ್ ಎಳೊದಿತಿಂಜತ್. ಆ ಅಪ್ಪಂಗ್, ಆ ಮೊಂವೊಂಡ ಮೇಲೆ ಅಚ್ಚಕ್ ನಂಬಿಕೆ ಇಪ್ಪಕ ಅದೆಚ್ಚಕ್ ಸತ್ಯವಂತ ಮೊಂವೊನಾಯಿತಿಕ್ಕು?

ತಾಂಡ ಪತ್ತನೆ ಬಯತ್‌ಲ್ ಅವ್ವನ ಕಳೊಂದಂಡತ್. ಅಕ್ಕಲೇ ಸಂಸ್ಕೃತತ್ ಒರ್ ಶೋಕ ಗೀತೆ ಎಳೊದಿತಿಂಜತ್. ಪದನಂಜನೆ ಬಯತ್‌ಲ್ ಬಾಳಂಗ್ ಮಂಗಲಾಚಿ. ಅಂವೊ ಅಂವಂಡ ಮಾಂವಂಡ ಕೈಲ್ ವರದಕ್ಕಣೆ (ಡಾರಿ) ಆಯಿತ್ ಪಡೊಂದದ್ ಪುಸ್ತಕ! ಭಾರತ ಸ್ವಾತಂತ್ರ್ಯ ಪೋರಾಟತ್ ಒರ್ ಮುಖ್ಯವಾನ ವ್ಯಕ್ತಿ ಯಾಯಿತ್ ಬಾಳ ಗಂಗಾಧರ ತಿಲಕ್ ಬ್ರಿಟಿಷ್‌ಕಾರಡ ಅನ್ಯಾಯತ್‌ನ ಪ್ರತಿಭಟನೆ ಮಾಡುವಯಿಂಜತ್. ‘ಕೇಸರಿ’ ಎಣ್ಣುವ ಪತ್ರಿಕೆರ ಸಂಪಾದಕನಾಯಿತ್ ಬ್ರಿಟಿಷ್ ಸರ್ಕಾರ ಮಾಡುವ ಪ್ರತಿಯೋರ್ ಅನ್ಯಾಯತ್‌ರ ಕೆಲಸತ್‌ನ ಪತ್ರಿಕೆಲ್ ಎಳೊದಿತ್, ಜನಳ ಎಚ್ಚರ ಮಾಡುವಯಿಂಜತ್. ಇದೊನುಂಡ್ ಎಚ್ಚಕೋ ಕುರಿ ಜೈಲ್‌ಕ್ ಪೋಯಿತ್ ಬಾತ್. “ಸ್ವರಾಜ್ಯ ನಾಡ ಜನ್ಮ ಸಿದ್ಧ ಹಕ್ಕು” ಎಣ್ಣೆಯಂಡ್ ಘೋಷಣೆ ಮಾಡೊನ ತಿಲಕ್, ಸ್ವರಾಜ್ಯ ಪ್ರತಿಯೋರ್ ಭಾರತೀಯಂಡ ಹಕ್ಕು ಎಣ್ಣುವಾನ ಜನಕ್ ಮನವರಿಕೆ ಮಾಡೊಚಿ. ತಿಲಕ್ ಜೈಲ್‌ಲ್ ಇಪ್ಪಕ ಸುಮಾರ್ ಪುಸ್ತಕ ಎಳೊದೊಚಿ. “ದಿ ಆರ್ಕಾಟಿಕ್ ಹೋಂ ಇನ್ ದಿ ವೇದಾಸ್” ಎಣ್ಣುವ ಸಂಶೋಧನಾ ಗ್ರಂಥ “ಗೀತಾ ರಹಸ್ಯ” ಎಣ್ಣುವ ಭಗವದ್ಗೀತೆರ ವಿಮರ್ಶೆ ಇದೊಲ್ ಮುಖ್ಯಪಟ್ಟದ್. ಎಲ್. ಎಲ್. ಬಿ. ಓದಿತಿಂಜ ತಿಲಕ್, ಒರ್ ಎಳ್ತಕಾರನಾಯಿತೂ, ಪತ್ರಿಕಾ ಸಂಪಾದಕನಾಯಿತೂ, ಸ್ವಾತಂತ್ರ್ಯ ಪೋರಾಟಕಾರನಾಯಿತೂ, ಸಮಾಜ ಸುಧಾರಕ ನಾಯಿತೂ, ಸುಮಾರ್ ಕಾರ್ಬಾರ್ ಮಾಡೊಚಿ. “ಭಾರತ ನಾಡ ಅವ್ವನಾಡ್, ಅದ್ ದೇವತೆ, ಭಾರತೀಯಂಗ ಎಲ್ಲರೂ ನಾಡ ಕುಟುಂಬತ್‌ರ ಸದಸ್ಯಂಗ, ಅಯಿಂಡ ಏಳಿಗೇಕ್ ನೈಪದೇ ನಾಡ ಧರ್ಮ ಪಿಂಇ ಕರ್ತವ್ಯ” ಎಣ್ಣೊನ ಬಾಳ ಗಂಗಾಧರ ತಿಲಕ್ “ಲೋಕಮಾನ್ಯ” ಎಣ್ಣುವ ಬಿರೊದ್ ಪಡೊಂದತ್. ಸ್ವಾತಂತ್ರ್ಯ ಕೊಟ್ಟು ವಾಂಗ್ ಮಿಂಇಲೇ ಕಣ್ಣ್ ಮುಚ್ಚೊನದ್ ಬಲ್ಯ ಬೇಜಾರ.

ಸತ್ಯ ಪರಿಯಂಡು, ಅನ್ಯಾಯತ್‌ನ ಪ್ರತಿಭಟನೆ ಮಾಡಂಡು, ಪಣಕಾಸೊಂಜ, ಪುಸ್ತಕ ಜ್ಞಾನ, ಆತ್ಮಾಭಿಮಾನ ಬಲ್ಯದೊಂದೆಣ್ಣೊನ ತಿಲಕ್‌ರ ಬದೊಕ್ ಎಲ್ಲಾಕೂ ಆದರ್ಶವಾಯಿತಿರಡ್. □



## ರವೀಂದ್ರನಾಥ ಠಾಕೂರ್

ಪುಟ್ಟಾನ ದಿನ	- 1861ನೇ ಮೇ 7
ಪುಟ್ಟಾನ ಜಾಗ	- ಕಲ್ಕತ್ತಾ, ಪಶ್ಚಿಮ ಬಂಗಾಳ
ಅಪ್ಪ	- ದೇವೇಂದ್ರನಾಥ ಠಾಕೂರ್
ಅಮ್ಮ	- ಶಾರದಾದೇವಿ
ಕಣ್ಮರೆ	- 1941ನೇ ಆಗಸ್ಟ್ 7

ಅಪ್ಪ ಅವಂಗ್ ಪದನಾಲನೆ ಮೋಂವೊನಾಯಿತ್ ಪುಟ್ಟಾನ ರವೀಂದ್ರ ಚೆರಿಯ ಬಯತ್ಲೇ ಅವಂಗ್, ರಾಮಾಯಣ - ಮಹಾಭಾರತತ್ ನ ಓದಿತ್ ಎಣ್ಣೆ ಕೊಡ್ ಪಯಿಂಜತ್. 1869 ಲ್ ರವೀಂದ್ರ ಓರಿಯಂಟಲ್ ಸೆಮಿನರಿ ಎಣ್ಣವ ಸ್ಕೂಲ್ ಕೊಡ್ ಚಿ. ಆಚೀಂಗಿ ಅಲ್ಲಿ ಮಕ್ಕಕ್ ಕೊಟ್ಟು ಪಯಿಂಜದ್ ತೂರೆ ಕೋಲ್ ಪೊಯ್ತ್. ಅದ್ ಆಂಗ್ ಬೊತ್ತಿತ್ ಮನೆಲೇ ನೀಲಕಮಲ ಎಣ್ಣವ ಉಪಾದ್ರಿರ ಪಕ್ಕ ಸಾಹಿತ್ಯ ಪಾಠ ಪಡ್ ಚಿತ್. ಉಪನಯನ ಆನ ಪಿಂಞ ಅಪ್ಪಂಡ ಕೈಲ್ ಸಂಸ್ಕೃತ ಪಡ್ ಚಿತ್. ಅಚ್ಚಕ್ ಚೆರಿಯ ಬಯತ್ಲೇ ಕಾಳಿದಾಸಂಡ ಕಾವ್ಯ, ಭಗವದ್ಗೀತೆ ಎಲ್ಲ ಓದ್ ಚಿ. ವಿಷ್ಣುಬಾಬು ಎಣ್ಣವಯಿಂಗಡ ಪಕ್ಕ ಸಂಗೀತ ಪಡ್ ಚಿತ್. ಪತ್ ಬಯತ್ಲೇ ಕಣ್ಣ ಪದ್ಯ ಎಳೊದುವಾನ ಕಂಡಿತ್ ಉಪಾದ್ರಿಯ, ನೇರಾಯಿತೂ ಈ ಕಣ್ಣನೇ ಎಳೊದಿಯದಾ ಎಣ್ಣಿತ್ ಸಂಶಯ ಪಡುವಯಿಂಜತ್. ಒಮ್ಮೆ ಮೋಂವೊ ಎಳೊದಾನ ಪದ್ಯತ್ ನ ಕೇಟಿತ್, ಪಾಡ್ ಚಿಟ್ಟಿತ್ ಕುಸಿಪಟ್ಟ ಅಪ್ಪ, ದೇಶ ಆಳುವ ದೊರೆಕ್ ಈ ಭಾಷೆ ಗೊತ್ತಿಂಜಿಂಜಕ ಖಂಡಿತಾ ಸನ್ನಾನ

ಮಾಡುವಯಿಂಜತ್. ಆಚೀಂಗಿ ಅದ್ ಸಾಧ್ಯ ಇಲ್ಲೆ. ಅದ್‌ಂಗ್ ನಾನೇ ಸನ್ಮಾನ ಮಾಡುವೀಂದ್ ಎಣ್ಣೆತ್ ಒರ್ ಚೆಕ್ ಕೊಡ್‌ತತ್. ಸ್ಕೂಲ್‌ಲೆ ಎಣ್ಣೆ ಕೊಡ್‌ಪನ್ನತ ಪಾಠ ರವೀಂದ್ರಂಗ್ ಕುಸಿ ಆಪಯಿಂಜಿಲೆ. ಅಂವೊಂಡ ಕವನ ಪತ್ರಿಕೆಲ್ ಪ್ರಕಟ ಆಪಕ್ ಸುರುವಾಚಿ.

1875 ಲ್ ರವೀಂದ್ರ ಅಪ್ಪನ ಕಳ್‌ಂದಂಡತ್. ಅಲ್ಲಿಂಜ ರವೀಂದ್ರಂಡ ಅಣ್ಣ, ತಮ್ಮಣನ ಇಂಗ್ಲೆಂಡ್‌ಕ್ ಬಪ್ಪಕ್ ಮಾಡಿಯಂಡತ್. ರವೀಂದ್ರ ಅಲ್ಲಿಕ್ ಪೋಪಾಂಗ್ ಮಿಂಞ ಕಲ್ಲತ್ತಾತ್‌ಲಿಂಜ ಒರ್ ಬ್ರಿಟಿಷ್ ಕುಟುಂಬತ್‌ರ ಜೊತೆಲ್ ಚೆನ್ನಂಗ್ ಸಮಯ ಇಂಜಿತ್ ಆಯಿಂಗಡ ರೀತಿ ನೀತಿನ ಪಡ್‌ಚೆಂಡ್ ಅಲ್ಲಿಂಜ ಇಂಗ್ಲೆಂಡ್‌ಕ್ ಪೋಚಿ. ಅಲ್ಲಿಯತ್‌ರ ಕೋಟ ಭಯಂಕರ ಆಯಿತಿಂಜತ್. ಇಂಗ್ಲೆಂಡ್‌ರ ತಾಂಡ ಅನುಭವತ್‌ನ ಭಾರತತ್‌ರ ಪತ್ರಿಕೆಕ್ ಎಳಾದಿತ್ ಆಯೆಪ ಯಿಂಜತ್. ಅದೆಲ್ಲ ದುಂಬ ಜನಪ್ರಿಯ ಆಚಿ. ಅಣ್ಣಂಡ ಆಸೆರ ಮಾದರಿ ರವೀಂದ್ರ ಬ್ಯಾರಿಸ್ಟರ್ ಆಯಿಲೆ. 1880 ಲ್ ರವೀಂದ್ರ ಭಾರತಕ್ ವಾಪಾಸ್ ಬಾತ್. ಅಂವೊಂಡ ಮನ್‌ಸೆಲ್ಲ ಸಾಹಿತ್ಯವೇ ಇಂಜತ್. 1883 ಲ್ ಮೈಣಾಲಿನಿ ದೇವಿ ಎಣ್ಣವಯಿಂಗಳ ಮಂಗಲ ಆಚಿ. “ವಾಲ್ಮೀಕಿ ಪ್ರತಿಭಾ”, “ಕಾಲ ಮೃಗಯಾ” ಎಣ್ಣವನ್ನತ ಸುಮಾರ್ ಗೀತನಾಟಕ ಎಳಾದ್‌ಚಿ. ಠಾಕೂರ್ ಮನೆತನಕ್ ಕೂಡ್‌ನ ಆಸ್ತಿ ಒರಿಸ್ಸಾ, ಉತ್ತರ ಪ್ರದೇಶತ್‌ಲೆಲ್ಲ ಇಂಜತ್. ಅದ್‌ನ ನೋಟಿಯವ ಜವಾಬ್ದಾರಿನ, ಅಪ್ಪೊ ರವೀಂದ್ರಂಗ್ ವಹಿಸ್‌ಚಿ. ಆ ಪ್ರಕೃತಿರ ಚಾಯಿ ಬೋಜ ಕವಿಕ್ ಕುಸಿಯಾಚಿ. ಅಲ್ಲಿ ಇಂಜಂಡೇ ಸಾಹಿತ್ಯ ರಚನೆ ಮಾಡಿಯಂಡಿಂಜತ್. ಬ್ರಿಟಿಷ್ ಆಡಳಿತತ್‌ರ ವಿರುದ್ಧ ಲೇಖನ ಎಳಾದುವಯಿಂಜತ್. ಬಂಗಾಳತ್‌ನ ದಂಡಾಯಿತ್ ಒಡೆಪ ಸರ್ಕಾರತ್‌ರ ಯೋಜನೆಕ್ ವಿರುದ್ಧ ಆಯಿತ್ ಪತ್ರಿಕೆಲ್ ರವೀಂದ್ರನಾಥ ಎಳಾದ್‌ನ ಲೇಖನ ವರಿಯಂಡಿಂಜ ಜನಳ ತಟ್ಟಿತ್ ಒಪ್ಪಾನೆಕೆ ಆಚಿ. ಜನಜಾಗೃತಿ ಆಚಿ.

ರವೀಂದ್ರನಾಥ ಠಾಕೂರ್ ಶಾಂತಿನಿಕೇತನ ಸ್ಥಾಪನೆ ಮಾಡುವಕ ಪೊಣ್ಣ್ ಮೈಣಾಲಿನಿ ತಾಂಡ ಎಲ್ಲ ಮಾಲ್ - ಮಟತ್‌ನ ದಾನ ಮಾಡ್‌ಚಿ. 1902 ಲ್ ಪೊಣ್ಣ್‌ನ ಕಳ್‌ಂದಂಡತ್. 1905 ಲ್ ಅಪ್ಪನ ಕಳ್‌ಂದಂಡತ್. 1907 ಲ್ ಒರ್ ಮೋಂವೊ, ಒರ್ ಮೋವಳೋ ಕಳ್‌ಂದಂಡತ್. ಒಂದಾಂಡ ಬಯ್ಯ ಒಂದಂಡನೆಕೆ ಬಂದ ದುಃಖತ್‌ನ ಸಹಿಸಂಡಿಯಾಚಿ.

ರವೀಂದ್ರನಾಥ ಎಳಾದ್‌ನ “ಗೋರಾ” ಎಣ್ಣವ ಕಾದಂಬರಿ ಪೆದಪೋನದ್. ಬಂಗಾಳಿ ಭಾಷೆಲ್ ಗೀತಾಂಜಲಿ ಕವನಸಂಕಲನ ಪ್ರಕಟ ಆಚಿ. ಅಲ್ಲಿಂಜ ಐಂಬತ್ತೊಂದ್ ಕವನ ಉಳ್ಳನ್ನತ ಬೋರೆ ಬೋರೆ ಕವನ ಸಂಕಲನತ್‌ರ ಕವನವೂ ಕೂಡಿತ್ “ಗೀತಾಂಜಲಿ” ಎಣ್ಣವ ಪೆದತ್ ಇಂಗ್ಲಿಷ್ ಅನುವಾದ ಪ್ರಕಟ ಮಾಡ್‌ಚಿ.

ಈ ಅನುವಾದ ಕೃತಿಕ್ ಪ್ರಪಂಚತರ ಬಲ್ಯ ಪ್ರಶಸ್ತಿ ಅನನ್ಯತ "ನೋಬೆಲ್ ಪ್ರಶಸ್ತಿ" ಕ್ಷಾಲ್ಪಿ. ಇದ್ ಭಾರತಕೂ, ಭಾರತೀಯ ಸಾಹಿತ್ಯಕೂ ಕ್ಷಾಲ್ಪನನ್ಯತ ಅದ್ಯ ನೋಬೆಲ್ ಪ್ರಶಸ್ತಿ. ಅಲ್ಲಿಂಜ ರವೀಂದ್ರನಾಥ ಠಾಕೂರರ ಕೀರ್ತಿ ಪ್ರಪಂಚತಲೆಲ್ಲ ಪಬ್ಲ್ಪಿ. ಬೋರೆ ಬೋರೆ ದೇಶತಂಜ ಭಾಷಣ ಮಾಡುವಕ್ ಅಹ್ವಾನ ಬಾತ್. ಅಮೆರಿಕಾ, ಜಪಾನ್, ರಷ್ಯ, ಸ್ವೀಡನ್, ಫ್ರಾನ್ಸ್ ಇನ್ಯತೆಲ್ಲ ದೇಶಕ್ ಪೋಯಿತ್ ಭಾಷಣ ಮಾಡಿತ್ ನಂಗಡ ದೇಶತರ ಕೀರ್ತಿನ ಪಾಡಿತ್ ಬಾತ್. ಬ್ರಿಟಿಷ್ ಸರ್ಕಾರ 1914 ಲ್ "ನೈಟ್‌ಹುಡ್" ಪ್ರಶಸ್ತಿ ಕೊಡ್ತತ್. ಆಚೇಂಗಿ 1919 ಲ್ "ಜಲಿಯನ್‌ವಾಲಾಬಾಗ್ ಹತ್ಯಾಕಾಂಡ" ಮಾಡ್ನ ಬ್ರಿಟಿಷಡ ಕೆಟ್ಟಾಪೆನ ವಿರೋಧ ಮಾಡುವಕಾಯಿತ್ ಆ ನೈಟ್‌ಹುಡ್ ಪ್ರಶಸ್ತಿನ ವಾಪಾಸ್ ಕೊಡ್ತತ್. 1924 ಲ್ ಚೀನಾಕ್ ಪೋಯಿತ್ ಭಾಷಣ ಮಾಡ್ಚಿ. 1932 ಲ್ ಇರಾನ್‌ರ ರಾಜ ಕಾಕ್‌ಚಿಟ್ಟತ್. ಇಟಲಿಲ್ ರವೀಂದ್ರನಾಥಂಡ ಕವನತನ ಇಟಾಲಿಯನ್ ಭಾಷೆಕ್ ಅನುವಾದ ಮಾಡಿತ್ ಪಾಡ್ಚಿ. ಗ್ರೀಸ್‌ರ ರಾಜ "ಆರ್ಡರ್ ಆಫ್ ಸ್ಮಾರ್" ಪ್ರಶಸ್ತಿ ಕೊಡ್ತತ್. ಎಚ್ಚಕೋ ವಿಶ್ವವಿದ್ಯಾನಿಲಯ ರವೀಂದ್ರಂಗ್ ಗೌರವ ಡಾಕ್ಟರೇಟ್ ಕೊಡ್ತಿತ್ ಗೌರವ ಕಾಟ್ಚಿ. ಆಕ್ಸ್‌ಫರ್ಡ್ ವಿಶ್ವವಿದ್ಯಾಲಯ "ಡಿ ಲಿಟ್ ಪ್ರಶಸ್ತಿ" ಕೊಡ್ತತ್. ಭಾರತ ಬಾಂಗ್ಲಾದೇಶ ದಂಡಾಂಗೂ ಈ ಕವಿ ರಾಷ್ಟ್ರಗೀತೆ ಎಳ್‌ದ್ಚಿ.

ರವೀಂದ್ರನಾಥಂಡ ಸಾಧನೆ ನೋಟುವಕ ಆಶ್ಚರ್ಯ ಆಪ. ಒಂದರೆ ಲಕ್ಷ ಗೆರೆ ಕಾವ್ಯ ನಾಟಕ, ಅದ್‌ಂಡ ದಂಡ್ ಪಾಲ್ ಗದ್ಯ ಎಣ್ಣಕ ಕತೆ, ಕಾದಂಬರಿ ಎಳ್‌ದಿತ್. ರವೀಂದ್ರನಾಥ ಠಾಕೂರ್ ಒರ್ "ವಿಶ್ವ ಕವಿ". ತಾಂಡ ಎಳ್‌ವದನೇ ಬಯತ್‌ಲ್ ಚಿತ್ರಕಲೆ ಪಡ್ಚಿತ್, ಚಾವಲ್ಲಿಕೆತ್ತನೆ ಸುಮಾರ್ ಮೂಂದಾಯಿರ ಚಿತ್ರ ಬುಡ್ತಿತ್. ರವೀಂದ್ರಂಡ ಸಾಹಿತ್ಯ ಪೂರ್ತಿ ಓದುವಕ್ ಒರ್ ಜನ್ಮ ಪೋರಾಂ ದೆಣ್ಣುವ ತಕ್ಕುಂಡ್. ಎಂಬದನೆ ಬಯತ್‌ಲ್ ಆರೋಗ್ಯ ಪಾಳಾಚಿ. ಆಚೇಂಗೂ ಬುದ್ಧಂಡಲ್ಲಿಯೇ "ನಾಡ ಬಾಲ್ಯ", "ಆರೋಗ್ಯ" ಎಣ್ಣುವ ಗ್ರಂಥ ಎಳ್‌ದ್ಚಿ. ಪನಿ ಜಾಸ್ತಿ ಆಪಕ ಕಲ್ಕತ್ತಾಕ್ ಎಡ್‌ತಂಡ್ ಪೋಕಂಡೂಂದ್ ಎಲ್ಲರೂ ತೀರ್ಮಾನ ಮಾಡ್ಚಿ. "ನಾನ್ ಬದ್‌ಕನದ್ ಮದಿ, ನನ್ನ ನಾಡ ಶಾಂತಿನಿಕೇತನತೇ ಚಾವಕ್ ಬುಡಿ" ಎಣ್ಣ್ಚಿ. ಆಚೇಂಗೂ ಕಲ್ಕತ್ತಾಕ್ ಎಡ್‌ತಂಡ್ ಪೋಚಿ. 1941 ಆಗಸ್ಟ್ 7ಂಗ್ ಕವಿ ಇಲ್ಲತಾಚಿ. ಇಲ್ಲತಾಚೇಂಗಿಯೂ ಕವಿರ ಎಳ್‌ತ್ ಶಾಶ್ವತ ಆಚಿ.

ಪಡಿಪಕ್ ಬಯತ್‌ರ ಮಿತಿ ಇಲ್ಲೆ. ಎಕ್ಕ ಎಂತಾನ ಬೋಂಡಿಕೆಯೂ ಪಡಿಕಲು. ಬೋರೀ ಸ್ಕೂಲ್‌ಲ್ ಪಡಿಪ ಪಾಠ ಮಾತ್ರ ವಿದ್ಯೆ ಅಲ್ಲ. ಪ್ರಪಂಚ ಜ್ಞಾನ ಬೋಂಡಿಕೆ ಆಪಚ್ಚಕ್ ನಲ್ಲ ಪುಸ್ತಕ ಓದಂಡು. □



## ಜಗದೀಶಚಂದ್ರ ಬೋಸ್

- ಪುಟ್ನಾನ ದಿನ - 1858ನೇ ಇಸವಿ, ನವಂಬರ್ 30  
 ಪುಟ್ನಾನ ಜಾಗ - ಫರೀದಾಪುರ, ಢಾಕಾ, ಬಾಂಗ್ಲಾದೇಶ  
 (1947 ಕೆತ್ತನೆ ಇದ್ ಭಾರತ ದೇಶಕ್ ಕೂಡಿತಿಂಜತ್)  
 ಅಪ್ಪ - ಭಗವಾನ್‌ಚಂದ್ರ ಬೋಸ್  
 ಅಮ್ಮ - ವಾಮು ಸುಂದರೀದೇವಿ  
 ಕಣ್ಮರೆ - 1937ನೇ ಇಸವಿ ನವಂಬರ್ 23

ಭಗವಾನ್‌ಚಂದ್ರ ಬೋಸ್ ಫರೀದಾಪುರತರ ಡೆಪ್ಯುಟಿ ಮ್ಯಾಜಿಸ್ಟ್ರೇಟ್ ಆಯಿತಿಂಜತ್. ಅಂದೇತರ ಕಾಲತ್ ಪಣಕಾರ ಎಲ್ಲರೂ ಮಕ್ಕಳ ಇಂಗ್ಲಿಷ್ ಸ್ಕೂಲಾಲೇ ಓದ್‌ಚಿಡುವಯಿಂಜತ್. ಆಚೇಂಗಿ ಭಗವಾನ್‌ಚಂದ್ರ ಬೋಸ್ ಮೋಂವೊನ, ತಾನೇ ಗರೀಬ ಮಕ್ಕಕಾಯಿತ್ ಸ್ಥಾಪನೆ ಮಾಡ್‌ನ ಬಂಗಾಳಿ ಮಾಧ್ಯಮ ಸ್ಕೂಲಾಲೇ ಓದ್‌ಚಿಟ್ಟತ್. ಅದ್‌ನುಂಡ್ ಜಗದೀಶ ಚಂದ್ರಂಗ್ ಬಡತನ ಎಣ್ಣಕ ಎಂತ, ಅಯಿಂಗ ಎನ್ನನೆ ಜೀವನ ಮಾಡುವಾಂದ್ ಅರಿಂಜಿತಿಂಜತ್.

ಮ್ಯಾಜಿಸ್ಟ್ರೇಟ್ ಆಯಿತಿಂಜ ಭಗವಾನ್‌ದಾಸ್ ಒಮ್ಮ ಒರ್ ಡಕಾಯಿತಂಗ್ ಶಿಕ್ಷೆ ಕೊಡ್‌ತಿತಿಂಜತ್. ಅಂವೊಂಡ ಶಿಕ್ಷೆ ತೇಂದದು ಅಂವೊಂಗೂ ಸಮಾಜತ್ ಚಾಯಿಲ್ ಬದ್‌ಕುವ ಅವಕಾಶ ಕೊಡ್‌ಕಂಡು ಎಣ್ಣೆತ್ ಅವನ ಮನೆಲೇ ಕೆಲಸಕ್ ಆಕಿಯಂಡತ್. ಜಗದೀಶಚಂದ್ರ ಚೆರಿಯಂವೊನಾಯಿತಿಪ್ಪಕ ಆ ಆಳ್ ಸ್ಕೂಲ್‌ಕ್



ಕೂಟಿಯಂಡ್ ಪೋಪಯಿಂಜತ್. ಅಕ್ಕ ಜಗದೀಶಚಂದ್ರಂಗ್ ಅಂವೊಂಡ ಪಳೆಯ ಕತೆ ಎಲ್ಲ ಎಣ್ಣೆ ಕೊಡ್‌ಪಯಿಂಜತ್. ಅಂಜಿ ವಯಸ್‌ಲೇ ಕುದುರೆ ಸವಾರಿ ಪಡ್‌ಚಿ ತಿಂಜತ್. ಒಮ್ಮೆ ಚಿರಿಯಂವೊನಿಪ್ಪಕ ಕುದುರೆ ರೇಸ್ ನೋಟುವಕ್ ಪೋಯಿ ತಿಂಜತ್. ಅಲ್ಲಿ ಚೆನ್ನ ಜನ ನೀಕ್ ಕುದುರೆ ಸವಾರಿ ಗೊತ್ತುಂಡಲ್ಲ, ನೀನೂ ಓಡ್‌ಚಿಡ್‌ಂದ್ ಎಣ್ಣೆದ ಕುದುರೆರ ಜೀನ್ ರಿಕಾಪು ಒಂದೂ ಇಲ್ಲತೆ ಓಡ್‌ಚಿಟ್ಟತ್. ಅದ್‌ಂಡ ಪರಿಣಾಮ ತೊಡೆಲ್ ಗಾಯ ಆಯಿತ್ ಚೋರೆ ಒಕ್ಕುವಯಿಂಜತ್. ಅಂದಕಲೂ ರೇಸ್‌ಕೋರ್ಸ್‌ರ ಒರ್ ಸುತ್ತ ಬಾತ್. ಆ ಚಿರಿಯ ಕ್‌ಣ್ಣಂಡ ದೈರ್ಯತ್‌ನ ಜನ ಕೊಂಡಾಡ್‌ಚಿ.

ಓದುವಾತ್ ಇಂಜಚ್ಚೆಕೇ ಪುರ್‌ಡ್ ಕಳಿಲೂ ಇಂಜತ್. ಕ್ರಿಕೆಟ್ ಅಯಿಂಗಡ ಕುಸಿರ ಕಳಿ. ಒಯಿಂಬದನೆ ವಯಸ್ಸಲ್ ಓದುವಕ್ ಕಲ್ಪತ್ತಾಕ್ ಪೋಕಂಡಿಯಾಚಿ. ಅಲ್ಲಿಯತ್‌ರ ಸ್ಕೂಲ್ ಮಕ್ಕಕ್ ಇಂಗ್ಲಿಷ್ ಬುಟ್ಟಿತೇಂಗಿ ಬೋರೆ ಭಾಷೆ ಬಪ್ಪ ಯಿಂಜಿಲೆ. ಜಗದೀಶಚಂದ್ರ ಓದಿಯೆ ಬಂಗಾಳಿ ಮೀಡಿಯಲ್. ಅನ್ನನಾಯಿತ್ ಆ ಮಕ್ಕ ಜಗದೀಶನ ಕಮ್ಮಿ ತರತ್ ಕಾಂಬಯಿಂಜತ್. ಜಗದೀಶಚಂದ್ರ ಬೋಸ್ ದಾಡ ಕೂಡೆಯೂ ಕೂಡತೆ ತಾನ್ ಇಂಜ ಹಾಸ್ಟೆಲ್‌ಲೇ ಗಿಡ ಬೊಳ್‌ತುವೊ, ಮೊನ, ಕೊರಿಯ ಚಾಕುವೊ ಇನ್ನತ ಕೆಲಸ ಎಲ್ಲ ಮಾಡುವಯಿಂಜತ್. ಇನ್ನನೆ ನಲ್ಲ ಅಭ್ಯಾಸ ಬೊಳ್‌ತಿಯಂಡಾನಗುಂಡ್ ಅಯಿಂಗ ಪಾಳ್ ಬಟ್ಟೆಕ್ ಪೋಕತೆ ನಲ್ಲ ಮಾರ್ಕ್ಸ್ ಎಡ್‌ತಿತ್ ಪಾಸಾಚಿ.

ಪತ್ತೊಯಿಂಬದ್ ಬಯತ್‌ಲ್ ಬಿ. ಎ. ಪದವಿ ಪಡ್‌ಂದತ್. ಇಂಗ್ಲೆಂಡ್‌ಕ್ ಪೋಯಿತ್ ಐ.ಸಿ.ಎಸ್. (ಇಂಡಿಯನ್ ಸಿವಿಲ್ ಸರ್ವಿಸ್) ಇಲ್ಲೇಂಗಿ ಮೆಡಿಕಲ್ ಓದಂಡೂಂದ್ ಆಸೆಯಿಂಜತ್. ಆಚೇಂಗಿ ಅಪ್ಪಂಗ್ ಸರ್ಕಾರಿ ಕೆಲಸ ಮಾಡುವದ್ ಕುಸಿಯಿಂಜಿಲೆ. ಜೊತೆಕ್ ಪಣತ್‌ರ ತೊಂದರೆಯೂ ಇಂಜತ್. ಮೊಂವೊ ಉಪಾದ್ರಿ ಯಾಯಿತ್ ಜನಸೇವೆ, ದೇಶಸೇವೆ ಮಾಡ್‌ಂದ್ ಅಪ್ಪಂಡ ಅಭಿಪ್ರಾಯ. ಒಂದುಳ್ಳ ಮೊಂವೊ ಕಣ್ಣ್ ಮಿಂಞಲೇ ಇರಡ್‌ಂದ್ ಅಪ್ಪಂಡ ಆಸೆ. ಅಂದಕಲೂ ತಾಂಡ ಇರುವತ್ತದಂಡನೆ ವಯಸ್ಸಲ್ ಇಂಗ್ಲೆಂಡ್‌ಕ್ ಪೋಚಿ. ಲಂಡನ್‌ಲ್ ಡಾಕ್ಟರ್ ಓದುವಕ್ ಕೂಡ್‌ಚಿ. ಆರೋಗ್ಯ ಸೆರಿಯಿಲ್ಲತಾಯಿತ್ ಅದ್‌ನ ಬುಟ್ಟಿತ್ ಕೇಂಬ್ರಿಜ್‌ಲ್ ಪ್ರಕೃತಿ ವಿಜ್ಞಾನತ್ ಬಿ. ಎಸ್ಸಿ. ಮಾಡ್‌ಚಿ. ಅಲ್ಲಿಂಜ ಭಾರತಕ್ ವಾಪಾಸ್ ಬಂದ ಜಗದೀಶಚಂದ್ರ ಗಿಡ ಮರಕೆಲ್ಲಾಂಗೂ ಮನುಷ್ಯಂಡ ಮಾದರಿ ಪ್ರಾಣ ಉಂಡ್ ಎಣ್ಣೆವ ವಿಷಯತ್ ಸಂಶೋಧನೆ ಮಾಡಿತ್ ಪ್ರಪಂಚತೇ ಕೇಳಿ ಪಡ್‌ಂದತ್. ಗಿಡತ್‌ರ ಮೇಲೆ ಆಪ ಪರಿಣಾಮತ್‌ನ ಕಾಟುವನ್ನತ ಕ್ರಿಸ್ತೋಗ್ರಾಫ್

ಎಣ್ಣುವ ಸೂಕ್ಷ್ಮ ಉಪಕರಣ ಕಂಡ್‌ಪುಡ್‌ಚಿತ್ ಪ್ರಪಂಚತರ ವಿಜ್ಞಾನಿಯ ಬೆರಗಾವನೆಕೆ ಮಾಡ್‌ಚಿ.

ಒಮ್ಮೆ ಇಂಗ್ಲೆಂಡ್‌ಲ್ ಸಂಶೋಧನೆರ ಸತ್ಯತನ ಕಾಟುವಕ್ ವೇದಿಕೆಲ್ ಎಲ್ಲ ತಯಾರಾಯಿತಿಂಜತ್. ಗಿಡಕ್ ವಿಷತರ ಇಂಜಕ್ಷನ್ ಕೊಡ್‌ತಲೆಂಗಿ ಗಿಡ ಎನ್ನನೆ ಚಾವಾಂದ್ ಕಾಟುವ ಸಂದರ್ಭ. ಎಲ್ಲಾರ್‌ಕೂ ಕಾಟಿತ್ ಗಿಡಕ್ ವಿಷತರ ಇಂಜಕ್ಷನ್ ಕೊಡ್‌ತತ್. ಆಚೇಂಗಿ ಗಿಡಕ್ ಒಂದೂ ಆಯಿಲೆ. ಈ ವಿಷ ಗಿಡಕ್ ಒಂದೂ ಮಾಡತ ಪಿಂಞ ನಾಕೂ ಒಂದೂ ಮಾಡುಲೇಂದ್ ಎಣ್ಣಿತ್ ತಾನೇ ಆ ಇಂಜಕ್ಷನ್ ಕುತ್ತಿಯೋಕ್ ಪೊರ್‌ಟಿತ್. ಅಕ್ಕ ಅಲ್ಲಿ ಒಬ್ಬ ಎದ್ದ್ ನಿಂದಿತ್ ವಿಷತರ ಬದಲ್ ಅದೇ ರಂಗ್‌ರ ನೀರ್ ಬೆಚ್ಚಿಯೇಂದ್ ಒತ್ತಂಡತ್. ನೇರಾನ ವಿಷತರ ಇಂಜಕ್ಷನ್ ಕೊಡ್‌ಪದು ಗಿಡ ಬಾಡಿತ್ ಚತ್‌ಪೋಚಿ. ಇದೇ ಆತ್ಮವಿಶ್ವಾಸ ಜಗದೀಶಚಂದ್ರನ ಬಲ್ಯ ವಿಜ್ಞಾನಿಯಾಯಿತ್ ಮಾಡ್‌ಚಿ.

ಫರೀದಾಪುರತ್‌ಲೋರ್ ಪನೆಮರ ಇಂಜತ್. ಅದ್ ಎಕ್ಕೊಲು ಸೂರ್ಯ ತಾರುವಕ ಬಾಂಗುವಯಿಂಜತ್. ಅಲ್ಲಿಯೇ ಇಂಜ ದೇವಸ್ಥಾನತರ ಗಂಟೆ ಸದ್‌ಕ್ ಮರ ಬಾಂಗುವೊ ಆ ಮರತ್‌ಲ್ ದಾರೋ ಶಕ್ತಿ ಪುರುಷಂಗ ವಾಸವುಂಡ್‌ಂದ್ ಜನ ನಂಬಿತಿಂಜತ್. ಅದೇ ಮರತ್ ಉಷ್ಣ ಪಿಂಞ ಶೀತ ಪ್ರಕೃತಿರ ವ್ಯತ್ಯಾಸಕ್ ಮರ ಅನ್ನನೆ ಬಾಂಗುವೊಂದ್ ಜಗದೀಶಚಂದ್ರ ಕಾಟಿ ಕೊಡ್‌ತತ್. ಅನ್ನನೇ ತಾವರೆ ಪೂ ಪಿಂಞ ಸೂರ್ಯಕಾಂತಿ ಕೂಡ ಸೂರ್ಯಂಡ ಶಾಖಿಕ್ ಸೆರಿಯಾಯಿತ್ ಪ್ರತಿಕ್ರಿಯೆ ಕಾಟುವೊಂದ್ ಎಣ್ಣ್‌ಚಿ.

ಜಗದೀಶಚಂದ್ರ ಒರ್ ಡಕಾಯಿತನಾಯಿತಿಂಜ ಕೆಲಸಕಾರಂಡ ಒಡನಾಡಿ ಆಯಿತಿಂಜಕಲೂ, ಅಞ್‌ಡ ಧೈರ್ಯ ಸಾಸತನ ಮಾತ್ರ ಪಡ್‌ಚಿತ್. ಜೀನ್ ರಿಕಾಪು ಇಲ್ಲತೆಯೂ ಕುದಾರೆ ಓಡ್‌ಚಿಟ್ಟಿತ್ ಧೈರ್ಯ, ಆತ್ಮವಿಶ್ವಾಸ ಮೆರಂದತ್. ಇಂಗ್ಲಿಷ್ ಬರತ ಜಗದೀಶನ ಇಂಗ್ಲಿಷ್ ಬಪ್ಪ ಮಕ್ಕ ಕಮ್ಮಿ ತರತ್ ಕಂಡಕಲೂ ನಲ್ಲ ಹವ್ಯಾಸ ಬೊಳ್‌ತಿಯಂಡ್ ಆತ್ಮವಿಶ್ವಾಸತ್ ಮಿಂಞಕ್ ಮೊಟ್‌ಪಟ್ಟಿತ್. ಅನ್ನನೆ ಬಲ್ಯ ವಿಜ್ಞಾನಿಯಾಯಿತ್ ಪ್ರಪಂಚತೇ ಕೇಳಿ ಪಡ್‌ಂದತ್. ಅನ್ನನೇ ಕೆಟ್ಟ ಜನಡ ಕೂಡೆ ಇಂಜಕಲೂ ಅಯಿಂಗಡಲ್ಲಿ ಉಳ್ಳ ನಲ್ಲ ಗುಣ ಮಾತ್ರ ಪಡ್‌ಚಿತ್, ಏದೇ ತರತರ ಕ್ಷೇರಿಮೆ ಬೊಳ್‌ತಿಯವತೆ ಕೆಟ್ಟ ಅಭ್ಯಾಸತನ ಪಡಿಕತೆ ಆತ್ಮವಿಶ್ವಾಸ ಬೊಳ್‌ತಿಯವಂಡು. □



## ಹೋಮಿ ಜಹಾಂಗೀರ್ ಬಾಬಾ

- ಪುಟ್ನನ ದಿನ - ಅಕ್ಟೋಬರ್ 30, 1909ನೇ ಇಸವಿ  
ಪುಟ್ನನ ಜಾಗ - ಮುಂಬಯಿ  
ಅಪ್ಪ - ಜಹಾಂಗೀರ್ ಬಾಬಾ  
ಅಮ್ಮ - ಮೆಹರಾನ  
ಕಣ್ಮರೆ - ಜನವರಿ 24, 1966 ಇಸವಿ

ಹೋಮಿ ಬಾಬಾಂಡ ಅಪ್ಪ ಆಕ್ಸ್‌ಫರ್ಡ್‌ಲ್ ಓದಿತ್, ಟಾಟಾ ಸಂಸ್ಥೆಲ್ ಪೆದಪೋನ ಲಾಯರ್ ಆಯಿತಿಂಜತ್. ಹೋಮಿ ಬಾಬಾ ಚೆರಿಯಂವೊನಾಯಿತಿಪ್ಪಕ ವರ್ಕ್ ಕಮ್ಮಿ. ಅಪ್ಪ ಅವ್ವಂಗ್ ಮೋಂವೊಂಡ ಆರೋಗ್ಯತೆರ್ ವಿಷಯತ್ ಪೆರ್ತ್ ಬೇಜಾರಾಯಿತ್ ಏದೇ ಡಾಕ್ಟರ್‌ಕ್ ಕಾಟ್‌ಚೆಂಗಿಯೂ ಪರಿಹಾರ ಕ್‌ಟ್ಲೆ. ಬಯ್ಯಂಚಿ ಒರ್ ಡಾಕ್ಟರ್ ಎನ್‌ಚಿ, ಕುಂಞಿರ ಆರೋಗ್ಯ ಚಾಯಿಲುಂಡ್. ಅವಂಡ ಮಂಡೆಲ್ ವಿಚಾರಶಕ್ತಿ ಭಾರೀ ಚೋರಾಯಿತ್ ಸುತ್ತಿಯಂಡುಳ್ಳಾನಗುಂಡ್ ಈ ಕುಂಞಿಕ್ ಬೋರೆ ಮಕ್ಕಕಿಂಜ ವರ್ಕ್ ಕಮ್ಮಿಂಡ್. ಅಲ್ಲಿಂಜ ಅಪ್ಪ ಅವ್ವಂಗ್ ಸಮಾಧಾನ ಆಚಿಲೊ. ಅಲ್ಲಿಂಜ ಅಂವೊಂಗ್ ಅಪ್ಪ ವಿಜ್ಞಾನತೆರ್ ವಿಷಯತೆರ್ ಪಲತರತೆರ್ ಪುಸ್ತಕ ಎಡ್‌ತಿತ್ ಕೊಡ್‌ಪಯಿಂಜತ್. ಚೆರಿಯ ಬಯತೆರ್ ಹೋಮಿಬಾಬಾಂಡ ರೂಂ ನಲ್ಲೋರ್ ವಿಜ್ಞಾನ ಪುಸ್ತಕತೆರ್ ಲೈಬ್ರರಿಯಾಯಿತಿಂಜತ್. ಪದನಂಜಿ ಬಯತೆರ್ ಚೆರಿಯ ಬಯತೆಲೇ ಹೋಮಿ ಬಾಬಾ ಐನ್‌ಸ್ಟೈನ್‌ರ ಸಾಪೇಕ್ಷ

ವಾದತರ ಪುಸ್ತಕತನ ಓದಿತ್ ಅರ್ಥ ಮಾಡಿಯವಚ್ಚಕ್ ಅವಂಡ ವಿಜ್ಞಾನತರ ಜ್ಞಾನ ಬೊಳ್ಂದಿತಿಂಜತ್. ಬೊರಿ ವಿಜ್ಞಾನ ಅಲ್ಲತೆ ಚೆರಿಯತಲೇ ಚಿತ್ರಕಲೆ, ಸಂಗೀತ ಸಾಹಿತ್ಯ ಇನ್ನನೆ ಪಲತರತರ ಆಸಕ್ತಿ ಬೊಳ್ತಿಯಂಡತ್. ಸ್ಕೂಲ್ ಕಾಲೇಜ್ಲ್ ಬೊಂಡಿಯಚ್ಚಕ್ ಇನಾಂ ಪಡ್ಂದಿತ್, ನಲ್ಲ ವಿದ್ಯಾರ್ಥಿ ಎಣ್ಣುವ ಪೆದ ಎಡ್ತತ್.

ಭೌತಶಾಸ್ತ್ರ (Physics) ಎಣ್ಣಕ ದುಂಬ ಪ್ರೀತಿ ಇಂಜಕಲೂ, ಅಪ್ಪಂಗ್ ಮೊಂವೊ ಇಂಜಿನಿಯರ್ ಆಂಡೂಂದ್ ಆಸೆ ಇಂಜಾಂಗಾಯಿತ್ ಅಪ್ಪಂಡ ತಕ್ಕ್ ಕೆಲೆ ಕೊಡ್ತಿತ್ ಕೇಂಬ್ರಿಜ್ ವಿಶ್ವವಿದ್ಯಾನಿಲಯತ್ ಮೆಕ್ಯಾನಿಕಲ್ ಇಂಜಿನಿಯರಿಂಗ್ ಓದ್ಚಿ. ಅದ್ಂಡ ಕೂಟ್ಕೇ ಭೌತಶಾಸ್ತ್ರತರ ಸಂಶೋಧನ ವಿದ್ಯಾರ್ಥಿಯಾಯಿತೂ ಕೆಲಸ ಸುರು ಮಾಡ್ಚಿ. ಹೋಮಿ ಬಾಬಾ ಪುಸ್ತಕಪುಳು ಆಯಿತಿಂಜಲೆ. ಜನಸಾಮಾನ್ಯಂಗ ಎಲ್ಲ ವಿಜ್ಞಾನಿಯ, ವಿಜ್ಞಾನತ್ ಆಸಕ್ತಿ ಉಳ್ಳಯಿಂಗ ಕಲೆ ಸಾಹಿತ್ಯಕ್ ಜಾಸ್ತಿ ಸಮಯತನ ಕೊಡ್ಪಲೆಂದ್ ಗೇನ ಮಾಡು ವಲ್ಲ? ಆಚೇಂಗಿ ಬಾಬಾ ಸಮಯ ಕ್ಕಟ್ಟುವಕೆಲ್ಲ ಚಿತ್ರ ಬುಡ್ತುವಯಿಂಜತ್. ಕಲಾಪ್ರದರ್ಶನಕೂ, ಮ್ಯೂಸಿಯಂಕೂ, ಸಂಗೀತ ಸಮಾರಂಭಕೂ ಎಲ್ಲ ಪೋಪ ಯಿಂಜತ್. ಇಂಗ್ಲೆಂಡ್ ಕಲಾಭವನತ್ ಇಂದೂ ಬಾಬಾ ಬುಡ್ತನ ಚಿತ್ರಕಲೆ ಉಂಡ್ಲೊ.

ಹೋಮಿ ಬಾಬಾಂಗ್ ಸುಮಾರ್ ಸ್ಕಾಲರ್ಶಿಪ್ ಕ್ಕಟ್ಟಿತ್ ಬಲ್ಯ ಬಲ್ಯ ವಿಜ್ಞಾನಿಯಡ ಕೂಡ ಸಂಶೋಧನೆ ಮಾಡುವ ಅವಕಾಶ ಕ್ಕಟ್ಟಿಚಿ. 1937 ಲ್ ಹೈಟಲ್ಟ್ ಎಣ್ಣುವ ವಿಜ್ಞಾನಿರ ಕೂಡೆ ಕೂಡಿತ್ ವಿಶ್ವಕಿರಣತರ ವಿಷಯತ್ ವಾದ ಮಂಡನೆ ಮಾಡ್ಚಿ. ಭೂಮಿಕ್ ಎಲ್ಲ ಬರಿಂಜ ಬಪ್ಪನ್ನತ ಚೈತನ್ಯ ಕಣತಲ್ ರಭಸತ್ ಪೋಪನ್ನತ ಪ್ರೋಟಾನ್, ಎಲೆಕ್ಟ್ರಾನ್ ಪಿಂಞ ಗಾಮಾ ಕಿರಣವೂ ಇಪ್ಪ. ಇದ್ ಭೂಮಿರ ವಾತಾವರಣತಲ್ಕ ಪರಮಾಣುಕ್ ಡಿಕ್ಕಿ ಆಪಕ ಪುದಿಯ ಕಣ ಉತ್ಪತ್ತಿ ಆಪಂದ್ ಎಣ್ಣುವ ಸೋಪಾನ ತತ್ವತನ ಕಂಡ್ಪಡ್ಚಿತ್. ಗಣಿತಶಾಸ್ತ್ರತ್ "ಸಾರ್ವತ್ರಿಕ ಭ್ರಮಣ ತತ್ವ" ಕಂಡ್ಪಡ್ಚಿತ್. ಚೆರಿಯ ಬಯತ್ಲೇ ಬಲ್ಯ ಭೌತವಿಜ್ಞಾನಿಂಂದ್ ಪೆದ ಎಡ್ತತ್. ಪರದೇಶತ್ ಚಾಕ್ರಿ ಕಾಕಿತ್ ಕೊಡ್ಪ ಯಿಂಜತ್. ಅಂದಕಲೂ ಬಾಬಾ ಪರದೇಶತರ ಆಡಂಭರಕ್ ಆಸೆಪಡತೆ ಅವ್ವ ದೇಶಕೇ ತಾಂಡ ಸೇವೆ ಮಾಡೊಂಡೂಂದ್ ನಿರ್ಧಾರ ಮಾಡ್ಚಿ. 1940 ಲ್ ಬೆಂಗಳೂರರ್ ಇಂಡಿಯನ್ ಇನ್ಸ್ಟಿಟ್ಯೂಟ್ ಆಫ್ ಸೈನ್ಸ್ಲ್ ರೀಡರ್ ಆಯಿತ್ ಕೂಡ್ಚಿ. ಅದೇ ಕಾಲ ಲಂಡನ್ ರಾಯಲ್ ಸೊಸೈಟಿರ ಸದಸ್ಯನಾಯಿತ್ ಆಯ್ಕಿ ಆಚಿ. ಅಚ್ಚಕ್ ಚೆರಿಯ ಬಯತ್ಲ್ (31) ಆ ಗೌರವ ಪಡ್ಂದ ಪ್ಯಕ್ತಿಯ

ಅಪರೂಪ ಆಯಿತಿಂಜತ್. 1944 ಲ್ ಸರ್ದೋರಾಬ್ಜಿ ಟಾಟಾ ಟ್ರಸ್ಟ್ಸ್ ಬಾಬಾ ಕಾಗದ ಎಲ್ದಾಚಿ. ಇಂಞ ಪತ್ತಿರುವದ್ ಕಾಲಕ್ ಪರಮಾಣು ಶಕ್ತಿಲ್ ವಿದ್ಯುತ್ ಉತ್ಪಾದನೆ ಮಾಡುವ ಸಾಧ್ಯತೆ ಉಂಡ್. ಅಕ್ಯ ವಿಜ್ಞಾನಿಯಕಾಯಿತ್ ನಂಗ ಪರದೇಶತ್ ತೇಡುವದ್ ಬೋಂಡ, ಅನ್ನತ ವಿಜ್ಞಾನಿಯಳ ಇಲ್ಲಿಯೇ ಸೃಷ್ಟಿ ಮಾಡೊಲೊಂದ್. 1945 ಲ್ ಟಾಟಾ ಟ್ರಸ್ಟ್ಸ್ಕಾರ ಟಾಟಾ ರೀಸರ್ಚ್ ಇನ್ಸ್ಟಿಟ್ಯೂಟ್ ಸ್ಥಾಪನೆ ಮಾಡ್ಚಿ. ಅದ್ ಬಯ್ಯಂಜಿ ಮುಂಬಯಿಕ್ ವರ್ಗಾವಣೆ ಆಚಿ, ಅಲ್ಲಿ ಬುದ್ದಿವಂತ ಯುವ ವಿಜ್ಞಾನಿಯಳ ಕೂಟುವಲ್ಲಿ ಬಾಬಂಗ್ ಸಫಲತೆ ಕ್ಹೆಚ್ಚಿ.

ಭಾರತಕ್ ಸ್ವಾತಂತ್ರ್ಯ ಕ್ಹೆಚ್ಚಿನ ಪಿಂಞ 1956 ಲ್ ಅಣುಶಕ್ತಿ ಸಂಸ್ಥೆ ಸುರುವಾಚಿ. ಇದ್ಂಂಗ್ ಬೆಂಬಲ ಕೊಡ್ತವು ಜವಾಹರಲಾಲ್ ನೆಹರು ಪಿಂಞ ಜೆ. ಆರ್. ಡಿ. ಟಾಟಾ. ಅಣುಶಕ್ತಿನ ಶಾಂತಿಕಾಯಿತ್ ಉಪಯೋಗ ಮಾಡೊಂಡು ಎಣ್ಣುವ ವಿಷಯತ್ ವಿಶ್ವಸಮ್ಮೇಳನ ಡೆಲ್ಲಿಲ್ ನಡ್ಂದತ್. 1955 ಲ್ ಜಿನಿವಾ ಸಮ್ಮೇಳನಕ್ ಬಾಬಾ ಪೋಯಿತಿಪ್ಪಕ ಕೆನಡಾ ದೇಶ ಭಾರತಕ್ ರಿಯಾಕ್ಟರ್ ತಪ್ಪಕ್ ಮಿಂಞಕ್ ಬಾತ್. ಅಲ್ಲಿಂಜ ಟ್ರಾಂಬೆಲ್ ನಾಲ್ ಪರಮಾಣು ಕೇಂದ್ರ ಸ್ಥಾಪನೆ ಆಚಿ. ಇದ್ಂಡ ಕೀರ್ತಿ ಹೋಮಿ ಜಹಾಂಗೀರ್ ಬಾಬಾಂಗ್ ಕೂಡೊಂಡು. ಇಂದಿಕ್ಯ ದೇಶತ್ಲ್ ಏದಲ್ಲ ಬಲ್ಯ ಬಲ್ಯ ಉದ್ಯಮ ಪರಮಾಣು ಶಕ್ತಿನ ಉಪಯೋಗ್ ಚಿಟ್ಟಂಡಿತೊ ಅದಲ್ಲ ಹೋಮಿ ಬಾಬಂಡ ಸಂಶೋಧನೆರ ಫಲ ಎಣ್ಣೆಚೀಂಗೊ ತಪ್ಪಾಪ್ಲೆ. ಭಾರತ ಅಣುಯುಗತ್ ಕಾಲ್ಡುವಕ ಹೋಮಿ ಬಾಬಾ ಪರದೇಶತಿಂಜ ಯುವ ವಿಜ್ಞಾನಿಯಕ್, ಟ್ರಾಂಬೆಕ್ ಬಾರಿ, ಭಾರತಕ್ ವಾಪಾಸ್ ಬಾರೀಂದ್ ಆಹ್ವಾನ ಕೊಡ್ತತ್. ಬಾಬಾಂಡ ಕರೆಕ್ ಬೆಲೆ ಕೊಡ್ತಿತ್ ಅವ್ವ ದೇಶತ್ರ ಮೇಲೆ ಪ್ರೀತಿಲೂ ವಾಪಾಸ್ ಬಂದ ವಿಜ್ಞಾನಿಯಕ್ ಟ್ರಾಂಬೆಲ್ ಎಲ್ಲ ತರತ್ರ ಸೌಕರ್ಯ ಮಾಡಿ ಕೊಡ್ತತ್. ವಿಜ್ಞಾನತ್ಂಜ ಭಾರತತ್ರ ಅಭಿವೃದ್ಧಿ ಸಾಧ್ಯ ಎಣ್ಣುವಾನ ಸಾಬೀತ್ ಮಾಡ್ಚಿ. 1974 ಮೇ 18 ಲ್ ಭಾರತ ರಾಜಸ್ಥಾನತ್ರ ಪೋಕ್ರಾನ್ಲ್ ಪರಮಾಣು ಸ್ಪೋಟ ನಡ್ತಿತ್ ಪ್ರಪಂಚತ್ರ ಆರನೇ ಅಣುಶಕ್ತಿ ರಾಷ್ಟ್ರ ಆಯಿತ್ ಮೆರ್ದಂದತ್. ಅಮೆರಿಕ, ರಷ್ಯ, ಬ್ರಿಟನ್, ಫ್ರಾನ್ಸ್ ಪಿಂಞ ಚೀನಾತ್ರ ಕೂಡ ಭಾರತವೂ ಕೂಡ್ಚಿ. ಇದ್ ಭಾರತಕ್ ಹೋಮಿ ಬಾಬಾಂಡ ಕೊಡುಗೆ. ಬಾಬಾಂಡ ಯೋಗ್ಯತೆಕ್ ನಂಗಡ ದೇಶತ್ಲೊ, ಪರದೇಶತ್ಲೊ ಸುಮಾರ್ ವಿಶ್ವವಿದ್ಯಾನಿಲಯಕಾರ ಡಾಕ್ಟರೇಟ್ ಕೊಡ್ತಿತ್ ಸನ್ಮಾನ ಮಾಡ್ಚಿ. ಕುಶಲ ಕಲೆಗಾರನಾಯಿತೂ, ಪ್ರತಿಭಾವಂತ ವಿಜ್ಞಾನಿಯಾಯಿತೂ, ಸಂಗೀತಪ್ರೇಮಿ ಯಾಯಿತೂ, ಜನಡ ಮೇಲೆ ಕರುಣೆವಳ್ಳವನಾಯಿತೂ, ದೇಶಾಭಿಮಾನಿಯಾಯಿತೂ

ಇಂಜ ಹೋಮಿ ಬಾಬಾ ವಿಜ್ಞಾನ, ಕಲೆ, ಸಂಸ್ಕೃತಿ, ಸಾಹಿತ್ಯ ಒಬ್ಬಂಟಿಯೇ ಇಂಜ ಅಪರೂಪತರ ವ್ಯಕ್ತಿ. ಆಜನ್ಮ ಬ್ರಹ್ಮಚಾರಿಯಾಯಿತಿಂಜ ಬಾಬಾ ಒಮ್ಮೆ ಆತ್ಮೀಯ ಒಬ್ಬೊಂಗೆ ಎಳೆದಾನ ಕಾಗದತ್, "ಜೀವನತ್ ಎಲ್ಲಾನೋ ತೆರಕಿತ್ ನಡೆಕೊಲು ಚಾವು ಒಂದಾನ ಬುಟ್ಟಿತ್. ಜೀವನತರ ಕಾಲ ಭಾರೀ ಕಮ್ಮಿ, ಅರಿವಕುಳ್ಳದ್ ದುಂಬ ಉಂಡ್, ಅದೊಂಗೆ ಇಂಜಚ್ಚಕ್ ಕಾಲ ಎಚ್ಚಕ್ ಕಯ್ಯುವೊ ಅಚ್ಚಕ್ ವಿಷಯತನ ಅರಿವ ಸಾಸ ನಾಡದ್. ಕಲೆ, ಕಾವ್ಯ, ಸಂಗೀತ ಇದೆಲ್ಲ ಜೀವನತರ ಅರಿವುನ, ಸಫಲತೆನ ಜಾಸ್ತಿ ಮಾಡುವಾಂದ್" ಎಳೆದಿತಿಂಜತ್. ಇನ್ನತ ಒರ್ ವಿಶೇಷಪಟ್ಟಿ ವ್ಯಕ್ತಿ ಚಿನೆವಾ ಸಮ್ಮೇಳನಕ್ ಪೋಯಂಡಿಪ್ಪಕ್, ಕಾಂಚನಗಂಗಾ ಎಣ್ಣುವ ವಿಮಾನ ಅಪಘಾತ ಆಯಿತ್ ಅದಲ್ ಪ್ರಯಾಣ ಮಾಡಿಯಂಡಿಂಜ ಬಾಬಾ, ತಾಂಡ 56ನೇ ಬಯತ್ಲೇ ಮರಣಪಟ್ಟಿತ್. ಆ ದಿನ ಟ್ರಾಂಬೆ ಸಂಸ್ಥೆರ ಕೆಲಸಕಾರ ಎಕ್ಕೊಲು ಮಾಡುವಾಂಗಿಂಜ ಜಾಸ್ತಿ ಕೆಲಸ ಮಾಡಿತ್ ಆ ಪುಣ್ಯಾತ್ಮಂಗೆ ಶ್ರದ್ಧಾಂಜಲಿ ಅರ್ಪಣೆ ಮಾಡ್ಚಿ.

ಇಂದ್ ಬುದ್ಧಿವಂತ ಮಕ್ಕ ಸುಮಾರ್ ಏರ ವಿದ್ಯೆ ಪಡಿಪಕಾಯಿತ್ ಪರದೇಶಕ್ ಪೋಪ. ಅಲ್ಲಿ ಪಡ್ಚ ಜ್ಞಾನ ವಿದ್ಯೆ ಅರಿವುನೆಲ್ಲ ನಂಗಡ ದೇಶಕಾಯಿತ್ ಉಪಯೋಗ್ ಚೆಡುವನ್ನತ ಬಾಬಾಂಡ ಆದರ್ಶ ಎಲ್ಲಾಡಲ್ಲಿಯೂ ಬೊಳೆಯಡ್. ಐಶ್ವರ್ಯ ಸಂಪತ್ತಾರ ಆಸೆಕಾಯಿತ್ ದೇಶಾಭಿಮಾನ ಬುಟ್ಟಿತ್ ನಿಂಗಡ ಸೇವೆನ ಬೋರೆ ದೇಶಕ್ ಮಾಡತೆ ನಿಂಗಡ ಅವ್ವ ದೇಶಕೇ ಮಾಡಿತ್ ದೇಶಾಭಿಮಾನ ಮೆರೆಯೊಂಡು. ಇದ್ ಭಾರತತರ ಪ್ರತೀ ಮಕ್ಕಕೂ ಹೋಮಿ ಜಹಾಂಗೀರ್ ಬಾಬಾಂಡ ಸಂದೇಶ. □



## ವಲ್ಲಭಭಾಯಿ ಪಟೇಲ್

- ಪುಟ್ನಾನ ದಿನ - ಅಕ್ಟೋಬರ್ 31, 1875ನೇ ಇಸವಿ  
 ಪುಟ್ನಾನ ಜಾಗ - ಕರಮಸದನ, ಪೇಟ್ಲಾ ತಾಲೂಕ್, ಗುಜರಾತ್ ರಾಜ್ಯ  
 ಅಪ್ಪ - ರ್ನುವೇರಭಾಯಿ ಪಟೇಲ್  
 ಅಮ್ಮ - ಲಾಡಭಾಯಿ  
 ಕಣ್ಮರೆ - ಡಿಸೆಂಬರ್ 14, 1950ನೇ ಇಸವಿ

“ಇರಾಂಬುರ ಮನುಷ್ಯ” ಎಣ್ಣೆ ತ್ ಪೆದ ಎಡ್ತ ವಲ್ಲಭಭಾಯಿ ಪಟೇಲ್ ಚೆರಿಯತ್ಲೆ ಧೈರ್ಯವಂತ ಕುಂಞಿಯಾಯಿತಿಂಜತ್. ಇಯಂಗಡದ್ ಬಡತನತ್ ರೈತ ಕುಟುಂಬ. ಒಮ್ಮೆ ಏಳ್ ಬಯತ್ ರ ವಲ್ಲಭಭಾಯಿಕ್ ಕಕ್ಕಳತಡಿಲ್ ಕರಳೆ ಎದ್ದಿತಿಂಜತ್. ಅಯಿಂಡ ಹಳ್ಳಿಲ್ ಒಬ್ಬೊ ಕರ್ಪುಣ್ಣಾಕ್ ಇರಾಂಬು ಕಾಚಿತ್ ಬರೆ ಬೆಚ್ಚಿತ್ ವಾಸಿ ಮಾಡುವಯಿಂಜತ್. ಅಂವೊಂಡ ಪಕ್ಕ ವಲ್ಲಭಭಾಯಿ ಪೋಚಿ. ಅಂವೊ ಇರಾಂಬುನೆನ್ನೊ ಚೋಂದಿತೆ ಕಾಚಿಚಿ. ಆಚೇಂಗಿ ಚುಮ್ಮಿ ಕ್ಣಿ ನ ನೋಟಿತ್ ಬರೆ ಇಡುವಕ್ ಮನ್ಸಾ ಬಂದಾಲೆ. ಅಂವೊ ಮಿಂಞ ಬಯ್ಯ ಗೇನ ಮಾಡಿಯಂಡಿರಣೆ ಚುಮ್ಮಿ ಕ್ಣಿ, “ಎಂತ ನೋಟಿಯಂಡುಳ್ಳಿಯಾ? ಇರಾಂಬು ತಣ್ಂಜಿ ಪೋಪ ಬೆರಿಯ ಬರೆ ಇಡ್” ಎಣ್ಣಾಚಿಲೊ. ಕುಂಞಿರ ತಕ್ಕ ಕೇಟಿತ್ ಬರೆಕಾರಂಗ್ ಒರ್ ತರ ಪೋಡಿ ಆಚಿ. ಅಕ್ಕ ವಲ್ಲಭಭಾಯಿ ಕಾಂಜ ಇರಾಂಬುನ ಎಡ್ತಂಡ್ ತಾನೇ ಕುರತನ ಚುಟ್ಟಂಡತ್ಲೊ. ಅಲ್ಲಿ ನೋಟಿಯಂಡಿಂಜ ಜನ

ಪೋಡ್‌ಚಿಟ್ಟಿಂಡ್ ಕೂತ್ ಕೊಡ್‌ತಕಲೂ ವಲ್ಲಭಭಾಯಿರ ಮೂಡ್‌ಲ್ ಮಾತ್ರ ನೊಂಬಲತರ್‌ಗೆರೆ ಕೂಡ ಕಂಡ್‌ಲೆ. ಚೆರಿಯ ಇಂಜಕ್ಲನ್‌ಕ್ ಬೊತ್ತುವ ಇಂದೇತರ್ ಮಕ್ಕಕ್ ಇದ್ ಕಟ್ಟ್‌ಕತೇಂದ್ ತೋಂದು. ಎಲ್ಲಿ ಅನ್ಯಾಯ ಆಚೇಂಗಿಯೂ ಅಲ್ಲಿ ಸತ್ಯ ಪರೆವಯಿಂಜತ್. ಅವಂಡ ಜೊತೆಕಾರ ದಾರೂ ಅವಂಡ ತಕ್ಕ್‌ನ ಮೀರುವ ಯಿಂಜಿಲೆ. ಕೂಟ್‌ಕಾರಕ್ ಎನ್ನತ ಕಷ್ಟ ಬಾತೇಂಗಿಯೂ ಅರ್‌ಂಜಿತ್ ತಾಂಡ ಕೈಲಾಪ ಸಹಾಯ ಮಾಡುವಯಿಂಜತ್. ಇದೆಲ್ಲ ಪ್ರೈಮರಿ ಸ್ಕೂಲ್‌ಲ್ ಓದಿಯಂ ಡಿಪ್ಪಕ.

ಹೈಯರ್ ಪ್ರೈಮರಿಕ್ ನದಿಯಾ ಎಣ್ಣುವ ಊರ್‌ಲ್ ಕೂಡ್‌ಚಿ. ಅಲ್ಲಿಯತರ್ ಒರ್ ಮಾಸ್ಪರೇ ಪಾಠ ಪುಸ್ತಕತ್‌ನ ಮಾರುವಯಿಂಜತ್. ಮಕ್ಕ ಎಲ್ಲ ಅವೊಂಡ ಕೈಲೇ ಎಡ್‌ತವಂಡೂಂದ್ ಬಲವಂತ ಮಾಡುವಯಿಂಜತ್. ಬೋರೆ ಎಲ್ಲೇಂಗಿ ಪುಸ್ತಕ ಎಡ್‌ತಯಿಂಗಕ್ ಎನ್ನತೆಲ್ಲೊ ಕಿರುಕುಳ ಕೊಡ್‌ಪಯಿಂಜತ್. ಅಕ್ಕ ವಲ್ಲಭಭಾಯಿ ಮಕ್ಕಕೆಲ್ಲ ಆ ಮಾಸ್ಪರರ್ ಕ್ಲಾಸ್‌ಕ್ ದಾರೂ ಪೋಪಕಾಗಾಂದೆಣ್ಣೆತ್ ನಿಪ್ಪಾಚಿಟ್ಟಿತ್‌ಲೊ. ಒರ್ ವಾರ ಮಕ್ಕ ದಾರೂ ಅವಂಡ ಕ್ಲಾಸ್‌ಕ್ ಪೋಕತಿಪ್ಪಕ, ಆ ಮಾಸ್ಪರ್ ತಾಂಡ ತಪ್ಪುನ ತಿದ್ದಿಯಂಡತ್‌ಲೊ. ಅಲ್ಲಿಂಜ ಹೈಸ್ಕೂಲ್‌ಕ್ ಪೇಟ್ಟಾತ್ ಕೂಡ್‌ಚಿ. ಅಲ್ಲಿ ಅಯಿಂಗಳೇ ಅಡಿಗೆ ಮಾಡಿಯವಯಿಂಜತ್. ಮನೆಂಜ ಅಕ್ಕಿ ಬೇಳೆ ಎಲ್ಲ ಪೂರ್‌ತಂಡ್, ನಡ್‌ಂದಂಡೇ ಪೋಪಯಿಂಜತ್. ರೈಲ್ ಇಂಜಕಲೂ ಟಿಕೇಟ್ ಎಡ್‌ಪಕ್ ದುಡ್ಡ್ ಇಂಜಿಲೆ.

ಮೆಟ್ರಿಕ್ (SSLC) ಓದುವಕ್ ಬರೋಡಾಕ್ ಬಾತ್. ಅಲ್ಲಿ ಒರ್ ಉಪಾದ್ರಿ ಲೆಕ್ಕ ತಪ್ಪು ಮಾಡಿತಿಂಜತ್. ವಲ್ಲಭಭಾಯಿ ತಪ್ಪುನ ಕಾಟುವಕ ಉಪಾದ್ರಿಕ್ ಸಹಜವಾಯಿತೇ ಚೆಡಿ ಬಂದಿತ್, ಅಂದಕ ನೀನೇ ಮಾಸ್ಪರ್ ಆಯಿತ್ ಪಾಠ ಮಾಡ್ ಎಣ್ಣಾಚಿಲೊ. ಅಕ್ಕ ವಲ್ಲಭಭಾಯಿ ಆಕೂಂದೆಣ್ಣೆತ್ ಬೋರ್ಡ್‌ಲುಳ್ಳ ಲೆಕ್ಕತನ ಸೆರಿ ಮಾಡಿತ್, ಮಾಸ್ಪರರ್ ಕುರ್ಚಿಲ್ ಅಳಾತ್‌ರ್‌ತ್. ಒಯಿಂಬದನೆ ಕ್ಲಾಸ್‌ಕೆತ್ತನೆ ಸಂಸ್ಕೃತ ಓದಿತ್ ಪತ್ತನೆಲ್ ಗುಜರಾತಿ ಎಡ್‌ತಂಡತ್. ಗುಜರಾತಿ ಮಾಸ್ಪರಕೂ ಸಂಸ್ಕೃತವೇ ಕುಸಿ ಇಂಜಾಂಗ್ ಸಂಸ್ಕೃತ ಬುಟ್ಟಿತ್ ಗುಜರಾತಿ ಎಡ್‌ತಂಡ ಕ್ಕಾಣ್ಂಡ ಮೇಲೆ ಚೆಡಿ. ವಲ್ಲಭಭಾಯಿ ಕ್ಲಾಸ್‌ಕ್ ಬಪ್ಪಕ ವ್ಯಂಗ್ಯ ಆಯಿತ್, “ಬಾಪ್ಪಾ ಬಲ್ಯ ಮನುಷ್ಯ, ಸಂಸ್ಕೃತ ಬುಟ್ಟಿತ್ ಗುಜರಾತಿ ಎನ್ನೊಂಗ್ ಎಡ್‌ತಂಡಿಯೆ?” ಎಣ್ಣೆಯಂಡ್ ಕೇಟತ್‌ಲೊ. “ಎಲ್ಲಾರೂ ಸಂಸ್ಕೃತವೇ ಎಡ್‌ತಂಡಕ ನಿಂಗಕ್ ಕೆಲಸ ಇಲ್ಲತೆ ಆಪಲ್ಲ” ಎಣ್ಣುವಕ, ಮಾಸ್ಪರ್ ಕ್ಕಾಣ್ಂಡ ಮೇಲೆ ಹೆಡ್‌ಮಾಸ್ಪರಕ್ ದೂರ್ ಕೊಡ್‌ತತ್. ಮುಖ್ಯೋಪಾದ್ರಿ ವಲ್ಲಭಭಾಯಿನ ಕಾಕಿತ್



ಕೇಪಕ ವಿವರವಾಯಿತ್ ಉಳ್ಳ ವಿಷಯತ್‌ನ ಎಣ್ಣೆಚಿ. ಕ್ಕಣ್ಣನ ಅಯೆಚಿತ್ ಮುಖ್ಯೋಪಾದ್ರಿ ಗುಜರಾತಿ ಉಪಾದ್ರಿರ ಕೂಡ, "ಇಂತ ಧೈರ್ಯವಂತ ಕ್ಕಣ್ಣನ ಇಂದಾಕಣೆ ಕಂಡಿತಿಂಜಿಲೆ" ಎಣ್ಣವಕ ಅಂವೊಂಗೆ ಇಂಇೂ ಚೆಡಿ ಬಾತ್. ಇಂತದೆಲ್ಲ ಘಟನೆ ನಡಂದಿತ್, ಮನಸ್‌ಕ್ ಬೇಜಾರ ಆಯಿತ್, ಸ್ಕೂಲ್ ಬುಟ್ಟಿತ್ ಮನೆಕ್ ಬಾತ್. ಮನೆಲೇ ಓದಿತ್ ಪತ್ತನೆ ಕ್ಲಾಸ್ ಪಾಸ್ ಮಾಡ್‌ಚಿ.

ವಲ್ಲಭಭಾಯಿಕ್ ಬ್ಯಾರಿಸ್ಟರ್ (ಇಂಗ್ಲೆಂಡ್‌ಲ್ ಓದ್‌ನನ್ನತ ಲಾಯರ್) ಆಂಡೂಂದ್ ಭಾರೀ ಆಸೆ ಇಂಜತ್. ಅದ್‌ಂಗೆ ಇಂಗ್ಲೆಂಡ್‌ಕ್ ಪೊಂಡು. ಮನೆಲ್ ಬಡತನ, ಕಾಲೇಜ್‌ಕ್ ಕೂಡುವಕೇ ದುಡ್ಡಿಲ್ಲೆ. ಅಂದೇತ ಕಾಲತ್ ಕಾಲೇಜ್‌ಕ್ ಪೋಕತೆಯೂ 'ಲಾ' ಓದಲಿಂಜತ್. ವಲ್ಲಭಭಾಯಿರ ಅಣ್ಣ ವಿಠಲಭಾಯಿ ವಕೀಲನಾಯಿತಿಂಜತ್. ಅಂವೊನೂ ಮನೆಲೇ ಓದ್‌ಚೇಂಗೂ ಪರೀಕ್ಷೆಕ್ ಮಿಂಇಾ ಕೋಚಿಂಗೆ ಕ್ಲಾಸ್‌ಕ್ ಪೋಚಿ. ಆಚೇಂಗೆ ವಲ್ಲಭಭಾಯಿ ಮಾತ್ರ ಗೊತ್ತುಳ್ಳ ವಕೀಲಂಡಲ್ಲಿ ಪುಸ್ತಕ ಎಡ್‌ತಂಡ್ ಬಂದಿತ್ ಮನೆಲೇ ಓದಿತ್, ಕೋರ್ಟ್‌ಕ್ ಪೋಯಿತ್ ವಾದ, ಪ್ರತಿವಾದ ಮಾಡುವದ್ ನೋಟಿತ್, ಅಲ್ಲಿಂಜ ಪರೀಕ್ಷೆಕ್ ಅಳ್‌ತಿತ್ ಪಾಸಾಚಿ. ಪ್ರಾಕ್ಟೀಸ್ ಸುರು ಮಾಡುವಕ್ ಸಿನೇತಕಾರಂಡ ಕೈಲ್ ಸಾಲ ಮಾಡಿತ್ ಗೋಧರಾ ಎಣ್ಣವ ಊರ್‌ಲ್ ಒರ್ ರೂಂ ಬಾಡಿಗಕ್ ಪುಡ್‌ಚಿತ್, ಅಲ್ಲಿಯೇ ಪ್ರಾಕ್ಟೀಸ್ ಸುರು ಮಾಡ್‌ಚಿ. ಇವಂಡ ಯೋಗ್ಯತೆನ ಅರಾಂಜಿತ್ ಜನ ಬಪ್ಪಕ್ ಸುರುವಾಚಿ. ಭಾರೀ ಬೆರಿಯ ನಲ್ಲ ಲಾಯರ್ ಎಣ್ಣವ ಪೆದ ಎಡ್‌ತತ್. ಒಮ್ಮೆ ಕೋರ್ಟ್‌ಲ್ ವಾದ ಮಾಡಿಯಂಡಿಪ್ಪಕ ಪಟೇಲ್‌ಕ್ ಒರ್ ಟೆಲಿಗ್ರಾಂ ಬಾತ್. ಅದ್‌ನ ಓದಿತ್ ಅನ್ನನೇ ಮಡ್‌ಕಿತ್ ಜೋಬ್‌ಲ್ ಬೆಚ್ಚಂಡ್, ಅಂದೇತೆರ ವಾದತ್‌ನ ಅಂದೇ ತೇತತ್. ಬಯ್ಯಂಜಿ ಗೊತ್ತಾಚಿ ಅದ್ ಅಯಿಂಗಡ ಪೊಣ್ಣ್ ಚಿತ್ತ್‌ಪೋಚೀಂದ್ ಬಂದ ಟೆಲಿಗ್ರಾಂ! ಅದ್‌ಂಗೆ ಅಯಿಂಗಕ್ ಇರಾಂಬುರ ಮನುಷ್ಯ ಎಣ್ಣವಯಿಂಜಿಯೆ. ಕರ್ತವ್ಯನಿಷ್ಠೆ, ಪ್ರಾಮಾಣಿಕತೆ, ಪುಡ್‌ಚಿ ಕೆಲಸತ್‌ನ ಮಾಡುವಕ್ ಎಚ್ಚಕೇ ಕಷ್ಟ ಬಂದಕಲೂ ಬಯ್ಯಕ್ ನಿಪ್ಪಯಿಂಜಿಲೆ.

ಬ್ಯಾರಿಸ್ಟರ್ ಓದುವಕ್ ಇಂಗ್ಲೆಂಡ್‌ಕ್ ಪೋಪಕ್ ದುಡ್ಡ್ ಕೂಟಿ ಬೆಚ್ಚಂಡಿಂಜತ್. ಟ್ರಾವಲ್ ಏಜೆನ್ಸಿಂಜ ಇಂಗ್ಲೆಂಡ್‌ಕ್ ಪೋಪಕುಳ್ಳ ಟಿಕೇಟ್ ಬಾತ್. ಆಚೇಂಗೆ ಅದ್ ಅಣ್ಣ ವಿಠಲಭಾಯಿಕ್ ಕ್ಕಟ್ಟಿತ್ ನಾನ್ ಮಿಂಇಾ ಪೋಯಿತ್ ಬಪ್ಪಿ, ಬಯ್ಯಂಜಿ ನೀನ್ ಪೊಂಡ್ ಎಣ್ಣ್‌ಚಿ. ವಲ್ಲಭಭಾಯಿ ಚೆನ್ನಂಗೂ ಮಿಂಇಾ ಬಯ್ಯ ಗೇನ ಮಾಡತೆ ಅದ್‌ಂಗೆ ಒತ್ತಂಡ್ ಅಣ್ಣನ ಇಂಗ್ಲೆಂಡ್‌ಕ್ ಅಯೆಚಿತ್. ಇದ್‌ಲ್ ಅಯಿಂಗಡ ತ್ಯಾಗ ಮನೋಭಾವ ಎಂತದೇಂದ್ ಗೊತ್ತಾಪ. ಮೂಂದ್

ಕಾಲ ಕಯಿಂಜಿತ್ ಅಣ್ಣ ವಾಪಾಸ್ ಬಂದ ಪಿಂಞ ವಲ್ಲಭಭಾಯಿ ಪಟೇಲ್ ಇಂಗ್ಲೆಂಡ್‌ಕ್ ಪೋಚಿ. ಅಲ್ಲಿ ಏದೇ ತರತರ ಆಕರ್ಷಣೆಕೂ ಮರ್ಳಾಕತೆ ದೃಢ ಮನಸ್ಸಿಂಜ ಓದ್‌ಚಿ. ಪಟೇಲ್‌ರ ರೂಂಕೂ ಲೈಬ್ರರಿಕೂ ಪನ್ನೊಂದ್ ಮೈಲ್ ದೂರತಿಂಜಕಲೂ ದಿನಾ ಪೊಲಾಕ ನಡ್‌ಂದಂಡೇ ಪೋಯಿತ್ ಬೈಟ್ ವಾಪಾಸ್ ಬಪ್ಪಯಿಂಜತ್. ಇನ್ನನೆ ಓದಿತ್ ಆದ್ಯತ್ ಬ್ಯಾರಿಸ್ಟರ್ ಪರೀಕ್ಷೆ ಪಾಸ್ ಮಾಡ್‌ಚಿ. ವಾಪಾಸ್ ಬಂದಿತ್ ಅಹಮದಾಬಾದ್‌ಲ್ ಬ್ಯಾರಿಸ್ಟರ್ ಆಯಿತ್ ಪಣ ಪೆದ ಎಲ್ಲ ಸಂಪಾದನೆ ಮಾಡ್‌ಚಿ. ಅಕ್ಕ ದೇಶಸೇವೆ, ಸತ್ಯಾಗ್ರಹ ಇಂತಾಲೆಲ್ಲ ಆಸಕ್ತಿ ಇಂಜಿಲೆ. ಬಯ್ಯಂಜಿ ಗಾಂಧೀಜಿರ ಪರಿಚಯ ಆನ ಪಿಂಞ ದೇಶಸೇವೆರ ಅರ್ಥ ಗೊತ್ತಾಚಿ, ಆಸಕ್ತಿ ಬಾತ್. ಬ್ಯಾರಿಸ್ಟರ್ ಕೆಲಸ ಬುಟ್ಟಿತ್ ದೇಶಸೇವೆಕ್ ಇಳೊಂಜತ್. ಅಕ್ಕ ಮಾಡ್‌ನ ಸೇವೆಲ್ ವಲ್ಲಭಭಾಯಿ ಪಟೇಲ್, ಸರ್ದಾರ್ ಬಿರ್‌ದ್ ಪಡ್‌ಂದತ್. ಸುಮಾರ್ ಕಾಲ ಜೈಲ್ ಶಿಕ್ಷೆಯೂ ಅನುಭವಿಚಿಟ್ಟಿತ್. ಇರಾಂಬುರಚ್ಚೆಕ್ ಗಟ್ಟಿಯಾನ ವ್ಯಕ್ತಿರ ಮನಸ್ಸು ಅಚ್ಚೆಕೇ ಮೃದುವಾಯಿತೂ ಇಂಜತ್‌ಂದ್ ಅಯಿಂಡ ಚೊತೆಲ್ ಜೈಲಾಲಿಂಜ ಕೂಟ್‌ಕಾರ ಎಣ್ಣಿವಯಿಂಜತ್. ಜೈಲಲ್ ಕೂಟ್‌ಕಾರ ಕಾಯಿಲ ಬುದ್ಧತೇಂಗಿ, ಅವ್ವಂಗ ಮಕ್ಕಳ ನೋಟುವನೆಕೆ ನೋಟುವಯಿಂಜತ್.

ದೇಶಕ್ ಸ್ವಾತಂತ್ರ್ಯ ಕ್‌ಟ್ಚೆನ ಪಿಂಞ ದೇಶತರ ಆದ್ಯ ಉಪಪ್ರಧಾನಿ ಆಯಿತ್ ಎಚ್ಚೆಕೋ ಸಮಸ್ಯೆನ ಪರಿಹಾರ ಮಾಡ್‌ಚಿ. ಸ್ವಾತಂತ್ರ್ಯ ಕ್‌ಟ್ಚೆಚೆಂಗೂ ದೇಶತ್ ರೊಳ್‌ಲಿಂಜ ಚಿರಿಯ ಚಿರಿಯ ರಾಜಂಗ, ನಿಜಾಮಂಗ ಎಲ್ಲ ನಂಗಡ ರಾಜ್ಯ ನಂಗಕೇ ಬೋಂಡೊಂದ್ ಗಲಾಟೆ ಮಾಡಿಯಂಡಿಂಜತ್. ಅನ್ನತಯಿಂಗಳ, ಸೈನ್ಯ ಅಯೆಚಿತೂ ಪೋಲೀಸ್ ಅಯೆಚಿತೂ ಅಡ್‌ಕಿತ್ ಭಾರತ ದೇಶ ಇಡೀ ಒಂದಾಪನೆಕೆ ಮಾಡ್‌ಚಿ.

ವಲ್ಲಭಭಾಯಿರನ್ನತ ವ್ಯಕ್ತಿಯ ಅಪರೂಪ. ಅಯಿಂಗಡ ನಲ್ಲರಿಕೆ, ಧೈರ್ಯ, ಸರಳಜೀವನ ಸತ್ಯಮಾರ್ಗ, ತ್ಯಾಗ ಇನ್ನತದೆಲ್ಲ ನಂಗಡ ಬದ್‌ಕಲ್ ಬಟ್ಟೆ ಬೊಳಿಯಾಯಿತ್ ನಿಕ್ಕಂಡು. □



## ವಿನಾಯಕ ದಾಮೋದರ ಸಾವರ್ಕರ್

- ಪುಟ್ನಾನ ದಿನ - 1883ನೇ ಇಸವಿ, ಮೇ 28  
 ಪುಟ್ನಾನ ಜಾಗ - ಭಗೂರು, ನಾಸಿಕ್ ಜಿಲ್ಲೆ, ಮಹಾರಾಷ್ಟ್ರ  
 ಅಪ್ಪ - ದಾಮೋದರ ಪಂತ್  
 ಅಮ್ಮ - ರಾಧಾಭಾಯಿ  
 ಕಣ್ಮರೆ - 1966ನೇ ಇಸವಿ, ಫೆಬ್ರವರಿ 26

ವಿನಾಯಕ ಸಾವರ್ಕರ್ ಕೊದಿ ಪೆದ ತಾತ್ಯಾ. ಗಣೇಶ ಎಣ್ಣುವ ಅಣ್ಣ. ನಾರಾಯಣ ಎಣ್ಣುವ ತಮ್ಮಣ. ಮೈನಾ ಎಣ್ಣುವ ತಂಗೆರ ಮಧ್ಯ ಬೊಳ್ಂದಂವೊ. ಇಂವೊ ಒಯಿಂಬದ್ ಬಯತ್ ಕಣ್ಣನಾಯಿತಿಪ್ಪಕ ಅಪ್ಪ ಚತ್ಪೋಚಿ. ವಿನಾಯಕನೂ, ಗಣೇಶನೂ ನಾಸಿಕ್‌ಲ್ ಓದುವಕ್ ಪೋಚಿ. 1897 ಲ್ ವಿಕ್ಟೋರಿಯ ರಾಣಿ ಸಿಂಹಾಸನ ಪತ್ನಿನ ವಜ್ರಮಹೋತ್ಸವ ಮಾಡೊಂಡೂಂದ್ ಬ್ರಿಟಿಷ್ ಸರ್ಕಾರ ಏರ್ಪಾಡ್ ಮಾಡಿತಿಂಜತ್. ಆಚೇಂಗಿ ಅದೇ ಸಮಯತ್ ಮಹಾರಾಷ್ಟ್ರತ್ ಪ್ಲೇಗ್ ರೋಗ ಅದಿಯಾಯಿತ್ ದುಂಬ ಜನ ಚತ್ತಂಡಿಂಜತ್. ಇನ್ನತ್ ದುಃಖಿತ್ ಸಂದರ್ಭತ್ ನಮ್ಮೆ ಮಾಡಂಡುವಾಂದ್ ಚೆಡಿ ಬಂದಿತ್, ಚಾಪೇಕರ್ ಅಣ್ಣತಮ್ಮಣಂಗ ಮೂಂದಾಳ್ (ಸ್ವಾತಂತ್ರ್ಯ ಪೋರಾಟಕಾರಂಗ) ದಂಡ್ ಬ್ರಿಟಿಷ್ ಅಧಿಕಾರಿಯಳ ಕೊಂದತ್. ಅಯಿಂಗಕ್ ಗಲ್ಲ್ ಶಿಕ್ಷೆ ಆಚಿ. ಈ ಘಟನೆ ಚೆರಿಯ ಮಕ್ಕಳಾನ ಗಣೇಶ ಪಿಂಞ ವಿನಾಯಕಂಡ ಮೇಲೆ ಬಲ್ಯ ಪರಿಣಾಮ

ಆಚಿ. ಅಯಿಂಗ ಅದೇ ಚಾಪೇಕರ್ ಸಹೋದರಂಗ ಪಾದಿಲ್ ಬುಟ್ಟಿ ಕಾರ್ಯತನ ನಂಗ ಮಾಡುವಾಂದ್ ಪ್ರತಿಜ್ಞೆ ಮಾಡ್‌ಚಿ. 1899 ಲ್ ಅಪ್ಪ ಪ್ಲೇಗ್ ರೋಗಕ್ ಬಲಿಯಾಚಿ. ಅಕ್ಕಣೆ ಅಣ್ಣ ಗಣೇಶಂಡ ಮಂಗಲಾಯಿತಿಂಜತ್. ತಮ್ಮಣಿಂಗಳೋ ತಂಗನೋ ತಂಗಡ ಸ್ತಂತ ಮಕ್ಕಡ ಮಾದಾರಿ ನೋಟಾಚಿ ಆ ಅಣ್ಣನೂ ಮಮ್ಮನು. ಒರ್ ದಿವಸ ವಿನಾಯಕ ಸಾವರ್ಕರ್ ದುರ್ಗಾಮಾತರ ಎದಿಕೆ, ಬೊಳ್‌ಚತಾರ ಮೇಲೆ ಅಂಗೈ ಪುಡ್‌ಚಿತ್, ದೇಶಕ್ ಸ್ವಾತಂತ್ರ್ಯ ಎಡ್‌ತ ಬಪ್ಪಂಗಾಯಿತ್ ಪ್ರಾಣತಾರ ಆಸೆ ಬುಟ್ಟಿತ್ ಪೋರಾಡುವೀಂದ್ ಪ್ರತಿಜ್ಞೆ ಮಾಡಿಯಂಡಿಂಜಾನ ಮಮ್ಮ ಯಶೋದೆ ಕಂಡಿತ್ ಕಣ್ಣೀರಾಟ್ಟಿತ್. ಅವಂಡ ಚುಟ್ಟಿ ಅಂಗೈಕ್ ಮದ್ದ್ ಇಟ್ಟಿತ್ ತಾನೇ ಬಾಯಿಕ್ ಕೂಳ್ ಉಂಬ್‌ಚಿಟ್ಟಿತ್. ವಿನಾಯಕ ಸಾವರ್ಕರ್ ಶಿವಾಜಿರ ಭಕ್ತನಾಯಿ ತಿಂಜತ್. ಅವನೂ ಶಿವಾಜಿರ ಮಾದಾರಿ ತಾಂಡ ಬಯತ್‌ರ ಮಕ್ಕಳ ಕಾಕಿ ಕೂಟಿತ್, ಸ್ವಾತಂತ್ರ್ಯಕಾಯಿತ್ ಪೋರಾಟ ಮಾಡುವಕ್ ಅಯಿಂಗಳೆಲ್ಲ ತಯಾರ್ ಮಾಡುವ ಯಿಂಜತ್. ಸಂಸಾರತಾರ ಭಾರ ಅಣ್ಣ ಪೊರಾತಂಡ್ ತಮ್ಮಣನ ಮಿಂಞಾಕ್ ಓದುವಕ್ ಅಯೆಚಿತ್. ಪೂನಾತ್ ಓದಿಯಂಡಿಪ್ಪಕ ಇಂಞ ಮಿಂಞಾಕ್ ಸ್ವದೇಶತಾರ ಬಟ್ಟೆ ಮಾತ್ರ ಇಡುವೊ, ಪರದೇಶತಾರ ಬಟ್ಟೆ ಇಡುಲೇಂದ್ ಪ್ರತಿಜ್ಞೆ ಮಾಡಿತ್, ಪರದೇಶತಾರ ಬಟ್ಟೆನಲ್ಲ ಸಾರ್ವಜನಿಕ ಜಾಗತ್ ಚುಟ್ಟಿತ್. ಇದೆಲ್ಲ ಕಂಡಿತ್ ಪೂನಾತಾರ ಹಾಸ್ಟೆಲ್‌ಂಜ ವಿನಾಯಕನ ಪೊರಾತೆ ಇಟ್ಟಿತ್. ಸಿನೇತಕಾರಂಡ ಮನೆಲಿಂಜಂಡ್ ಡಿಗ್ರಿನ ಆದ್ಯತೇ ಪಾಸ್ ಮಾಡ್‌ಚಿ. ಅಲ್ಲಿಂಜ ಕಾನೂನ್ ಪದವಿ ಓದುವಕ್ ಇಂಗ್ಲೆಂಡ್‌ಕ್ ಪೋಚಿ. ಅಲ್ಲಿಯೂ ಪೋರಾಟ ನಿಂದಾಲೆ. ಇಟಲಿ ದೇಶತಾರ ಸ್ವಾತಂತ್ರ್ಯವೀರ ಮ್ಯಾಡ್ವಿನಿರ ಜೀವನಚರಿತ್ರನ ಭಾರತತಾರ ಬಾಲೆಕಾರಕ್ ಪುರಾಡ್ ಬಪ್ಪನೆಕೆ ಪುಸ್ತಕ ಎಳಾದಿತ್ ಭಾರತತ್ ಇಂಜ ಅಣ್ಣಂಗ್ ಅಯೆಚಿತ್. ಎನ್ನತ ಉತ್ತರ ಕುಮಾರಂಗಳೋ, ಸ್ವಾತಂತ್ರ್ಯ ವೀರಂಗಳಾಯಿತ್ ಮಾಡುವನೆಕೆ ಉಳ್ಳ ಈ ಎಳ್ತಾರ ಪುಸ್ತಕತನ ಬ್ರಿಟಿಷ್ ಸರ್ಕಾರ ವಶ ಪಡ್‌ತಿಯವಾಂದ್ ಬಾಳಗಂಗಾಧರ ತಿಲಕ್ ಎಣ್ಣೆನ ತಕ್ಕ ನೇರಾಚಿ. 1857 ಲ್ ಆನ ಆದ್ಯ ಸ್ವಾತಂತ್ರ್ಯ ಪೋರಾಟತನ "ಸಿಪಾಯಿ ದಂಗೆ" ಎಣ್ಣೆತ್ ಕಮ್ಮಿ ತರತ್ ಎಣ್ಣೆನ ಬ್ರಿಟಿಷ್‌ಕಾರಕ್ ಉತ್ತರವಾಯಿತ್ "1857ಂಡ ಆದ್ಯ ಸ್ವಾತಂತ್ರ್ಯ ಸಂಗ್ರಾಮ" ಎಣ್ಣುವ ಪುಸ್ತಕ ಎಳ್‌ದ್‌ಚಿ. ಅದನೋ ಅಣ್ಣಂಗ್ ಅಯೆಚಿ ಕೊಡ್‌ತತ್. ಅದನ ಪ್ರಕಟ ಮಾಡುವಕ್ ಸುರು ಮಾಡ್‌ನಾನ ಸರ್ಕಾರ ಅರ್‌ಂಜಿತ್ ಅದಂಡ ಕೈ ಎಳ್ತನ ತೇಡ್‌ಚಿ. ಅಕ್ಕ ಅದನ ಫ್ರಾನ್ಸ್‌ಕ್ ಅಯೆಚಿತ್. ಅಲ್ಲಿ ಇಂಗ್ಲಿಷ್‌ಕ್ ತರ್ಜುಮೆ ಆಯಿತ್ ಪ್ರಕಟ ಪಡ್‌ತನ ಪುಸ್ತಕ ಭಾರತಕ್ ಬಾತ್. ಆಚೀಂಗಿ ಅದನೋ ಮುಟ್ಕೊಲಾಟ್ಟಿ ಸರ್ಕಾರ, ಅಣ್ಣ ಗಣೇಶ ಸಾವರ್ಕರ್‌ನ ರಾಜದ್ರೋಹತಾರ

ಆಪಾದನೆಲ್ ಜೀವಾವಧಿ ಶಿಕ್ಷೆ ಕೊಡ್ತೆ ಅಂಡಮಾನ್ ಕರ್ತನೀರ್ ಶಿಕ್ಷೆನೋ ಕೊಡ್ತೆ. ಇದ್ನುಂಡ್ ರೋಷತ್ ಕ್ರಾಂತಿಕಾರಿ ಸ್ವಾತಂತ್ರ್ಯವೀರಂಗ ಸುಮಾರ್ ಬ್ರಿಟಿಷ್ ಅಧಿಕಾರಿಯಳ ಕೊಂದತ್.


ವಿನಾಯಕ ಸಾವರ್ಕರ್ ಭಾರತಕ್ ಬಪ್ಪಕ್ ಪೊರ್ಟತ್. ಅವನ ಇಂಗ್ಲೆಂಡ್ ಏರ್ಪೋರ್ಟ್ಲೇ ಆರೆಸ್ಟ್ ಮಾಡ್ಚಿ. ಅಲ್ಲಿಂಜ ಹಡಗಲ್ ಭಾರತಕ್ ಕಾಕಿಯಂಡ್ ಬಂದಂಡಿಂಜತ್. 1910 ಜುಲೈ 10ಂಡ ಪೊಲಾಕ ನೇರ್ತ್ ಹಡಗ್ ಫ್ರಾನ್ಸ್ ದೇಶತ್ ಬಂದರ್ಲ್ ನಿಂದಿತಿಂಜ ಸಂದರ್ಭತ್ ದಂಡ್ ಪಾರಕಾರ ಇಂಜಕಲೂ, ಟಾಯಿಲೆಟ್ಕ್ ಪೊಂಡೂಂದೆಣ್ಣೆತ್ ಕ್ಡಿಕೆರೊಳ್ಲಿಂಜ ಪಾರಿತ್ ಸಮುದ್ರಕ್ ಬುದ್ದಿತ್ ಅಲ್ಲಿಂಜ ಮೀಂದಿಯಂಡ್ ಬಂದಿತ್ ಬಂದರ್ ಗೋಡೆನ ಪತ್ತಿತ್ ದಾಟಿತ್ ಓಡಿಯಂಡಿಂಜತ್. ಅಕ್ಕಣ್ ಪಾರಕಾರ ದೋಣಿಲ್ ಬಂದಿತ್ ದವುತಿ ಪುಡ್ಚತ್. ಫ್ರಾನ್ಸ್ ದೇಶತ್ ನಿಂಗ ನನ್ನ ಪುಡಿಪನ್ನೆಕಿಲ್ಲೆಂದ್ ಕೂತ್ ಕೊಡ್ತಕಲೂ ಕೇಕತೆ, ಅಂವೊನ ಪುಡ್ಚಂಡ್ ಬಾತ್. ಗ್ಲಾಸ್ಕರ್ ಕ್ಡಿಕೆನ ಒಡ್ತಿತ್ ಪಾರುವಕ ಮೇಲೆಲ್ಲ ಗಾಯ. ಅದೇ ಗಾಯತ್ಲ ಸಮುದ್ರತ್ ಉಪ್ವಾನೀರ್ಕ್ ಬೂವಕ ಗಾಯತ್ ಉರಿ! ಆ ಉರಿಲೇ ಮೀಂದಿತ್ ಕರೆ ಮುಟ್ಟ್ಚಿ. ಇಚ್ಚೆಕೆಲ್ಲ ನೊಂಬಲ ಸಹಿಯಂಡ್ ದೇಶಕಾಯಿತ್ ನೈಚ ಈ ದೇಶಪ್ರೇಮಿರ ಸಾಸಕಾರ್ಯ ದೇಶತ್ ಚರಿತ್ರೆಲ್ ಒರ್ ನೆಪ್ಪಾಯಿತುಂಡ್. ಅಲ್ಲಿಂಜ ಪುಡ್ಚಂಡ್ ಬಂದಿತ್ ವಿನಾಯಕಂಗೂ ಅಂಡಮಾನ್ ದಂಡ್ ಜೀವಾವಧಿ ಶಿಕ್ಷೆ ಕೊಡ್ತತ್. ಅಲ್ಲಿ ಅಂವೊನ ಎಣ್ಣೆರ ಗಾಣಕ್ ಕಟ್ಟುವಯಿಂಜತ್. ಪೊಲಾಕ್ಂಜ ಬೈಟಾಕಣೆಕ್ ಎತ್ತರ ಮಾದರಿ ಎಣ್ಣೆ ಗಾಣ ಸುತ್ತೊಂಡಿಂಜತ್. ಕೇರ್ ಮಾಡೊಂಡಿಂಜತ್. ಕೆಲಸ ಸೆರಿಯಾಯಿತ್ ಮಾಡತ ಪೋಚೆಂಗಿ ತೂರೆಕೋಲ್ ಪೊಯ್ತ. ಇದೆಲ್ಲ ಸಹಿಯಂಡ್, ಕೈಕೂ ಕಾಲಕೂ ಸರಪಳಿ ಇಟ್ಟಿತ್ ಕಟ್ಟಿಪ್ಪಕಲೂ ಆಣಿ ಎಡ್ತಂಡ್ ಜೈಲರ್ ಗೋಡಲ್ ದೇಶಭಕ್ತಿರ ಪದ್ಯ ಎಳ್ವುದುವಯಿಂಜತ್. ಅಲ್ಲಿ ಉಳ್ಳ ಕೈದಿಯಕ್ ಪ್ರೀತಿ ಕಾಟಿತ್ ಅಯಿಂಡ ಮನಸ್ ಬದಲ್ ಮಾಡ್ಚಿ. ಅಯಿಂಗಕ್ ಅಕ್ಷರ ಎಣ್ಣೆ ಕೊಡ್ತತ್, ಭಾರತತ್ ಇತಿಹಾಸತ್ ಪಾರ ಎಣ್ಣೆ ಕೊಡ್ತತ್, ಹಿಂದೂಧರ್ಮತ್ ವಿಷಯ ಅರಿವಿಕೆ ಕೊಡ್ತತ್. ಇದೆಲ್ಲ ಮಾಡಿತಾಪದು ಎಚ್ಚಕೋ ಕೈದಿಯಡ ಮನಃಪರಿವರ್ತನೆಯಾಯಿತ್ ನಲ್ಲ ಮನುಷ್ಯಂಗ ಆಚಿ. ಅಲ್ಲಿ ಸ್ತೋತ್ರ, ಪ್ರಾರ್ಥನೆ ಪಡ್ಪಾಚಿಟ್ಟಿತ್ ಜಾತಿಭೇದತ್ ಭಾವನೆ ಇಲ್ಲ ತನೆಕೆ ಮಾಡ್ನದ್ ಒಗ್ಗಟ್ಟ್ ಮೊಳಿ ಆಚಿ. 1919 ಲ್ ವಿನಾಯಕ ಸಾವರ್ಕರ್ ಆರೋಗ್ಯ ಪಾಳಾಚಿ. ದೇಶತ್ಲೆಲ್ಲ ಜನ ಅಯಿಂಗಳ ಬುಡೊಂಡೊಂದ್ ಚಳುವಳಿ ಮಾಡ್ಚಿ. ಅಲ್ಲಿಂಜ ಚೆನ್ನ ಕಾಲ ಭಾರತತ್ ಜೈಲೆಲೇ ಬೆಚ್ಚಿತ್, 1924 ಲ್

ಬುಡ್‌ಗಡೆ ಮಾಡ್‌ಚಿ. ಅಲ್ಲಿಂಜ ರಾಜಕೀಯತ್ ಒರ್ ಕೆಲಸವೂ ಮಾಡುವ ಕಯ್ಯಾಂದ್ ಬ್ರಿಟಿಷ್ ಸರ್ಕಾರ ಎಳ್‌ದ್‌ಚಿಟ್ಟಂಡತ್. ಅಕ್ಕ ಸಮಾಜ ಸೇವೆಕ್ ಇಳ್‌ಂಜತ್. ಕ್ಲೆಳ್‌ಜಾತಿಯ ದೇವಸ್ಥಾನಕ್ ಕೂಡುವಕಯ್ಯಾಂದ್ ಎಣ್ಣುವಾನ ವಿರೋಧ ಮಾಡಿತ್ ಪ್ರತಿಯೋರ್ ಹಿಂದೂ ದೇವಸ್ಥಾನಕ್ ಪೋಪನೆಕೆ ಮಾಡ್‌ಚಿ. ದೇವಸ್ಥಾನತ್ ಒಕ್ಕಚೆ ಅಳ್‌ತಿತ್ ಉಂಬಕ್ ಏರ್ಪಾಡ್ ಮಾಡ್‌ಚಿ. ಸ್ಕೂಲ್‌ಲ್ ಮಕ್ಕಳ ಜಾತಿ ಭೇದ ಕಾಟತೆ ಒಕ್ಕಚೆ ಅಳ್‌ಪ್‌ಚಿಡುವಕ್ ಮಾಡ್‌ಚಿ. ಇನ್ನತ ಅರ್ಥ ಇಲ್ಲತ ಪದ್ಧತಿಯೆಲ್ಲ ಬುಡೊಂಡೊಂದ್ ಜನಜಾಗೃತಿ ಮಾಡ್‌ಚಿ. ದೇಶಕ್ ಸ್ವಾತಂತ್ರ್ಯ ಕ್ಲೆನ್‌ನಾಂಗ್ ಎಚ್ಚಕ್ ಕುಸಿಪಟ್ಟತೊ, ದೇಶಕ್ ಹಿಂದೂಸ್ಥಾನ ಎಣ್ಣುವ ಪೆದಕ್ ಕಾರಣವಾನ ಸಿಂಧೂ ನದಿಯೂ..., ಹಿಂದೂ ಧರ್ಮಕ್ ವೇದತ್‌ನ ತಂದ ಆರ್ಯವರ್ತ ಎಣ್ಣುವ ಪ್ರದೇಶವೂ... ಭಾರತತಿಂಜ ದೂರಾಯಿತ್ ಪಾಕಿಸ್ತಾನ ಎಣ್ಣುವ ಪೆದತ್ ಬೋರೆಯೇ ದೇಶ ಆನದ್ ಅಚ್ಚಕೇ ದುಃಖ ಆಯಿತಿಂಜತ್.

1966 ಲ್ ಸಾವರ್ಕರ್ ಲೋಕ ಬುಟ್ಟಿತ್ ಪೊರ್‌ಟತ್. ಒರ್ ಋಷಿರ ಮಾದರಿ ಜೀವನ ನಡತಿತ್ ಋಷಿಯ ಮೋಕ್ಷ ಬಯಂದಿತ್ ತಪಸ್ಸು ಮಾಡುವನೆಕೆ ಸ್ವಾತಂತ್ರ್ಯ ಕಾಯಿತ್ ತಪಸ್ಸು ಮಾಡ್‌ನ ಸ್ವಾತಂತ್ರ್ಯವೀರ ವಿನಾಯಕ ದಾಮೋದರ ಸಾವರ್ಕರ್.

ಇನ್ನನೆ ಕಷ್ಟಪಟ್ಟಿತ್ ನಂಗಕ್ ಸಂಪಾದನೆ ಮಾಡಿತಂದ ಸ್ವಾತಂತ್ರ್ಯತ್‌ನ ಎನ್ನನೆ ಕಾಪಾಡಿಯೊಂಡೊಂದ್ ಅರ್ಥ ಮಾಡಿಯವಂಡು. ಬದ್‌ಕ್‌ಲ್ ಒಮ್ಮೆ ಆಚೀಂಗೂ ಈ ದೇಶಕಾಯಿತ್, ಸಮಾಜಕಾಯಿತ್, ಧರ್ಮಕಾಯಿತ್ ಒರ್ ಚೆರಿಯ ಕೆಲಸ, ಒರ್ ಚೆರಿಯ ತ್ಯಾಗ ಮಾಡ್‌ಚೀಂಗೂ ಮದಿ ಸಾವರ್ಕರ್ ಪುಟ್ಟೊನ ಈ ನೆಲ ಧನ್ಯ!





## ಭಗತ್ ಸಿಂಗ್

- ಪುಟ್ಟಾನ ದಿನ - 1907ನೇ ಇಸವಿ, ಸೆಪ್ಟೆಂಬರ್ 28  
ಪುಟ್ಟಾನ ಜಾಗ - ಬಂಗಾ, ಲಾಯಲ್ಪುರ, ಪಂಜಾಬ್  
ಅಪ್ಪ - ಸರ್ದಾರ್ ಕಿಶನ್‌ಸಿಂಗ್  
ಅವ್ವ - ವಿದ್ಯಾವತಿ ದೇವಿ  
ಕಣ್ಮರೆ - 1931, ಮಾರ್ಚ್ 23

ಭಗತ್‌ಸಿಂಗ್ ಪುಟ್ಟುವುದು, ಜೈಲೊಲಿಂಜ ಸ್ವಾತಂತ್ರ್ಯ ಪೋರಾಟಕಾರಳಾನ ಅಪ್ಪ ಕಿಶನ್‌ಸಿಂಗ್ ಪಿಂಳ ಕುಂಳಾಪ್ಪ ಸ್ವರಣ್‌ಸಿಂಗ್ ಜೈಲೊಂಜ ಬುಡ್‌ಗಡೆ ಆಚಿ. ಆ ಕುಂಳಾ ಭಾಗ್ಯವಂತಂದ್ "ಭಗತ್‌ಸಿಂಗ್" ಎಣ್ಣಿಯಂಡ್ ಪೆದ ಇಟ್ಟತ್. ಕ್ರಾಂತಿಕಾರಿ ಸ್ವಾತಂತ್ರ್ಯ ಪೋರಾಟಕಾರಂಗ ಎಲ್ಲ ಆ ಮನೆಕ್ ಬಂದಿತ್ ಪೋಪ ಯಿಂಜತ್. ಅವ್ವ ವಿದ್ಯಾವತಿ ಭಗತ್‌ಸಿಂಗ್‌ಕ್ ರಾಮ, ಕೃಷ್ಣ, ಗುರುಗೋವಿಂದ ಸಿಂಹ, ವೀರ ದೇಶಭಕ್ತಂಗ ಇನ್ನತಯಿಂಡ ಕತೆ ಎಲ್ಲ ಎಣ್ಣಿಯಂಡೇ ಚಾಕ್‌ಚಿ. ಅನ್ನತ ಸ್ವಾತಂತ್ರ್ಯ ಪೋರಾಟಕ್ ಪುರ್‌ಡ್ ಬಪ್ಪನ್ನತ ಜಾಗತ್ ಬೊಳಂದ ಭಗತ್‌ಸಿಂಗ್, ಮಹಾನ್ ದೇಶಭಕ್ತನೂ, ಸ್ವಾತಂತ್ರ್ಯ ಪೋರಾಟಕಾರನೂ ಆಯಿತ್ ಬೊಳಂದತ್.

ಮೂಂದ್ ಬಯತ್‌ರ ಕುಂಳಾಯಾಯಿತಿಪ್ಪಕ ಬೇಲೆಲ್ ಮಣ್ಣಾರ ಗುಡ್ಡೆ ಮಾಡಿತ್ ಅದಲ್ ಕಡ್ಡಿನೆಲ್ಲ ನಟ್ಟಿಂಡಿಂಜತ್. ಅಕ್ಕ ಅಲ್ಲಿಂಜ ಕಿಶನ್‌ಸಿಂಗ್‌ರ

ಸಿನೇತಕಾರನೊಬ್ಬ ಕೇಟಿತ್, “ಎಂತ ಕುಂಞಿ ಮಾಡಿಯಂಡುಳ್ಳೊ”ಂದ್. ಅಕ್ಕ ಚುಮ್ಮಿ ಭಗತ್ ಎಣ್ಣೆಚಿ, “ಅದ್ ತೋಕ್ ಬೊಳ್‌ತುವೋ”ಂದ್. ಪುನಃ ಕೇಟಿತ್‌ವೊ “ಎನ್ನಾಂಗ್?”. “ಅದ್ ಶತ್ರುವಳ ದವುತುವಕ್” ಎಣ್ಣೆಚಿ. ಅದ್‌ನ ಕೇಟಿತ್ ಅಂವೊ ಅಪ್ಪಂಡ ಕೂಡೆ ಎಣ್ಣೆಚಿ, ಇದ್ ಸಾಮಾನ್ಯ ಕುಂಞಿ ಅಲ್ಲಾಂದ್.

ಸ್ಕೂಲಾಲಿಪ್ಪಕ ಸಂಸ್ಕೃತ, ಇಂಗ್ಲಿಷ್, ಇತಿಹಾಸ, ಉರ್ದು ವಿಷಯತ್‌ಲೆಲ್ಲ ಬಲ್ಯ ಬುದ್ಧಿವಂತನಾಯಿತಿಂಜತ್. ಪನ್ನೆರಂಡ್ ಬಯತ್‌ರ ಭಗತ್‌ಸಿಂಗ್ ಲಾಹೋರರ ಡಿ. ಎ. ವಿ. ಸ್ಕೂಲಲ್ ಓದಿಯಂಡಿಂಜತ್. ಆ ಸಮಯತ್ “ಜಲಿಯನ್ ವಾಲಾ ಬಾಗ್ ಹತ್ಯಾಕಾಂಡ” ನಡ್‌ಂದತ್. ಜಲಿಯನ್ ವಾಲಾ ಬಾಗ್‌ಲ್ ಸಭೆ ಕೂಡಿತಿಂಜ ಇರುವದಾಯಿರ ಜನಡ ಮೇಲೆ ಜನರಲ್ ಡೈಯರ್ ಎಣ್ಣೆವ ಬ್ರಿಟಿಷ್ ಅಧಿಕಾರಿ ಸುತ್ತೂ ಬಂದ್ ಮಾಡಿತ್ ಬೊಡಿ ಬೆಪ್ಪಾಚಿಟ್ಟತ್. ಜನ ದಿಕ್ಕಾಪಾಲಾಯಿತ್ ಓಡ್‌ಚಿ. ಅಲ್ಲಿಂಜ ಕಣತರೆಕ್ ಪಾರಿ ಬುದ್ಧತ್. ಮುನ್ನೂಯಿಟಿ ಎಳುವತ್ತೊಯಿಂಬದ್ ಜನ (379) ಚತ್ತತ್. ಆಯಿರತ ನೂಯಿಟಿ ನುಪ್ಪತ್ತೇಳ್ ಜನಕ್ (1137) ಗಾಯ ಆಚಿ. ಇದ್‌ನೆಲ್ಲ ಪತ್ರಿಕೆಲ್ ಓದ್‌ನ ಭಗತ್‌ಸಿಂಗ್‌ರ ಮನಸ್‌ಕ್ ದುಂಬ ನೊಂಬಲಾಚಿ. ಅಲ್ಲಿಂಜ ದಂಡ್ ಮೂಂದ್ ದಿನತ್ ಭಗತ್‌ಸಿಂಗ್ ಮನೆಕೇ ಬಂದ್‌ಲೆ. ಮನೆಲ್ ಎಲ್ಲಾರ್‌ಕೂ ಪೋಡಿಯಾಚಿ. ಎಲ್ಲೆಲ್ಲಿ ತೇಡ್‌ಚೇಂಗಿಯೂ ಭಗತ್‌ಸಿಂಗ್‌ನ ಕ್‌ಟ್‌ಲೆ. ಭಗತ್‌ಸಿಂಗ್ ಜಲಿಯನ್ ವಾಲಾಬಾಗ್‌ನ ನೋಟುವಕ್ ಪೋಯಿತಿಂಜತ್. ಜಲಿಯನ್‌ವಾಲಾಬಾಗ್‌ರ ಗೋಡೆಲಿಂಜ ಬೊಡಿರ ಗುರ್‌ತ್, ಅಲ್ಲಿಯತ್‌ರ ಮಣ್ಣ್‌ಲ್ ಪರ್‌ಂಜ ಚೋರೆನ ನೋಟಿತ್ ಅಂವೊ ಕಣ್ಣೇರ್‌ಟ್ಟತ್. ಚೋರೆ ಪರ್‌ಂಜ ಜಾಗತ್‌ಂಜ ಮಣ್ಣ್‌ ಎಡ್‌ತಂಡ್ ಒರ್ ಡಬ್ಬಿಲ್ ಇಟ್ಟಂಡ್ ಮನೆಕ್ ಬಾತ್. ಅಂವೊಡ ಒಳ್‌ಲುಳ್ಳ ದೇಶಭಕ್ತ ಎದ್ದ್ ನಿಂದಿತಿಂಜತ್. ಜಲಿಯನ್‌ವಾಲಾಬಾಗ್‌ರ ದರ್ಶನ ಅಂವೊಂಡ ಭವಿಷ್ಯ ತೀರ್ಮಾನ ಮಾಡ್‌ನನ್ನತ ದಿವ್ಯಕ್ಷೇತ್ರ ಆಚಿ. ಮನೆಕ್ ಬಂದ ಮೋಂವೊನ ಕಂಡಿತ್ ಎಲ್ಲಾರ್‌ಕೂ ಸಮಾಧಾನ ಆಚಿ. ಅಲ್ಲಿಂಜ ಎಡ್‌ತ ಬಂದ ಮಣ್ಣ್‌ನ ಕಾಟಿತ್ ತಂಗೆಕ್ ಎಣ್ಣೆಚಿ, “ಇದ್ ಪವಿತ್ರವಾನ ಮಣ್ಣ್, ಇದ್‌ಲ್ ಇಂಗ್ಲಿಷ್‌ಕಾರ ಒಕ್ಕಚಿಟ್ಟಿ ನಂಗಡಯಿಂಡ ಚೋರೆ ಮೇಂಗಿತುಂಡ್. ಇದ್‌ಂಗ್ ನಮಸ್ಕಾರ ಮಾಡ್‌ಲೆ”ಂದ್ ಅಲ್ಲಿಂಜ ಆ ಡಬ್ಬಿನ ಅಂವೊಂಡ ಪುಸ್ತಕತ್‌ರ ಗೂಡ್‌ಲ್ ಬೆಚ್ಚಿತ್ ಪೂಜೆ ಮಾಡಿಯಂಡಿಂಜತ್.

ಅಸಹಕಾರ ಚಳುವಳಿಲ್ ಭಾಗವಹಿಸ್‌ಚಿ. ಅಕ್ಕ ಸ್ಕೂಲ್ ಬುಟ್ಟತ್, ಆಚೇಂಗಿಯೂ ಪರೀಕ್ಷೆಕ್ ಅಳತಿತ್ ಪಾಸ್ ಮಾಡಿತ್ ಕಾಲೇಜ್‌ಕ್ ಕೂಡ್‌ಚಿ. ಅಲ್ಲಿ ನಲ್ಲ ನಲ್ಲ ನಾಟಕತ್ ಪಾತ್ರ ಮಾಡುವಯಿಂಜತ್. ಏದೇ ಚಳುವಳಿ



ಆಚೇಂಗಿಯೂ ಭಾಗವಹಿಸುವಯಿಂಜತ್. ಎಕ್ಕೊಲು ಖಾದಿಯೇ ಇಡುವ ಯಿಂಜತ್. ಅವಂಡ ಮನೆಲ್ ಅವಂಗ್ ಮಂಗಲ ಕಯಿಪ ತಯಾರಿ ನಡ್ಂದಂ ಡುಂಡ್ಂದ್ ಅರ್ಂಜಿತ್ ಅದ್ಂಗ್ ವಿರೋಧ ಮಾಡ್ಚಿ. “ನಾನ್ ಭಾರತಮಾತೆರ ಬುಡ್ಗಡೆಕಾಯಿತ್ ಸನ್ಯಾಸ ದೀಕ್ಚೆ ಎಡ್ತಂಡಿಯೆ. ನಾನ್ ಮಂಗಲಾಪಾಲೆ”ಂದ್ ಅಪ್ಪಂಗ್ ಕಾಗದ ಎಳ್ಳದಿತ್ ಮನೆಕಾರ ಬಲವಂತ ಮಾಡುವಕ್ ಅವಕಾಶ ಆಕತನ್ನನೆ ಲಾಹೋರ್ ಬುಟ್ಟಿತ್ ಕಾನ್ಪುರಕ್ ಬಾತ್. ಅಲ್ಲಿ ಕಾಂಗ್ರೆಸ್ ಕಾರ್ಯಕರ್ತೆಂಗಡ ಕೂಡೆ ಕೂಡಿತ್ ನಮ್ಮೆಲ್ ಪೋಯಿತ್ ಭಾಷಣ ಮಾಡುವೊ, ಎಳ್ಳದುವೊ, ಓದುವೊ ಇನ್ನ ತ ಕೆಲಸತ್ ಮನೆಯೇ ಮರ್ಂದ್ ಪೋಚಿ. ಮನೆ ಜನ ಎಲ್ಲ ಮೋಂವೊ ಕಾಂಗತಾಯಿತ್ಲೆಂದ್ ಗಾಬರಿಪಟ್ಟಂಡ್ ಅಂವೊಂಗ್ ಇಂವೊಂಗ್ ಎಣ್ಣಿತ್ ಕಂಡ್ಪುಡ್ಚಿತ್ ಕಾನ್ಪುರಕೋರ್ ಕಾಗದ ಎಳ್ಳದ್ಚಿ. “ನಿನ್ನ ಮಂಗಲ ಕಯಿಪಕ್ ಬಲವಂತ ಮಾಡುಲೆ ಮನೆಕ್ ಬಾ”ಂದ್ ಎಳ್ಳದ್ನ ಅಪ್ಪಂಡ ಕಾಗದ ಕ್ಷಾನ್ ಪಿಂಞ ಭಗತ್ಸಿಂಗ್ ಮನೆಕ್ ವಾಪಾಸ್ ಪೋಚಿ.

ಬಯ್ಯಂಜಿ ಪದಾನಾಲ್ “ಭಡಿಪೊಯ್ತ್” ತಿಂದಿತೂ, ಸ್ವಾತಂತ್ರ್ಯ ಸ್ಮರಣೆ ಬುಡತೆ, ಜನಕೆಲ್ಲ ಆಶ್ಚರ್ಯ ಆಪನೆಕೆ ಮಾಡ್ತನ ಚಂದ್ರಶೇಖರ್ ಆಜಾದ್ ಪರಿಚಯ ಆನ ಪಿಂಞ ಭಗತ್ಸಿಂಗ್ ಸ್ವಾತಂತ್ರ್ಯ ಪೋರಾಟಕ್ ಬಲ ಬಾತ್. ಕ್ರಾಂತಿಕಾರಿಯಡ ಸಂಘ ಕೆಟ್ಟಿತ್, “ಹಿಂದೂಸ್ತಾನ್ ಸೋಶಿಯಲಿಸ್ಟ್ ರಿಪಬ್ಲಿಕ್ನ್ ಅಸೋಸಿಯೇಷನ್” ಎಣ್ಣಿತ್ ಪೆದ ಇಟ್ಟಿತ್. ಸೈಮನ್ ಕಮಿಷನ್ಕ್ ವಿರೋಧ ಮಾಡುವಕ್ ಚಳುವಳಿ ಮಾಡ್ತನ, ಚಳುವಳಿಕಾರಡ ನಾಯಕ ಲಾಲಾ ಲಜಪತ್ ರಾಯ್ನ ಪೊಜ್ಜಿತ್ ಅಯಿಂಡ ಚಾವುಕ್ ಕಾರಣಕರ್ತನಾನ ಸ್ಕಾಂಡರ್ಸ್ ಎಣ್ಣಿವೆ ಬ್ರಿಟಿಷ್ ಅಧಿಕಾರಿನ ಭಗತ್ಸಿಂಗ್ ಪಿಂಞ ರಾಜಗುರು ದಂಡಾಳೂ ಬೊಡಿಬೆಚ್ಚಿತ್ ಕೊಂದತ್. ಲಾಲ ಲಜಪತ್ ರಾಯ್ನ ಕೊಂದಾಂಗ್ ಹಿಂದೂಸ್ತಾನತ್ ಜವಾಬ್ ಇದ್ಲೆಂದ್ ಹೇಳಿಕೆ ಕೊಡ್ತತ್. ಆಚೇಂಗಿ ಕೊಂದಯಿಂಗ್ ದಾರ್ಲೆಂದ್ ಗೊತ್ತಾಯಿಲೆ. ಕೊಂದಯಿಂಗಳ ಪುಡಿಪಕ್ ಬ್ರಿಟಿಷ್ ಸರ್ಕಾರ ಬಲೆ ಬೀಜಿತಿಪ್ಪಕ ಭಗತ್ಸಿಂಗ್ ತಾಂಡ ಸಿಖ್ ವೇಷತ್ನ ಮಾತಿತ್ ಗಡ್ಡ ಎಡ್ತಿತ್, ಕ್ರಾಪ್ ಮಾಡಿತ್ ಬಲ್ಯ ಅಧಿಕಾರಿರ ಮಾದರಿ ವೇಷ ಬದಲ್ ಮಾಡಿಯಂಡ್ ತಾಂಡ ಮಮ್ಮೊ ಪಿಂಞ ಕುಂಞಿನೊ ಕೂಟಿಯಂಡ್, ಪೊಣ್ಣ್ ಕುಂಞಿರ ಮಾದರಿಯೂ, ರಾಜ್ಗುರು ಆಳ್ವರ ಮಾದರಿಯೂ ನಾಟಕ ಮಾಡಿಯಂಡ್ ತೇಡಿಯಂಡುಳ್ಳ ಪೋಲೀಸಡ ಮಿಂಞತೇ ಲಾಹೋರ್ ಬುಟ್ಟಿತ್ ಕಲ್ಕತ್ತಾಕ್ ಪೋಚಿ. ಅಲ್ಲಿಯತ್ ಕಾರ್ಯಕರ್ತೆಂಗಡ ಕೂಡೆ ಕೂಡಿತ್ ಬಾಂಬ್ ಮಾಡುವಕ್ ಪಡ್ಚಿತ್, ಬೊಂಡಿಯಚ್ಚಕ್ ಬಾಂಬ್ ಮಾಡಿತ್ ಬೆಚ್ಚಿತ್.

1929 ಏಪ್ರಿಲ್ 8ರ ಶಾಸನ ಸಭೆ ಕೂಡಿಸಿವುಕ ಅಲ್ಲಿ ಜನಕ್ ತೊಂದರೆ ಆಕತನೆಕೆ, ದಾಡ ಪ್ರಾಣಕೂ ಅಪಾಯ ಆಕತನ್ನನೆ ಬಾಂಬ್ ಕನ್‌ಚಿತ್ ವಿರೋಧ ಮಾಡಂಡೂಂದ್ ನಿರ್ಧಾರ ಮಾಡ್‌ಚಿ. ದಾರ್ ಬಾಂಬ್ ಕನಿವೊಂದ್ ಪ್ರಶ್ನೆ ಬಂದಲ್ಲಿ ನಾನೇ ಕನಿಕಂಡೂಂದ್ ಭಗತ್‌ಸಿಂಗ್ ಹಟ ಮಾಡ್‌ಚಿ. ಇದಲ್ ಕಾಟ್‌ಚೀಂಗಿ ಶಿಕ್ಷೆ ಆಪಾಂದ್ ಅರಾಂಜಿತೂ ಆ ಕೆಲಸಕ್ ತಾನೇ ಒತ್ತಂಡತ್. ಅವಂಡ ಕೂಡ ಬಟುಕೇಶ್ವರ ದತ್ತ ಇಂಜತ್. ಬಾಂಬ್ ಕನ್‌ಚಿಯಿಂಗ ಅರೆಸ್ಪ್ ಆಚೀಂಗಿ ವಾಪಾಸ್ ಬಪ್ಪಲೇಂದ್ ಗೊತ್ತಿಂಜತ್.

ಎಲ್ಲರೂ ಅಯಿಂಗಕ್ ಆರತಿ ಮಾಡಿತ್ ವೀರತಿಲಕ ನೆತ್ತಿಕ್‌ಚ್ಚಿತ್ ಅಯೆಚತ್. ಸಭಾಭವನತ್ ಬಾಂಬ್ ಕನ್‌ಚಿತ್, ನಾನೇ ಕನ್‌ಚಿಯೇಂದ್ ಒತ್ತಂಡತ್. ವಿಚಾರಣೆ ಮಾಡಿತ್ ಜೀವಾವಧಿ ಶಿಕ್ಷೆ ಕೊಡ್‌ತತ್. ಬಯ್ಯಂಜಿ ಭಗತ್‌ಸಿಂಗೇ ಸ್ಕಾಂಡರ್ಸ್‌ನ ಕೊಂದಿಯೇಂದ್ ಗೊತ್ತಾಯಿತ್ ಅಂವೊಂಗ್ ಗಲ್ಲಾಶಿಕ್ಷೆ ಕೊಡ್‌ತತ್. ಇದಾನ್ ಅರಾಂಜಿ ಅಪ್ಪ ಕಿಶನ್‌ಸಿಂಗ್ ನಾಡ ಮೊಂವೊಂಗೂ ಕೊಲೆಕೂ ಸಮ್ಮಂಧ ಇಲ್ಲೇಂದೂ ಅಂವೊಂಗ್ ಪ್ರಾಣ ಭಿಕ್ಷೆ ಕೊಡ್‌ಕಂಡೂಂದ್ ನ್ಯಾಯಾಲಯಕ್ ಅರ್ಜಿ ಇಟ್ಟತ್. ಆನಗುಂಡ್ ದೇಶಭಕ್ತ ಭಗತ್‌ಸಿಂಗ್‌ಕ್ ದುಂಬ ನೊಂಬಲಾಚಿ. ಅದಾನ್ ವಿರೋಧ ಮಾಡಿತ್ ಅಪ್ಪಂಗೋರ್ ಕಾಗದ ಎಳಾದ್‌ಚಿ. ಬ್ರಿಟಿಷ್‌ಕಾರಡ ಕೈಲ್ ಪ್ರಾಣಭಿಕ್ಷೆ ಕೇಪಂವೊ ನೇರಾಯಿತೂ ದೇಶಭಕ್ತನಾಂದ್ ನಾಕ್ ಅನುಮಾನ ಆಯಂಡುಂಡ್. ಬ್ರಿಟಿಷ್‌ಕಾರಡ ಕೈಲಾಂಜಿ ಕಟ್ಟುವ ಭಿಕ್ಷೆಲ್ ಬದ್‌ಕುವಾಂಗಿಂಜ ನಾಕ್ ಚಾವದೇ ಕುಸಿ ಅಪ್ಪ, ನೀನ್ ನೇರಾನ ದೇಶಭಕ್ತನಾಯಿತಿಂಜಕ ಪುನಃ ನ್ಯಾಯಾಲಯಕ್ ಅರ್ಜಿ ಕೊಡ್‌ಕತೇಂದ್ ಕಾಗದ ಎಳಾದಿತಿಂಜತ್. ವಿದ್ಯಾವತಿ ದೇವಿ ಮಾತ್ರ, “ಕುಂಞಿ ನೀನ್ ಚಾವಾಂಗ್ ಬೊತ್ತುವಂವೊ ಅಲ್ಲಾಂದ್ ನಾಕ್ ಗೊತ್ತುಂಡ್. ಎಲ್ಲಾರೂ ಒಂದಲ್ಲ ಒರ್ ದಿನ ಚಾವಂಡು. ಆಚೀಂಗಿ ಒರ್ ಮಾಕಾರ್ಯ ಸಾಧನೆಕಾಯಿತ್ ನಿನ್ನ ನೀನೆ ಬಲಿ ಕೊಡ್‌ತಂಡುಳ್ಳಿಯ. ನೀಡನ್ನತ ಮೊಂವೊನ ಪಡ್‌ಂದಾಂಗ್ ನಾನ್ ಕುಸಿಪಡುವಿ. ಪ್ರಾಣ ಪೋಪಲ್ಲಿ ಕೆತ್ತನೆಯೂ ನೀಡ ನಿರ್ಧಾರ ಬದಲಾಕತಿರಡ್” ಎಣ್ಣೆಚಿ. ಇದಾಲಿಂಜ ಭಗತ್‌ಸಿಂಗ್‌ರ ಧೈರ್ಯ ಇಂಞಾಚ್ಚಕ್ ಜಾಸ್ತಿಯಾಚಿ. ನಿರ್ಧಾರ ಇಂಞಾಚ್ಚಕ್ ಗಟ್ಟಿಯಾಚಿ. ನಾಡ ಚಾವು, ನಾಡನ್ನತ ದೇಶಭಕ್ತಂಗಳ ಆಯಿರ ಆಯಿರ ಸಂಖ್ಯೆಲ್ ಮಿಂಞಾಕ್ ಪೋರಾಟಕ್ ಇಳಿವನೆಕೆ ಪುರ್‌ಡ್ ಕೊಡ್‌ಕಂಡು ಎಣ್ಣುವ ವಿಷಯ ಭಗತ್‌ಸಿಂಗ್‌ರ ಮನಸ್ ಲಿಂಜತ್. ಆ ತಕ್ಕ್ ಪರ್‌ಂದ ವೀರಮಾತೆಕ್ ಬಯ್ಯಂಜಿ ಪಂಜಾಬ್ ಸರ್ಕಾರ ಸ್ವಾತಂತ್ರ್ಯ ಕಾಟ್‌ನ ಪಿಂಞ “ಪಂಜಾಬ್ ಮಾತಾ” (ಪಂಜಾಬ್‌ರ ಅವ್ವ) ಎಣ್ಣುವ ಬಿರಾದ್ ಕೊಡ್‌ತತ್. ಭಗತ್‌ಸಿಂಗ್‌ಕ್ ಗಲ್ಲಾಶಿಕ್ಷೆ ಕಾಟ್‌ನದ್ ಕೇಟಿತ್ ಭಾರತ

ದೇಶತರ ಜನಮನತ್ ದೇಶಭಕ್ತಿ ಇಂಚಾಚ್ಚಕ್ ಜಾಗೃತಿ ಆಯಂಡಿಂಜತ್. ಅದೇ ಭಗತ್‌ಸಿಂಗ್‌ಕ್ ಬೋಂಡಿಂಜಿಯೆ. ಅಂವೊಂಗ್ ತೃಪ್ತಿಯಾಚಿ. ನಂಗ ಚತ್ತತೇಂಗಿಯೂ ನಂಗ ಕತ್‌ಚಿಟ್ಟಿ ಸ್ವಾತಂತ್ರ್ಯತರ ಚೆಡಿ ಬಲ್ಯ ತಿತ್ತಾಯಿತ್ ಕತ್ತುವಾಂದೆಣ್ಣವ ನಂಬಿಕೆಲ್ ಭಗತ್‌ಸಿಂಗ್, ರಾಜ್‌ಗುರು, ಸುಖ್‌ದೇವ್ ಎಣ್ಣವ ಮೂಂದ್ ದೇಶಭಕ್ತಿ ಬಾಲೆಕಾರಂಗ "ಮೇರಾ ರಂಗ್‌ದೇ ಬಸಂತಿ ಛೋಲಾ...." ಎಣ್ಣವ ಪಾಟ್ ಪಾಡಿಯಂಡೇ ಕುಸಿಲ್ ಗಲ್ಲ್‌ಕ್ ಬೋಳೆನ ಕೊಡ್‌ತತ್. ಅಯಿಂಡ ಚಾವುನ ದಫನಕ್ ಜನಕ್ ಕೊಡ್‌ತತ್. ಮೆರವಣಿಗೆ ಮಾಡಿತ್ ಗಲಾಟೆ ಮಾಡು ವಾಂದ್ ಸಮಯಕ್ ಮಿಂಚಾಲೇ ಗಲ್ಲ್‌ಕಿಟ್ಟಿತ್ ಫಿರೋಜ್‌ಪುರತರ ಹುಸೇನಿವಾಲಾ ಎಣ್ಣವ ಜಾಗತ್ ಚಾವುನ ಚುಟ್ಟಿತ್. ಬಯ್ಯಂಜಿ ಜನ ಅಲ್ಲಿಕೂ ಪೋಯಿತ್ ಭಸ್ಮ ಎಡ್‌ತ ಬಂದಿತ್ ಮೆರವಣಿಗೆ ಮಾಡ್‌ಚಿ.

ಮಹಾನ್ ದೇಶಭಕ್ತನಾನ ಭಗತ್‌ಸಿಂಗ್‌ನ ಇಕ್ಕತರ ಕೆಲವು ಜನ ಉಗ್ರಗಾಮಿ ಯಕ್ ಹೋಲ್‌ಚಿಡುವ. ಜನಡ ದೇಶಭಕ್ತಿ ಜಾಸ್ತಿಯಾಯಿತ್ ಸ್ವಾತಂತ್ರ್ಯಕಾಯಿತ್ ಪೋರಾಟ ಮಾಡಡ್ ಎಣ್ಣವ ನಲ್ಲ ಉದ್ದೇಶತ್ ತನ್ನ ತಾನೇ ಬಲಿ ಕೊಡ್‌ತ ಭಗತ್‌ಸಿಂಗ್‌ನ ಸ್ವಾರ್ಥಕಾಯಿತೂ, ದುಡ್ಡ್‌ಕಾಯಿತೂ ಬೋಂಡತ ಕೇತರೆ ಮಾಡುವ ಉಗ್ರಗಾಮಿಯಕ್ ಹೋಲ್‌ಚಿಡುವದ್ ಸೆರಿ ಅಲ್ಲ. ಅಯಿಂಡ ದೇಶಭಕ್ತಿ, ತ್ಯಾಗ ನಂಗಕೆಲ್ಲ ಆದರ್ಶವಾಯಿತಿರಂಡು. □



## ಚಂದ್ರಶೇಖರ ಆಜಾದ್

- ಪುಟ್ಟನ ದಿನ - ಜುಲೈ 23, 1906ನೇ ಇಸವಿ  
 ಪುಟ್ಟನ ಜಾಗ - ಭಾವರಾ, ಮಧ್ಯಪ್ರದೇಶ  
 ಅಪ್ಪ - ಸೀತಾರಾಮ ತಿವಾರಿ  
 ಅಮ್ಮ - ಜಗರಾಣಿದೇವಿ  
 ಕಣ್ಮರೆ - ಫೆಬ್ರವರಿ 27, 1931ನೇ ಇಸವಿ

ಭಾರತದ ಸ್ವಾತಂತ್ರ್ಯ ಪೋರಾಟದ ಮುಖ್ಯಪಟ್ಟಿ ಕ್ರಾಂತಿಕಾರಿ ವೀರ ಚಂದ್ರಶೇಖರ. ಅಪ್ಪ ಒರ್ ಪೋಲೀಸರ ಮಾಲಿಯಾಯಿತ್ ಕೆಲಸ ಮಾಡಿಯಂ ಡಿಂಜತ್. ಆಚೇಂಗಿ, ಸತ್ಯವಂತನೂ, ಪ್ರಾಮಾಣಿಕನೂ ಆಯಿತಿಂಜತ್. ಅವ್ವಂಗ್ ಓದುವಕ್, ಎಳೆದುವಕ್ ಗೊತ್ತಿಲ್ಲತೆ ಪೋಚೇಂಗೂ, ದೇವಡಲ್ಲಿ ದುಂಬ ಭಕ್ತಿ; ನಲ್ಲ ಬುದ್ಧಿ ಕರ್ತಿ ಪೋಣ್ಣಾಳ್. ಅಯಿಂಡ ಹಳ್ಳಿರ ಸುತ್ತ ದುಂಬ ಕಾಡ್ ಇಂಜತ್. ಅಲ್ಲಿಯತ್ ಕಾಡ್ ಜನಡ ಕೂಡೆ ಚಂದ್ರಶೇಖರಂಗ್ ಸಿನೇಚಾರ ಇಂಜತ್. ಅಯಿಂಗ ಅವೊಂಗ್ ಕಾಡ್ ಪಣ್ಣ್, ತೇನ್ ಎಲ್ಲ ಎಡ್ತ ಬಂದಿತ್ ಕೊಡ್ಪ ಯಿಂಜತ್. ಅಯಿಂಡ ಕೈಲ್ ಗುರಿ ಬೆಚ್ಚಿತ್ ಬಾಣ ಬುಡುವಾನ ಅಭ್ಯಾಸ ಮಾಡಿ ಯಂಡತ್. ಅಂಪೊ ಎಟ್ ಬಯತ್ ಕಣ್ಣನಾಯಿತಿಪ್ಪಕ, ದೀಪಾವಳಿ ನಮ್ಮೆಲ್ ಎಲ್ಲ ಮಕ್ಕಳೂ ಪಿಟಾಕಿ ಕತ್ ಚಿಡುವಯಿಂಜತ್. ಅಕ್ಕ ಚಂದ್ರಶೇಖರ ಮಕ್ಕಳೆಲ್ಲ ಕಾಕಿತ್, ಎಲ್ಲರೂ ನಿಂಗ ನಿಂಗಡ ಕೈಲುಳ್ಳ ಬೊಳಿ ಬಪ್ಪನ್ನತ, ಪೂಚೆಟ್ಟಿನನ್ನತ

ಪಿಟಾಕಿನೆಲ್ಲ ಒರ್ ಗುಡ್ಡೆ ಇಡಿ. ಒಮ್ಮೆಕೆ ತಿತ್ತ್ ಕೊಡ್‌ಕನ. ಅಕ್ಕ ದುಂಬ ಬೊಳಿ ಆಪ ಎಣ್ಣೆಚಿ. ಮಕ್ಕ ಎಲ್ಲ ಒತ್ತಂಡ್, ಪಿಟಾಕಿನೆಲ್ಲ ಗುಡ್ಡೆ ಇಟ್ಟಿತ್ ತಿತ್ತ್ ಕೊಡ್‌ತತ್. ಸುಮಾರ್ ನೇರ ಇಡೀ ರಸ್ತೆ ಬೊಳಿಲ್ ಎಲ್‌ಂಗುವಯಿಂಜತ್. ಮಕ್ಕಕೆಲ್ಲ ಕುಸಿಯಾಚಿ. ಕಂಡಿರಾ, ಎಲ್ಲಾಡೋ ಪಿಟಾಕಿನ ಒಕ್ಕಚೆ ಕೂಟ್‌ಚೇಂಗಿ, ಎಚ್ಚಕ್ ಬೊಳಿ ಬಪ್ಪಾಂದ್ ಎಣ್ಣೆಯಂಡ್ ಕುಸಿಪಟ್ಟತ್. ಈ ಗಲಾಟೆಲ್ ಅವೊಂಡ ಅಂಗೈ ಚುಟ್ಪೊನದೇ ಗೊತ್ತಾಯಿಲೆ. ಮಕ್ಕ ಎಲ್ಲ ಅಯ್ಯೋ ನೀಡ ಕೈ ಚುಟ್ಪೊ ಪೋಯಿತ್ತಲ್ಲ, ಏಳ್ ನೀಡ ಅಮ್ಮಂಗ್ ಎಣ್ಣಾನಂದ್ ಎಣ್ಣುವಕ, ಚಂದ್ರಶೇಖರ ಎಣ್ಣೆಚಿ - "ಅಯ್ಯೋ ಪೆದ್ದಂಗಳೇ, ಇಚ್ಚಕ್ ಚೆರಿಯ ಗಾಯಕ್ ಕ್ಕಣ್ಣಂಗಳಾನ ನಂಗ ಬೊತ್ತುವದಾ, ಅದ್ ಒರೇ ದಿನತ್ ವಾಸಿಯಾಪ, ಬಾರಿ, ಪಿಟಾಕಿ ಕತ್ ಚಿಡನಾ."

ಚೆರಿಯತ್‌ಲೇ ಒಗ್ಗಟ್ಟರ ಬಲತ್‌ನೋ, ಕಷ್ಟ ಸಹಿಸುವನ್ನತ ಶಕ್ತಿನೋ ಕಾಟ್‌ಚಿ. ಮನೆರ ಬಡತನಕಾಯಿತ್ ಚೆರಿಯತ್‌ಲೇ ಓದ್ ನಿಪ್ಪಾಚಿಟ್ಟಿತ್ ಮುಂಬಯಿಕ್ ಬಂದಿತ್ ಅಲ್ಲಿಯತ್‌ರ ಬಂದರ್‌ಲ್ (Port) ಮೂಟೆ ಪೊರ್‌ಪ ಕೂಲಿ ಕೆಲಸ ಮಾಡಿಯಂಡಿಂಜತ್. ಆಚೇಂಗಿಯೂ ಸಮಾಧಾನ ಆಯಿಲೆ. ಸ್ಕೂಲ್‌ಕ್ ಪೋಂಡು, ಬಲ್ಯ ವಿದ್ಯಾಂಸನಾಂಡು ಎಣ್ಣುವ ಆಸೆ, ಅವನ ಕಾಶಿಕ್ ಪೋಪನೆಕೆ ಮಾಡ್‌ಚಿ. ಅಲ್ಲಿ ಸಂಸ್ಕೃತ ಸ್ಕೂಲ್‌ಕ್ ಕೂಡಿತ್ ಸಂಸ್ಕೃತ ಪಡ್‌ಚಂಡಿಂಜತ್. ಅಕ್ಕ ಅಸಹಕಾರ ಚಳುವಳಿ ಸುರುವಾಯಿತಿಂಜತ್. ತಾನೂ ಸ್ವಾತಂತ್ರ್ಯ ಪೋರಾಟ ಮಾಡಂಡು, ದೇಶಸೇವೆ ಮಾಡೊಂಡು. ಬ್ರಿಟಿಷ್‌ಕಾರಳ ದೇಶ ಬುಟ್ಟಿತ್ ದವುತಂಡೂಂದೆಣ್ಣುವ ಆಸೆ ಚಂದ್ರಶೇಖರಂಡ ಮನಸ್‌ಕ್ ಬಾತ್. ಒರ್ ದಿನ ಕಾಶಿಲ್, ಚಳುವಳಿಕಾರ ಮೆರವಣಿಗೇಲ್ ಪೋಯಿಂಡಿಂಜತ್. ಪೋಲೀಸ್‌ಕಾರ ಬಂದಿತ್ ಲಾರಿಚಾರ್ಜ್ ಮಾಡ್‌ಚಿ. ಮಿಂಞಲ್ ನಿಂದೋರ್ ಪೆರಿಯ ಮನುಷ್ಯನ ಪೋಲೀಸ್ ಅಧಿಕಾರಿ ಒಬ್ಬೊ ಪೊಚ್ಚಿತ್ ಬೂಕ್‌ಚಿ. ಇದ್‌ನ ನೋಟಿತ್ ತಡ್‌ಪ ಕಯ್ಯತ ಚಂದ್ರಶೇಖರ, ಆ ಅಧಿಕಾರಿಕ್ ಗುರಿ ಬೆಚ್ಚಿತ್ ಒರ್ ಕಲ್ಲ್ ಕನ್‌ಚತ್. ಅದ್ ಅವೊಂಡ ಮಂಡಕೇ ಪಟ್ಟತ್. ಪೋಲೀಸ್ ಅವೊನ ದವುತಿ ಪುಡ್‌ಚಿತ್, ಪಿತ್ಯಾಂದ್ ಕೋರ್ಟ್‌ಕ್ ಕಾಕಿಯಂಡ್ ಬಾತ್. ಜಡ್ಲ್ ಭಾರಿ ದುಷ್ಟನಾಯಿತಿಂಜತ್. ಹಿಂದೂ ಆಯಿತೂ, ಬ್ರಿಟಿಷ್‌ಕಾರಡ ಪರ ಕೆಲಸ ಮಾಡುವ ಜಡ್ಲ್‌ನ ಕಂಡಿತ್ ಇಂಞಚ್ಚಕ್ ಚೆಡಿ ಬಾತ್, ಚಂದ್ರಶೇಖರಂಗ್.

"ನೀಡ ಪೆದ ಎಂತರಾ?" ಎಣ್ಣೆಯಂಡ್ ಜೋರ್‌ತೆ ಕೇಟತ್ ಜಡ್ಲ್.

ಅಂವೊಂಗಿಂಜ ಜೋರ್‌ತೆ, "ನಾಡ ಪೆದ ಆಜಾದ್" ಎಣ್ಣೆಚಿ.

"ಅಪ್ಪಂಡ ಪೆದ ಎಂತ?"

“ಅಪ್ಪಂಡ ಪೆದ ಸ್ವಾಧೀನ” ಎಣ್ಣೆಚಿ.

“ನೀಡ ಅಡ್ರೆಸ್ ಎಂತ?”

“ನಾಡ ಅಡ್ರೆಸ್ ಜೈಲ್” ಎಣ್ಣೆತ್ ಉತ್ತರ ಕೊಡ್ತ ಪದಾನಂಜಿ ಬಯತ್‌ರ ಆ ಶೂರ, ಧೀರ, ವೀರ ಕ್ಕಣ್ಣನ ಕಂಡಿತ್ ಅಲ್ಲಿಂಜ ದೇಶಪ್ರೇಮಿಯಡ ಎದೆ ದುಂಬಿ ಬಾತ್. ಅಂದಾಂಜ ಅಂವೊಂಡ ಪೆದ, “ಚಂದ್ರಶೇಖರ ಆಜಾದ್” ಆಚಿ. ಜಡ್ಡ್ ಆ ಚುಮ್ಮಿ ಕ್ಕಣ್ಣಂಗ್ ಪನ್ನೆರಂಡ್ ತೂರೆಕೋಲ್‌ರ ಪೊಯ್ತರ ಶಿಕ್ಷೆ ಕೊಡ್ತತ್. ನೀರ್‌ಲ್ ನೆನತಾನ ತೂರೆಕೋಲ್‌ಲ್ ರಾಕ್ಷಸಂಡ ಮಾದರಿ ಉಳ್ಳಂವೊನೊಬ್ಬೊ, ಚಂದ್ರಶೇಖರಂಗ್ ಕಾಶಿರ ಸೆಂಟ್ರಲ್ ಜೈಲ್‌ಲ್ ಪೊಜ್ಜತ್. ಓರಂದ್ ಪೊಯ್ತ ಬೂವಕಲೂ ಪ್ರಾಣ ಪೋಪನ್ನತ ನೊಂಬಲ, ತೋಲ್ ಉಳಿತ್, ಚೋರೆ ಬಪ್ಪಯಿಂಜತ್. ಆಚೇಂಗಿ ಆ ಕ್ಕಣ್ಣ ಓರೊಂದ್ ಪೊಯ್ತ ಬೂವಕಲೂ “ವಂದೇ ಮಾತರಂ”, “ಜೈ ಭಾರತ್ ಮಾತಾಕಿ”, “ಜೈ ಮಹಾತ್ಮಗಾಂಧೀಕೀ” ಎಣ್ಣೆಯಂಡ್ ಜೋರ್‌ಲ್ ಕೂತ್ ಕೊಡ್ತಂಡ್, ನೊಂಬಲತಾನ ದೇಶಕಾಯಿತ್ ಸಹಿಸಿಯಂಡತ್. ಅವಂಡ ಮನಃಶಕ್ತಿನ ಕಂಡ ಕಾಶಿರ ಜನ, ಅವನ ಸನ್ಮಾನ ಮಾಡ್‌ಚಿ. ಅಂದಾಂಜ ಅಂವೊ ದಿನದಿನಕೂ ಬಲ್ಯೋರ್ ಸ್ವಾತಂತ್ರ್ಯಯೋಧ ನಾಯಿತ್ ಬೊಳ್‌ಂದಂಡೇ ಪೋಚಿ.

ಒಮ್ಮೆ ಕಾಶಿಲೆಲ್ಲ, ಬ್ರಿಟಿಷಡ ವಿರುದ್ಧ ಗೋಡೆರ ಮೇಲೆಲ್ಲ ಎಳ್ತ ಅಂಟ್ ಚಿಡುವ ಸಂದರ್ಭತ್, ಆಜಾದ್, ನಾನ್ ಪೋಲೀಸ್ ಸ್ಟೇಷನ್‌ಲೇ ಅಂಟ್‌ಚಿಟ್ಟಿತ್ ಬಪ್ಪೀಂದ್ ಪೋಚಿ. ಎಳ್‌ದಾನ ಕಾಗದತಾನ ದಂಡೂ ಬರಿಯ ಗೋಂದ್ ಇಟ್ಟಿತ್ ಬೆನ್ನೆಕ್ ಅಂಟ್‌ಚಿಟ್ಟಂಡಿಂಜತ್. ಸ್ಟೇಷನ್‌ರ ಪೊರ್‌ಮೆ ನಿಂದ ಪೋಲೀಸ್‌ರ ಕೂಡೆ ತಕ್ ಪರ್‌ಂದಂಡೇ, ಒರ್ ಕಂಬಕ್ ತಾಂಗಿ ನಿಂದಂಡ್ ಬೆನ್ನಿನ ಕಂಬಕ್ ಉದ್ದಿಯಂಡಿಂಜತ್. ಕಾಗದ ಕಂಬಕ್ ಅಂಟ್‌ನದು, ಒಂದೂ ಗೊತ್ತಿಲ್ಲತಂವೊಂಡ ಮಾದರಿ, ಪೋಲೀಸ್‌ಕ್ ನಮಸ್ಕಾರ ಎಣ್ಣೆತ್ ಪೋಚಿ. ರಸ್ತೆಲ್ ಪೋಪ ಜನಕೆಲ್ಲ ಅದಾನ ನೋಟಿತ್ ಆಶ್ಚರ್ಯೊಡ್ ಆಶ್ಚರ್ಯ.

ಲಾಲಾ ಲಜಪತ್‌ರಾಯ್‌ನ ಕೊಂಡ ಬ್ರಿಟಿಷ್ ಅಧಿಕಾರಿನ ಆಜಾದ್, ಭಗತ್‌ಸಿಂಗ್ ಪಿಂಞ ರಾಜ್‌ಗುರು ಮೂಂದಾಳ್ ಕೂಡಿತ್ ಕೊಂದತ್. ಇಯಂಗಳ ಪುಡಿಪಕ್ ಪೋಲೀಸ್‌ಕಾರ ಎಲ್ಲಲ್ಲಿಯೂ ತೇಡಿಯಂಡಿಂಜತ್. ಅಕ್ಕ ಚಂದ್ರಶೇಖರ ಒರ್ ಮಠತ್‌ರ ಸ್ವಾಮೀಜಿರ ವೇಷತ್, ಭಗತ್‌ಸಿಂಗ್ ಒರ್ ಸರ್ಕಾರಿ ಅಧಿಕಾರಿರ ವೇಷತೂ, ರಾಜಗುರು ಅಂವೊಂಡ ಆಳ್‌ರೆ ಮಾದರಿಲ್ ವೇಷ ಮಾತಿಯಂಡ್ ಪೋಲೀಸಡ ಮಿಂಞತೇ ಪೋಚಿ. ಅಯಿಂಗಳ್ ಗೊತ್ತೇ ಆಯಿಲೆ.

ಇಂಞಸೊಮ್ಮ ಆಜಾದ್, ಪೋಲೀಸ್ ದವುತಿಯಂಡ್ ಬಪ್ಪಕ, ಒರ್ ಮಸಿಕಂಡ (ಇದ್ದಿಲು) ಮಾರುವ ಮುದಾಕಿರ ಅಂಗಡಿಕ್ ನುಗ್ಗಚಿ. ಪೋಲೀಸ್ಕಾರ ಅಲ್ಲಿಕೂ ಬಾತ್. ಮೇಲ್ ಮೂಡ್ಡಿಯ ಮಸಿ, ಬೂದಿ ಉದ್ದಿಯಂಡ್, ಒರ್ ಚೀಲ ಮಸಿಕಂಡ ಪೊರತಂಡ್ ಬಂದ ಆಜಾದ್, ಪೋಲೀಸಡ ಮಿಂಞತೇ ಪೋಚಿ. ಅಯಿಂಗ ಮುದಾಕಿನ ಕೇಟಂಡೇ ಇಂಜತ್, ಅವ 'ಗೊತ್ತಲೆ' ಎಣ್ಣೆ ಚಿ.

ಇನ್ನತದ್ ಅದೆಚ್ಚಕೋ ಘಟನೆ ನಡಂದಿತ್. ಅಚ್ಚಕ್ ಬುದ್ದಿವಂತಿಕೆಲ್ ತಪ್ಪಾಚಿಟ್ಟವಯಿಂಜ ಚಂದ್ರಶೇಖರನ ಪುಡಿಪಕ್ ಬ್ರಿಟಿಷ್ಕಾರ ಒರ್ ಉಪಾಯ ಮಾಡ್ಚಿ. ಅವಂಡದೇ ಗುಂಪಾರ ಕಾರ್ಯಕರ್ತನಾನಂತ ವೀರಭದ್ರತಿವಾರಿ ಎಣ್ಣುವವಂಗೆ ದುಡ್ಡಾರ ಆಸೆ ಕಾಟಿತ್, ಅಂವೊಂಡ ಗುಟ್ಟನ ಆರಾಂಜಂಡತ್. 1931ನೇ ಇಸವಿ ಫೆಬ್ರವರಿ 27 ಲ್ ಅಲಹಾಬಾದ್ "ಆಲ್ಪೆಡ್ ಪಾರ್ಕ್" ಲ್ ದಾಡೋ ಕೂಡೆ ತಕ್ ಪರವಕ್ ಪೋಯಿತಿಂಜ ಚಂದ್ರಶೇಖರ ಆಜಾದ್ನ ಎಂಬದ್ ಜನ ಪೋಲೀಸ್ಕಾರ, ತೋಕಾಯಿತ್ ಪಾರ್ಕ್ ಸುತ್ತ ನಿಂದಿತ್ ಅಂವೊಂಗೆ ಬೊಡಿ ಬೆಚ್ಚತ್.

ಅಕ್ಕ ಅಲ್ಲಿಂಜ ಒರ್ ಮರತ್ ಬೆಂಬರತ್ ಒಳಚಂಡ್, ತಾಂಡ ಕೈಲಿಂಜ ಪಿಸ್ತೂಲ್ ಪೋಲೀಸ್ಕಾರಕ್ ಬೊಡಿ ಬೆಚ್ಚತ್. "ಅಯ್ಯೋ ಪೋಲೀಸಳೇ, ನಿಂಗ ನಾಕೆನ್ನಾಂಗ್ ಬೊಡಿಬೆಚ್ಚಿರಾ? ನಾನೂ, ನಿಂಗಳೂ ಎಲ್ಲ ಒಂದೇ. ನಂಗಡ ದೇಶತ್ ಬುಡ್ಗಡೆಕೇ ನಾನ್ ಪೋರಾಡಿಯಂಡುಳ್ಳೊ, ಕಯ್ಯುವೆಂಗಿ ಬ್ರಿಟಿಷ್ ಕಾರಕ್ ಬೊಡಿಬೆಚ್ಚಿರಿ" ಎಣ್ಣಿಯಂಡ್ ಕೂತ್ಚಿತ್, ಚಂದ್ರಶೇಖರ ಆಜಾದ್.

ವಿಶ್ವಾಸದ್ರೋಹಿಯಳಾನ ಮನುಷ್ಯಂಗಳುಂಡ್ ಚಂದ್ರಶೇಖರ ಕೆಣ್ಣಂಜತ್. ಕಡೇಕ್ ಅವಂಡ ಪಿಸ್ತೂಲ್ ಒರೇ ತೋಟ ಬಾಕಿ ಇಂಜಿಯೆ. ಎಂದಿಕೂ ಬ್ರಿಟಿಷ್ಡ ಕೈಕ್ ಜೀವಂತ ಕಾಟ್ಟುಲೆಂದ್ ಪ್ರತಿಜ್ಞೆ ಮಾಡಿತಿಂಜ ಆಜಾದ್, ಆ ಆಖೀರಿ ತೋಟತನ ತಾಂಡ ಮಂಡೆಕೇ ಬೊಡಿ ಬೆಚ್ಚಂಡ್, ಭಾರತಮಾತೆಕ್ ತಾಂಡ ಚೋರ ಅಭಿಷೇಕ ಮಾಡ್ಚಿ. ಅಂವೊ ಚಿತ್ತ ಬಾಗಕೂ, ಆ ಮರಕೂ ದೇಶಭಕ್ತ ಜನ ಪೂಜೆ ಮಾಡುವಕ್ ಕೂಡ್ಚಿ. ಅದಾನ ಕಂಡಿತ್ ಬೊತ್ತನ ಬ್ರಿಟಿಷ್ಕಾರ, ಆ ಮರತ್ನ ಬೈಟ್ ಬೈಟೇ ಕೆತ್ತಿತ್ ಕನ್ಚತ್. ಆಚೀಂಗನ್ನೆ, ಚಂದ್ರಶೇಖರ ಆಜಾದ್ ಬಿತ್ತನ ದೇಶಭಕ್ತಿರ ಕುರು ಎಚ್ಚಕೋ ಜನಡ ಮನಸಾರೊಳ್ ಮೊಳಕೆ ಒಡಂದಿತ್ ಮರ ಆಯಂಡಿಂಜತ್.

ತಾಂಡ ಇರುವತ್ತನಾಲನೆ ಬಯತ್ಲೇ ಪ್ರಾಣತ್ನ ದೇಶಕಾಯಿತ್ ತ್ಯಾಗ ಮಾಡ್ನ ದೇಶಪ್ರೇಮಿ ಚಂದ್ರಶೇಖರ ಆಜಾದ್. □



## ಜಯಪ್ರಕಾಶ ನಾರಾಯಣ್

- ಪುಟ್ಟಾನ ದಿನ - 1902ನೇ ಇಸವಿ ಅಕ್ಟೋಬರ್ 21  
 ಪುಟ್ಟಾನ ಜಾಗ - ಬಾಬರ್ ಬನಿ, ಉತ್ತರಪ್ರದೇಶ  
 ಅಪ್ಪ - ಹರಸೂ ದಯಾಳ್  
 ಅಮ್ಮ - ಪೂಲ್‌ರಾಣಿ  
 ಕಣ್ಣರೆ - 1979ನೇ ಇಸವಿ ಅಕ್ಟೋಬರ್ 7

ಜಿ.ಪಿ. ಎಣ್ಣೆ ತೇ ಪೆದಪೋನ ಈ ಗಾಂಧೀವಾದಿ, ಅಪ್ಪ ಅಮ್ಮಂಡ ಮಾದಾರಿಯೇ ಸಾಧು ಸ್ವಭಾವಕಾರ. ಆಚೇಂಗಿ, ಚಿರಿಯತ್‌ಲೇ ಅನಾರೋಗ್ಯ. ನಾಲ್ ವಯಸ್ ಕೆತ್ತನೆಯೂ ಪಲ್ಲೇ ಬಂದಿತಿಂಜಿಲೆ. ಎಕ್ಕೋಲು ಎಂತಾನೋ ಗೇನ ಮಾಡಿಯಂ ಡಿಪ್ಪನೆಕೆ ಇಪ್ಪಯಿಂಜಾನ ಕಂಡಿತ್ ಅಪ್ಪ ಈ ಕ್ಕಣ್ಣ ಎಂತಾನ ಗೇನ ಮಾಡುವೊ ದೇವಕೇ ಗೊತ್ತ ಎಣ್ಣವಯಿಂಜತ್‌ಲೊ. ಒರೂ ಗಲಾಟೆ ಮಾಡತ ಸಾಧು ಕ್ಕಣ್ಣ ನಾಯಿತಿಂಜತ್. ಪ್ರಾಣಿ ಪಕ್ಷಿಯಡ ಮೇಲೆ ಪ್ರೀತಿ ಜಾಸ್ತಿ. ಒಮ್ಮ ಅಪ್ಪ ದಂಡ್ ಪಾರಿವಾಳ ಎಡ್‌ತಂಡ್ ಬಾತ್. ಬೇನಿಲ್ ಸೆಕೆ ತಡ್‌ಪಕ್ ಕಯ್ಯತೆ ಒರ್ ಪಾರಿವಾಳ ಚಿತ್ತಪೋಚಿ. ಇದ್‌ಂಗ್ ಬೇಜಾರಾನ ಕ್ಕಣ್ಣ ಜಯಪ್ರಕಾಶ ದಂಡ್ ದಿನ ಉಂಗತೇ ದುಃಖಪಟ್ಟಿತ್. ಪಾಟ್ನಾತ್ ಕೊಲಿಜಿಯೇಟ್ ಸ್ಕೂಲ್‌ಕ್ ಕೂಡಿತ್, ಚಾಯಿಲ್ ಓದಿತ್ ನಲ್ಲ ಮಾರ್ಕ್ಸ್‌ಲ್ ಪಾಸಾಚಿ. ಒಮ್ಮ ಸ್ಕೂಲ್‌ಲ್ ಒರ್ ಕ್ಕಣ್ಣ ಜಯಪ್ರಕಾಶಂಡ ಪುಸ್ತಕ ಕಟ್ಟಿತ್. ಅದ್ ದಾರ್‌ಂದ್ ಗೊತ್ತಿಂಜಕಲೂ, ಕಣ್ಣರೆ ಕಾಂಗತಾಂಗ್ ಅವಂಡ ಮೇಲೆ ಪುಕಾರ್ ಮಾಡ್‌ಲೆ. ಪುಸ್ತಕ ಕಾಂಗತಾಯಿತ್‌ಂದ್ ಮಾತ್ರ ಎಣ್ಣೆ ಚಿ. ಹೆಡ್‌ಮಾಸ್ಸರೇ ನೋಟಿತ್, ಪುಸ್ತಕ ಕಟ್ಟಿ ಕ್ಕಣ್ಣನ ಕಂಡ್



ಪುಡ್‌ಚಿತ್, ಪುಸ್ತಕ ವಾಪಾಸ್ ಕೊಡ್‌ಪ್‌ಚಿಟ್ಟಿತ್. ಬಯ್ಯಂಜಿ ಜಯಪ್ರಕಾಶ ಆ ಕ್ಲಾಂಡ ಪಕ್ಕ ಪೋಯಿತ್ ಅವಂಗ್ ಅವಮಾನ ಆನಾಂಗ್ ಮಾಘ್ ಕೇಟಿತ್. ಕ್ಲಾಂಗ್ ಆಶ್ಚರ್ಯ ಆಚಿ, ತಪ್ಪು ಮಾಡ್‌ನಂವೊ ನಾನ್. ಅಂತೂ ಇಂವೊ ನನ್ನೇ ಮಾಘ್ ಕೇಪಲ್ಲ್ಯಾಂದ್. ಅಂದ್‌ಂಬ ಆ ಕ್ಲಾ ಕಪ್ಪನ್ನತ ಕೆಟ್ಟಬುದ್ಧಿನೇ ಬುಟ್ವಾರ್ತ್.

ಜೆ. ಪಿ. ಬಲ್ಯ ವಿಜ್ಞಾನಿಯಾಂಡು ಎಣ್ಣುವ ಆಸೆಲ್ ವಿಜ್ಞಾನ ಓದಿಯಂ ಡಿಂಜತ್. ಅಸಹಕಾರ ಚಳುವಳಿ ಆಪಕ ಕಾಲೇಜ್ ಬುಟ್ಟಿತ್. ಬಯ್ಯಂಜಿ ಓದುವಕ್ ಅಮೇರಿಕಾಕ್ ಪೋಚಿ. ಅಲ್ಲಿಯತ್‌ರ ಬರ್‌ಕ್ ವಿಶ್ವವಿದ್ಯಾನಿಲಯತ್ ಓದಂಡೂಂದ್ ಆಸೆ ಇಂಜತ್. ಆಚೇಂಗಿ, ಅಲ್ಲಿಕ್ ಪೋಕಣೆಕ್ ಕಾಲೇಜ್ ಸುರು ಆಯಿತಿಂಜತ್. ಕಾಲೇಜ್‌ಕ್ ಕೂಡುವಕ್ ಮೂಂದ್ ತಿಂಗ ಪಾರಕಾತಂಡಿಪ್ಪಕ, ಮನೆಂಜ ಎಡ್‌ತ ಪೋನ ಪಣ ಎಲ್ಲ ಖಾಲಿಯಾಪದು, ದ್ರಾಕ್ಸ್ ತೋಟಿತ್ ದಿನಕ್ ಪತ್ ಗಂಟೆ ಕೆಲಸ ಮಾಡಿತ್ ಪುನಃ ಕಾಲೇಜ್‌ಕ್ ಕೂಡ್‌ಚಿ. ಕೆಮಿಕಲ್ ಇಂಜಿನಿಯರಿಂಗ್ ಓದಿಯಂಡಿಂಜತ್. ದಂಡನೆ ಕಾಲತ್ ಫೀಸ್ ಜಾಸ್ತಿ ಎಣ್ಣೆತ್ ಬೋರೆ ಕಾಲೇಜ್‌ಕ್ ಕೂಡ್‌ಚಿ. ಸಮಯ ಕಟ್ಟುವಕೆಲ್ಲ ಹೋಟೆಲ್ ಮಾಣಿಯಾಯಿತೂ, ಫರ್ನೀಚರ್‌ಕ್ ಪಾಲಿಶ್ ಮಾಡಿತೂ, ಹಿಮ ಬೂವ ಸಮಯತ್ ಮನೆರ ಮಿಂಘಲ್ ಬುದ್ಧಿ ಹಿಮತ್‌ನ ನೀಕುವ ಕೆಲಸ ಮಾಡಿತ್, ದುಡ್ಡ್ ಸಂಪಾದನೆ ಮಾಡಿಯಂಡೇ ಓದಿತ್ ಫಸ್ಟ್‌ಕ್ಲಾಸ್‌ಲ್ ಪಾಸಾಪಯಿಂಜತ್. ವಿಜ್ಞಾನಿಯಾಂಡೂಂದ್ ಪೋನಂವೊ, ಸಮಾಜಶಾಸ್ತ್ರಜ್ಞ ಆಯಿತ್ ಭಾರತಕ್ ವಾಪಾಸ್ ಬಾತ್. ಸ್ವಾತಂತ್ರ್ಯಕಾಯಿತ್ ಪೋರಾಟ ಮಾಡಿತ್, ಎಚ್ಚಕೋ ಕುರಿ ಜೈಲ್‌ಕ್ ಪೋಚಿ. ಒಮ್ಮೆ ಜೈಲ್‌ಕ್ ಪೋನಲ್ಲಿ, ನಾಪದ್ ದಿನ ಪೋಲೂ ಬೈಟೂ ವರುವಕ್ ಬುಡತನ್ನತ ಶಿಕ್ಷೆ ಕೊಡ್‌ತತ್. ನಾಪದ್ ದಿನ ವರ್‌ಕ್ ಇಲ್ಲ ತೇ ಕಯಿಚತ್. ನಾಪದ್ ದಿನ...!

ಸ್ವಾತಂತ್ರ್ಯ ಕ್ಲಾನ್ ಪಿಂಘವೊ ಅಧಿಕಾರಕ್ ಆಸೆ ಪತತೆ, ಸಮಾಜಸೇವೆ ಮಾಡಿ ಯಂಡಿಂಜತ್. ವಿನೋಬಾ ಭಾವೆರ ಕೂಡ ಕೂಡಿತ್ ಭೂದಾನ ಚಳುವಳಿಕ್ ಕೂಡ್‌ಚಿ. ಚಂಬಲ್ ಕಣಿವೆರ ಡಕಾಯಿತಂಗ ಸಮಾಜತ್ ನಲ್ಲ ಮನುಷ್ಯಂಗಲಾಯಿತ್ ಬದುಕುವ ಕಾಯಿತ್ ಸರಕಾರಕ್ ಶರಣಾಪನ್ನತ ತೀರ್ಮಾನ ಎಡ್‌ತಿತಿಪ್ಪಕ, ಜೆ. ಪಿ. ಅಲ್ಲಿಕೇ ಪೋಚಿ. ಅಲ್ಲಿ ಎಚ್ಚಕೋ ಡಕಾಯಿತಂಗ ಜೆ.ಪಿ.ಕ್ ಶರಣಾಯಿತಿಂಜತ್. ಇನ್ನನೆ ದೇಶಕಾಯಿತ್ ಅದೆಚ್ಚಕೋ ನಯಿಚಿತ್, ತಾಂಡ ಕಣ್ಣ್ ಮಿಂಘಲ್ ರಾಜಕಾರಣಿಯ ಅಧಿಕಾರಕಾಯಿತ್ ಸತ್ಯ ನೀತಿ ಬುಟ್ಟಿತ್ ನಡಪಾನ ನೋಟಿತ್ ಬೇಜಾರಪಟ್ಟಿತ್. 1979 ಅಕ್ಟೋಬರ್ 7 ಲ್ ದೇಶಭಕ್ತ ಜಯಪ್ರಕಾಶ ನಾರಾಯಣ ಕ್ಲಾರ್ ಆಚಿ.

ದೇಶಾಭಿಮಾನ, ಸ್ವಾಭಿಮಾನ, ನಿಸ್ವಾರ್ಥತೆರ ಪಾಲ ಪಡಿಕಂಡು ಎಣ್ಣಕ ಜೆ.ಪಿ.ರ ಜೀವನಚರಿತ್ರನ ಓದೊಂಡು, ಪಡಿಕೊಂಡು, ಅನ್ನನೇ ನಡ್‌ಕೊಂಡು. □



## ಶಿವಾಜಿ

ಪುಟ್ನಾನ ದಿನ	- 1627ನೇ ಇಸವಿ
ಪುಟ್ನಾನ ಜಾಗ	- ಶಿವನೇರು ದುರ್ಗ, ಮಹಾರಾಷ್ಟ್ರ
ಅಪ್ಪ	- ಶಹಾಜಿ
ಅವ್ವ	- ಜೀಜಾಬಾಯಿ
ಕಣ್ಮರೆ	- 1680ನೇ ಇಸವಿ

ಸ್ವಾತಂತ್ರ್ಯ ಪೋರಾಟಕ್ಕೆ ಮೊಳಿ ಇಟ್ಟ ಮಹಾರಾಜ ಶಿವಾಜಿ. ಅಪ್ಪ ಶಹಾಜಿ ಬಿಜಾಪುರತರ ಮುಸ್ಲಿಂ ರಾಜಂಡ ಅಡಿಲ್ ಕೆಲಸ ಮಾಡುವ ಒರ್ ಸರದಾರನಾಯಿ ತಿಂಜತ್. ಅಯಿಂಗ ಜಾಸ್ತಿ ಪೊರಮೆಲೇ ಇಪ್ಪಯಿಂಜತ್. ಶಿವಾಜಿಕ್ ಗುರು ಆಯಿತೂ, ಪುರಡಾಯಿತೂ ನಿಂದವು ಅವ್ವೊ ಜೀಜಾಬಾಯಿ ಪಿಂಞ ಗುರು ದಾದಾಜಿಕೊಂಡದೇವ. ಶಿವಾಜಿ ಚೆರಿಯದಿಪ್ಪಕಲೇ, ಅವ್ವ ಜೀಜಾಬಾಯಿ ರಾಮಾಯಣ, ಮಹಾಭಾರತ, ಪುರಾಣತ್ ಬಪ್ಪನ್ನತ ಸುಮಾರ್ ಮಹಾ ವೀರಂಗಡ ಕತೆನೆಲ್ಲ ಎಣ್ಣುವಯಿಂಜತ್. ಅದ್ನ ಕೇಟಿತ್ ಶಿವಾಜಿ ನಾನೂ ಮಹಾವೀರನಾಂಡು, ಧರ್ಮವಂತನಾಂಡು ಎಣ್ಣಿಯಂಡ್ ಗೇನ ಮಾಡ್ಚಿ.

ಪೂನಾತರ ಸುತ್ತಮುತ್ತ ಉಳ್ಳ ಹಳ್ಳಿಯೇ ಶಿವಾಜಿರ ರಾಜ್ಯ ಆಚಿ. ಆ ರಾಜ್ಯಕ್ ಶಿವಾಜಿಯೇ ರಾಜ. ಅಕ್ಕ ಅವಂಗ್ ಪದನಾಲ್ ವಯಸ್ಸು. ಆ ಸಮಯತ್ ಅವಂಡ ಸೈನಿಕಂಗ ಪಕ್ಕತ ಹಳ್ಳಿರ ಒರ್ ಪಟೇಲನ ಕೈ ಕಾಲ್ ಕಟ್ಟಿತ್ ಬಲ್ಚಂಡ್


ಬಾತ್. ಈ ಕುಂಞಿರಾಜ ಚೆರಿಯ ಸಿಂಹಾಸನತ್ ಅಳಾತಿತ್. ಆ ದುಷ್ಟ ಪಟೇಲ ವಡಿಯ ಚಿತ್ತ ಒರ್ ಪೊಣ್ಣ್ ಕ್ ಹಿಂಸೆ ಮಾಡಿತಿಂಜತ್. ಪೊಣ್ಣಾಳ್ ಅಂವ್ಂಡೆ ಸಮಾನ ಆಯಿತ್ ಕಾಂಬಯಿಂಜ ಶಿವಾಜಿಕ್ ಎಲ್ಲಿಲ್ಲತ ಚೆಡಿ ಬಾತ್. ಅಂವೊನ ವಿಚಾರಣೆ ಮಾಡಿತಾಪದು ಅವಂಡ ತಪ್ಪ್ ರುಜುವಾತಾಚಿ. ಆ ದುಷ್ಟಂಗ್ ಈ ಕುಂಞಿರಾಜ ಎನ್ನತ ಶಿಕ್ವೆ ಕೊಡ್ಕೊಂದ್ ಜನ ಎಲ್ಲ ನೋಟಿಯಂಡಿಂಜತ್. ಇಚ್ಚಕ್ ಚೆರಿಯ ಕ್ಣಿ ಇಂವೊ ಎಂತ ನನ್ನ ವಿಚಾರಣೆ ಮಾಡುವೊಂದ್ ಪಟೇಲ ದರ್ಪತ್ ನಿಂದಿತಿಂಜತ್. ಅಪರಾಧಿರ ದಂಡೂ ಕೈಕಾಲ್ ನ ಕೆತ್ತಿ ಎಣ್ಣೆಯಂಡ್ ಆದೇಶ ಮಾಡ್ಚಿ ಶಿವಾಜಿ. ಹಳ್ಳಿರ ಜನಕೆಲ್ಲ ಕುಸಿಯಾಚಿ. ಈ ಕುಂಞಿರಾಜ ಎಚ್ಚಕ್ ನಿಷ್ಕಾವಂತ. ದುಷ್ಟಂಗಕ್ ಸೆರಿಯಾನ ಶಿಕ್ವೆ ಕೊಡ್ಪಕ್ ಅಂವೊ ಬೊತ್ತುಲೆ. ಅನ್ನನೇ ಬಡವಕೂ, ಕೈಲಾಗತಯಿಂಗಕೂ ಸಹಾಯ ಮಾಡುವ ಇಂವೊ ಬಲ್ಯಂವೊನಾನ ಹಿಂಞ ನಂಗಡ ದೇಶತ್ನೋ, ಧರ್ಮತ್ನೋ ಕಾಪಾಡುವನ್ನತ ಬಲ್ಯ ರಾಜನಾಪಾಂದ್ ಜನ ಎಲ್ಲ ತಕ್ ಪರಂದಂಡತ್.

ಒಮ್ಮೆ ಶಹಾಜಿ, ಶಿವಾಜಿನ ಬಿಜಾಪುರ ಸುಲ್ತಾನಂಡ ದರ್ಬಾರ್ ಕ್ ಕೂಟಿಯಂಡ್ ಪೋಯಿತಿಂಜತ್. ಸುಲ್ತಾನಂಗ್ ಶಹಾಜಿ ಮೂಂದ್ ಕುರಿ ನೆಲ ತೊಟ್ಟಿತ್ ಸಲಾಂ ಇಟ್ಟಿತ್. ಇದ್ ಪ್ರತಿ ಮುಸ್ಲಿಂ ರಾಜಂಡ ದರ್ಬಾರ್ ನೇಮ ಆಯಿತಿಂಜತ್. ಮೋಂವೊಂಗೂ ಅನ್ನನೇ ಮಾಡುವಕೆಣ್ಣೆ ಚಿ. ಆಚೇಂಗಿ ಶಿವಾಜಿ ದಂಡ್ ಮೊಟ್ಟ್ ಬಯ್ಯಕ್ ನಿಂದಿತ್, ಮಂಡೆನ ಕೊಡಿಕೆಡ್ ನಿಂದತ್. ನಂಗಡ ದೇಶತ್, ನಂಗಡ ಧರ್ಮತ್ ರಡಿಲ್ ಆಶ್ರಯ ಪಡಂದ್ ನಿಂದ ಬೋರೆ ರಾಜಂಗ್ ನಾನ್ ಮಂಡೆ ಬಗ್ಗೆ ಚಿಡುಲೆ ಎಣ್ಣವದ್ ಶಿವಾಜಿರ ತೀರ್ಮಾನ ಆಯಿತಿಂಜತ್. ಅನ್ನನೇ ನಮಸ್ಕಾರ ಸಹ ಮಾಡತೆ, ದರ್ಬಾರ್ಂಜ ವಾಪಾಸ್ ಬಾತ್. ಅಂದಾಕಣೆ ದಾರೂ ಅನ್ನನೇ ಮಾಡಿತಿಂಜಿಲೆ. ಅದೇ ಚೆಡಿಲ್ ಬಂದಂಡಿಪ್ಪಕ, ಬಟ್ಟೆಲ್ ಒಬ್ಬೊ ಕಸಾಯಿಖಾನೆಕಾರ ಒರ್ ಪಯ್ಯನ ಕೆತ್ತುವಕ್ ಕತ್ತಿ ಕೊಡಿಕೆಡ್ ತಿತಿಂಜತ್. ಅದನ್ ಕಂಡದೇ ಶಿವಾಜಿ ತಾಂಡ ಕತ್ತಿಲ್ ಆ ಕೆತ್ತಕಾರಂಡ ಕೈನ ಕೆತ್ತಿರತ್. ಇದನ್ನೆಲ್ಲ ಕಂಡ ಶಹಾಜಿಕ್ ಮೋಂವೊಂಡ ಮೇಲೆ ಚೆಡಿ ಬಂದ್ಲೆ. ನಾಕಂತೂ ಸ್ವತಂತ್ರ ರಾಜ ಆಪ ಕಯಿಂಜಿಲೆ. ನಾಡ ಮೋಂವೊನಾಚೇಂಗೂ ಸತ್ಯ, ಧರ್ಮ, ನ್ಯಾಯ, ನೀತಿ ಕಾಪಾಡುವನ್ನತ ದೇಶಭಕ್ತ ರಾಜನಾಡೆಂದ್ ಆಶೀರ್ವಾದ ಮಾಡಿತ್, ಪೂನಾಕ್ ಬಯ್ಯಕ್ ಆಯೆಚತ್. ಅಲ್ಲಿಂಜ ವಾಪಾಸ್ ಬಂದ ಹಿಂಞ ಚೆರಿಯ ಬಯತ್ ಶಿವಾಜಿ, ಬಿಜಾಪುರ ಸುಲ್ತಾನಂಗ್ ಕೊಡ್ನ ಸುಮಾರ್ ಕೋಟೆನೆಲ್ಲ ಗೆದ್ದಂಡತ್. ಮುಸಲ್ಮಾನ ರಾಜಂಗಕೆಲ್ಲ ಒರ್ ಮಂಡೆ ನೊಂಬಲ ಆಯಿತಿಂಜತ್ ಶಿವಾಜಿ. ಶೂರನೂ, ಧೀರನೂ, ಕೂಟ್ ಕ್ ಬುದ್ಧಿವಂತನೂ ಆನ ಶಿವಾಜಿ ಶತ್ರುರ

ಕೈಲ್ ಕೆಣ್ಣೆಂಬಕಲೂ ದಾಟಿತ್ ಬಂದ್‌ರುವಯಿಂಜತ್. ಆದ್‌ಂಗಾಯಿತ್ ಶಿವಾಜಿಕ್ "ಕುಂದ್‌ರ ಎಲಿ" ಎಣ್ಣಿಯಂಡ್ ಪೆದ ಬಾತ್.

ಒಮ್ಮ ಔರಂಗಜೇಬಂಡ ದರ್ಬಾರ್‌ಕ್ ಡೆಲ್ಲಿಕ್ ಪೋನ ಶಿವಾಜಿ ಪಿಂಞ ಅಂವೊಂಡ ಮೋಂವೊ ಸಾಂಬಾಜಿನ ಔರಂಗಜೇಬ ಕೆಣಿಲ್ ಅಲ್ಲಿಯೇ ಗೃಹಬಂಧನತ್ ಬೆಚ್ಚತ್. ಆ ಸಂದರ್ಭತ್ ಶಿವಾಜಿ ಸೌಖ್ಯ ಇಲ್ಲತನ್ನನೆ, ಮನ್‌ಸ್ ಸೆರಿಯಿಲ್ಲತನ್ನನೆ ನಾಟಕ ಮಾಡಿತ್, ಕಾಯಿಲ ವಾಸಿ ಆಚೇಂಗಿ, ಬಡವಕ್, ಭಿಕ್ಷುಕಂಗಕ್ ಪಣ್ಣ್ ತಿಂಡಿ ಎಲ್ಲ ಕೊಡ್‌ಪೀಂದ್ ಪರಕೆ ಮಾಡಿಯಂಡಿಯೆಂದ್ ಎಲ್ಲಲ್ಲಿಯೂ ವಿಷಯ ಪಬ್ಬಾಚಿಟ್ಟತ್. ಇದ್ ಬಲ್ಯ ವಿಷಯಾಂದ್ ರಾಜಂಗ್ ತೊಂದ್‌ಲೆ. ನಾಪದ್ ದಿನ ಎಕ್ಕೊಲು ಶಿವಾಜಿ ಇಂಜ ಅರಮನೆಯಿಂಜ ಸುಮಾರ್ ಬಲ್ಯ ಬಲ್ಯ ಕುಕ್ಕೆಲ್ ಆಳ ಪಣ್ಣ್‌ಫಲ ಪೊರ್‌ತಂಡ್ ಪೋಯಿತ್ ಮಸೀದಿರ ಪೊರ್‌ಮೆ, ದೇವಸ್ಥಾನತ್‌ರ ಪೊರ್‌ಮೆ ಅಳಾತಿಪ್ಪ ಭಿಕ್ಷುಕಂಗಕ್ ಕೊಡ್‌ಪಯಿಂಜತ್. ಪಾರಕಾರ ಎಕ್ಕೊಲು ಕುಕ್ಕೆನ ಪರೀಕ್ಷೆ ಮಾಡುವಯಿಂಜತ್. ಬಯ್ಯ ಬಯ್ಯಂಜಿ ಪಣ್ಣ್ ಫಲ, ಪುಟ್ತ್ ತಿಂಡಿ ದುಂಬಾನ ಕುಕ್ಕೆನ ಎಕ್ಕೊಲು ಎಂತ ನೋಟುವೊಂದ್ ಗೇನ ಮಾಡಿತ್ ಅನ್ನನೇ ಬುಡ್‌ವಕ್ ಸುರು ಮಾಡ್‌ಚಿ. ಅಂತದೇ ಒರ್ ದಿನ, ದಂಡ್ ಕುಕ್ಕೆಲ್ ಶಿವಾಜಿಯೂ, ಸಾಂಬಾಜಿಯೂ ಅಳಾತಂಡತ್. ಅಯಿಂಡ ಮೇಲೆ ಪಣ್ಣ್ ದುಂಬಾಚಿಟ್ಟತ್ ಬೆಚ್ಚತ್. ಪಾರಕಾರ ನೋಟುವಕ ಪಣ್ಣ್ ಇಂಜತ್. ಶಿವಾಜಿ ಮೋಂವೊನ ಕೂಟಿಯಂಡ್ ವೇಷ ಮಾತಿಯಂಡ್ ಭಾರೀ ಕಷ್ಟತ್ ಮಹಾರಾಷ್ಟ್ರಕ್ ಬಂದೆತ್‌ಚಿ. ಅಚ್ಚಕ್ ಪಾರಕಾರ ಇಂಜಿತೂ, ತಪ್ಪಾಚಿಟ್ಟಂಡ್ ಪೋನ ಶಿವಾಜಿರ ವಿಷಯತ್ ಔರಂಗಜೇಬಂಗ್ ಆಶ್ಚರ್ಯ ಆಚಿ. ಇನ್ನತ ಶಿವಾಜಿರ ದೇಶಭಕ್ತಿ ಸಾವರ್ಕರ್‌ರನ್ನತ ದೇಶಭಕ್ತಂಗಕೂ ಪುರ್‌ಡಾರ ಕತೆ ಆಚಿ. ಮರಾಠ ರಾಜ್ಯ ಸ್ಥಾಪನೆ ಮಾಡ್‌ನ ಶಿವಾಜಿಕ್ "ಭತ್ತಪತಿ" ಎಣ್ಣವ ಬಿರ್‌ದ್ ಕ್‌ಟ್‌ಚಿ.

ಎಚ್ಚಕೇ ಬಲ್ಯ ಉದ್ಯೋಗಕ್ ಪೋಚೇಂಗಿಯೂ, ದೇಶಭಕ್ತಿ, ದೇಶಾಭಿಮಾನ ಬುಡುವಕಾಗ. ಇದೇ ಶಿವಾಜಿರ ಸಂದೇಶ. □




## ಕುವೆಂಪು (ಡಾ| ಕೆ. ವಿ. ಪುಟ್ಟಪ್ಪ)

ಪುಟ್ಟಾನ ದಿನ	- 1904ನೇ ಇಸವಿ ಡಿಸೆಂಬರ್ 29
ಪುಟ್ಟಾನ ಜಾಗ	- ಕುಪ್ಪಳಿ, ತೀರ್ಥಹಳ್ಳಿ ತಾಲೂಕ್, ಕರ್ನಾಟಕ
ಅಪ್ಪ	- ವೆಂಕಟಪ್ಪ
ಅಮ್ಮ	- ಸೀತಮ್ಮ
ಕಣ್ಣರೆ	-

ಸ್ಕೂಲ್‌ನ ಪೋಪದೇ ಕಷ್ಟ ಆಯಿತಿಂಜ ಕಾಲತ್, ಮಣತೊರ್ ಮೇಲೆ, ಸ್ಲೇಟ್‌ಲ್ ಅಕ್ಷರಾಭ್ಯಾಸ ಮಾಡುವಯಿಂಜದೇ ಎಳ್ತ ಆಯಿತಿಂಜತ್. ಮನೆಲ್ ನಡಪಯಿಂಜ ರಾಮಾಯಣ, ಮಹಾಭಾರತ, ಭಾಗವತ ಓದಲ್ ಕುವೆಂಪುರ ಮನ್‌ಸಾರ ಮೇಲೆ ನಲ್ ಪ್ರಭಾವ ಕಾಟ್‌ಚಿ. ಪ್ರೈಮರಿ ಶಿಕ್ಷಣ ತೀರ್ಥಹಳ್ಳಿಲ್ ಆಪದು, 1918 ಲ್ ಮೈಸೂರ್‌ಲ್ ಹೈಸ್ಕೂಲ್‌ಕ್ ಕೂಡ್‌ಚಿ. ಅಕ್ಕಲೇ ಸಾಹಿತ್ಯ ವಿಷಯತ್ ಆಸಕ್ತಿ ಬೊಳ್‌ತಿಯಂಡ ಪುಟ್ಟಪ್ಪ, ಇಂಗ್ಲಿಷ್ ಕವಿಯಳಾನ ವರ್ಡ್‌ಸವರ್ತ್, ಷೆಲ್ಲಿರನ್ನತ ಕವಿಯಡ ಸುಮಾರೆಲ್ ಪುಸ್ತಕ ಓದಿತಿಂಜತ್. 1922 ಲ್ ತಾಂಡ ಪದಾನೆಟ್ಟನೆ ಬಯತ್‌ಲ್ "ಬಿಗಿನರ್ಸ್ ಮ್ಯೂಸ್" ಎಣ್ಣುವ ಇಂಗ್ಲಿಷ್ ಕವನ ಸಂಕಲನ ಆದ್ಯವಾಯಿತ್ ಬುಡ್‌ಗಡೆ ಮಾಡ್‌ಚಿ. ಇಂಗ್ಲಿಷ್‌ಲೇ ಎಳ್‌ದಿಯಂಡಿಂಜ ಪುಟ್ಟಪ್ಪಂಗ್ ಒಮ್ಮ, ಶ್ರೀರಂಗಪಟ್ಟಣಕ್ ಬಂದಿತಿಂಜ ಐರಿಷ್ ಕವಿ ಜೆ. ಹೆಚ್. ಕಸಿನ್ಸ್ ಎಣ್ಣುವಂವೊ ಕನ್ನಡತ್ ಎಳ್‌ದುವಕ್ ಎಣ್ಣ್‌ಚಿ.

ಅಕ್ಕ ಪುಟ್ಟಪ್ಪ, ಕನ್ನಡ ಭಾಷೆಗೆ ಇಂಗ್ಲಿಷ್‌ರನೆಕೆ ಭಾವನೆ ಕಾಟುವ ಸಾಮರ್ಥ್ಯ ಉಂಡಾಂದ್ ಕೇಟತ್. ಅಕ್ಕ ಕಸಿನ್ಸ್ ಎಣ್ಣೆಚಿ, ಪ್ರತಿ ಒರ್ ಭಾಷೆಕೂ ಅದಾಂಡದೇ ಆನನ್ನತ ವಿಶೇಷತೆ ಇಪ್ಪ. ಒರ್ ಭಾಷೆ ಇಂಗ್ಲಿಷ್‌ಲರ್ ಭಾಷೆಕಿಂಜ ಕೇಳ್ ಮೇಲಾಂದ್ ಇಲ್ಲೆ. ಪ್ರತಿಭಾವಂತಂಗ ಏದ್ ಭಾಷೆನ ಬೊಳಾತ್‌ಚೇಂಗೂ ಅದ್ ಬೊಳಿವ ಎಣ್ಣೆನ ತಕ್ಕ ಕುವೆಂಪುರ ಮನಸ್‌ಲ್ ನಿಂದತ್. ಅಲ್ಲಿಂಜ ಕನ್ನಡತೇ ಸಾಹಿತ್ಯ ರಚನೆ ಮಾಡುವಕ್ ಸುರು ಮಾಡ್‌ಚಿ. ತಾನ್ ಓದ್‌ನ ಮಹಾರಾಜ ಕಾಲೇಜ್‌ಲೇ ಉಪಾದ್ರಿಯಾಯಿತ್ ಕೂಡಿತ್, ಉಪನ್ಯಾಸಕನಾಯಿತ್, ಪ್ರಿನ್ಸಿಪಾಲ್ ಆಯಿತ್, 1956 ಲಿಂಜ 1960 ಕೆತ್ತನೆ ಮೈಸೂರ್ ವಿಶ್ವವಿದ್ಯಾಲಯತ್‌ರ ಕುಲಪತಿ ಆಯಿತಿಂಜತ್. ಅಕ್ಕ ಮೈಸೂರು ವಿಶ್ವವಿದ್ಯಾಲಯತ್ ಭೋದನಾಂಗ, ಪ್ರಸಾರಾಂಗ, ಸಂಶೋಧನಾಂಗ ಎಣ್ಣುವ ಮೂಂದ್ ವಿಭಾಗಕ್ “ಮಾನಸ ಗಂಗೋತ್ರಿ” ಎಣ್ಣುವ ವಿದ್ಯಾಕೇಂದ್ರ ಸ್ಥಾಪನೆ ಮಾಡ್‌ಚಿ. ಪಿ.ಯು.ಸಿ. ಲ್ ಕನ್ನಡ ಮಾಧ್ಯಮತ್‌ನ ಆದ್ಯತ್‌ಲ್ ಸುರು ಮಾಡ್‌ಚಿ. 1960 ಲ್ ನಿವೃತ್ತಿಯಾನ ಪಿಂಞ ಸಾಹಿತ್ಯ ಸೃಷ್ಟಿಕಾಯಿತೇ ಬದ್‌ಕನ ತೇಚತ್.

ಕುವೆಂಪು ಲೆಕ್ಕ ಇಲ್ಲತಚ್ಚಕ್ ಕವನ ಸಂಕಲನ, ನಾಟಕ, ಕಾದಂಬರಿ ಎಲ್ಲ ಎಳಾದಿತ್. ಸುಮಾರೆಲ್ಲ ಮಕ್ಕಡ ಕವನ, ನಾಟಕ ಎಳಾದಿತ್. ‘ನೆನಪಿನ ದೋಣಿ’ ಎಣ್ಣುವ ಆತ್ಮಚರಿತ್ರೆ ಎಳಾದಿತ್. “ಮಲೆಗಳಲ್ಲಿ ಮದುಮಗಳು” ಪಿಂಞ “ಕಾನೂರು ಸುಬ್ಬಮ್ಮ ಹೆಗ್ಗಡತಿ” ಎಣ್ಣುವ ದಂಡ್ ಬಲ್ಯ ಕಾದಂಬರಿ ದುಂಬ ಪೆದ ಪೋನದ್. ಕುವೆಂಪುಕ್ ಬಂದ ಪ್ರಶಸ್ತಿ ಲೆಕ್ಕ ಇಲ್ಲತಚ್ಚಕ್. ಮೈಸೂರ್, ಬೆಂಗಳೂರ್, ಕರ್ನಾಟಕ, ಗುಲ್ಬರ್ಗಾ, ಕಾನ್ಪುರ ಪಿಂಞ ಅಮೆರಿಕಾತ್‌ರ “ವರ್ಲ್ಡ್ ಅಕಾಡೆಮಿ ಆಫ್ ಆರ್ಟ್ಸ್ ಅಂಡ್ ಕಲ್ಚರ್” ಇನ್ನತ ವಿಶ್ವವಿದ್ಯಾಲಯ ಗೌರವ ಡಾಕ್ಟರೇಟ್ ಕೊಡ್‌ತಿತ್. 1955 ಲ್ “ಶ್ರೀ ರಾಮಾಯಣ ದರ್ಶನಂ” ಎಣ್ಣುವ ಕೃತಿಕ್ ಕೇಂದ್ರ ಸಾಹಿತ್ಯ ಅಕಾಡೆಮಿ ಪ್ರಶಸ್ತಿ ಕೊಟ್‌ಚಿ. ಬಯ್ಯಂಜಿ 1968 ಲ್ ಅದೇ ಕೃತಿಕ್ ಜ್ಞಾನಪೀಠವೂ, 1988 ಲ್ ಪಂಪ ಪ್ರಶಸ್ತಿಯೂ ಕೊಟ್‌ಚಿ. 1958 ಲ್ ಪದ್ಮಭೂಷಣ, 1992 ಲ್ ಕರ್ನಾಟಕ ರತ್ನ, 1964 ಲ್ “ರಾಷ್ಟ್ರಕವಿ” ಬಿರ್‌ದ್, 1979 ಲ್ ಕೇಂದ್ರ ಸಾಹಿತ್ಯ ಅಕಾಡೆಮಿರ “ಫೆಲೋಶಿಪ್” ಕೊಟ್‌ಚಿ. □



## ಮೈಕೆಲ್ ಫ್ಯಾರಡೆ

- ಪುಟ್ಟನ ದಿನ - 1791ನೇ ಇಸವಿ, ಸೆಪ್ಟೆಂಬರ್ 22  
 ಪುಟ್ಟನ ಜಾಗ - ಲಂಡನ್ ನಗರ, ಇಂಗ್ಲೆಂಡ್ ದೇಶ  
 ಅಪ್ಪ - ಜೇಮ್ಸ್ ಫ್ಯಾರಡೆ  
 ಅಮ್ಮ - ಮಾರ್ಗರೆಟ್ ಹ್ಯಾಸ್‌ವೆಲ್  
 ಕಣ್ಮರೆ - 1867ನೇ ಇಸವಿ, ಆಗಸ್ಟ್ 25

ಇಿಯಂಗಡ ಕುಟುಂಬ ಕೊಲ್ಲಂಗ (Blacksmith) ಆಯಿತಿಂಜತ್. ಮನೆಲ್ ಪಣಕ್ ಬಡತನ ಇಂಜಕಲೂ, ಸಂಸ್ಕಾರತ್ ಬಡತನ ಇಂಜಿಲೆ. ಗುಣವಂತಂಗಲಾನ ಅಪ್ಪವ್ವಂಡ ಪ್ರೀತಿರ ಮಕ್ಕಳಾಯಿತ್ ಬೊಳಂದತ್. ಬಡತನ ಇಂಜಾನಗುಂಡ್ ಫ್ಯಾರಡೆಕ್ ನಲ್ಲ ಸ್ಕೂಲ್‌ಲ್ ವಿದ್ಯಾಭ್ಯಾಸ ಕಾಟ್ಲೆ; ಪ್ರಾಥಮಿಕ ಶಿಕ್ಷಣ ಮಾತ್ರ ಆಚಿ. ಓದುವಕ್, ಎಳೆದುವಕ್, ಚೆನ್ನೆ ಲೆಕ್ಕ ಮಾಡುವಕ್ ಪಡ್‌ಚಿತಿಂಜತ್.

ಅಣ್ಣ ಕೊಲ್ಲಂಡ ಕೆಲಸ ಸುರು ಮಾಡ್‌ಚಿ. ಪದ್‌ನಾಲ್ ಬಯತ್‌ರ ಫ್ಯಾರಡೆಕ್ ಮನೆರ ಬಡತನಕ್ ಸಹಾಯ ಮಾಡೊಂಡೊಂದಾಚಿ. ಒರ್ ಪುಸ್ತಕ ಅಂಗಡಿಲ್ ಕೆಲಸ ಮಾಡುವಕ್ ಸುರು ಮಾಡ್‌ಚಿ. ಚಂದಾದಾರಕೆಲ್ಲ ಪತ್ರಿಕೆ ಕೊಡ್‌ಪಯಿಂಜತ್. ಅವಂಡ ನಲ್ಲ ಸ್ವಭಾವ, ನಲ್ಲ ಕೆಲಸ ನೋಟಿತ್ ಅಂಗಡಿರ ಯಜಮಾನ ಫ್ಯಾರಡೆಕ್ ಪುಸ್ತಕಕ್ ಬೈಂಡ್ ಮಾಡುವದೂ, ಪೊಲ್ಲುವದೂ ಪಡ್‌ಪ್‌ಚಿಟ್ಟತ್. ಇದೊಲಿಂಜ

ಫ್ಯಾರಡೆಕ್ ಭಾರೀ ಅನುಕೂಲ ಆಚಿ. ಬೈಂಡ್ ಮಾಡುವಕ್ ಕ್ವಾಟ್ನ ಪುಸ್ತಕತ್‌ನ ಬೈಂಡ್ ಮಾಡಿತಾನದು ಓದುವಯಿಂಜತ್. "ಆರೆಬಿಯನ್ ನೈಟ್ಸ್" ಪುಸ್ತಕ ಓದ್‌ಚಿ.

ಒಮ್ಮೆ ಒರ್ ರಸಾಯನ ಶಾಸ್ತ್ರತರ ಪುಸ್ತಕ ಬೈಂಡ್ ಇಡುವಕ್ ಬಾತ್. ಅದ್‌ನ ಓದಿತಾಪದು ಸುಲಭತ್ ಅರ್ಥ ಆಚಿ. ಆ ಸಮಯತ್ ಪುದಿಯದಾಯಿತ್ ಕಂಡ್‌ಪುಡ್‌ಚಿತಿಂಜ ಕರೆಂಟ್‌ರ ವಿಷಯವೇ ಎಲ್ಲಲ್ಲಿಯೂ ಸುದ್ದಿಯಾಯಿತಿಂಜತ್. ಅದ್‌ಂಡ ವಿಷಯತ್ ಕ್ವಾಟ್ನ ಪುಸ್ತಕ ಎಲ್ಲ ಓದಿತ್ ಅರ್ಥ ಮಾಡಿಯಂಡತ್. ಅದ್‌ಲ್ ಉಳ್ಳನೆಕೇ ಪ್ರಯೋಗ ಮಾಡಂಡೂಂದ್ ಆಸೆ ಆಚಿ. ಮನೆಲ್ ಚೆರಿಯ ಚೆರಿಯ ಪ್ರಯೋಗ ಕೂಡ ಮಾಡ್‌ಚಿ. ಅದ್‌ಂಡ ವಿಷಯ ಸಿನೇತಂಗಡ ಕೂಡ ಚರ್ಚಿ ಮಾಡುವಯಿಂಜತ್. ಅಂಗಡಿರ ಕೆಲಸತ್ ಸೋಮಾರಿತನ ಮಾಡತಾನಗುಂಡ್ ಅವೊ ಓದಿಯಂಡಿಂಜಕಲೂ, ಯಜಮಾನ ಬಯ್ಯುವಯಿಂಜಿಲೆ.

ಅಕ್ಟೋಬರ್ ಅಂವೊಂಡ ಅಪ್ಪ ಚಿತ್ತಿತ್, ಅಯಿಂಗಡ ಬಡತನ ಇಂಞಚ್ಚಕ್ ಜಾಸ್ತಿ ಆಚಿ. ಅನ್ನತ ಪರಿಸ್ಥಿತಿಲ್ ಒಮ್ಮೆ ಒರ್ ವಿಜ್ಞಾನಿರ ಭಾಷಣ ಇಂಜತ್. ಅದ್‌ನ ಕೇಪಕ್ ಪೋಂಡೂಂದ್ ಫ್ಯಾರಡೆಕ್ ಆಸೆ. ಆಚೀಂಗಿ, ಟಿಕೇಟ್ ಎಡ್‌ಪಕ್ ದುಡ್ಡಿಯಿಂಜಿಲೆ. ಬೊತ್ತಿಯಂಡ್ ಬೊತ್ತಿಯಂಡ್ ಅಣ್ಣನ ದುಡ್ಡ್ ಕೇಟತ್. ತಮ್ಮಣಂಡ ಮೇಲೆ ದುಂಬ ಪ್ರೀತಿ ಇಂಜ ಅಣ್ಣ ಮನೆಲ್ ಕಷ್ಟ ಇಂಜಕಲೂ, ದುಡ್ಡ್ ಕೂಟಿತ್ ಕೊಡ್‌ತತ್. ಅಲ್ಲಿ ಭಾಷಣ ಮಾಡ್‌ನಾನ ಒರ್ ಕೆಮಿಲ್ ಕೇಟಿತ್, ಇಂಞೋರ್ ಕೆಮಿಲ್ ಬುಡತೆ, ಮುಖ್ಯ ವಿಷಯ ಟಿಪ್ಪಣಿ ಎಳ್‌ದಿಯಂಡ್ ಬಂದಿತ್, ಚಿತ್ರ ಸಮೇತ ವಿವರಣೆ ಎಳ್‌ದಿತ್ ಬೆಪ್ಪಯಿಂಜತ್. ವಿಜ್ಞಾನ ಪಡಿಪವಂಗ್ ಚಾಯಿಲ್ ಚಿತ್ರ ಬುಡ್‌ತುವಕ್ ಗೊತ್ತಿರಂಡೂಂದ್ ಅರ್‌ಂಜ ಫ್ಯಾರಡೆ ಅವೊ ಕೆಲಸತ್ ಇಂಜ ಅಂಗಡಿರ ಪಕ್ಕತ್ ಒರ್ ಚಿತ್ರಕಾರಂಡ ಕೈಲ್ ಚಿತ್ರ ಬುಡ್‌ತುವಕ್ ಪಡ್‌ಚಂಡತ್. ಆಚೀಂಗಿ, ಅವಂಗ್ ಫೀಸ್ ಕೊಡ್‌ಪಕ್ ದುಡ್ಡ್ ಇಂಜಿಲೆ. ಅದ್‌ಂಗಾಯಿತ್ ಎಕ್ಕೊಲು ಅವಂಡ ರೂಂನ ಚಾಯಿಲ್ ಒಡ್‌ಕಿತ್ ಕ್ಲೀನ್ ಮಾಡುವಯಿಂಜತ್. ಇನ್ನನೆ ಟಾಟಮ್‌ರ ಭಾಷಣಕ್ ಪೋನಲ್ಲಿ ನಲ್ಲ ನಲ್ಲ ಸಿನೇತಕಾರಳ ಕ್ವಾಟ್‌ಚಿ. ಇನ್ನತಯಿಂಗಡ ಕೂಡ ಕೂಡಿತ್ ಕಾಡ್‌ಹರಟೆ ಮಾಡತೆ, ವಿಜ್ಞಾನತರ ವಿಷಯ ಚರ್ಚಿ ಮಾಡುವಯಿಂಜಾನಗುಂಡ್, ಜ್ಞಾನ, ಅನುಭವ ಜಾಸ್ತಿಯಾಚಿ. ಪುಸ್ತಕ ಪೊಲ್ಲುವಕ್ ಚಾಯಿಲ್ ಪಡ್‌ಚಿತಿಂಜತ್. ಅಕ್ಟೋಬರ್ ಸುಮಾರ್ ಓದಿತಿಂಜತ್. ಅನ್ನನೇ ಒಮ್ಮೆ ಡೇವಿ ಎಣ್ಣುವ ಒರ್ ವಿಜ್ಞಾನಿರ ಭಾಷಣ ಇಂಜತ್. ಸಿನೇತಂಡ ಕೈಲ್ ದುಡ್ಡ್ ಕೇಟಂಡ್, ವಿಜ್ಞಾನಿರ ಪ್ರತೀ ಭಾಷಣಕೂ ಪೋಯಿತ್ ಬಂದಿತ್ ಚಿತ್ರ ಸಮೇತ ಎಳ್‌ದ್‌ನ ಲೇಖನ



ಮುನ್ನೂಯಿಟ ಎಂಬತ್ತಾರ್ ಪಾಳೆರ ಪುಸ್ತಕ ಆಚಿ. ಅದ್‌ನ ಪೊಂದಿತ್ ಬೈಂಡ್ ಮಾಡಿತ್ ಬೆಚ್ಚತ್.

ಆ ಅಂಗಡಿ ಬುಟ್ಟಿತ್ ಇಂಇಸೋರ್ ಅಂಗಡಿಕ್ ಕೂಡ್‌ಚಿ. ಆಚೇಂಗಿ ಸಮಾಧಾನ ಆಯಿಲೆ. ವಿಜ್ಞಾನ ಪಡಿಪಕ್ ಅವಕಾಶ ಉಳ್ಳ ಜಾಗತ್ ಕೆಲಸಕ್ ಕೂಡಂಡೂಂದ್ ಪ್ರಯತ್ನ ಪಟ್ಟಿಂಡೇ ಇಂಜತ್. ಒಮ್ಮೆ ತಾನ್ ಡೇವಿರ ಭಾಷಣಾತ್‌ರ ವಿವರ ಎಳ್‌ದ್‌ನ ಪುಸ್ತಕ ಎಡ್‌ತಂಡ್, ಡೇವಿರ ಪಕ್ಕ ಪೋಯಿತ್ ಕೊಡ್‌ತತ್. ಅದ್‌ನ ನೋಟಿತ್ ಕುಸಿಪಟ್ಟಿ ಡೇವಿ, ಅವಂಡ ಪ್ರಯೋಗಶಾಲೆಲ್ ಕೆಲಸ ಕೊಡ್‌ತತ್. ಡೇವಿ ಯುರೋಪ್, ಏಷ್ಯಾ ದೇಶಕ್ಕೆಲ್ಲ ಪ್ರವಾಸಕ್ ಪೋಪಕ್, ಫ್ಯಾರಡೆನ ಕಾಕಿಯಂಡ್ ಪೋಚಿ. ಸುಮಾರ್ ಸಂಶೋಧನೆ ಮಾಡ್‌ಚಿ. ಟ್ರಾನ್ಸ್‌ಫಾರ್ಮರ್ ಕಂಡ್ ಪುಡ್‌ಚತ್. ಲೋಕಕ್ ಉಪಕಾರ ಆಚಿ. ಫ್ಯಾರಡೆರ ನಿಯಮ ಎಣ್ಣೆತ್ ಕರೆಂಟ್‌ರ ವಿಷಯತ್ ಪ್ರಪಂಚಕೇ ಉಪಯೋಗ ಆಪನೆಕೆ ನಿಯಮ ಮಾಡ್‌ಚಿ. ಬೋರೆ ಬೋರೆ ಫ್ಯಾಕ್ಟರಿಕೆಲ್ಲ ಸಲಹೆಕಾರನಾಯಿತಿಂಜತ್. ದುಡ್ಡ್‌ಕ್ ತೊಂದರೆ ಇಂಜಿಲೆ. ಆಚೇಂಗೂ ಸರಳ ಜೀವನ ನಡ್‌ತಿಯಂಡ್, ದುಡ್ಡ್‌ನ ಅವಶ್ಯಕತೆ ಉಳ್ಳಯಿಂಗಕ್ ದಾನ ಮಾಡುವಯಿಂಜತ್. ಅದ್‌ನ ದಾರ್‌ಕೂ ಗೊತ್ತ್ ಮಾಡತನೆಕೆ ಇಪ್ಪಯಿಂಜತ್. ಚೆನ್ನಂಗೂ ವಿಶ್ರಾಂತಿ ಇಲ್ಲತೆ ನಯಿಚಾಂಗ್, ಐಂಬದನೆ ಬಯತ್‌ಲೆ ನೆರುರ ಕಾಯಿಲ ಬಾತ್. ಆಚೇಂಗಿಯೂ ಸಂಶೋಧನೆ ನಿಪ್ಪಾಚಿಟ್ವೆಲೆ. ಅಲ್ಲಿಂಜ ಮರ್‌ಪು ಜಾಸ್ತಿಯಾಯಿತ್, ಎಲ್ಲ ಕೆಲಸಕೂ ರಾಜೀನಾಮೆ ಕೊಡ್‌ಕಂಡಿ ಯಾಚಿ. ತಾಂಡ ಎಳ್‌ವತ್ತಾರನೇ ಬಯತ್‌ಲ್ ಫ್ಯಾರಡೆ ಮರಣಪಟ್ಟಿತ್.

ಮನ್‌ಸ್ಸ್ ಮಾಡ್‌ಚೇಂಗಿ ಸಾಧನೆಕ್ ನೂರ್ ಬಟ್ಟೆ ಕಾಂಬ. ಕೂಟ್‌ಕಾರಡ ವಿಷಯತೂ ಅಚ್ಚಿಕೇ ಎಚ್ಚರ ಇರಂಡು. ನಲ್ಲ ಸಿನೇತಂಗಡ ಸಹವಾಸ ಮಾಡಿತ್, ನಲ್ಲ ಅಭ್ಯಾಸ ಬೊಳ್‌ತಿಯಂಡ್, ಸಮಾಜಕೂ, ಲೋಕಕೂ ನಲ್ಲದಾಪನ್ನತ ಕೆಲಸ ಮಾಡಂಡು. ಇದೇ ಫ್ಯಾರಡೆರ ಜೀವನತ್‌ರ ಸಂದೇಶ. □



## ಆಲ್ಬರ್ಟ್ ಐನ್‌ಸ್ಟೈನ್

- ಪುಟ್ಟನ ದಿನ - 1879ನೇ ಇಸವಿ, ಮಾರ್ಚ್ 14  
 ಪುಟ್ಟನ ಜಾಗ - ಉಲ್ಮ್, ಜರ್ಮನಿ ದೇಶ  
 ಅಪ್ಪ - ಹರ್ಮನ್ ಐನ್‌ಸ್ಟೈನ್  
 ಅಮ್ಮ - ಪಾಲಿನ್  
 ಕಣ್ಮರೆ - 1955ನೇ ಇಸವಿ, ಏಪ್ರಿಲ್ 18

ಐನ್‌ಸ್ಟೈನ್ ಒರ್ ಸಾಮಾನ್ಯ ವಿದ್ಯಾರ್ಥಿ ಆಯಿತ್ತಿಂಜತ್. ಇಗಾಣ ಸ್ವಭಾವ ಇಂಜಾಂಗ್ ಜಾಸ್ತಿ ತಕ್ಕ ಪರವಯಿಂಜಿಲೆ. ಅಪ್ಪ ಅಮ್ಮಂಗ್ ಮೋಂವೊ ಬಾಯಿ ಬರತಂವೊ ಆಯಿರುವ ಎಣ್ಣೆಯಂಡ್ ಪೋಡಿ ಆಪಯಿಂಜತ್. ಚೆರಿಯತಿಪ್ಪಕ ದಾರ್ನ ಕಾಂಗಡ್, ಎಂತದೇ ವಸ್ತುನ ನೋಟಡ್, ಅದ್ಂಡ ವಿಷಯತ್ ದುಂಬ ಪ್ರಶ್ನೆ ಕೇಪಯಿಂಜತ್. ಅವಂಡ ಪ್ರಶ್ನೆಕ್ ಜನಕ್ ಸುಸ್ತಾಪಯಿಂಜತ್. ಅಕ್ಕ ಜರ್ಮನಿರ ಬಿಸ್ಕಾರ್ಕರ ಆಡಳಿತ ಇಂಜತ್. ಸ್ಕೂಲ್‌ಲ್ ಮಿಲಿಟರಿ ವಾತಾವರಣ ಇಪ್ಪಯಿಂಜತ್. ಉಪಾದ್ರಿಯ ವಿದ್ಯಾರ್ಥಿಯಕ್ ಕರುಣೆ ಇಲ್ಲತೆ ಶಿಕ್ಷೆ ಕೊಡ್ಪ ಯಿಂಜತ್. ಉಪಾದ್ರಿ ಕೇಟ ಪ್ರಶ್ನೆಕ್ ವಿದ್ಯಾರ್ಥಿ ತಕ್ಷಣ ಉತ್ತರ ಎಣ್ಣಂಡು ಯಿಂಜತ್. ಆಚೇಂಗಿ, ಐನ್‌ಸ್ಟೈನ್ ಸಮಾಧಾನತ್ ಉತ್ತರ ಕೊಡ್ಪಯಿಂಜತ್. ಅದ್ಂಗಾಯಿತ್ ಅಂವೊಂಗ್ ಎಕ್ಕೊಲು ಶಿಕ್ಷೆ ಕ್ಕಟ್ಟುವಯಿಂಜತ್. ಕೂಟ್ಕಾರ ಮಕ್ಕ ತೆಳಿಪಯಿಂಜತ್. ಆಲ್ಬರ್ಟ್‌ಕ್ ಬಾಯಿಪಾಠ ಮಾಡುವದ್, ಬಾಯಿಪಾಠ

ಮಾಡ್‌ನ ಉತ್ತರತನ ಕೇಟ ತಕ್ಷಣ ಎಣ್ಣುವದ್ ಸರಿ ಕಾಂಬಯಿಂಜಿಲೆ. ಅಂವೊ ಎಕ್ಕೊಲು ಗೇನ ಮಾಡಿತ್ ಉತ್ತರ ಎಣ್ಣುವಯಿಂಜತ್. ಒಮ್ಮೆ ಉಪಾದ್ರಿ ಕೇಟ ಪ್ರಶ್ನೆಕ್ ಆಲ್ಬರ್ಟ್ ಉತ್ತರ ಎಣ್ಣುದೇ ಇಲ್ಲೆ, ಮುಂಡತೇ ನಿಂದತ್. ಚೆರಿಯ ವಿಷಯ ಅರ್ಥ ಮಾಡಿಯವ ಕಯ್ಯತನ್ನತ ಬಲ್ಯ ಜಡ್ಡ್ ಕ್ಕಣ್ಣ ನೀನ್‌ಲೆಂದ್ ಉಪಾದ್ರಿ ಅವಮಾನ ಮಾಡಿತ್, ಮಜ್ಜಣಾಕಣೆ ಮೂಲೆಲ್ ನಿಂದವನೆಕೆ ಶಿಕ್ಷೆ ಕೊಡ್‌ತತ್. ಐನ್‌ಸ್ಟೈನ್ ನಾಕೆನ್‌ನ್‌ಂಗ್ ತಕ್ಷಣ ಉತ್ತರ ಎಣ್ಣುವಕ್ ಕಯ್ಯಲೆಂದ್ ಗೇನ ಮಾಡ್‌ಚಿ. ಅಲ್ಲಿಂಜ ತಕ್ಷಣ ತಪ್ಪು ಉತ್ತರ ಎಣ್ಣುವಾಂಗಿಂಜ ಶಿಕ್ಷೆ ಅನುಭವ್ ಚಿಡುವದೇ ನಲ್ಲದ್‌ಲೆಂದ್ ಗೇನ ಮಾಡ್‌ಚಿ. ಇನ್ನನೆ, ಸ್ಕೂಲಾರ ವಾತಾವರಣ ಆಲ್ಬರ್ಟ್‌ಕ್ ಉಸ್‌ರ್ ಕಟ್ವಾನನೆಕೆ ಆಪಯಿಂಜತ್. ಆಚೀಂಗಿ, ಮನೆಲ್ ಅಪ್ಪ, ಅಪ್ಪ, ತಂಗೆ, ಕುಂಞಪ್ಪ, ಕುಂಞವ್ಪ ಎಣ್ಣಿಯಂಡ್ ಅಂವೊಂಗೆ ಕುಸಿ ಆಪ ಯಿಂಜತ್. ಎಲ್ಲರೂ ಕೂಡಿಯಂಡ್ ಪೊರ್‌ಮೆ ಪೋಪಯಿಂಜತ್. ಅಕ್ಕಿಲ್ಲ ಆಲ್ಬರ್ಟ್ ಅಳಾತಂಡ್ ಮರ, ಗಿಡ, ಸೂರ್ಯ ಇನ್ನನೆ ನೋಟಿಯಂಡೇ ಕಾಲ ಕಯಿಪಯಿಂಜತ್. ಅಂವೊಂಗೆ ಕಳಿಪದ್ ಕುಸಿಯಿಂಜಿಲೆ. ಸಂಗೀತ ಕುಸಿಯಿಂಜತ್. ಪಿಟೀಲ್ ಅಂವೊಂಡ ಪ್ರೀತಿರ ವಾದ್ಯ. ಆರ್ ಬಯತ್‌ಲೇ ಸಂಗೀತ ಪಡಿಪಕ್ ಸುರು ಮಾಡ್‌ಚಿ. ಆಲ್ಬರ್ಟ್ ಅಂಜಿ ವಯಸ್‌ಲಿಪ್ಪಕ ಅಂವೊಂಡ ಅಪ್ಪ ಅವಂಗೋರ್ 'ದಿಕ್ಕೂಚಿ' (Compass) ಎಡ್‌ತಂಡ್ ಬಂದಿತ್ ಕೊಡ್‌ತತ್. ಅದ್‌ನ ಕಂಡಿತ್ ಆಲ್ಬರ್ಟ್‌ಕ್ ಆಶ್ಚರ್ಯ ಆಚಿ. ಅದ್‌ನ ಏದ್ ಬರಿಕ್ ತಿರ್‌ಕಚೇಂಗೂ, ಅದ್‌ಂಡ ಚೂದ್ ಮಾತ್ರ ಒರೇ ದಿಕ್ಕನ ಕಾಟುವಲ್ಲ ಎನ್‌ನ್‌ಂಗ್‌ಲೆಂದ್ ಪ್ರಶ್ನೆರ ಮೇಲೆ ಪ್ರಶ್ನೆ ಕೇಟತ್ ಅಪ್ಪನ. ಅಪ್ಪ ಮೋಂವೊಂಡ ಎಲ್ಲ ಪ್ರಶ್ನೆಕೂ ಅಯಸ್ಕಾಂತ ಪಿಂಞ ಭೂಮಿರ ಗುರುತ್ವಾಕರ್ಷಣ, ಇದ್ ದಂಡ್ ವಿಷಯತ್ ಗೇನ ಮಾಡಿ ಮಾಡಿ ಬೈಟ್ ವರ್‌ಕೇ ಬಪ್ಪಯಿಂಜಿಲೆ, ಅಚ್ಚಕ್ ಚುಮ್ಮಿ ಕ್ಕಣ್ಣಿಂಗ್. ದಿಕ್ಕೂಚಿಲೇ ದಿನ ಇಡೀ ಕಳಿಪಯಿಂಜತ್. ಗೇನ ಮಾಡುವಯಿಂಜತ್. ಚರಿತ್ರರ ಘಟನೆರ ತಾರೀಕ್‌ನೆಲ್ಲ ಎನ್‌ನ್‌ಂಗ್ ಬಾಯಿಪಾರ ಮಾಡಿತ್ ಸಮಯ ವ್ಯರ್ಥ ಮಾಡುವೊ, ನೋಟಿತೇ ಎಣ್ಣೊಲುವಲ್ಲ ಎಣ್ಣುವಯಿಂಜತ್. ಅನ್ನನೆ ಆಯಿತ್, ಚರಿತ್ರ, ಭಾಷೆ ಇದ್‌ನೆಲ್ಲ ಕುಸಿಲ್ ಪಡಿಪಯಿಂಜಿಲೆ. ಕ್ಲಾಸ್‌ಲ್ ಎಕ್ಕೊಲು ಎಂತ, ಎನ್‌ನ್‌ಂಗ್, ಎನ್ನನೆ, ಎಣ್ಣಿಯಂಡ್ ಉಪಾದ್ರಿಯಳ ನೂರ್ ಪ್ರಶ್ನೆ ಕೇಪಯಿಂಜದ್; ಅಯಿಂಗಕ್ ಅದ್‌ಂಗ್ ಸೆರಿಯಾನ ಉತ್ತರ ಎಣ್ಣುವಕ್ ಕಯ್ಯತೆ ಆಪಯಿಂಜತ್. ಅಂತಹ ಸಂದರ್ಭತ್ ಉಪಾದ್ರಿಯ ಅಂವೊನ ಪೊಯ್ಯುವಯಿಂಜತ್. ಬೋರೆ ಮಕ್ಕ ಎಲ್ಲ ಜರ್ಮನಂಗ. ಆಲ್ಬರ್ಟ್ ಒಬ್ಬ ಯಹೂದಿ. ಜರ್ಮನಕ್ ಯಹೂದಿಯಳ ಕಂಡಕ ಆಪ್‌ಲೆ. ಇದೂ ಒರ್ ಕಾರಣ ಚೊತೆಕಾರ ಮಕ್ಕ ಆಲ್ಬರ್ಟ್‌ನ ದ್ವೇಷ ಮಾಡುವಕ್.

ಚೆರಿಯ ಬಯತ್ ಆಲ್ಬರ್ಟ್ ಇದೆಲ್ಲ ಭೇದ ಭಾವ ಎನ್ನೋಗ್ಲೆಂದೇ ಅರ್ಥ ಆಪಯಿಂಜಿಲೆ.

ಒಮ್ಮೆ ಕ್ಲಾಸ್‌ಲಾ ಆಲ್‌ಜಿಬ್ರಾ (Algebra) ಲೆಕ್ಕ ಮಾಡಿಯಂಡಿಂಜತ್. ಅಕ್ಕ ಆಲ್‌ಜೀಬ್ರಾ ಎಣ್ಣಕ ಎಂತ ಎಣ್ಣೆಯೆಂಡ್ ಉಪಾದ್ರಿನ ಪ್ರಶ್ನೆ ಕೇಟತ್ ಆಲ್ಬರ್ಟ್. ಮಂಡೆ ಇಲ್ಲತ ಪ್ರಶ್ನೆ ಕೇಕತೇಂದ್ ಬಜ್ಜತ್, ಉಪಾದ್ರಿ. ಕಾಣ್ಣಂಗ್ ಬೇಜಾರಾಚಿ. ಮನೆಕ್ ಬಂದಿತ್ ಆಲ್ಬರ್ಟ್ ಅಂವೊಂಡ ಕುಂಞಾಪ್ಪನ ಕೇಟತ್. ಕುಂಞಾಪ್ಪಂಗ್ ಆಲ್ಬರ್ಟ್‌ನ ದುಂಬ ಕುಸಿಯಿಂಜತ್. ಆಲ್‌ಜೀಬ್ರಾವೂ ಗಣಿತವೇ. ಉದಾರಣೆಕ್, ನಂಗ ಬೋಟೆಕ್ ಪೋಯಿತಿಪ್ಪಕ, ನಂಗಕ್ ಒರ್ ಪ್ರಾಣಿನ ಕಾಟ್ಟುವಾಂಗ್ ಮಿಂಞ ಅದ್ ಏದ್ ಪ್ರಾಣೀಂದ್ ಗೊತ್ತಿಲ್ಲತಾಂಗ್ 'A' ಎಣ್ಣೆತ್ ಪೆದ ಬೆಪ್ಪ. ಬೋಟೆ ಮಾಡ್‌ನ ಪ್ರಾಣಿ ಕಾಟ್ವನ ಪಿಂಞವೇ ನಂಗಕ್ ಅದೊಂಡ ನೇರಾನ ಪೆದ ಗೊತ್ತಾಪೊ. ಆಲ್‌ಜೀಬ್ರಾತ್‌ರ ಲೆಕ್ಕ ಇನ್ನನೇ ಇಪ್ಪೊ ಎಣ್ಣೆಚಿ. ಅಲ್ಲಿಂಜ ಆಲ್ಬರ್ಟ್ ಸ್ಕೂಲ್‌ಲ್ ಎಲ್ಲ ಮಕ್ಕಕಿಂಜ ಮಿಂಞ ಆಲ್‌ಜೀಬ್ರಾ ಲೆಕ್ಕ ಮಾಡಿರುವಯಿಂಜತ್. ಅಲ್ಲಿಂಜ ಅನ್ನನೆ ಪುಸ್ತಕತ್‌ರ ಮೇಲೆ ಆಸಕ್ತಿ ಬಾತ್. ಸುರು ಸುರುಲ್ ಲೆಕ್ಕ ಪಿಂಞ ವಿಜ್ಞಾನಕ್ ಸಂಬಂಧಪಟ್ಟನೆಕೆ ಮಾತ್ರ ಓದುವಯಿಂಜತ್. ಬಯ್ಯಂಜಿ ಸಾಹಿತ್ಯ ಪಾಠ ಮಾಡುವಯಿಂಜ ಉಪಾದ್ರಿರ ಪ್ರಭಾವತ್ ಎಲ್ಲ ತರತ್‌ರ ಪುಸ್ತಕವೂ ಓದುವಕ್ ಕುಸಿಯಾಚಿ. ಒಮ್ಮೆ ಜ್ಯಾಮಿತ್ರಿ ಪುಸ್ತಕ ಕಾಟ್ವಾಚಿ. ಪದಾನಂಜಿ ದಿನತ್ ಅದೊಲಿಂಜ ಎಲ್ಲ ಲೆಕ್ಕತನೋ ಮಾಡಿತ್ ತೇತತ್. ಅಂತೂ ಮನ್‌ಸಾಲೇ ಗೇನ ಮಾಡ್‌ಚಿ, ಅಂದಕ ನಾನ್ ಜಡ್ಡನಲ್ಲಾಂದ್. ಎಕ್ಕೊಲು ಉಪಾದ್ರಿಯೆಲ್ಲ ಜಡ್ಡ ಎಣ್ಣೆತ್ ಅಂವೊಂಡ ಮನ್‌ಸೂ ಅನ್ನನೇ ಗೇನ ಮಾಡಿತಿಂಜತ್. ಪತ್ತನೆ ಕ್ಲಾಸ್‌ಲಿಪ್ಪಕ ಅಪ್ಪಂಗ್ ವ್ಯಾಪಾರತ್ ನಷ್ಟ ಆಯಿತ್ ಬೋರೆ ಊರ್‌ಕ್ ಪೊಂಡಿ ಯಾಚಿ. ಅಕ್ಕ ಆಲ್ಬರ್ಟ್‌ನ ಹಾಸ್ಟೆಲ್‌ಕ್ ಕೂಟಿತ್ ಪೋಚಿ. ಮನೆ, ಜನ ಎಣ್ಣಕ ದುಂಬ ಪ್ರೀತಿಯಿಂಜ ಆಲ್ಬರ್ಟ್‌ಕ್ ದುಂಬ ಬೇಜಾರಾಚಿ. ಪತ್ತನೆ ಕ್ಲಾಸ್ ತೇತಿತ್, ಸರ್ತಿಫಿಕೇಟ್ ಎಡ್‌ತಂಡ್ ಪೋಯಿತ್, ಬೋರೆ ಜಾಗತ್ ಕಾಲೇಜ್‌ಕ್ ಕೂಡು ಪೊಂದ್ ಗೇನ ಮಾಡಿತಿಂಜತ್. ಆಚೀಂಗಿ, ಪತ್ತನೆ ಕ್ಲಾಸ್ ತೇರುವಕ್ ಅಂಜಿ ತಿಂಗ ಇಪ್ಪಕ, ಸ್ಕೂಲ್‌ಲ್ ಪ್ರಶ್ನೆ ಕೇಟಾಂಗ್ ಉಪಾದ್ರಿ ಬಜ್ಜಿತ್, ನೀನ್ ಎಕ್ಕ ಸ್ಕೂಲ್ ಬುಟ್ಟಿತ್ ಪೋಪಿಯ ಅಂದೇ ನಾಕ್ ನೆಮ್ಮದಿ, ನನ್ನ ಅವಮಾನ ಮಾಡುವಕೇ ನೀನ್ ಪ್ರಶ್ನೆ ಕೇಪೊಂದೆಲ್ಲ ಬಜ್ಜತ್. ಇದೊಲಿಂಜ ಬೇಜರಾನ ಆಲ್ಬರ್ಟ್, ಅಂದೇ ಸ್ಕೂಲ್ ಬುಡ್‌ವಕ್ ತೀರ್ಮಾನ ಮಾಡ್‌ಚಿ. ಡಾಕ್ಟರ್‌ರ ಕೈಲ್ ಸೌಖ್ಯ ಇಲ್ಲೆಂದ್ ಸರ್ತಿಫಿಕೇಟ್ ಎಡ್‌ತಂಡ್, ಬಲ್ಯ ರಜ ಇಟ್ಟಿತ್ ಮನೆಕ್ ಪೋಚಿ. ಸೌಖ್ಯ ಇಲ್ಲತೆ ಬಂದ ಮೋವೊನ ಅವ್ವ ಅಪ್ಪ ಚಾಯಿಲ್ ನೋಟಿ

ಯಂಡತ್. ಚೆನ್ನ ದಿನ ಅಪ್ಪಂಡ ಅಂಗಡಿಲ್ ಅಳಾತತ್. ಕುಸಿ ಆಯಿಲೆ. ದೇಶ ಸುತ್ತೊಂಡೊಂದ್ ಅವ್ವಂಗ್ ಎಣ್ಣೊಚಿ. ಅಚ್ಚಕ್ ಪಣಕಾಸ್ ಇಲ್ಲೆಲ್ಲಾಂದ್ ಅವ್ವ ಬೇಜಾರ ಪಟ್ಟತ್. ಆಲ್ಬರ್ಟ್ ದುಂಬ ದುಡ್ಡ್ ಬೋಂಡ, ನಾನ್ ನಡ್ಂದಂಡೇ ದೇಶ ನೋಟುವೊಂದೆಣ್ಣೆತ್ ಜಿನೀವಾ, ಪೀಸಾ, ಫ್ಲಾರೆನ್ಸ್ ಎಲ್ಲ ನಡ್ಂದಿತೇ ಸುತ್ತಿತ್ ಮನೆಕ್ ಬಾತ್. ಅಂವೊಂಡ ಮನ್‌ಸ್ ಸೆರಿಯಾನಾಂಗ್ ಆರೋಗ್ಯವು ಸೆರಿಯಾಯಿತಿಂಜತ್.

ಜೂರಿಚ್ ಪಾಲಿಟೆಕ್ನಿಕ್ ಕೂಡುವೊಂದ್ ತೀರ್ಮಾನ ಮಾಡ್‌ಚಿ. ಅಲ್ಲಿ ಪ್ರವೇಶ ಪರೀಕ್ಷೆ ಎಡ್‌ತಂಡತ್. ಗಣಿತ ಪಿಂಚಾ ಭೌತಶಾಸ್ತ್ರ ಮಾತ್ರ ಚಾಯಿಲ್ ಮಾಡಿತಿಂಜತ್. ಬಾಕಿ ವಿಷಯ ಚಾಯಿಲ್ ಮಾಡಿತಿಂಜಿಲೆ. ಅದ್‌ಂಗಾಯಿತ್ ಪಾರೊ ಎಣ್ಣುವ ಜಾಗತ್ ಸ್ಕೂಲ್‌ಕ್ ಕೂಡುವಕ್ ಸಲಹೆ ಕೊಡ್‌ತತ್. ಅಲ್ಲಿಯತ್ತರ ಪರಿಸರ ಆಲ್ಬರ್ಟ್‌ಕ್ ಒಗ್ಗುವನೆಕೆ ಇಂಜತ್. ಅಲ್ಲಿಯತ್ತರ ಒರ್ ಉಪಾದ್ರಿ ಕ್ಲಾಂಡ ಬುದ್ಧಿವಂತಿಕೆನ ಗುರ್‌ತ್‌ಚಿಟ್ಟಿತ್, ಅಂವೊಂಡ ಮನೆಲೇ ಇಪ್ಪಕ್ ಜಾಗ ಕೊಡ್‌ತತ್. ಅಲ್ಲಿ ಚಾಯಿಲ್ ಓದಿತ್, ಪಾಸಾಯಿತ್ ಪಾಲಿಟೆಕ್ನಿಕ್ ಕೂಡ್‌ಚಿ. ಅಲ್ಲಿಂಜ ಪಾಸಾಯಿತ್ ಕ್ಲಾನ್ ಸರ್ಟಿಫಿಕೇಟ್‌ಲ್ “ಈ ವಿಶ್ವವಿದ್ಯಾಲಯತ್ ಪದವಿ ಪಡ್‌ಂದ ವಿದ್ಯಾರ್ಥಿಯೆಲ್ಲಕಿಂಜ ಪ್ರತಿಭಾವಂತ ಆಲ್ಬರ್ಟ್” ಎಣ್ಣೆತ್ ಎಳಾದಿತಿಂಜತ್. ಎಲ್ಲಾರ್‌ಕಿಂಜ ಜಡ್ಡ್ ಎಣ್ಣೊ ಚಿಟ್ಟಿಂಡ್ ಬಂದಿತಿಂಜ ಆಲ್ಬರ್ಟ್‌ಕ್ ಈ ಸರ್ಟಿಫಿಕೇಟ್ ನೋಟಿತ್ ದುಂಬ ಕುಸಿ ಆಚಿ. ಅಲ್ಲಿಂಜ ಅದೇ ಪಾಲಿಟೆಕ್ನಿಕ್ ಉಪಾದ್ರಿ ಆಯಿತ್ ಕೆಲಸ ಮಾಡಂಡೊಂದ್ ಗೇನ ಮಾಡ್‌ಚೇಂಗೊ, ಕೆಲಸ ಕ್ಲಾಲ್. ಬಯ್ಯಂಜಿ ಒರ್ ಪೇಟೆಂಟ್ ಕಚೇರಿಲ್ ಗುಮಾಸ್ತನಾಯಿತ್ ಕೂಡಿ ಯಂಡ್, ಸಂಶೋಧನೆ ಮಾಡಿತ್ “ಸಾಪೇಕ್ಷ ಸಿದ್ಧಾಂತ” ಎಣ್ಣುವ ಪ್ರಬಂಧ ಎಳಾದ್‌ಚಿ. ಅದ್‌ನ ಜರ್ಮನಿರ ಒರ್ ಪತ್ರಿಕೆ ಪ್ರಕಟ ಮಾಡ್‌ಚಿ. ಅದ್‌ನ ಓದ್‌ನ ಬೋರೆ ವಿಜ್ಞಾನಿಯಕ್ ಆಶ್ಚರ್ಯ ಆಚಿ. ಪೇಟೆಂಟ್ ಆಫೀಸರ್ ಗುಮಾಸ್ತ ಆಲ್ಬರ್ಟ್ ಐನ್‌ಸ್ಟೈನ್ ಆ ಕ್ಷಣತೇ ಒರ್ ಬಲ್ಯ ವಿಜ್ಞಾನಿ ಆಯಿತಿಂಜತ್.  $E = Mc^2$  ಎಣ್ಣುವ ಈ ಪ್ರಯೋಗತ್ತರ ಆಧಾರತೇ ಅಣುಬಾಂಬ್ ತಯಾರ್ ಮಾಡುವಕಾಚಿ. ಆಚೇಂಗಿ ಅಣುಬಾಂಬ್ ಮಾನವ ಕಲ್ಯಾಣಕಾಯಿತ್ ಉಪಯೋಗ ಮಾಡಂಡು, ನಾಶಕಾಯಿತ್ ಅಲ್ಲಾಂದ್ ಐನ್‌ಸ್ಟೈನ್ ಸಾರಿ ಸಾರಿ ಎಣ್ಣೊಚಿ. ಅಂದಕಲೂ, ಜಪಾನ್‌ರ ಮೇಲೆ ಅಣುಬಾಂಬ್ ಪ್ರಯೋಗ ಮಾಡ್‌ಚಿ ಅಮೆರಿಕಾ. ಇದ್‌ಲ್‌ಂಜ ಐನ್‌ಸ್ಟೈನ್‌ರ ಮನ್‌ಸ್ ದುಂಬ ನೊಂದತ್. 1922 ಲ್ ಐನ್‌ಸ್ಟೈನ್‌ಕ್ “ನೋಬೆಲ್” ಇನಾಂ ಕ್ಲಾಚಿ. ಮಕ್ಕಳ ದುಂಬ ಕುಸಿಯಿಂಜ ಐನ್‌ಸ್ಟೈನ್, ಮಕ್ಕಡ ಕೂಡ ಮಕ್ಕಳಾಯಿತೇ ಕಳಿಪಯಿಂಜತ್. ಪಣ, ಪ್ರಚಾರ, ಸನ್ಮಾನ, ಆಡಂಬರ ಇದ್‌ಲಿಂಜೆಲ್ಲ ದೂರ

ಇಪ್ಪಯಿಂಜ ಐನ್‌ಸ್ಟೈನ್, ನಲ್ಲ ಬಟ್ಟೆಬರಿರ ವಿಷಯತ್ ಸಹ ಆಸಕ್ತಿ ಕಾಟುವ ಯಿಂಜಿಲೆ. ಒಮ್ಮೆ ಒರ್ ವೈಜ್ಞಾನಿಕ ಲೇಖನ ಎಳಾದಾನಾಂಗ್ ಪತ್ರಿಕೆರ ಸಂಪಾದಕ 1000 ಮಾರ್ಕ್ಸ್ ಕೊಡ್ತತ್. ಅದಲ್ 400 ಮಾರ್ಕ್ಸ್ (ಜರ್ಮನ್ ಕರೆನ್ಸಿ) ವಾಪಾಸ್ ಕೊಡ್ತಿತ್, ನಾಡ ಲೇಖನಕ್ ಇದ್ ಜಾಸ್ತಿಯಾಚಿ 600 ಮಾರ್ಕ್ಸ್ ಮಾತ್ರ ಕೊಡ್ಕಲು ಎಣ್ಣಾ ಚಲೊ. ಇನ್ನನೆ, ಸರಳ ಜೀವನ ನಡತ್‌ನ ಐನ್‌ಸ್ಟೈನ್ 1948 ಲ್ ಜವಾಹರಲಾಲ್ ನೆಹರೂನ ಅಮೆರಿಕಾತ್ ಕಂಡಿತ್, ತಕ್ಕ್ ಪರ್ಂದಿ ತಿಂಜತ್. ತಾಂಡ ಎಳವತ್ತಂಜನೆ ಬಯತ್‌ಕೆತ್ತನೆಯೂ ವಿಜ್ಞಾನಕಾಯಿತ್ಲೆ ಬದ್‌ಕನ ಐನ್‌ಸ್ಟೈನ್ ಕಣ್ಮರೆಯಾಚಿ.

ಬದ್‌ಕ್ ನಿಂದ ನೀರಾಪಕಾಗ, ದಿನ ದಿನಕೂ ಬೊಳಂದಂಡೇ ಇರಂಡು. ಗೊತ್ತಿಲ್ಲತಾನ ಪಡಿಕಂಡು, ಪಡ್‌ಚ ವಿದ್ಯೆನ ಉಪಯೋಗ ಮಾಡಂಡು. ಡಿಗ್ರಿ ಆಚಿ, ಚಾಕ್ರಿ ಆಚಿ, ಸಂಪಾದನೆ, ಸಂಸಾರ ಎಣ್ಣಿಯಂಡ್ ಬದ್‌ಕ್‌ಚೇಂಗಿ ಪೋರ. ನೂರಾಂಗ್ ಅಂಜಿ ಆಚೇಂಗಿಯೂ ಸಮಾಜಕೂ, ಜನಕೂ ಉಪಕಾರ ಆಪನ್ನತ ಕಾರ್ಬಾರ್ ಮಾಡಂಡು. □



## ಸರ್ ಎಂ. ವಿಶ್ವೇಶ್ವರಯ್ಯ

- ಪುಟ್ಟಾನ ದಿನ - 1861ನೇ ಇಸವಿ, ಸೆಪ್ಟೆಂಬರ್ 15  
 ಪುಟ್ಟಾನ ಜಾಗ - ಮುದ್ದೇನಹಳ್ಳಿ, ಚಿಕ್ಕಬಳ್ಳಾಪುರ ತಾಲೂಕ್  
 ಕೋಲಾರ ಜಿಲ್ಲೆ, ಕರ್ನಾಟಕ  
 ಅಪ್ಪ - ಶ್ರೀನಿವಾಸ ಶಾಸ್ತ್ರಿ  
 ಅಮ್ಮ - ವೆಂಕಾಚಮ್ಮ  
 ಕಣ್ಮರೆ - 1962ನೇ ಇಸವಿ ಏಪ್ರಿಲ್ 14

ಮೈಸೂರ ಕೃಷ್ಣರಾಜ ಸಾಗರ ಅಣೆಕಟ್ಟು ನೋಟನಯಿಂಗ್, ಅದ್‌ನ ಕೆಟ್ಟಾನ ಇಂಜಿನಿಯರ್ ವಿಶ್ವೇಶ್ವರಯ್ಯನ ಗೇನ ಬರತಿಪ್ಪುಲೆ. ಅಪ್ಪ - ಅವ್ವಂಡ ಭಕ್ತಿ, ಆಚಾರ, ಸಂಸ್ಕೃತಿ, ಪರೋಪಕಾರ ಬುದ್ಧಿ ಇದೆಲ್ಲ ವಿಶ್ವೇಶ್ವರಯ್ಯಂಗೂ ಇಂಜತ್. ಪ್ರೈಮರಿ ಸ್ಕೂಲ್, ಚಿಕ್ಕಬಳ್ಳಾಪುರತೇ ಓದ್‌ಚಿ. ಹೈಸ್ಕೂಲ್‌ಕ್ ಬೆಂಗಳೂರ್‌ಕ್ ಪೋಚಿ. ಕೈಲ್ ಕಾಸಿಲ್ಲೆ. ಇಪ್ಪಕ್ ಜಾಗ ಇಲ್ಲೆ. ಕೊಡಗ್‌ಂಜ ಬೆಂಗಳೂರ್‌ಕ್ ಪೋನ ಒರ್ ಸಂಸಾರತರ ಮಕ್ಕಕ್ ಪಾಠ ಮಾಡಿತ್, ಓರೋರ್ ಪೈಸತ್‌ನೋ ಕೂಟಿತ್ ಓದ್‌ಚಿ. ಪೊರ್‌ಮೆ ಅಳ್‌ತಂಡ್, ಬೀದಿರ ಬೊಳಾಚತ್ ಓದಿತ್, ಎಲ್ಲಾಕಿಂಜ ಜಾಸ್ತಿ ಮಾರ್ಕ್ಸ್ ಎಡ್‌ತಿತ್ ಪಾಸಾಚಿ. ಮೈಸೂರ್ ಸರ್ಕಾರತರ ಸಹಾಯತ್ ಪೂನಾತ್‌ಲ್ ಇಂಜಿನಿಯರಿಂಗ್ ಓದ್‌ಚಿ. ಅದ್‌ಲೂ ಆದ್ಯ ರ್ಯಾಂಕ್‌ಲ್ ಪಾಸಾಚಿ. ಪಾಸಾನದು ಮುಂಬೈ ಸರ್ಕಾರ ನಾಸಿಕ್‌ಲ್ ಅಸಿಸ್ಟೆಂಟ್ ಇಂಜಿನಿಯರ್ ಕೆಲಸ ಕೊಡ್‌ತತ್.

ವಿದ್ಯಾರ್ಥಿ ಜೀವನತ್ ವಿಶ್ವೇಶ್ವರಯ್ಯ ಶಿಸ್ತರ ಜೀವನ ನಡತುವಯಿಂಜತ್. ಪೊಲಾಕ ಬೆರಿಯ ಎದ್ದಿತ್ ಕೆಲಸ ಸುರು ಮಾಡುವಯಿಂಜತ್. ಅಂದೇತರ ಕೆಲಸ ಅಂದೇ ಮಾಡಿತ್ ತೇಪಯಿಂಜತ್. ಉಂಬೊ, ತಿಂಬೊ, ಉಡ್‌ಪೊ, ಪಡಿಪೊ ಎಲ್ಲಾತೂ ಶಿಸ್ತರ ಜೀವನ. ಇದೇ ಅಯಿಂಗಳ ನೂಯಿಟ ದಂಡ್ (102) ಕಾಲತರ ದೀರ್ಘಾಯುಷ್ಯತ್ ಬದ್‌ಕುವನಕೆ ಮಾಡ್‌ಚಿ. ಒರೇ ಒರ್ ನಿಮಿಷತನ ಕೂಡ ಪಾಳ್ ಮಾಡುವಯಿಂಜಿಲೆ. ಇದೇ ಅಯಿಂಡ ಕಾರ್ಯ ಯಶಸ್ಸರ ಗುಟ್ಟ್. ಬ್ರಿಟಿಷ್ ಸರ್ಕಾರ ಇಂಜನ್ನತ ಆ ಸಮಯತೂ ನಂಗಡ ದೇಶಕಾಯಿತ್ ಅದೆಚ್ಚಕ್ ಕಾರ್ಬಾರ್ ಮಾಡ್‌ಚಿ. “ಸಕ್ಕೂರು” ಎಣ್ಣುವ ಚಾಗಕ್ ಸಿಂಧು ಪೊಳೆಲಿಂಜ ನೀರ್ ಬಪ್ಪನ್ನತ ಏರ್ಪಾಡ್ ಮಾಡ್‌ಚಿ. ಜಲಾಶಯತ್ ನೀರ್ ಪ್ರಯೋಜನಕಿಲ್ಲತೆ ಆಪಾನ ತಡ್‌ಪಕ್ ಬ್ಲಾಕ್‌ಸಿಸ್ಟಂ ಕಂಡ್‌ಪುಡ್‌ಚಿತ್. ಹೈದರಾಬಾದ್‌ರ ಮೂಸಾ ಪೊಳೆಲ್ ಪ್ರವಾಹ ಬಂದಿತ್ ಬೋಂಡಿಯಚ್ಚಕ್ ನಷ್ಟ ಆಚಿ. ಪುನಾದಿಯ ಅನ್ನನೆ ಆಕತನ್ನನೆ ಮೂಸಾ ಪಿಂಞ ಈಸಾ ಪೊಳೆನ ಕೂಟಿತ್ ಅಣೆಕಟ್ಟ್ ಕೆಟ್ಟುವಕ್ ಯೋಜನೆ ಇಟ್ಟಿತ್ ಕೊಡ್‌ತತ್.

ಭಾರತತ್ ಅಕ್ಕ ನೂರಾಂಗ್ ಆರ್ ಜನ ಮಾತ್ರ ಅಕ್ಷರಸ್ಥಂಗೆ ಇಂಜಿಯೆ. ಜನಕ್ ವಿದ್ಯೆ, ವಿದ್ಯೆಕ್ ಸೆರಿಯಾನ ಕೆಲಸ, ಮೂಡನಂಬಿಕೆ ದೂರ ಮಾಡುವನೆಕೆ ವಿಜ್ಞಾನತರ ಅರಿವು, ಕಾಯಿಲ ಕಸ ಬರತನ್ನನೆ ಶುಚಿತ್ವ ಕಾಪಾಡುವದ್... ಇದೆಲ್ಲ ಭಾರತತರ ಜನಕ್ ಇಕ್ಕ ಅತ್ಯವಶ್ಯಾಂದ್ ಗೇನ ಮಾಡಿತ್, ಮೈಸೂರ್ ಸಂಸ್ಥಾನತರ ದಿವಾನನಾಯಿತಿಪ್ಪಕ, ಲೆಕ್ಕ ಇಲ್ಲತಚ್ಚಕ್ ಆಸ್ತೆ, ಸ್ಕೂಲ್ ಕೆಟ್ಟ್‌ಚಿಟ್ಟಿತ್. ದಿವಾನ ಆಯಿತಿಪ್ಪಕ ಸರ್ಕಾರ ಕಾರ್ ಕೊಡ್‌ತಿಂಜತ್. ಸರ್ಕಾರತರ ಕೆಲಸಕ್ ಮಾತ್ರ ಸರ್ಕಾರತರ ಕಾರ್, ಸ್ವಂತ ಕೆಲಸಕ್ ಸ್ವಂತ ಕಾರ್‌ನ ಬಳಸುವಯಿಂಜತ್. ಸರ್ಕಾರ ತಿಂಜ ಕೊಡ್‌ಪಯಿಂಜ ಕಾಗದ, ಕ್ಯಾಂಡಲ್ ಕೂಡ ಸ್ವಂತ ಕೆಲಸಕ್ ಉಪಯೋಗ್ ಚಿಡುವಯಿಂಜಿಲೆ. ಮೈಸೂರ್ ವಿಶ್ವವಿದ್ಯಾನಿಲಯ, ಪಾಲಿಟೆಕ್ನಿಕ್, ಪೊಮ್ಮಕ್ಕಡ ಕಾಲೇಜ್, ಹಾಸ್ಟೆಲ್, ಕೃಷ್ಣರಾಜಸಾಗರ ಡ್ಯಾಂ, ಅಲ್ಲಿಂಜ ಉತ್ಪತ್ತಿಯಾಪನ್ನತ ಕರೆಂಟ್, ಚಾಂದ್ ಎಣ್ಣೆರ ಫ್ಯಾಕ್ಟರಿ, ಸೋಪು ಕಾರ್ಖಾನೆ, ತೋಲ್ ಪದ ಮಾಡುವ ಕಾರ್ಖಾನೆ, ಭದ್ರಾವತಿರ ಇರಂಬು ಪಿಂಞ ಉಕ್ಕ್ ಫ್ಯಾಕ್ಟರಿ, ಸಿಮೆಂಟ್ ಫ್ಯಾಕ್ಟರಿ, ಕಾಗದ ಫ್ಯಾಕ್ಟರಿ, ಮೈಸೂರ್ ಬ್ಯಾಂಕ್, ಬೆಂಗಳೂರ್‌ಲ್ ಇಂಜಿನಿಯರಿಂಗ್ ಕಾಲೇಜ್ - ಇನ್ನತ ಅದೆಚ್ಚಕೋ ಅಭಿವೃದ್ಧಿ ಕಾರ್ಯ ಮಾಡ್‌ನ ಸರ್ ಎಂ. ವಿಶ್ವೇಶ್ವರಯ್ಯ, ತಾಂಗ್ ಎದ್ದಿತ್ ಅಳ್‌ಪಚ್ಚಕ್ ಶಕ್ತಿ ಇಪ್ಪಲ್ಲಿ ಕೆತ್ತನೆಯೂ ಕೆಲಸ ಮಾಡಿಯಂಡೇ ಇಂಜತ್. ಅಯಿಂಗಡ ತೊಂಬತ್ತೊಂದನೇ ಬಯತ್‌ಲ್ ಅಮೆರಿಕಾತರ ಏದೋ ಒರ್ ಫ್ಯಾಕ್ಟರಿ ನೋಟಿತ್ ವಿಷಯ ಅರಂಬಂಡ್



ಬಪ್ಪಕಾಯಿತ್, ಭಾರತ ಸರ್ಕಾರ ವಿಶ್ವೇಶ್ವರಯ್ಯನ ಅಯಿಚತ್. ಕೆಲಸತಾರ ವಿವರ ಅರಿವಾಂಗಾಯಿತ್, ಎಳ್ವತ್ತಂಜಿ ಅಡಿ ಎತ್ತರಕ್ ಇರ್ಂಬಾರ ಏಣಿಲ್ ಪತ್ತಂಡಿಂಜತ್. ಅಧಿಕಾರಿಯ ಎಣ್ಣಾನೆಲ್ಲ ಕೇಟಿತಾಪದು ಪೋಯಿತ್ ನೋಟಿನಾ ಎಣ್ಣಾಚಿ. ತೊಂಬತ್ತೊಂದ್ ಬಯತ್ ಅಜ್ಜ, ಎಳ್ವತ್ತಂಜಿ ಅಡಿ ಎತ್ತರಕ್ ಪತ್ತವದಾ? ಎಲ್ಲಾರೂ ಆಶ್ಚರ್ಯತೂ, ಪೋಡಿಲೂ ನೋಟಿಯಂಡಿಂಜತ್. ಎಲ್ಲ ನೋಟಿಯಂಡಿಂಜನೆಕೇ ಪತ್ತಿತ್, ಎಲ್ಲ ನೋಟಿತ್ ಅಡಿಕ್ ಇಳಾಂಜತ್. ಅಯಿಂಡ ಕೂಡ ಪತ್ನನಯಿಂಗ ಮೂಂದೇ ಜನ! ಇನ್ನತ ಒರ್ ವ್ಯಕ್ತಿ ಎಚ್ಚಕ್ ಕಾಲ ಬದ್ಕನಕಲೂ ದೇಶಕ್ ಉಪಕಾರವೆ. ಬ್ರಿಟಿಷ್ ಸರಕಾರತಾರ "ನ್ಯೆಟ್‌ಹುಡ್" ಪ್ರಶಸ್ತಿ ಕ್ಷಾನ್ಯನಯಿಂಗಕ್ ಪೆದತಾರ ಬಯ್ಯತ್ "ಸರ್" ಎಣ್ಣವ ಶಬ್ದ ಉಪಯೋಗ್ ಚಿಡುವ. ಭಾರತ ಸರ್ಕಾರತಾರ ಬಲ್ಯ ಪದವಿ ಆನ "ಭಾರತರತ್ನ ಪ್ರಶಸ್ತಿ" ಕೂಡ ಇಯಂಗಕ್ ಕ್ಷಿತ್. ವಿಶ್ವೇಶ್ವರಯ್ಯ ಎಣ್ಣವಯಿಂಜತ್ - "ಒರ್ ರೈಲ್ವೆ ಕ್ರಾಸಿಂಗ್‌ನ ಒಡ್ಕುವ ಕೆಲಸ ನೀಡದಾಯಿತಿಂಜಕಲೂ, ಪ್ರಪಂಚತೇ ಇನ್ನತ ನೀಟಾನ ಕ್ರಾಸಿಂಗ್ ಇಲ್ಲೆ ಎಣ್ಣವಚ್ಚಕ್ ಚಾಯಿಲ್ ಬೆಚ್ಚವದ್ ನೀಡ ಕರ್ತವ್ಯ".

ಬದ್ಕಲ್ ಆತ್ಮವಿಶ್ವಾಸ, ಶಿಸ್ತ್, ಸಮಯತಾರ ಸದುಪಯೋಗ ಇದೆಲ್ಲ ಮನುಷ್ಯಂಡ ಬದ್ಕಾರ ಯಶಸ್ಸರ ಗುಟ್ಟ್. ನಂಗ ಮಾಡುವ ಪಣಿ ಚಿರಿಯದೇ ಆಡ್, ಬಲ್ಯದೇ ಆಡ್, ಅದ್ನ ಶ್ರದ್ಧೆಲ್ ಮಾಡಂಡು. ನಂಗ ನಂಗಡ ಕೆಲಸತಾರ ಮೇಲೆ ಕಾಟುವ ಶ್ರದ್ಧೆಯೆ ನಂಗಲ ಮೋಳಾಕೇತುವ. □



## ಸರ್ ಐಸಾಕ್ ನ್ಯೂಟನ್

- ಪುಟ್ಟನ ದಿನ - 1642ನೇ ಇಸವಿ, ಡಿಶಂಬರ್ 25  
 ಪುಟ್ಟನ ಜಾಗ - ಪುಲ್ಫಾಥರ್ಪ್, ಲಿಂಕಲ್ಷೈರ್ ಜಿಲ್ಲೆ, ಇಂಗ್ಲೆಂಡ್  
 ಅಪ್ಪ - ಐಸಾಕ್ ನ್ಯೂಟನ್  
 ಕಣ್ಮರೆ - 1727ನೇ ಇಸವಿ ಮಾರ್ಚ್ 20

ಕುಂಞಿಯಾನ ಐಸಾಕ್ ನ್ಯೂಟನ್, ಪುಟ್ಟುವಾಂಗ್ ಮಿಂಞಾಲೇ ಅವಂಡ ಅಪ್ಪ ಚಿತ್ತಪೋಚಿ. ಅನ್ನನಾಯಿತ್ ಅಪ್ಪ, ಅಪ್ಪಂಡ ಪೆದತ್ನೇ ಮೋಂವೊಂಗೆ ಇಟ್ಟತ್. ಪುಟ್ಟವಕ್ ಶಕ್ತಿ ಇಲ್ಲತೆ ತೋಲಾಂಡಿ ಆಯಿತಿಂಜ ಕುಂಞಿ, ಉಸ್‌ರಾಡು ವಕೂ ಕಷ್ಟ ಪಡುವಯಿಂಜತ್. ಅನ್ನತ ಕುಂಞಿ ಸ್ಕೂಲ್‌ಕ್ ಕೂಡಾನ ಪಿಂಞ ಸ್ಪರ್ಧಾ ಮನೋಭಾವ ಬೊಳತಿಯಂಡ್, ಪ್ರತಿ ಕ್ಲಾಸ್‌ಲೂ ಆದ್ಯತ್ ಪಾಸಾಯಿತ್, ಉಪಾದ್ರಿಯಕೆಲ್ಲ ಪ್ರೀತಿರ ಶಿಷ್ಯನಾಯಿತ್ ಬೊಳಂದತ್. ಅವ್ವಂಗೆ ಮೋಂವೊ ರೈತನಾಂಡೂಂದ್ ಆಸೆ ಇಂಜಕಲೂ, ಮೋಂವೊ ಮಾತ್ರ ಓದಿಯಂಡೇ ಪೋಚಿ. ಪದ್‌ನೆಟ್ಟನೆ ಬಯತ್‌ಲ್ ನ್ಯೂಟನ್, ಕೇಂಬ್ರಿಡ್ಜ್ ವಿಶ್ವವಿದ್ಯಾನಿಲಯತ್‌ರ ಟ್ರಿನಿಟಿ ಕಾಲೇಜ್‌ಕ್ ಕೂಡ್‌ಚಿ. ಅಕ್ಕ ನ್ಯೂಟನ್‌ಕ್ ಗಣಿತತ್ ಆಸಕ್ತಿ ಬಾತ್. ಸಮಯ ಪಾಳ್ ಮಾಡತೆ ಮುಂಡತಿಪ್ಪಕೆಲ್ಲ ನ್ಯೂಟನ್ ಅಂಗಡಿಲಿಂಜ ಸಾಮಾನ್‌ನ ಗಿರಾಕಿಯಡ ಮನೆಕ್ ಕೊಡ್‌ತಿತ್ ಕೈ ಖರ್ಚ್ (ಪಾಕೆಟ್ ಮನಿ) ಸಂಪಾದನೆ ಮಾಡಿಯವ ಯಿಂಜತ್. ವಿದ್ಯಾರ್ಥಿಯಾಯಿತಿಪ್ಪಕಲೇ ಲೆಕ್ಕತ್ ಪುದಿಯ ವಿಷಯತ್‌ನೆಲ್ಲ ಕಂಡ್ ಪುಡ್‌ಚತ್. ಬುದ್ಧಿವಂತನಾಚೇಂಗೂ ವಿನಯವಂತನಾ ನ್ಯೂಟನ್, ತಾನ್ ಕಂಡ್ ಪುಡ್‌ಚ ವಿಷಯತ್‌ನೆಲ್ಲ ಎಳಾದಿತ್ ಬೆಚ್ಚಿತಿಂಜತ್. ಪ್ರಿನ್ಸಿಪಲ್‌ಕ್ ಅಯೆಚಿತಿಂಜಲೆ.

ಪದವಿ ಆನ ಪಿಂಞ ಮಿಂಞಾಕ್ ಓದಂಡೂಂದ್ ಪ್ರಯತ್ನ ಪಟ್ಟಿಂಡಿಪ್ಪಕಲೇ ಎಲ್ಲಲ್ಲಿಯೂ 'ಪ್ಲೇಗ್' ಕಾಹಿಲ ಬಂದಾನಗುಂಡ್, ಕಾಲೇಜ್ ಎಲ್ಲ ಮುಚ್ಚ್ಚಿ. ಅಕ್ಕ ಅಂವೊ ಅವಂಡ ನಾಡ್ಕೇ ಬಯ್ಯಕ್ ಪೋಚಿ. ಅಲ್ಲಿ ಅವಂಗ್ ಲೈಬ್ರರಿ ಆಡ್, ಪ್ರಯೋಗಾಲಯ ಆಡ್ ಇಂಜಿಲೆ. ಆಚೀಂಗಿಯೂ, ಮನೆಲೇ ಸಂಶೋಧನೆ ನಡ್ತಿಯಂಡಿಂಜತ್. ಒಮ್ಮೆ ಗೇನ ಮಾಡಿಯಂಡ್ ತೋಟತ್ ಅಳತಿಪ್ಪಕ ಒರ್ ಮರತಿಂಜ ಪಣ್ಣ್ ಅಡಿಕ್ ಬುದ್ದದ್ ಕಂಡಿತ್, ಭಾರವಳ್ಳ ಎಲ್ಲ ವಸ್ತುವೊ ಕೊಡಿಲಿಂಜ ಅಡಿಕೇ ಎನ್ನಾಂಗ್ ಬೂವೊಂದ್ ಗೇನ ಮಾಡ್ಚಿ. ಅದೊಂಡ ಸಂಶೋಧನೆರ ಫಲವೇ ಭೂಮಿರ "ಗುರುತ್ವಾಕರ್ಷಣ ಶಕ್ತಿ" ಕಂಡ್ಪುಡ್ಚದ್.

ಈ ವಿಷಯತ್ ಪನ್ನೊಂದನೇ ಶತಮಾನತ್ ನಂಗಡ ದೇಶಕಾರನಾನ ಗಣಿತಾಚಾರ್ಯ ಭಾಸ್ಕರನೂ ಭೂಮಿಕ್ ಆಕರ್ಷಣ ಶಕ್ತಿ ಉಳ್ಳಾನಗುಂಡೇ, ಪ್ರತಿ ಒರ್ ಭಾರವಳ್ಳ ವಸ್ತು ಕೊಡಿಲಿಂಜ ಅಡಿಕ್ ಬೂವೊಂದ್ ಎಣ್ಣೆತಿಂಜತ್. ಆಚೀಂಗಿ ನ್ಯೂಟನ್ ಅದೊಂಡ ವಿಷಯತ್ ಏರ ಸಂಶೋಧನೆ ಮಾಡಿತ್, ಇಡೀ ಪ್ರಪಂಚಕ್ ವಿಷಯತ್ನ ಗೊತ್ತ್ ಮಾಡ್ಚಿ. ಬೊಳ್ತದ್ ಎಣ್ಣುವದೇ ಒರ್ ರಂಗ್ ಅಲ್ಲ, ಸೂರ್ಯಂಡ ಕಿರಣತ್ಲುಳ್ಳ ಏಳ್ ರಂಗ್ ಕೂಡಿತ್ ಬೊಳ್ತ ರಂಗ್ ಕಾಂಬೊಂದ್ ಸಂಶೋಧನೆಲಿಂಜ ಕಾಟಿ ಕೊಡ್ತತ್.

ಪ್ಲೇಗ್ ಕಾಹಿಲ ಪೋನ ಪಿಂಞ ಪುನಃ ಟ್ರಿನಿಟಿ ಕಾಲೇಜ್ಲ್ ಫೆಲೋ ಆಯಿತ್ ಕೂಡಿತ್, ದಂಡ್ ಕಾಲತ್ ಪ್ರಾಧ್ಯಾಪಕನಾಚಿ. ಬಯ್ಯಂಜಿ ಇರುವತ್ತ ದಂಡ್ ಕಾಲ ಅಲ್ಲಿ ಪ್ರಾಧ್ಯಾಪಕನಾಯಿತ್ ಕೆಲಸ ಮಾಡ್ಚಿ. 1672ನೇ ಇಸವಿಲ್ ನ್ಯೂಟನ್ ರಾಯಲ್ ಸೊಸೈಟಿರ ಸದಸ್ಯನೂ, 1703 ಲ್ ಅಧ್ಯಕ್ಷನೂ ಆಯಿತಿಂಜತ್. ಅಲ್ಲಿಯತರ ರಾಜಕೀಯತರ ವಿಗ್ ಪಾರ್ಟಿಕ್ ಕೂಡಿತಿಂಜ ನ್ಯೂಟನ್ 1694 ಲ್, ಕರೆನ್ಸಿ ಚೆಸ್ಟರ್ ವಾರ್ಡನ್ ಆಯಿತಿಂಜತ್. ಆ ಸಮಯತ್ ಖೋಟಾ ನಾಣ್ಯ ಗುರ್ತಪ್ಪಡಿಪನ್ನತ ರೀತಿನ ಸುಲಭ ಮಾಡ್ಚಿ. ಅಲ್ಲಿ ದಂಡ್ ಕಾಲ ಕೆಲಸ ಮಾಡಿತ್ "ಮಾಸ್ಟರ್" ಪದವಿಕ್ ಬಡ್ಡಿ ಕ್ವೆಚ್ಚಿ. 1705 ಲ್ ಅಲ್ಲಿಯತರ ರಾಣಿ ಆನ್ ಅಂವೊಂಗ್ "ಸರ್" ಎಣ್ಣುವ ಬಿರ್ದ್ ಕೊಡ್ತತ್. ತಾಂಡ ಎಂಬತ್ತಂಜನೆ ಬಯತ್ಲ್ ಸ್ವರ್ಗಸ್ಥನಾಚಿ.

ನ್ಯೂಟನ್ ಬಲಹೀನನಾಯಿತ್ ಪುಟ್ಟ್ಚೀಂಗೂ ಪೆಡಿಪುಲ್ ಮಿಂಞಾಕ್ ಬಾತ್. ಸಾಧನೆ ಮಾಡ್ಚಿ. ಸಂಶೋಧನೆ ಮಾಡ್ಚಿ. ಅಯಿಂಗಡ ಸಂಶೋಧನೆಂಜ ಲೋಕಕ್ ಉಪಕಾರ ಆಚಿ. ಅನ್ನನೆ ಪ್ರತಿಯೊಬ್ಬನೂ ಕ್ವೆಚ್ಚಿ ಬೊಳ್ತಿಯವತೆ, ತಾಂಡ ಒಳ್ಳೆಲುಳ್ಳ ಶಕ್ತಿನ ಅರೊಂಜಂಡ್ ಸಮಾಜಕ್ ಪ್ರಯೋಜನ ಆಪನೆಕೆ ಬದ್ಕಂಡು.

□



## ಮೇರಿ ಕ್ಯೂರಿ

ಪುಟ್ಟಾನ ದಿನ	-	1867ನೇ ಇಸವಿ, ನವಂಬರ್ 7
ಪುಟ್ಟಾನ ಜಾಗ	-	ವಾರ್ಸಾ, ಪೋಲೆಂಡ್ ದೇಶ
ಅಪ್ಪ	-	ಸ್ಕೊಡೌಸ್ಕ
ಅಮ್ಮ	-	
ಕಣ್ಮರೆ	-	1934ನೇ ಇಸವಿ ಜುಲೈ 4

ಮೇರಿರ ಅಪ್ಪ ಭೌತಶಾಸ್ತ್ರ (Physics) ಉಪಾದ್ರಿಯಾಯಿತಿಂಜತ್. ಅವ್ವಂಗ್ ಕ್ವಯರೋಗ ಇಂಜಾನಗುಂಡ್, ಮಕ್ಕಳ ದುಂಬ ಕುಸಿ ಇಂಜಕಲೂ, ಪಕ್ಕ ಬಪ್ಪಕ್ ಬುಡುವಯಿಂಜಿಲೆ. ಚುಮ್ಮಿ ಮೇರಿಕ್, "ನಂಗಳೆಲ್ಲ ಇಚ್ಚೆಕ್ ಕುಸಿವ್ವಳ್ಳ ನಾಡ ಅಮ್ಮ ನಾಕೆನ್ನಾಂಗ್ ಒರ್ 'ಮುತ್' ತಪ್ಪಾಲೆಂದ್ ಎಣ್ಣು ವದೇ ಬಲ್ಯ ಸಮಸ್ಯೆ ಆಯಿತಿಂಜತ್. ಅಪ್ಪಂಡ ಗೋಡೆಪೊಟ್ಟಿಲ್ ತರತರ ಉಪಕರಣ ನೋಟಿತ್ "ಇದೆಂತಪ್ಪಾ?" ಎಣ್ಣೆತ್ ಅಪ್ಪನ ಕೇಟಿತ್. ಅದ್ ಭೌತಶಾಸ್ತ್ರತಾರ ಉಪಕರಣಂದ್ ಅಪ್ಪ ಎಣ್ಣುವಕ, ಅದ್ನೇ ರಾಗತ್ ಪಾಡಿಯಂಡ್ ಪೋಚಿ ಆ ಚುಮ್ಮಿ ಮೇರಿ. ಮೋವಡ ಆಸಕ್ತಿ ಕಂಡಿತ್ ವಿಜ್ಞಾನತಾರ ವಿಷಯ ಎಣ್ಣೆ ಕೊಡ್ಪಕ್ ಸುರು ಮಾಡ್ಚಿ. ಸ್ಕೊಡೌಸ್ಕ.

ಸ್ಕೂಲ್ಲ್ ಎಲ್ಲಾರ್ಕಿಂಜ ಚೆರಿಯವ ಆಯಿತಿಂಜ ಮೇರಿ, ಎಲ್ಲಾರ್ಕಿಂಜ ಬುದ್ಧಿವಂತೆ ಆಯಿತಿಂಜತ್. ಓದುವಕ್ ಅಳತತೇಂಗಿ ಅವಕ್ ಬೋರೆ ಎಲ್ಲಿಯೂ

ಮನಸ್ ಪೋಕತಚ್ಚಕ್ ಪುಡ್ತ ಇಂಜತ್. ಒಮ್ಮ ಓದ್ನಾನ ಎಕ್ಕೊಲು ಮರ್ಪ ಯಿಂಜಿಲೆ. ಸ್ಕೂಲ್ ವಿದ್ಯಾಭ್ಯಾಸತ್ ಪೊನ್ನಾರ ಮೆಡಲ್ ಪಡ್ಂದತ್. ಅಕ್ಕಣೆ ಅವಡ ಅಕ್ಕನೂ, ಅವ್ವನೂ ದಂಡಾಳೂ ಚತ್ಪೋಚಿ. ಅಲ್ಲಿಂಜ ಚೆನ್ನಂಗ್ ಕಾಲ ಮನೆ ಮನೆಕ್ ಪೋಯಿತ್ ಮಕ್ಕಕ್ ಪಾರ ಎಣ್ಣೆತ್ ಕೊಡ್ಪಯಿಂಜತ್. ಅಲ್ಲಿಂಜ ಪದಾನೆಟ್ಟನೇ ಬುಯತ್ಲಾ, ಒರ್ ಹಳ್ಳಿರ ಸ್ಕೂಲ್ಲ್ ಗವರ್ನೆಸ್ ಕೆಲಸ ಕ್ಕೆಟ್ಪಚಿ. ಕಾಲೇಜ್ ಓದೊಂಡು ಎಣ್ಣುವ ಅವಡ ಆಸೆ ಆಸೆಯಾಯಿತೇ ಉಳ್ಳಂಜತ್. ಪೊಲಾಕ ಎಟ್ಪ ಗಂಟೆಂಜ ಬೈಟ್ ಎಟ್ಪ ಗಂಟೆಕೆತ್ತನೆ, ಪುರುಸೊತ್ತಿಲ್ಲತ ಪಣಿರ ನಡುಲ್ ಕಟ್ಟುವ ಚೆನ್ನಂಗ್ ಸಮಯತ್ಲೇ ಗಣಿತ, ವಿಜ್ಞಾನ ಪುಸ್ತಕ ಓದುವ ಸಾಸ ಮಾಡ್ಚಿ. ಮೂಂದ್ ಕಾಲ ಗವರ್ನೆಸ್ ಕೆಲಸ ಮಾಡಿಯಂಡೇ ಓದಿತ್ ಸುಮಾರ್ ವಿಷಯ ಅರ್ಂಜಂಡತ್. ಅದೇ ಸಮಯತ್ ಮೇರಿಕ್ ಮಿಂಞಕ್ ಓದುವಕ್ ಅವಕಾಶ ಕ್ಕೆಟ್ಪಚಿ. ಅಲ್ಲಿಂಜ ಅವ ಬಯ್ಯಕ್ ತಿರಿತ್ ನೋಟುವ ಪರಿಸ್ಥಿತಿ ಬಂದ್ಲೆ. ಪ್ಯಾರಿಸ್ ಸಾರ್ಬೋನ್ ವಿಶ್ವವಿದ್ಯಾನಿಲಯಕ್ ಕೂಡ್ ಚೇಂಗಿಯೂ, ಪಣಕಾಸ್ ತೊಂದರೆನಗುಂಡ್ ಅವ ಕಷ್ಟ ಪಡಂಡಿಯಾಚಿ. ಉಪಾದ್ರಿಯಕ್ ಸಹಾಯ ಮಾಡುವೊ, ಬೋರೆ ಮಕ್ಕಕ್ ಪಾರ ಎಣ್ಣೆ ಕೊಡ್ಪೊ, ಇನ್ನತದೆಲ್ಲ ಮಾಡಿತ್, ತಾಂಡ ಖರ್ಚಿಕ್ ಬೋಂಡಿಯಾನ ಪಣತನ ಸಂಪಾದನೆ ಮಾಡುವಯಿಂಜತ್. ಬೋರೆ ದೇಶಕರ್ತೀಂದ್ ಗೊತ್ತಾಕತಚ್ಚಕ್ ಚಾಯಿಲ್ ಫ್ರೆಂಚ್ ಭಾಷೆನ ಪಡ್ಚತ್. 1893ನೇ ಇಸವಿಲ್ ಭೌತಶಾಸ್ತ್ರತೂ, 1894ನೇ ಇಸವಿಲ್ ಗಣಿತತೂ ಪದವಿ ಪಡ್ಂದತ್. ಅಲ್ಲಿಂಜ 1895 ಲ್ ಅದೇ ವಿಶ್ವವಿದ್ಯಾನಿಲಯತ್ ಉಪಾದ್ರಿಯಾಯಿತಿಂಜ ಪಿಯರ್ ಕ್ಯೂರಿ ಎಣ್ಣುವ ಒರ್ ವಿಜ್ಞಾನಿರ ಕೂಡ್ ಮಂಗಲಾಚಿ. ದಂಡಾಳೂ ಬುದ್ಧಿ ವಂತಂಗಳೂ, ವಿಜ್ಞಾನತ್ ಆಸಕ್ತಿ ಉಳ್ಳಯಿಂಗಳೂ ಆಯಿತಿಂಜತ್. ಆನಗುಂಡ್, ದಂಡಾಳೂ ಭಿನ್ನಾಭಿಪ್ರಾಯ ಇಲ್ಲತೆ, ಅಪ್ಪರಿಪ್ಪರ ಗೌರವ ಪಿಂಞ ಪ್ರೀತಿಲ್ ಬದ್ಕಾಚಿ.


1896 ಲ್ ಹೆನ್ರಿ ಬೆಕ್ವೆರಲ್ ಎಣ್ಣುವ ವಿಜ್ಞಾನಿ ಓರೊಂದ್ ವಸ್ತು ಇರ್ಚೊಲೂ ಮಿನ್ನುವ ವಿಷಯತ್ ಸಂಶೋಧನೆ ಮಾಡಿತಿಂಜತ್. ಆ ವಿಜ್ಞಾನಿ ಕಂಡ್ ಪುಡ್ಚದ್ ಯುರೇನಿಯಂ ಎಣ್ಣುವ ವಸ್ತು. ಕರ್ತ ಕಾಗದತ್ ಸುತ್ತಿತ್ ಬೆಚ್ಚಕಲೂ, ಅದ್ಂಡ ಬೊಳಿ ಪೊರೊಮೆ ಬೂವಯಿಂಜತ್. ಅದೇ ವಿಷಯತ್ ಸಂಶೋಧನೆ ಮಾಡ್ಚಿ ಮೇರಿ ಪಿಂಞ ಪಿಯರ್. "ಪಿಚ್ಚೆಂಡ್" ಎಣ್ಣುವ ಕಚ್ಚಾವಸ್ತು ಎಡ್ತ ಬಂದಿತ್ ಅದ್ನ ಅಯಿಂಗಡ ಪ್ರಯೋಗಾಲಯತ್ ಕೊದ್ಪ್ ಚಿಟ್ಟಿತ್ ಆವಿ ಮಾಡಿತ್ ಅದ್ನ ಪರತರ ರೂಪ ಮಾಡಿತ್ ಪ್ರಯೋಗ ಮಾಡ್ಚಿ. ಅಚ್ಚೆಲ್ಲ ಕಷ್ಟಪಟ್ಟಿದ್ ಸಾರ್ಥಕ ಆಪನೆಕೆ, ಅದ್ಲ್ ಮೂಂದ್ ಬೋರೆ ಬೋರೆ

ಮೂಲವಸ್ತು ಉಳ್ಳದ್ದು ಗೊತ್ತಾಗಿ. ಜಾಸ್ತಿ ಕ್ಷೇತ್ರವಾಗಿದ್ದು "ರೇಡಿಯಂ"ದೂ, ದುಂಬು ಮಿನ್ನುವ ವಸ್ತು ತಾಂಡ ಅಪ್ಪದೇಶತರ ಗೇನತ್ "ಪೊಲೋನಿಯಂ"ದೂ, ಮೂಂದನೆ ವಸ್ತು "ಆಕ್ಟೀನಿಯಂ"ದೂ ಪೆದ ಬೆಚ್ಚತ್. ಈ ಸಂಶೋಧನೆರ ವಿಷಯ 1898 ಲ್ ಪ್ರಕಟ ಮಾಡುವದು, ಅಯಿಂಗ ಪ್ರಪಂಚತೇ ಕೇಳಿ ಪಡ್ಂದತ್. ಯುರೇನಿಯಂ ಎಣ್ಣುವದ್ ಮೂಲ ವಸ್ತು ಅಲ್ಲಾಂದೂ; ಅದ್ಂಗೆ ಸ್ವಯಂಪ್ರಕಾಶ ಇಲ್ಲೆಂದೂ; ಹೀಲಿಯಂ ಪಿಂಞ ರೇಡಿಯಂರ ಕೂಡೆ ಉಳ್ಳಾಂಗ್ ಮಿನ್ನುವೊಂದೂ; ಯುರೇನಿಯಂಕಿಂಜ ಪತ್ಲಕ್ಕ ಪಾಲ್ ಬೊಳಿ ರೇಡಿಯಂಲ್ ಕೊಟ್ಟುವೊಂದೂ ಕಂಡ್ ಪ್ರಡ್ಚತ್. 1902 ಲ್ ಒರ್ ಡೆಸಿಗ್ರಾಂರಚ್ಚಕ್ ರೇಡಿಯಂನ ಸಂಗ್ರಹ ಮಾಡ್ಚಿ. ಇದ್ ಪೊನ್ನೊಕಿಂಜ ಎಚ್ಚಕೋ ಪಾಲ್ ಬೆಲೆ ಉಳ್ಳದಾಯಿತ್. ಒರ್ ಪೌಂಡ್ ರೇಡಿಯಂಕಾಯಿತ್ ಆಯಿರಗಟ್ಟಲೆ ಟನ್ನ್ ಪಿಚ್ಚೆಂದ್ನ ಬೇವ್ಚೆಡೆಂದಿಂಜತ್. ಈ ಸಂಶೋಧನೆಕಾಯಿತ್ 1903 ಲ್ ನೋಬೆಲ್ ಇನಾಂ ಕೊಟ್ಟಿ. ಅದ್ "ಬೆಕ್ವೆರಲ್"ಕ್ ಪಾದಿ, ಕ್ಯೂರಿ ದಂಪತಿಯಕ್ ಪಾದಿ ಆಯಿ ತಿಂಜತ್. ಅಂದಾಕಣೆ ಏದ್ ಪೊಣ್ಣಾಳ್ಕೂ ನೋಬೆಲ್ ಇನಾಂ ಕೊಟ್ಟಿಂಜಿಲೆ. 1906 ಲ್ ಮೇರಿರ ವಡಿಯ ಕ್ಯೂರಿ ವಾಹನ ಅಪಘಾತತ್ ಮರಣಪಟ್ಟತ್. ಪ್ಯಾರಿಸ್ ವಿಶ್ವವಿದ್ಯಾನಿಲಯತ್ ಕ್ಯೂರಿ ಸದಸ್ಯನಾಯಿತಿಂಜತ್. ಆಚೇಂಗಿ, ಪೊಣ್ಣಾಳ್ ಎಣ್ಣುವ ಕಾರಣಕ್ ಮೇರಿಕ್ ಸದಸ್ಯತ್ವ ಕೊಟ್ಟಿಂಜಿಲೆ. ಆಚೇಂಗಿ, ಕ್ಯೂರಿ ಚೆತ್ತ ಪಿಂಞ ಆ ಜಾಗಕ್ ಮೇರಿನ ಅಳ್ಪಾಚಿಟ್ಟತ್. ಅಂದಾಕಣೆ ಸಾರ್ಬೊನ್ ವಿಶ್ವವಿದ್ಯಾನಿಲಯತ್ ಏದ್ ಪೊಣ್ಣಾಳ್ಕೂ ಪ್ರಾಧ್ಯಾಪಕಿ ಆಯಿತಿಂಜಿಲೆ. ಪಿಯರ್ ರನ್ನತ ಬುದ್ಧಿವಂತಂಡ ಜಾಗಕ್ ಸೆರಿಯಾನ ಏದ್ ವ್ಯಕ್ತಿಯೂ ಆ ಕಾಲಕ್ ಫ್ರಾನ್ಸ್‌ಲ್ ಇಂಜಿಲೆ. ಅದ್ಂಗೆ ಮೇರಿಯೊಬ್ಬಳೆ ಸೆರಿಸಮ ಆಯಿತಿಂಜತ್. 1911 ಲ್ ಮೇರಿ ಕ್ಯೂರಿಕ್ ರಸಾಯನಶಾಸ್ತ್ರತ್ (Chemistry) ಮಾಡ್ನ ಸಂಶೋಧನೆಕಾಯಿತ್ ಇಂಞೊಮ್ಮ ನೋಬೆಲ್ ಪ್ರಶಸ್ತಿ ಕೊಟ್ಟಿ. ಅಂದಾಕಣೆ ದಾರ್ಕೂ ದಂಡ್ ಕುರಿ ನೋಬೆಲ್ ಇನಾಂ ಕೊಟ್ಟಿಂಜಿಲೆ. ರೇಡಿಯಂ ವಿಕಿರಣಕಾರಕ ವಸ್ತು ಆನಾನ ಗುಂಡ್, ಅದ್ಂಪ್ರಭಾವ ಅದ್ಂಪ್ರಕೂಡೆ ಉಳ್ಳಯಿಂಗೆಲ್ಲ ಅಪಾಯ ಆಯಿತೇ ಆಪ. ಅದ್ ಗೊತ್ತಿಂಜಿತೂ ಮೇರಿ ರೇಡಿಯಂ ಬೋರೆ ಬೋರೆ ಉಪಯೋಗ ಕಂಡ್ಪ್ರಡ್ಚತ್. ರೇಡಿಯಂ ಕಿರಣತಿಂಜ (Rays) ಕ್ಯಾನ್ಸರ್ ಪುಣ್ಣನ ಚುಟ್ಟಿತ್, ಕ್ಯಾನ್ಸರ್ ವಾಸಿ ಮಾಡೊಲೊಂದ್ ಕಂಡ್ ಪ್ರಡ್ಚತ್. ಕ್ಯಾನ್ಸರ್ ರೋಗಿಯಕ್ ಈ ಚಿಕಿತ್ಸೆ (Radio Therapy) ಕೊಡ್ಪಕಾಯಿತ್ ಮೇರಿ ಸುಮಾರ್ ಕಾಲ ರೆಡ್ಕ್ರಾಸ್ ಸಂಸ್ಥೆಕ್ ಸ್ವಯಂಸೇವಕಿಯಾಯಿತ್ ಸೇವೆ ಮಾಡ್ಚಿ. 1914 ಲ್ "ಪಿಯರ್ ಸೊಪನ" ಆಯಿತಿಂಜ "ಕ್ಯೂರಿ ರೇಡಿಯಂ ಇನ್ಸ್ಟಿಟ್ಯೂಟ್"ನ ಮೇರಿ

ಸುರು ಮಾಡ್ಚಿ. ರೇಡಿಯಂ ಎಡ್‌ಪಕಾಯಿತ್ ಒರ್ ಫ್ಯಾಕ್ಟರಿ ಸುರು ಮಾಡ್ಚಿ. "ಆಕ್ಸೀನಿಯಂ"ರ ವಿಷಯ ಸಂಶೋಧನೆ ಮಾಡಿತ್ "ಆಲ್ಫಾ ಕಿರಣ" (Alpha Rays) ಕಂಡ್‌ಪುಡ್‌ಚಿತ್. ನುಪ್ಪತ್ತಂಜಿ ಕಾಲತಿಂಜ ವಿಶ್ರಾಂತಿ ಇಲ್ಲತೆ ನಯಿಚೆ ದಲ್ಲತೆ, ರೇಡಿಯಂರನ್ನತ ಅಪಾಯಕಾರಿ ವಸ್ತುರ ಕೂಡೆ ಇಂಜ ಮೇರಿ ಕ್ಯೂರಿಕ್ ದಾರ್‌ಕೂ ಗೊತ್ತಿಲ್ಲತ ಒರ್ ಕಾಹಿಲ ಬಂದಿತ್, ಅವ ಮರಣಪಟ್ಟಿತ್. ಬಯ್ಯಂಜಿ ಮೇರಿಕ್ಯೂರಿರ ವೋವಕೂ, ಮೈಮಂಗೂ ಕೂಡ ರಸಾಯನಶಾಸ್ತ್ರತ್‌ರ ಸಂಶೋಧನೆಲ್ ನೋಬೆಲ್ ಇನಾಂ ಕ್‌ಟ್ಚಿ.

ರೇಡಿಯಂನ ವಾಚ್ ಒಳೊಲೂ, ಬೋರೆ ಏದೇಂಗಿ ರೂಪತೂ ನಂಗ ನೋಟಿತ್, ಇರ್‌ಟ್‌ಲೂ ಮಿನ್ನುವ ಅದ್‌ನ ನೋಟಿತ್ ಕುಸಿಪಟ್ಟಿತಿಕ್ಕು. ಆ ರೇಡಿಯಂರ ಚರಿತ್ರರ ಬಯ್ಯಲ್ ಈ ಮೇರಿಕ್ಯೂರಿ ಎಣ್ಣವ ವಿಚ್ಛಾನಿ... ಅಯಿಂಗಡ ನಯಿಪ್ಪು ಪಿಂಞ ಸಾಧನೆ ಉಂಡ್. ರೇಡಿಯಂನ ನೋಟುವಕ ಎಲ್ಲಾಕೂ ಮೇರಿನ ಗೇನ ಬಕ್ಕು. 'ಪೊಣ್ಣಾ'ಯಿತ್, 'ಅವ್ವ'ನಾಯಿತ್, ಒರ್ ನಲ್ಲ ಮನುಷ್ಯತಿ ಯಾಯಿತ್ ಸಾರ್ಥಕ ಬದ್‌ಕ್ ಬದ್‌ಕ್‌ನ ಈ ಮಾವಿಚ್ಛಾನಿರ ಜೀವನಚರಿತ್ರೆ ಎಲ್ಲಾಕೂ ಆದರ್ಶ ಆಡ್. ಸಾಧನೆಕ್ ಪೊಣ್ಣಾ, ಆಣ್ ಎಣ್ಣವ ಭೇದ ಇಲ್ಲೆಂದ್ ಅಂದೇತ ಕಾಲತೇ ಕಾಟಿ ತಂದ ಈ ವಿಚ್ಛಾನಿನ ಎಚ್ಚಕ್ ಕೊಂಡಾಡ್‌ನಕಲೂ ಪೋರ.

□



## ಪೈಥಾಗೋರಾಸ್


ಗ್ರೀಸ್ ದೇಶತ್ ಸಾಮೋಸ್ ಎಣ್ಣುವ ದ್ವೀಪತ್ ಕ್ರಿ. ಪೂ. 569 ಲ್ (582) ಲ್ ಪೈಥಾಗೋರಾಸ್ ಪುಟ್ಚಿ. ಇಯಂಡ ಅಪ್ಪ ಅವ್ವಂಡ ವಿಷಯ ಗೊತ್ತಲೆ. ಅವೊ ಇಂಜ ಕಾಲತ್ ನಂಗಡ ದೇಶತ್ ಗೌತಮಬುದ್ಧನೊ, ಚೀನಾ ದೇಶತ್ ಕನ್ಫ್ಯೂಷಿಯಸ್ ಇಂಜತ್. ಸೈರೊಸ್ ಎಣ್ಣುವ ಊರ್ಲ್ ಪೆರೆಸೈಡೆಸ್ ಎಣ್ಣುವ ಗುರುರ ಪಕ್ಕ ಪ್ರೈಮರಿ ವಿದ್ಯಾಭ್ಯಾಸ ಮಾಡ್ಚಿ. ಆಚೇಂಗಿ ಅಯಿಂಡ ಜ್ಞಾನತಾಸೆಕ್ ಅದ್ ಪೋರತಾಚಿ. ಚಿರಿಯ ಬಯತ್ಲೇ ಅವೊಂಗ್ ತತ್ವಜ್ಞಾನ, ಗಣಿತ ಏರ ಪಡಿಕಂಡು ಎಣ್ಣುವ ಆಸೆ ಉಕ್ಕಿಯಂಡಿಂಜತ್. ಅಕ್ಕತ ಕಾಲತ್ ವಿಜ್ಞಾನ, ಗಣಿತ ಎಲ್ಲ ದಾರೊ ಏರ ಪಡಿಪಕ್ ಪೋಪಯಿಂಜಿಲೆ. ಬದ್ಕುವಕ್ ಬೋಂಡಿ ಯಚ್ಚಕ್ ವ್ಯವಹಾರ ಜ್ಞಾನಕ್ ಗಣಿತ ಮದೀಂದ್ ಎಲ್ಲಾಡೋ ಅಭಿಪ್ರಾಯ ಆಯಿಂಜತ್. ಆ ಕಾಲತ್ ವಿಜ್ಞಾನ, ಗಣಿತಕೆಲ್ಲ ಪೆದಪೋನ ಜಾಗ ಈಜಿಪ್ಟ್ ದೇಶ. ಏರ ಪಡಿಕಂಡೊಂದಾಚೆಂಗಿ, ಈಜಿಪ್ಟ್ ದೇಶಕ್ ಪೋಂಡು, ಪೋಪಿಯಾಂದ್ ಮನೆಲ್ ಕೇಟತ್. ಪೈಥಾಗೋರಾಸ್ ಎಲ್ಲಿಕ್ ಬೋಂಡೇಂಗಿಯೊ ಪೋಪಕ್ ತಯಾರಿಂಜತ್. ಪಡಿಕಂಡು ಎಣ್ಣುವ ಪುರ್ಡೊ, ಆಸಕ್ತಿಯೊ ಅವೊಂಡಲ್ಲಿ ದುಂಬಿಂಜತ್. ಈಜಿಪ್ಟ್ ಪೋಯಿತ್ ನಲ್ಲ ಗುರು ಎಲ್ಲಿ ಉಂಡೊಂದ್ ಕೇಟತ್ ಅರ್ಂಜಿತ್ 'ಥೇಬ್ಸ್' ಎಣ್ಣುವ ಗುರುರ ಪಕ್ಕ ವಿದ್ಯೆ ಪಡ್ಚತ್. ತತ್ವಜ್ಞಾನ (Philosophy), ರೇಖಾಗಣಿತ (Geometry), ಖಗೋಳಶಾಸ್ತ್ರ (Astronomy), ಅಂಕಗಣಿತ (Arithmetic), ಸಂಗೀತ - ಇನ್ನೆಲ್ಲ ವಿಷಯತ್ ಪಂಡಿತನಾಚಿ. ಗುರು ಎಣ್ಣೆ ತಂದಾನ ಮಾತ್ರ ಪಡಿಪದಲ್ಲತೆ, ತಾನೇ ಸ್ವತಃ ಓದಿತೊ,



ಅರಂಜಿತೂ, ಪ್ರಯೋಗ ಮಾಡಿತೂ ಸುಮಾರಲ್ಲ ಪುದಿಯ ವಿಷಯ ಪಡ್ಚಿ ತಿಂಜತ್. ಸರಿಯಾನ ಶಿಷ್ಯಂಗ ಕ್ಷಾನ್ತನಕ, ತಾನ್ ಪಡ್ಚಿ ವಿದ್ಯೆನೆಲ್ಲ ಎಣ್ಣೆಕೊಡ್ಕ ನಾಂದ್ ಗೇನ ಮಾಡಿಯಂಡ್, ಪ್ರಪಂಚ ಸುತ್ತುವಕ್ ಪೊರೊಟತ್. ಏಷ್ಯಾ ಖಂಡತರ ಸುಮಾರ್ ಜಾಗ ಸುತ್ತಿತ್ 'ಸಾಮೋಸ್'ಕ್ ಬಾತ್. ಅಕ್ಕಣೆ ಅಯಿಂಗಡ ಅವ್ ದೇಶತರ ಪರಿಸ್ಥಿತಿ ಚಾಯಿಂಜಾಲೆ. ದಾರ್ಕೂ ವಿದ್ಯೆ ಪಡಿಪಾತ್ ಆಸಕ್ತಿ ಇಂಜಿಲೆ. ಅದ್ಲೂ ಗಣಿತ ಎಣ್ಣುವಕ ಜನ ಮೂಡ್ ತಿರಕುವಯಿಂಜತ್. ಅಂತಯಿಂಗಡ ಮನಸ್ ತಿರಕಿತ್, ಅಯಿಂಗಕ್ ವಿದ್ಯೆರ ಮಹತ್ವತನ ಗೊತ್ತ್ ಮಾಡ್ ಚಿಡಂಡು ವೇಂಗಿ, ಅಯಿಂಗ ದುಂಬ ಕಷ್ಟ ಪಡಂಡಿಯಾಚಿ. ಅಲ್ಲಿಂಜ ದುಂಬ ಜನ ಅಯಿಂಗಡ ಭಾಷಣ ಕೇಪಕ್ ಬಂದಂಡಿಂಜತ್. ಅದ್ಲೆ ಆಸಕ್ತಿ ಉಳ್ಳ ಚಿನ್ನಂಗಾಳಾನ್ ಆಯ್ಕೆ ಮಾಡಿತ್ ಅಯಿಂಗಕ್ ತಾನ್ ಪಡ್ಚಾನ ತೇರ ಎಣ್ಣೆ ಕೊಡ್ತತ್. ಇಯಂಗಕೆಲ್ಲ "ಪೈಥಾಗೊರಿಯನ್ಸ್" ಎಣ್ಣೆತ್ ಪೆದ ಬಾತ್.

ಈ ಪೈಥಾಗೊರಿಯನ್ಸ್ಡೆ ಶಿಸ್ತರ ಜೀವನ ಖಿಂಞ ಬುದ್ಧಿವಂತಿಕೆಲ್ ಬಲ್ಯ ಬಲ್ಯ ಚಾಕರಿ ಕಟ್ಟುವಯಿಂಜತ್. ಇದ್ನ ಕಂಡಿತ್ ಚಿಡಿ ಬಂದ ಪಳೆಯ ಸಂಪ್ರದಾಯವಾದಿಯ, ಸಮಯ ನೋಟಿತ್ ಪೈಥಾಗೊರಾಸ್ನೋ, ಅಯಿಂಗಡ ಶಿಷ್ಯಂಗಳೊ ಕ್ರಿ. ಪೂ. 500 ತ್ ಕೊಲೆ ಮಾಡ್ಚಿ. ಅದ್ಲೆ ಎಚ್ಚಕೋ ಜನ ಶಿಷ್ಯಂಗ ತಪ್ಪೆಚಿಟ್ಟಂಡ್ ಟಾರೆಂಟಮ್ ಎಣ್ಣುವ ಜಾಗಕ್ ಪೋಯಿತ್, ಅಯಿಂಗ ಪಡ್ಚಿ ವಿಷಯತನ ಬೋರೆಯಿಂಗಕ್ ಎಣ್ಣೆ ಕೊಡ್ತತ್. ಪುಸ್ತಕ ಪ್ರಕಟಣೆ ಮಾಡ್ಚಿ. ಇದ್ನುಂಡ್ ಪೈಥಾಗೊರಾಸ್ರ ಸಾಧನೆ ಜನಕೆಲ್ಲ ಗೊತ್ತಾಚಿ. ಅಂವೊಂಡ ಪೊಣ್ಣ್ 'ಥಿಯನೋ'ಕ್ ತಾಂಡ ವಡಿಯ ಬಲ್ಯ ಜ್ಞಾನಿ ಎಣ್ಣುವದ್ ಗೊತ್ತಿಂಜತ್. ಅದ್ಲೆಂಗಾಯಿತೇ ಅವ ಪೈಥಾಗೊರಾಸ್ರ ಜೀವನ ಚರಿತ್ರೆ ಎಳೊದಿ ಬೆಚ್ಚಿ ತಿಂಜತ್. ಆಚೇಂಗಿ, ಅದೆಲ್ಲಿಯೋ ಪಾಳಾಯಿರ್ತ್. ಬಪ್ಪಕುಳ್ಳ ಜನಾಂಗಕ್ ಬಟ್ಟೆಬೊಳಿ ಆಡ್ಲೆಂದ್ ಗೇನ ಮಾಡ್ನ ಅವಡ ಆಸೆ ನೆರವೇರೊಂದೇ ಇಲ್ಲೆ. ಇಂದೆಕೂ ನಂಗ ನಿಂಗೆಲ್ಲ ರೇಖಾಗಣಿತತ್ ಪೈಥಾಗೊರಾಸ್ರ ಥಿಯರಮ್ ಪಡಿಪಕ, ಅಂವೊನ ಗೇನ ಮಾಡಿಯೋವ ಅಲ್ಲಾ. ಸುಮಾರ್ಕ್ ಕ್ರಿ.ಪೂ. 507 ಲ್ ಮರಣಪಟ್ಟಿ ತಿಕ್ಕೊಂದ್ ಕೆಲವು ಪುಸ್ತಕತ್ ಎಳೊದಿತ್.

ಪೈಥಾಗೊರಾಸ್ ಚೆರಿಯ ಬಯತ್ಲೇ, ಅಂದೇತ ಕಾಲತ್ ವಿದೇಶಕ್ ಪೋಯಿತ್ ಏರ ಪಡಿಪು ಪಡ್ಚಿತ್, ಅದ್ನ ನಾಲ್ ಜನಕ್ ಎಣ್ಣೆಕೊಡ್ ಕಂಡೊಂದ್ ಬಯಂದತ್. ತಾನ್ ಪಡ್ಚಿ ವಿದ್ಯೆ ಮಿಂಞ ತಾಂಡ ಅವ್ ದೇಶತರ ಉಪಯೋಗಕ್ ಬರೊಂಡೊಂದ್ ಗೇನ ಮಾಡ್ಚಿ. ತಾನ್ ಪಡ್ಚಿ ವಿದ್ಯೆನ ನಾಲ್ ಜನಕ್ ಪಡ್ಪೆಚಿಡೊಂಡು ಎಣ್ಣುವ ಬಲ್ಯ ಮನಸ್ಸೂ, ದೇಶಪ್ರೇಮವೂ ನಿಂಗಡ ಬದ್ಕೆಲ್ ಬಟ್ಟೆಬೊಳಿ ಆಡ್ಲೆಂದ್ ಬಯಂದೋವಿ. □



## ಆರ್ಕಿಮಿಡೀಸ್

ಇಟಲಿ ದೇಶದ ಸಿಸಿಲಿ ಎಣ್ಣುವ ದ್ವೀಪದ ಕೂಡಾನ ಸಿರಾಕ್ಯೂಸ್ ಎಣ್ಣುವ ಜಾಗದ ಕ್ರಿಸ್ತಪೂರ್ವ 287 ಲ್ ಆರ್ಕಿಮಿಡೀಸ್ ಪುಟ್ಟ್ವಚಿ. ಚಿರಿಯ ಬಯತ್ಲೇ ಓದುವಕ್ ಅಲೆಕ್ಸಾಂಡ್ರಿಯಾ ನಗರಕ್ ಪೋಚಿ. ಅಲ್ಲಿ 'ಕೋನಾನ್' ಎಣ್ಣುವ ಗಣಿತ ಪಂಡಿತನ ಪರಿಚಯ ಆಯಿತ್, ಲೆಕ್ಕಶಾಸ್ತ್ರತ್ ಆಸಕ್ತಿ ಬಾತ್. ಅಲ್ಲಿ ಗಣಿತಶಾಸ್ತ್ರತ್ ಅಂದಾಕಣೆ ಅರ್ಂಜನ್ನತ ಪ್ರತಿಯೋರ್ ವಿಷಯತ್ನೋ ಪಡ್ಚಿತ್ ವಾಪಾಸ್ ಸಿರಾಕ್ಯೂಸ್ಕೇ ಬಾತ್. ಇಲ್ಲಿಕೆತ್ತನೆ ಅರ್ಂಜ ವಿಷಯಕಿಂಜ ಜಾಸ್ತಿ ಅರಿಯೊಂಡೊಂದ್ ಗೇನ ಮಾಡ್ನ ಆರ್ಕಿಮಿಡೀಸ್, ಬೋರೆ ಬೋರೆ ತರತರ ಯಂತ್ರ ಕಂಡ್ಪಡ್ಚಿತ್, ಅದಲ್ ಜನಕ್ ಉಪಕಾರ ಆಪನೆಕೆ ಮಾಡುವ ಯಿಂಜತ್. ಈಜಿಪ್ಪ್ಲಿಪ್ಪಕ ಕುಂಡಲ್ ನೀರ್ ನಿಂದಿತ್ ಜನಕ್ ತೊಂದರೆ ಆಪಾನ ಕಂಡಿಂಜ ಆರ್ಕಿಮಿಡೀಸ್ "ತಿರುಪು ಕೊಳವೆ" ಎಣ್ಣುವ ಯಂತ್ರ ಕಂಡ್ಪಡ್ಚಿತ್. ಒರ್ ಮರತರ ತುಂಡರ್ ಸುತ್ತ ಸುತ್ತಿತ್ ಇಪ್ಪನ್ನತ ಕೊಳವೆ (Tube) ಕೊಡಿಲ್ ಪುಡಿ ತಿರ್ಕಚೆಂಗಿ, ನೀರ್ ಕೊಡಿಕ್ ಬಂದಿತ್, ಎಲ್ಲಿಕ್ ಬೋಂಡು ಅಲ್ಲಿಕ್ ಬೂವಯಿಂಜತ್. ಇದಲ್ ಪತ್ತ ಪನ್ನೆರಂಡ್ ಅಡಿರಚ್ಚಕ್ ಕೊಡಿಕ್ ನೀರ್ ಎಡ್ಕಲಿಂಜತ್. ಇದಲಿಂಜ ಅಂವೊಂಗ್ ನಲ್ಲ ಪೆದ ಬಾತ್.

ಗೋಲ (Circle), ಸಿಲಿಂಡರ್ (Cylinder), ಪಿರಮಿಡ್ (Pyramid), ಶಂಖ (Cone) - ಇನ್ನತಾಂಡೆಲ್ಲ ಸುತ್ತಳತೆ, ವ್ಯಾಸ ಎಲ್ಲ ಗಣಿತತರ ಆಧಾರತರ ಮೇಲೆ ಕಂಡ್ಪುಡಿಪಕ್ ಸುರು ಮಾಡ್ಚಿ. ಎಕ್ಕೋಲು ಇಂತ ಲೆಕ್ಕತೇ ಮುಳಿತಿಪ್ಪ ಯಿಂಜ ಆರ್ಕಿಮಿಡೀಸ್ಕ್ ಉಂಬಕ್, ಕುಳಿಪಕ್ ಒಂದೂ ಗೇನ ಇಪ್ಪಯಿಂಜಿಲೆ.

ಅಂವೊಂಡ ಕೆಲಸಕಾರ ಅಂವೊನ ಬಲಾತ್ಕಾರತ್ ಗುಡ್ಡಕ್ (Bathroom) ಕಾಕಿಯಂಡ್ ಪೋಯಿತ್, ಮೇಲ್ಕೆಲ್ಲ ಎಣ್ಣೆ ತೇಚಿತ್, ಕುಳಿಪಕ್ ಬುಟ್ಟತೇಂಗಿ, ತಾಂಡ ಒಯ್ಲಿಲ್ ಮೇಲ್ಕೆಲ್ಲ ಜ್ಯಾಮಿಟ್ರಿರ ಗೆರೆ ಬಲ್ಚಂಡಿಪ್ಪಯಿಂಜತ್ಲೊ.

ಅನ್ನನೆ ಒಮ್ಮೆ ಆ ದೇಶತ್ ರಾಜಂಗ್ ಆರ್ಕಿಮಿಡೀಸ್‌ನ ಪರೀಕ್ಷೆ ಮಾಡುವ ಕೋರ್ ಸಮಸ್ಯೆ ಕಾಟ್ಕಿಂಜತ್. ತಟ್ಟಂಡ ಕೈಲ್ ಒರ್ ಕಿರೀಟ ಮಾಡ್ಚಿಟ್ಟಿಂಜ ರಾಜಂಗ್, ಅದಲ್ ಪೊನ್ನಾರ ಜೊತೆಲ್ ಬೊಳ್ಳಿಯೂ ಮಿಶ್ರ ಮಾಡ್ತೇಂದ್ ಅನುಮಾನ ಬಂದಿತ್, ಆರ್ಕಿಮಿಡೀಸ್‌ನ ಕಾಕ್‌ಚಿಟ್ಟಿತ್. ಈ ಕಿರೀಟತ್ ಬೊರೀ ಪೊನ್ನೇ ಉಳ್ಳದಾ, ಅಲ್ಲ ಬೊಳ್ಳಿಯೂ ಮಿಶ್ರ ಆಯಿತಾ? ಮಿಶ್ರ ಆಯಿತುಂಡೇಂಗಿ, ಎಚ್ಚಕ್ ಮಿಶ್ರ ಆಯಿತ್ ಎಣ್ಣೆ ಎಣ್ಣೆ ಚಿಲೊ. ಆರ್ಕಿಮಿಡೀಸ್ ಎಚ್ಚಕ್ ಗೇನ ಮಾಡ್‌ನಕಲೂ, ಈ ಸಮಸ್ಯೆಕ್ ಪರಿಹಾರ ಕಾಟ್ಕಿಂಜಿ ನಿಂದಲ್ಲಿ, ಅಳತಲ್ಲಿ ಅದೇ ವಿಚಾರತ್‌ನ ಗೇನ ಮಾಡಿಯಂಡಿಂಜತ್. ಇದೇ ವಿಷಯ ಗೇನ ಮಾಡಿಯಂಡಿಪ್ಪಕ್, ಅವಂಡ ಕೆಲಸಕಾರ ಅಂವೊನ ಈತಂಡ್ ಪೋಯಿತ್ ಗುಡ್ಡತ್ ಬುಟ್ಟತ್. ಅಂವೊ ಗೇನ ಮಾಡಿಯಂಡೇ ಕುಳಿಪ ತೊಟ್ಟಿಲ್ (Bath Tub) ಇಳಿವಕ ಚಿನ್ನಂಗ್ ನೀರ್ ಪೊರ್‌ಮೆ ಚಿಲ್ಚಿ. ನೀರ್‌ಲ್ ಮುಳುವಕ ಇಂಞೂ ಜಾಸ್ತಿ ನೀರ್ ಚಿಲ್ಚಿ. ಶರೀರ ನೀರ್‌ಲ್ ಮುಳುವಕ, ಎಚ್ಚಕ್ ನೀರ್ ಪೊರ್‌ಮೆ ಚಿಲ್ಲುವ, ಆ ನೀರ್‌ರ ಅಳತೆಯೂ, ನಂಗಡ ಶರೀರತ್ ಘನ ಅಳತೆಯೂ ಒಂದೇ ಆಯಿತಿಪ್ಪ ಎಣ್ಣುವ ವಿಚಾರ ಅಂದ್ ಅಂವೊಂಗ್ ಆ ಕ್ಷಣತ್‌ಲ್ ಅರ್‌ಂಜದೂ "ಗೊತ್ತಾಚಿ, ಗೊತ್ತಾಚಿ" ಎಣ್ಣಿಯಂಡ್ ಕೂತ್‌ಟ್ಟಂಡ್ ಗುಡ್ಡತ್‌ಂಜ ನೇರೆ ಓಡಿ ಬಂದ್‌ರಾತ್ಲೊ.


ಏದೇ ವಸ್ತುನ ದ್ರವ ಪದಾರ್ಥತ್ ಮುಳುಕುವಕ, ದ್ರವ ಪೊರ್‌ಮೆ ಚಿಲ್ಲುವ. ದ್ರವತ್ ಮುಳುವ ವಸ್ತುರ ತೂಕ ಅದ್‌ಂಡ ಮಾಮೂಲ್ ತೂಕಿಂಜ ಕಮ್ಮಿ ಆಯಿತಿಪ್ಪ. ಆ ಕಮ್ಮಿಯಾಯಿತಿಪ್ಪ ತೂಕ ಪೊರ್‌ಮೆ ಚಿಲ್ಚಿನ ದ್ರವತ್‌ರ ತೂಕ ಒಂದೇ ಆಯಿತಿಪ್ಪ ಎಣ್ಣುವದೇ ಆರ್ಕಿಮಿಡೀಸ್‌ರ ತತ್ತ್ವ (Archimedes Principle). ಇದೇ ತತ್ತ್ವತ್ ಆಧಾರತ್ ಕಿರೀಟಕ್ ಮಿಶ್ರ ಆನ ಬೊಳ್ಳಿರ ತೂಕ ಕಂಡ್‌ಪುಡ್‌ಚಿತ್ ಎಣ್ಣುವಕ, ರಾಜ ತಟ್ಟಿನ ಕಾಕ್‌ಚಿಟ್ಟಿತ್ ಕೇಪಕ, ರಾಜ ಕೊಲ್ಚಿಡುವಾಂದ್ ಬೊತ್ತಿಯಂಡ್ ಸತ್ಯ ಎಣ್ಣೆ ಚಿ. ಆರ್ಕಿಮಿಡೀಸ್‌ರ ಲೆಕ್ಕ ಸೆರಿಯಾನಾನ ಕಂಡಿತ್ ಅವಂಗ್ ಹಡಗ್ ಮಾಡುವ ಜಾಗತ್ ಕೆಲಸ ಕೊಡ್‌ತತ್. ಅಲ್ಲಿಯೂ ಬಲ್ಕ ಬಲ್ಕ ಭಾರತ್‌ರ ವಸ್ತುನ ಎಡ್‌ಪಕ್ ಸುಲಭ ಆಪನ್ನತ "ಸನ್ನೆಕೋಲ್" ಕಂಡ್‌ಪುಡ್‌ಚಿತ್. ಇದೇ "ಸನ್ನೆಕೋಲ್‌ತತ್ತ್ವ"ತ್ ಆಧಾರತ್ ದುಂಬ ಉದ್ದಾನ ಒರ್ ಕೋಲ್, ಬಗ್ಗತ ಒರ್ ಪಾರೆಕೋಲ್, ಅದ್‌ನ ಊರ್‌ವಕ್

ಒರ್ ಜಾಗ, ನಾನ್ ನಿಪ್ಪಕ್ ಒರ್ ಜಾಗ ತಾತೇಂಗಿ ನಾನೊಬ್ಬನೇ ಈ ಭೂಮಿನ ತೆರಾಕಿರುವೀ"ಂದ್ ಸವಾಲ್ ಇಟ್ಟ ಮಾವಿಚ್ಛಾನಿ ಈ ಆರ್ಕಿಮಿಡೀಸ್.

ಒಮ್ಮೆ ರೋಮ್‌ಕಾರ ಸಿರಾಕ್ಯೂಸ್ ನಗರಕ್ ಮುತ್ತಿಗೆ ಇಟ್ಟತ್. ಅಕ್ಕ ಆರ್ಕಿಮಿಡೀಸ್ ಬಲ್ಯ ಬಲ್ಯ ಕಲ್ಲ್‌ನ ಎಡ್‌ತಿತ್ ದೂರಕ್ ಚಾಡುವನ್ನತ ಯಂತ್ರ ತಯಾರ್ ಮಾಡಿತ್, ಶತ್ರುವಳ ಚೋಪ್‌ಚಿಟ್ಟತ್. ಅದ್‌ಂಗ್ ಬೊತ್ತಿತ್ ಬೈಟ್ ನೇರತ್ ಮುತ್ತಿಗೆ ಇಟ್ಟ ಸೈನಿಕಂಗಕ್ ಕೋಟೆರ ಗೋಡೆಲ್ ಚೆರಿಯ ಚೆರಿಯ ತೂತ್ ಮಾಡಿತ್, ಅದ್‌ಂಡ ಒಳಿಯ ಬಾಣ ಬುಡುವನೆಕೆ ಮಾಡ್‌ನಾನಗುಂಡ್ ರೋಮ್‌ಕಾರ ಚೋತಿತ್ ಓಡ್‌ಚಿ. ಅಲ್ಲಿಂಜ ಓಡ್‌ನ ಸೈನಿಕಂಗಳೂ, ಸೇನಾಪತಿಯೂ ಮದಿಯಪ್ಪಾ ಮದಿ ಈ ಗಣಿತ ಪಂಡಿತಂಡ, ಭೂತಂಡ ಜೊತೆಲ್ ಯುದ್ಧ ಮಾಡುವಕ್ ಕಯ್ಯುಲೆ. ನೂರಾರ್ ಕೈಯುಳ್ಳ ರಾಕ್ಷಸಂಡ ಮಾದಾರಿ ಯುದ್ಧ ಮಾಡುವಾಂದ್ ಎಣ್ಣೆ ಚಿಲೊ. ಕೋಟೆರ ಏದೋ ಒರ್ ಭಾಗಕ್ ರಕ್ಷಣೆ ಇಲ್ಲತಾನ ಕಂಡ್ ಪುಡ್‌ಚಿತ್, ಆಲೆ ನುಗ್ಗಿತ್, ನಗರತಾನ ರೋಮ್‌ಕಾರ ಪುಡ್‌ಚಂಡತ್. ಅಕ್ಕ ಆರ್ಕಿಮಿಡೀಸ್‌ಕ್ ಎಳುವತ್ತಂಜಿ ವಯಸ್ ಆಯಿತಿಂಜತ್. ರೋಮ್‌ಕಾರ ಸೇನಾಪತಿ ತಾಂಡ ಸೈನಿಕಂಗಕ್ ಆ ಅದ್ಭುತ ವಿಚ್ಛಾನಿನ ಮರ್ಯಾದಿಯೋಡೆ ರೋಮ್‌ಕ್ ಕಾಕಿಯಂಡ್ ಬಾರೀಂದ್ ಎಣ್ಣೆ ತಿಂಜತ್‌ಲೊ. ಆಚೇಂಗಿ, ಗೊತ್ತಿಂಜಿತ್ತೋ, ಗೊತ್ತಿಲ್ಲತೆಯೋ ಸೈನಿಕಂಗ ಆರ್ಕಿಮಿಡೀಸ್‌ನ ಕೊಂದಾರ್‌ತ್.

ನಂಗಡ ದೇಶತ್ ವ್ಯಾಕರಣ ಗ್ರಂಥ ಎಳಾದ್‌ನ ಪಾಣಿನಿನ ಒರ್ ಸಿಂಹ ಕೊಂದತ್‌ಲೊ. ಕಾವ್ಯ ವಿವರಣೆ ಎಳಾದ್‌ನ ಜೈಮಿನಿಯುಷಿನ ಒರ್ ಆನೆ ಕೊಂದತ್‌ಲೊ. ಅನ್ನನೆ ಮಹಾನುಭಾವಂಗಡ ಬೆಲೆ ಪ್ರಾಣಿಯಕ್ ಎನ್ನನೆ ಗೊತ್ತಾಪೊ. ಒರ್ ಕಾಡ್ ಪ್ರಾಣಿಕ್ ಸಮಾನ ಆಯಿತಿಂಜ ಸಾಮಾನ್ಯ ಸೈನಿಕಂಗ ಮಾವಿಚ್ಛಾನಿನ ಕೊಂದಾರ್‌ತ್. ಇದಾಲಿಂಜ ರೋಮ್‌ಕಾರ ಸೇನಾಪತಿಕ್ ಭಾರೀ ಬೇಜಾರ ಆಚಿ. ಅವಂಡ ಆಸೆನೆಕೆ ಅವಂಡ ಗೋರಿರ ಮೇಲೆ, ಒರ್ ಸಿಲಿಂಡರ್‌ರ ಒಳ್‌ಲ್ ಒರ್ ಗೋಲ ಬೆಚ್ಚಿತ್, ಅದ್‌ಂಡ ಮೇಲೆ  $\frac{3}{2}$  ಎಣ್ಣೆತ್ ಎಳಾದ್‌ಚಿಟ್ಟತ್. ಸುಮಾರ್ ಕ್ರಿ. ಪೂ. 212 ಲ್ ಮರಣಪಟ್ಟತ್‌ಂದ್ ಚರಿತ್ರಕಾರ ಎಳಾದಿತ್.

ಚಾವು ಬಂದಿತ್ ಸೈನಿಕಂಗಡ ರೂಪತ್ ಎದಿಕೆ ನಿಂದಿಂಜಕಲೂ, ಬೊತ್ತತೆ ಜ್ಯಾಮಿಟ್ರಿ ಗೆರೆ ಬಲ್‌ಚಂಡ್, ಎಂತೆಲ್ಲೊ ಸಂಶೋಧನೆಲೇ ಮುಳಿತಿಂಜ ಆರ್ಕಿಮಿಡೀಸ್ ನಂಗಕೆಲ್ಲ ಆದರ್ಶವಾಯಿತಿರಡ್. ಬದ್‌ಕ್‌ಲ್ ಏದ್‌ಂಗೂ ಬೊತ್ತತೆ ಸಾಧನೆರ ಬಟ್ಟೆಲ್ ಮಿಂಞ ಮಿಂಞಕ್ ನಡ್‌ಕಂಡು. ಸಮಾಜಕೂ, ದೇಶಕೂ ನಲ್ಲದಾಪ ಕಾರ್ಬಾರ್ ಮಾಡಂಡು, ಸಾರ್ಥಕ ಬದ್‌ಕ್ ಬದ್‌ಕೊಂಡು. □



## ಥಾಮಸ್ ಆಲ್ವ ಎಡಿಸನ್

- ಪುಟ್ಟಾನ ದಿನ - 1847ನೇ ಇಸವಿ ಫೆಬ್ರವರಿ 11  
 ಪುಟ್ಟಾನ ಜಾಗ - ಮಿಲಾನ್, ಅಮೇರಿಕಾ  
 ಅಪ್ಪ - ಸ್ಯಾಮ್ಯುಲ್ ಎಡಿಸನ್  
 ಅಮ್ಮ - ನ್ಯಾನ್ಸಿ ಎಡಿಸನ್  
 ಕಣ್ಮರೆ - 1931ನೇ ಇಸವಿ ಅಕ್ಟೋಬರ್ 18

ಅಪ್ಪ ಸ್ಯಾಮ್ಯುಲ್ ಕೊಲ್ಲ (Blacksmith) ಪಣಿಕಾರ. ಅಯಿಂಗಡ ಮನೆ  
 ಒರ್ ಪೊಳೆ ಪಿಂಞ ಸರೋವರ ಕೂಡಾನ ಜಾಗತ್ ಇಂಜತ್. ಅಲ್ಲಿ ದಿನಾ  
 ಹಡಗ್ ಓಡಿಕಳ್ಚಂಡೇ ಇಪ್ಪಯಿಂಜತ್. ಚುಮ್ಮಿ ಕುಂಞಿ ಆಲ್ವ ಅಳ್ತಂಡ್  
 ಅದಾನ ನೋಟಿಯಂಡೇ ಇಪ್ಪಯಿಂಜತ್. ಅದಾನ ನೋಟುವಕ ಅದೆಲ್ಲ ಪೋಯಿತ್  
 ಪ್ರಪಂಚತಾರ ಇಂಞೋರ್ ಮೂಲೆಕ್ ಎತ್ತುವೆನ್ನೋಂದ್ ಗೇನ ಮಾಡುವ  
 ಯಿಂಜತ್. ತಕ್ಕ್ ಬಪ್ಪಕಲೇ ಎಲ್ಲಾರನೋ ಪ್ರಶ್ನೆ ಕೇಪಯಿಂಜತ್. ಅಪ್ಪ, ಅಮ್ಮ  
 ಇಲ್ಲತ ಪೋಚೇಂಗಿ ಹಳ್ಳಿಕಾರಳ, ಬೋರೆ ಜನಳ ಕೇಪಯಿಂಜತ್. ಅಯಿಂಗ  
 ಗೊತ್ತಲೆ ಎಣ್ಣೆಚೇಂಗಿ 'ಎನ್ನ್ಯಾಂಗ್ ಗೊತ್ತಲೆ?' ಎಣ್ಣೆಯಂಡ್ ಕೇಪಯಿಂಜತ್.  
 ಅವೊಂಡ ಮಂಡೆ ಶರೀರಕಿಂಜ ಬಣ್ಣ ಇಂಜಾಂಗ್ ಡಾಕ್ಟರ್ ಕುಂಞಿರ ಮಿದ್ಲಲ್  
 ತೊಂದರೆ ಇಕ್ಕೊಂದ್ ಎಣ್ಣೆತಿಂಜತ್. ಕ್ಣ್ಣ ದುಂಬ ಪ್ರಶ್ನೆ ಕೇಪದ್ ಕಂಡಿತ್  
 ಹಳ್ಳಿರ ಜನ ಕ್ಣ್ಣಂಡ ಮಂಡೆಲ್ ತೊಂದರೆ ಉಂಡೇಂದೇ ಎಣ್ಣೆವಯಿಂಜತ್.

ಅಂವೊ ಮೂಂದ್ ಬಯತ್‌ರಂವೊನಾಯಿತಿಪ್ಪಕ ಮಿಲಾನ್ ದಾಟಿತೇ ಒರ್ ಪುದಿಯ ಪೊನ್ನರ ಗಣಿಕ್ ಜನ ಪೋಪದ್ ಕಾಂಬಯಿಂಜತ್. ಓರೊಮ್ಮ ಜನ ಗಾಡಿಲ್ ಬಂದಯಿಂಗ ಅಯಿಂಡ ಮನರ ಪಕ್ಕ ನಿಪ್ಪಾಚಿಟ್ಟಿತ್, ಅಲ್ಲಿಯೇ ಒಳಿವಯಿಂಜತ್. ಅಕ್ಕ ಚುಮ್ಮಿ ಆಲ್ಫ ಅಯಿಂಗಳ ಎಲ್ಲಿಂಜ ಬಂದಿಯೆ? ಎಲ್ಲಿಕ್ ಪೋಪೊ? ಎನ್ನಾಂಗ್ ಪೋಪೊ? ಎಣ್ಣಿಯಂಡ್ ಪ್ರಶ್ನೆರ ಮೇಲೆ ಪ್ರಶ್ನೆ ಕೇಪಯಿಂಜತ್. ಅದಾನ್ ಕಂಡಿತ್ ಜನಕ್ ಆಶ್ಚರ್ಯ ಆಪಯಿಂಜತ್. ಅವೊಂಗ್ ಗೇನ ಶಕ್ತಿ ದುಂಬ ಇಂಜತ್. ಬಲ್ಯಂವೊ ಆನ ಪಿಂಞ ಅವೊಂಡ ಪೊಂಡರ ಕೂಡ ಎಣ್ಣಾ ಚಿಲೊ-ಅಕ್ಕ ನಂಗ ಕಾಂಗತ ಬಲ್ಯ ಪ್ರಪಂಚ ಇಂಞೂ ಉಂಡೇಂದ್ ಗೇನ ಮಾಡುವ ಯಿಂಜ. ಆ ಗಾಡಿಯೆಲ್ಲ ಎಲ್ಲಿಕ್ ಪೋಪ, ಅದಾಂಡ ಒಳ್‌ಲ್ ಅಳ್‌ತಂಡ್ ನೋಟಂಡೂಂದ್ ಆಪಯಿಂಜತ್‌ಂದ್. ಅಂಜಿ ಬಯತ್‌ಲ್ ಆಲ್ಫ ಒರ್ ಚಿರಿಯ ಮನುಷ್ಯನೇ ಆಯಿತಿಂಜತ್. ಒಬ್ಬನೇ ಎಲ್ಲೆಲ್ಲಿಯೋ ತಿರುವಯಿಂಜತ್. ಕಾಡ್‌ಂಜ ಜನ ಬಲ್ಯ ಬಲ್ಯ ಮರ ಪೊರ್‌ತಂಡ್ ಬಂದಿತ್ ಹಡಗ್‌ಕ್ ಇಡುವಯಿಂಜತ್. ಕೆಲಸಕಾರ ಓರೊಮ್ಮ ಪಾಡಿಯಂಡೇ ಕೆಲಸ ಮಾಡುವಯಿಂಜತ್. ಆ ಪಾಟ್‌ನ ಕೇಟಿತೇ ಆಲ್ಫ ಪಡ್‌ಚಿತ್, ಜೋರಾತೆ ಪಾಡುವಯಿಂಜತ್. ಆಚೇಂಗಿ, ಮನಲ್ ಆ ಪಾಟ್ ಪಾಡುವದ್ ಅಪ್ಪವ್ವಂಗ್ ಕುಸಿಯಿಲ್ಲೇಂದ್ ಅರಾಂಜಂಡ್, ಅಂವೊ ಆ ಪಾಟ್‌ನ ಮನಲ್ ಪಾಡುವಯಿಂಜಿಲೆ. ಮಾನಸಿಕವಾಯಿತ್ ಆ ಚಿರಿಯ ಕ್ಷಣ್ಣ ಅಚ್ಚಕ್ ಬೊಳ್‌ಂದಿತಿಂಜತ್. ಎಲ್ಲ ವಿಷಯತೂ ಕುತೂಹಲ ಅಂವೊಂಗ್. ಒರ್ ದಿವಸ ಕೋಳಿ ಕಾಪ್‌ಲ್ ಅಳ್‌ತದ್ ಕಂಡತ್. ಪಿತ್ಯಾಂದ್ ಅಂವೊಂಡ ಅವ್ವ ನೋಟುವಕ, ಇಂವೊನೂ ಕೋಳಿ ಮುಟ್ಟಿನ ಬೆಚ್ಚಂಡ್ ಅಳ್‌ತಿತ್! ಎಂತ ಮಾಡಿಯಂ ಡುಳ್ಳಿಯಪ್ಪಾಂದ್ ಅವ್ವ ಕೇಪಕ, ಕೋಳಿ ಮರಿಕ್ ಮುಟ್ಟಿರೊಳ್‌ಂಜ ಪೊರ್‌ಮೆ ಬಪ್ಪಕ್ ಸಹಾಯ ಮಾಡಿಯಂಡುಳ್ಳೊ ಎಣ್ಣಾ ಚಿ. ಆ ಕೆಲಸ ನಂಗಕ್ ಮಾಡುವ ಕಯ್ಯುಲೆಪ್ಪ ಎಣ್ಣಾ ಚಿ ಅವ್ವ. ಕೋಳಿ ಮಾಡುವಕ, ನಂಗಕ್ ಎನ್ನಾಂಗ್ ಮಾಡುವ ಕಯ್ಯುಲೇಂದ್ ಕೇಟಿತ್. ಇನ್ನನೆ, ಧಾಮಸ್ ಆಲ್ಫ ಎಡಿಸನ್, ಒರ್ ವಿಜ್ಞಾನಿರ ಲಕ್ಷಣ ಕಾಟಿಯಂಡ್ ಬೊಳ್‌ಂದಂಡಿಂಜತ್. 1854 ಲ್ ಮಿಚಿಗನ್ ಎಣ್ಣು ವ ಊರ್‌ಕ್ ಬಾತ್. ಅಲ್ಲಿ ಸ್ಯಾಮ್‌ಲ್ ಎಡಿಸನ್ ಪುದಿಯ ವ್ಯಾಪಾರ ಸುರು ಮಾಡ್‌ಚಿ. ಕಾಡ್‌ಂಜ ಮರ ಎಡ್‌ತ ಬಂದಿತ್ ವ್ಯಾಪಾರ ಮಾಡುವೊ, ತರಕಾರಿ ಬೊಳ್‌ತಿತ್ ಮಾರುವೊ ಇನ್ನತೆಲ್ಲ ಮಾಡಿಯಂಡಿಂಜತ್. ಅದೇ ಸಮಯತ್ ಅಪ್ಪಂಗ್ ಪಣ ಸಂಪಾದನೆಕ್ ಇಂಞಾಸೋರ್ ಬಟ್ಟೆ ತೋಂದ್‌ಚಿ. ನೂರಡಿ ಎತ್ತರತರ ಮರತರ ಅಟ್ಟ ಮಾಡಿತ್, ಅಲ್ಲಿಕ್ ಬಂದ ಪ್ರವಾಸಿಯಕ್ ಸುತ್ತ ಪ್ರಕೃತಿರ ಚಾಯಿ ಬೋಜ ನೋಟುವಕ್ ಅನುಕೂಲ ಮಾಡ್‌ಚಿ. ಪ್ರತಿ ಒಬ್ಬಂಗ್ ಇರುವತ್ತಂಜಿ ಸೆಂಟ್ಸ್

ಟಿಕೆಟ್ ಮಾಡ್‌ಚಿ. ಟಿಕೆಟ್ ಕೊಡ್‌ಪಂವೊ ಎಟ್ತ್ ಬಯತ್‌ರ ಆಲ್ವ. ಇದ್‌ಲ್ ಸುಮಾರ್ ದುಡ್ಡ್ ಸಂಪಾದನೆ ಮಾಡ್‌ಚಿ. ಅಲ್ಲಿಂಜ ಚೆನ್ನ ದಿವಸತ್ ವ್ಯಾಪಾರ ಕಮ್ಮಿ ಆಚಿ. ಇದ್ ಬುಟ್ಟಿತ್ ಬೋರೆ ವ್ಯಾಪಾರ ಮಾಡಂಡೂಂದ್ ಗೇನ ಮಾಡ್‌ನ ಆಲ್ವ, ಗಾಡಿಲ್ ಮನೆ ಮನೆ ತರಕಾರಿ ಪಣ್ಣ್ ಮಾರುವಕ್ ಕೂಡ್‌ಚಿ. ಒರ್ ಕಾಲತ್ ಆರ್‌ನೂರ್ ಡಾಲರ್ ಸಂಪಾದನೆ ಮಾಡಿತ್ ಅವ್ವಂಡ ಕೈಲ್ ಕೊಡ್‌ತತ್. ಇದ್‌ಂಡೆಡೆಲ್ ರಸಾಯನ ಶಾಸ್ತ್ರತ್ ಆಸಕ್ತಿ ಬಂದಿತ್, ಪುಸ್ತಕ ಓದಿತ್, ಎಂತೆಲ್ಲೊ ಕೆಮಿಕಲ್ಸ್ ಎಡ್‌ತ ಬಂದಿತ್, ಪ್ರಯೋಗ ಮಾಡುವಕ್ ಕೂಡ್‌ಚಿ. ಪಕ್ಷಿ ಪಾರುವಕ ಮನುಷ್ಯಗೆನ್ನ್‌ಂಗ್ ಪಾರುವಕ್ ಕಯ್ಯಲೆಂದ್ ಗೇನ ಮಾಡಿತ್, ಅವೊಂಡ ಫ್ರೆಂಡ್‌ಕ್ ಎಂತೆಲ್ಲೊ ಪೊಡಿ ಮಿಶ್ರ ಮಾಡಿತ್ ಕುಡ್‌ಪ್‌ಚಿಟ್ಟಿತ್, ಅವೊಂಡ ಶರೀರ ಗಾಳಿಕಿಂಜ ತೂವೆ ಆಚೀಂಗಿ, ಅಂವೊ ಪಾರೋಲೂಂದ್ ಗೇನ ಮಾಡಿತ್ ಪ್ರಯೋಗ ಮಾಡಿತಾಪದು, ಫ್ರೆಂಡ್‌ಕ್ ಸೊಖ್ತಿ ಇಲ್ಲತಾಚಿ, ಚೆರಿಯ ವಿಚ್ಚಾನಿಕ್ ಪೊಯ್ತ್ ಕಟ್‌ಚಿ. ಸ್ಕೂಲ್‌ಕ್ ಕೂಟಿತಾಪದು, ಅಲ್ಲಿ ಉಪಾದ್ರಿ ಎಣ್ಣುವ ಪಾಠ ಇಂವೊಂಗ್ ಅರ್ಥ ಆಪ್‌ಲೆ. ಇಂವೊಂಡ ಒಳ್‌ಲುಳ್ಳ ಬುದ್ಧಿವಂತಿಕೆ ಉಪಾದ್ರಿಕ್ ಪೊರಾಮೆ ಬಲಿಪಕ್ ಗೊತ್ತಾಕತೆ, ಸ್ಕೂಲ್‌ಕ್ ಇನ್ಸ್‌ಪೆಕ್ಟರ್ ಬಂದಲ್ಲಿ, ಈ ಕಣ್ಣ ಬೋರೀ ಜಡ್ಡ. ಇಂವೊನ ಸ್ಕೂಲ್‌ಲ್ ಬೆಚ್ಚಿವದ್ ಸೆರಿ ಅಲ್ಲಾಂದ್ ಎಣ್ಣೆಚಿ. ಆ ತಕ್ಕನ ಕೇಟ ಆಲ್ವಂಗ್ ಬೇಚಾರಾಯಿತ್, ಅವ್ವಂಡ ಕೂಡ ಬಂದಿತೆಣ್ಣೆಚಿ, ನಾಳೆಂಜ ನಾನ್ ಸ್ಕೂಲ್‌ಕ್ ಕಾಲ್‌ಡುಲೆಂದ್. ಅವ್ವ ಮೋಂವೊನ ಚಾಯಿಲ್ ಅರ್ಥ ಮಾಡಿಯಂಡಿತಿಂಜತ್. ಅಂವೊ ಚೆನ್ನಂಗ್ ನಿಧಾನ ಪ್ರಕೃತಿಕಾರ, ಅಂವೊಂಗ್ ಪುರ್‌ಡ್ ಕೊಡ್‌ಕಂಡೂಂದ್ ಅರ್‌ಂಜ ಅವ್ವ, ತಾನೇ ಉಪಾದ್ರಿ ಆಚಿ. ತಾನ್ ಓದಿತೂ, ಪಡ್‌ಚಿತೂ, ಅನುಭವತೂ ಅರ್‌ಂಜ ಪ್ರತಿಯೋರ್ ವಿಷಯತ್‌ನೋ ಮೋಂವೊಂಗ್ ಎಣ್ಣೆ ಕೊಡ್‌ತತ್, ಎಳ್‌ದ್‌ಚಿಟ್ಟಿತ್. ಅಂವೊಂಡ ಎಳ್ತ್ ಪ್ರಿಂಟ್ ಮಾಡ್‌ನಾಂಡ ಮಾದರಿ, ಅಚ್ಚಕ್ ಚಾಯಿಂಜತ್. ಅಂವೊ ಬಲ್ಯಂವೊ ಆನ ಪಿಂಞ ಇಂದ್ ನಾನೆಂತ ಆಯೆ, ಆದ್‌ಂಗ್ ನಾಡ ಅವ್ವನೇ ಕಾರಣಾಂದ್ ಎಣ್ಣುವ ಯಿಂಜತ್. ಅಂವೊ ಓದುವಕ, ಪ್ರಯೋಗ ಮಾಡುವಕ ಎಲ್ಲ ಅಂವೊಂಡ ಕೂಡೇ ಇಂಜತ್. ನ್ಯಾನ್ಸಿ ಎಡಿಸನ್ ಬೋರೀ ಶಿಕ್ಷಣ ಮಾತ್ರ ಆಲ್ವ, ಅಂವೊಂಡ ಒಳ್‌ಲ್ ಪ್ರಾಮಾಣಿಕತೆ, ನಿಷ್ಠೆ, ಸತ್ಯ, ಧರ್ಮ, ಮನುಷ್ಯತ್ವ - ಇನ್ನೆತ ನಲ್ಲ ಗುಣತ್‌ನ ಬಿತ್ತಿತ್ ಬೊಳ್‌ತ್‌ಚಿ. ಮೋಂವೊ ಜಡ್ಡನಾ, ಬುದ್ಧಿವಂತನಾಂದೇ ಅರ್ಥ ಆಗತೆ ಒದ್ದಾಡುವಯಿಂಜ ಮೋಂವೊಂಡ ಬೊಳಚಿ ಕಂಡಿತ್ ಭಾರೀ ಕುಸಿಯಾಚಿ. ಪನ್ನೆರಂಡನೆ ಬಯತ್‌ಲ್ ನಾನ್ ಎಂತೆಂಗಿ ಮಾಡಂಡು, ದುಡ್ಡ್ ಸಂಪಾದನೆಯೂ ಆಂಡು, ಬದ್‌ಕ್‌ಲ್ ಸಾಧನೆಯೂ ಆಂಡೂಂದ್ ಗೇನ ಮಾಡ್‌ಚಿ ಆಲ್ವ. ಅವ್ವನ

ಕೇಟತ್ ನಾಕ್ ಕೆಲಸ ಕೊಟ್ಟುಲೆಯಾಂದ್. ನೀನ್ ಸಂಪಾದನೆ ಮಾಡುವಕ್ ಇಂಞೂ ಚೆರಿಯಂವೊ, ಎಂತ ಮಾಡುವಿಯಾಂದ್ ಕೇಟತ್. ಟ್ರೈನ್‌ಲ್ ಪೇಪರ್, ಪುಸ್ತಕ ಮಾರುವಿ, ಡೆಟ್ರಾಯಿಟ್ ಸಿಟಿಕ್ ಟ್ರೈನ್ ಎತ್ತುವಕ, ಅಲ್ಲಿಯತೆರ ಸಾರ್ವಜನಿಕ ಗ್ರಂಥಾಲಯತ್ ನಾಕ್ ಕಯ್ಯುವಚ್ಚಕ್ ಪುಸ್ತಕ ಓದುವಿ, ಪುನಃ ಅದೇ ಟ್ರೈನ್‌ಲ್ ವಾಪಾಸ್ ಬಪ್ಪೀಂದೆಣ್ಣ್ ಚಿ. ಅವ್ವ ಅಂವೊಂಡ ಈ ಬದ್‌ಕೆರ ಬಟ್ಟೆಲ್ ಬಪ್ಪನ್ನತ ಕಷ್ಟ ನಷ್ಟ ಎಲ್ಲ ಎಣ್ಣೆಕೊಡ್ತತ್. ಎನ್ನನೆಲ್ಲೋ ಪ್ರಯತ್ನ ಪಟ್ಟಿತ್ ಗ್ರಾಂಡ್ ಟ್ರಿಂಕ್ ರೈಲ್ವೆಲ್ ಪೇಪರ್, ಪುಸ್ತಕ, ತಿಂಡಿ, ಪಣ್ಣ್ - ಇನ್ನತಾನ ಮಾರುವಕ್ ಅನುಮತಿ ಪಡ್‌ಂದತ್. ಅಲ್ಲಿಂಜ ಪೊಲಾಕ ಆರ್ ಗಂಟೆಕ್ ಎದ್ದಿತ್ ಏಳ್ ಗಂಟೆರ ಟ್ರೈನ್‌ಕ್ ಪೋಯಿತ್, ಅದ್ ಡೆಟ್ರಾಯಿಟ್‌ಕ್ ಎತ್ತುವಕ ಪತ್ತ್ ಗಂಟೆ. ಪತ್ತ್ ಗಂಟೆಂಜ ಲೈಬ್ರರಿಲ್ ಅಳಾತಂಡ್, ಬೈಟ್ ಆರ್ ಗಂಟೆಕೆತ್ತನೆ ಓದಿತ್ ಆರೆರೆ ಗಂಟೆರ ಟ್ರೈನ್‌ಕ್ ವಾಪಾಸ್ ಬಪ್ಪಯಿಂಜತ್. ಬುದ್ವೋವಕ ಪನ್ನೊಂದ್ ಗಂಟೆ ಆಪಯಿಂಜತ್. ಪನ್ನೆರಂಡ್ ಬಯತೆರ ಕಣ್ಣಿಂಗ್ ಇದ್ ನೇರಾಯಿತೂ ಕಷ್ಟತೆರ ಕೆಲಸವೇ. ಟೆಲಿಫೋನ್‌ರ ವಿಷಯತ್ ಆಸಕ್ತಿ ಕಂಡಿತ್ ಧಾಮಸ್ ಆಲ್ಬ ಅಂವೊಂಡ ಮನೆಕೂ, ಅಂವೊಂಡ ಫ್ರೆಂಡ್‌ರ ಮನೆಕೂ ವೈರ್ ಕನೆಕ್ಟ್ ಮಾಡಿತ್ ಅಪ್ಪರಿಪ್ಪರ ತಕ್ಕ್ ಪರೆವನೆಕೆ ಮಾಡ್‌ಚಿ.

1861 ಲ್ ಈ ಕುಂಞಿವಿಜ್ಞಾನಿ ಟ್ರೈನ್‌ಲೇ ಪತ್ರಿಕೆ ಪ್ರಿಂಟ್ ಮಾಡುವಕ್ ಕೂಡ್‌ಚಿ. ಸಂಪಾದಕ, ಲೇಖಕ, ಏಜೆಂಟ್... ಎಲ್ಲ ಅಂವೊನೆ. ಒಬ್ಬ ಇಂಗ್ಲಿಷ್ ಇಂಜಿನಿಯರ್ ಒರ್ ದಿನ ಆ ಟ್ರೈನ್‌ಲ್ ಪೋನಂವೊ ಇದ್‌ನ ನೋಟಿತ್, ಕುಸಿಯಾಯಿತ್, ಆಯಿರ ಪ್ರತಿ ಪ್ರಿಂಟ್ ಮಾಡ್‌ಚಿಟ್ಟಿತ್, ಪ್ರಪಂಚತೆರ ಮೂಲೆ ಮೂಲೆಕ್ ಎತ್ತ್‌ಚಿಟ್ಟಿತ್. ಅದ್ ಪ್ರಪಂಚತೆಲೇ ಆದ್ಯೆ "ನಡಪ ಪತ್ರಿಕೆ" (Moving Paper) ಆಯಿತ್ತಿಂಜತ್. ಟ್ರೈನ್‌ಲೇ ಅಂವೊಂಡ ಪ್ರಯೋಗಶಾಲೆಯೂ ಇಂಜತ್. ಅದೊಮ್ಮೆ ತಿತ್ ಕತ್ತಿಯಂಡ್, ಪ್ರಪಂಚತೆಲೇ ಆದ್ಯೆ ನಡಪ ಪ್ರಯೋಗಶಾಲೆ (Moving Laboratory) ಪಿಂಞ 'ನಡಪ ಪತ್ರಿಕೆ' ದಂಡೂ ಇಲ್ಲತಾಚಿ. ರೈಲ್ವೆಕಾರ ಆಲ್ವಂಡ ಪ್ರಯೋಗಶಾಲೆನೋ, ಪ್ರಿಂಟಿಂಗ್ ಪ್ರೆಸ್‌ನೋ ಬಲೆಚಿ ಕನ್‌ಚತ್. ಅಲ್ಲಿಂಜ ಟೆಲಿಗ್ರಾಫ್ ಆಪರೇಟರ್ ಆಯಿತ್ ಕೂಡಿಯಂಡ್, ಅಂವೊನೇ ಸ್ವಂತ ಟೆಲಿಗ್ರಾಫ್ ಮೆಷಿನ್ ಮಾಡ್‌ಚಿ. ಬಯ್ಯಂಜಿ ರೈಲ್ವೆ ಸ್ಟೇಷನ್‌ಲ್ ನೈಟ್ ಆಪರೇಟರ್ ಆಯಿತ್ ಕೆಲಸ ಮಾಡ್‌ಚಿ. ಸಂಶೋಧಕಂಗೆ ಎಲ್ಲಿ ಪೋಚಿಂಗೂ ಕಂಡ್‌ಪುಡಿಪದೇ ಗೇನ. ಅಲ್ಲಿ ಒರ್ ಗಂಟೆಕೊಮ್ಮೆ ಅಂವೊ ಇಂಜ ಸ್ಟೇಷನ್‌ಂಜ ಮಿಂಞಾತೆರ ಸ್ಟೇಷನ್‌ಕ್ ಮೆಸೇಜ್ ಅಯೆಕಂಡು. ಅಲ್ಲಿ ಒರ್ ಗಡಿಯಾರ ಎಡ್‌ತ ಬಂದಿತ್ ಟೆಲಿಗ್ರಾಫ್ ವೈರ್‌ಕ್ ಕನೆಕ್ಟ್ ಕೊಡ್‌ತಿತ್, ಬೈಟ್ ಇಂವೊ ವರುಪಯಿಂಜತ್.



ಗಂಟೆ ಪೂಯ್ಯವಕ, ಮೆಸೇಜ್ ಇಂಞೋರೊ ಸ್ಪೇಷನ್‌ಕ್ ಎತ್ತುವಯಿಂಜತ್. ಇಂವೊ ಚಾಯಿಲ್ ವರುವಯಿಂಜತ್. ಕೆಲಸ ಸೆರಿಕ್ ಆಯಂಡಿಂಜಕಲ್ಲೂ, ಟೆಲಿಗ್ರಾಫ್ ಆಪರೇಟರ್ ನೈಟ್ ಶಿಫ್ಟ್‌ಲುಳ್ಳಂವೊ ವರುವ ಎಣ್ಣಿಯಂಡ್ ಕೆಲಸ ಕಳಂದಂಡತ್. ಭೌತಶಾಸ್ತ್ರ, ರಸಾಯನಶಾಸ್ತ್ರಕ್ ಸಮ್ಮಂಧಪಟ್ಟಿನ್ನತ ಪುಸ್ತಕ ಓದಿತ್ ಅರ್ಥ ಮಾಡಿಯಂಡ್ ಪ್ರಯೋಗ ಮಾಡುವೊ, ಪುದಿಯ ಪುದಿಯ ಯಂತ್ರ ಕಂಡ್‌ಪುಡಿವೊ, ಇನ್ನತದೇ ಹವ್ಯಾಸ ಥಾಮಸ್ ಆಲ್ವ ಎಡಿಸನ್‌ಕ್. ಅಂವೊ ಅಂವೊಂಡ ಬದ್‌ಕ್‌ಲ್ ಪತ್ತಾಯಿರಕಿಂಜ ಏರ ಪುಸ್ತಕ ಓದ್‌ತಿಂಜತ್‌ಲೊ. ಪಣಿರ ಮಧ್ಯ ಮಧ್ಯ ಸಮಯ ಮಾಡಿಯಂಡ್, ದಿನಕ್ ಮೂಂದ್ ಪುಸ್ತಕ ಓದುವಯಿಂಜತ್. ಸುಮಾರ್ ಪಳೆಯ ಸಂಶೋಧನೆಲ್ಲ ಇಂಞಚ್ಚಕ್ ಚಾಯಿ ಮಾಡ್‌ಚಿ. ಉದಾರಣೆಕ್ ಟೈಪಾರೈಟರ್, ಟೆಲಿಫೋನ್, ಟೆಲಿಗ್ರಾಫ್ ಇಂಞೂ ಸುಮಾರೆಲ್ಲ ಯಂತ್ರತಾನ ಚಾಯಿ ಕೂಟ್‌ಚಿ.

1877ನೇ ಇಸವಿಲ್ ತಕ್ಕ್ ಪರೆವ ಮಿಷಿನ್ ಕಂಡ್‌ಪುಡ್‌ಚಿತ್. ಎಣ್ಣಿಕ್ ಇಂದೇತಾರ ಟೇಪರೆಕಾರ್ಡರ್. ಅದಾನ ಕಂಡಿತ್ ಅಂದೇತಾರ ಜನಕ್ ಆಶ್ಚರ್ಯ ಆಚಿ. ಆ ಮಿಷಿನ್‌ನ ಅಮೇರಿಕಾತಾರ ಅಧ್ಯಕ್ಷಂಗ್ ಕಾಟುವಕ್ ಟೆಲಿಗ್ರಾಂ ಮಾಡಿತ್ ಬಪ್ಪಕೆಣ್ಣೆಚಿ. ಅದ್ ಪ್ರಪಂಚತಾರ ಆದ್ಯ ಪೋನೋಗ್ರಾಫ್. 1876 ಲ್ ಚಾರ್ಲ್ಸ್ ಬ್ರಶ್ ಎಣ್ಣಿವಂವೊ ಲೈಟ್ ಕಂಡ್‌ಪುಡಿಚಿತಿಂಜತ್. ಆಚೇಂಗಿ, ಅದ್ ಕ್ಯಾಂಡಲಾರ ಮಾದಾರಿ ಕತ್ತಿತ್ ತೇಂದ್ ಪೋಪಯಿಂಜತ್. ಲೈಟ್ ಒರ್ ಸದ್ದಾ ಬಪ್ಪಾಂಡ ಜೊತೆಕ್ ಕಣ್ಣೆಕ್ ನೊಂಬಲ ಆಪಯಿಂಜತ್. ಎಡಿಸನ್ ಅದಂಡ ಮೇಲೆ ಸಂಶೋಧನೆ ಸುರು ಮಾಡಿತ್, ಬಲ್ಬ್ ಕಂಡ್‌ಪುಡ್‌ಚಿತ್. ಅದಂಗಾಯಿತ್ ಅದೆಚ್ಚೆಕೋ ದುಡ್ಡಾ ಖರ್ಚ್ ಆಚಿ. ಇಡೀ ದಿನ ವರುವಯಿಂಜಿಲೆ. ವರ್ಕ್ ಬಪ್ಪಕ, ಟೇಬಲಾರ ಮೇಲೆ ಚೆನ್ನ ನೇರ ಕವುಂಜಂಡ್ ಕಣ್ಣೆ ಮುಚ್ಚಿವೊ, ಪುನಃ ಎದ್ದಿತ್ ಸಂಶೋಧನೆ ಮಾಡುವೊ. ಬಲ್ಬ್ ಎನ್ನೋ ಮಾಡ್‌ಚಿ. ಆಚೇಂಗಿ, ಅದ್ ಜಾಸ್ತಿ ನೇರ ಕತ್ತುವಯಿಂಜಿಲೆ. 1879 ಅಕ್ಟೋಬರ್ 21 ಲ್ ಅಂವೊಂಡ ಬಲ್ಬ್‌ಕ್ ಕರೆಂಟ್ ಪಾಸ್ ಮಾಡ್‌ಚಿ. ಅದ್ ಕತ್‌ಚಿ. ಅದೆಚ್ಚೆಕ್ ನೇರ ಕತ್ತುವಂದ್ ನೋಟುವಕ್ ಕಣ್ಣೆ ಮುಚ್ಚಿತ್ ಅಳತತ್. ನಾಪತ್ತಂಜಿ ಗಂಟೆ ಕತ್‌ಚಿ. ಅದಾನ ನೂರ್ ಗಂಟೆ ಕತ್‌ಚಿಡಂಡೂಂದ್ ಪುನಃ ಗೇನ ಮಾಡಿ ಮಾಡಿ, ಅದಂಗುಳ್ಳ ಫಿಲಮೆಂಟ್, ಟಂಗ್ಸ್ಟನ್ ಕಂಡ್‌ಪುಡ್‌ಚಿತ್, ಎಲೆಕ್ಟ್ರಿಕ್ ಬಲ್ಬ್ ಮಾಡ್‌ಚಿ. 1889 ಲ್ ಪ್ಯಾರಿಸ್ ಎಕ್ಸಿಬಿಷನ್‌ಲ್ ಅಂವೊಂಡ ಸಿನೇಮ ಕಾಟಲಾಕ್ ಜನ ದುಂಬುವಯಿಂಜತ್. ಸಿನೆಮಾ ಪ್ರೊಜೆಕ್ಟರ್ ಕಂಡ್‌ಪುಡ್‌ಚಿತ್ ಜನಕ್ ಸಿನೆಮಾ ಕಾಟ್‌ಚಿ. ಅಕ್ಕತಾರ ಸಿನೆಮ ಇಕ್ಕತಾರ ಮಾದಾರಿ ಇಂಜಿಲೇಂಗೂ, ಅದ್ ಪ್ರಪಂಚತೇ ಆದ್ಯ ಕಿನೆಟೋಸ್ಕೋಪ್ (ಪ್ರೊಜೆಕ್ಟರ್‌ರನ್ನತ ಮಿಷಿನ್) ಪಿಂಞ ಆದ್ಯ ಅನ್‌ಂಗಾಟ

ಚಿತ್ರ (Motion Picture) ಆಚಿ. ಚೆನ್ನ ಸಮಯ ಪಾರುವ ಮೆಷಿನ್‌ರ ಮೇಲೆ ಸಂಶೋಧನೆ ಮಾಡಿತ್, ಒರ್ ಹೆಲಿಕಾಪ್ಟರ್ ಮಾಡ್‌ಚಿ. ಅದ್ ಸೆರಿ ಆಯಿಲೆ. ವೈರಲೆಸ್ ಟೆಲಿಗ್ರಾಫ್ ಮಾಡ್‌ಚಿ. ಅಲ್ಲಿಂಜ ಬ್ಯಾಟರಿ ಕಂಡ್‌ಪುಡ್‌ಚಿತ್. ಇಂದೆಕೂ ಚಾರ್ಜ್ ಮಾಡುವ ಬ್ಯಾಟರಿಲೇ ಎಲ್ಲ ವಾಹನವೂ ಓಡುವ. ನಂಗೆಲ್ಲ ಇಂದ್ ಪೋನ್ ಮಾಡುವಕ "ಹಲೊ" ಎಣ್ಣುವಲ್ಲ, ಅದೂ ಎಡಿಸನ್‌ರದೇ ಕೊಡುಗೆ. ಎಕ್ಸ್‌ರೇ ಮೆಷಿನ್. ಚಾಯಿಕೂಟುವಕ್ ಸುಮಾರ್ ಸಂಶೋಧನೆ ಮಾಡ್‌ಚಿ. 1914 ಲ್ ಆದ್ಯ ಪ್ರಪಂಚಿ ಮಾಪಡೆಲ್ ಅಮೇರಿಕಾ ಎಡಿಸನ್‌ರ ಸಹಾಯ ಪಡ್‌ಂದತ್. ಅಕ್ ಅಂವೊಂಗ್ ಎಕ್‌ವದ್ ಬಯತ್, ಆಚೇಂಗಿಯೂ ಹಡಗ್‌ಲೂ ಸಬ್‌ಮೆರಿನ್‌ಲೂ ಪ್ರಯಾಣ ಮಾಡಿತ್, ತೊಂದರೆ ಉಂಡೇಂಗಿ ಸಹಾಯ ಮಾಡುವ ಯಿಂಜತ್. ಎಂಬತ್ತ ನಾಲನೇ ಬಯತ್‌ಲೂ ರಬ್ಬರ್‌ರ ವಿಷಯತ್ ಸಂಶೋಧನೆ ಮಾಡಿಯಂಡಿಂಜತ್. ನಾನಿಂಞೂ ಪದ್‌ನಂಜಿ ಪದ್‌ನಾರ್ ಕಾಲ ಸಂಶೋಧನೆ ಮಾಡಿತ್, ನಾಡ ಮಂಡೆಲುಳ್ಳ ಕಾರ್ಬಾರೆಲ್ಲ ತೇರೊಂಡು ಎಣ್ಣು ವಯಿಂಜತ್. ನಿಂಗ ಎಕ್ ನಿವೃತ್ತಿ ಆಪೋಂದ್ ಕೇಟತೇಂಗಿ, ವಿಜ್ಞಾನಕ್ ರಜ ಇಲ್ಲೆ, ನಾನ್ ಚಾವಾಂಗ್ ಒರ್ ದಿನ ಮಿಂಞ ಮಾತ್ರವೇ ನಿವೃತ್ತಿಯಾಪೋಂದ್ ಎಣ್ಣು ವ ಯಿಂಜತ್. ಆಚೇಂಗೂ ಎಂಬತ್ತ ನಾಲನೇ ಬಯತ್‌ಲ್ ಅಂವೊಂಗ್ ಕಯ್ಯತಾಚಿ. ಶರೀರಕ್ ಎಕ್ ಕಯ್ಯತಾಚಿ, ಇಂಞ ಒಂದೂ ಕೆಲಸ ಮಾಡುವಕ್ ಕಯ್ಯಲೇಂದ್ ಗೊತ್ತಾಚಿ. ಇಂಞ ಈ ಪ್ರಪಂಚತ್ ಇಂಜಿತ್ ಪ್ರಯೋಜನ ಇಲ್ಲೇಂದ್ ಗೇನ ಮಾಡ್‌ಚಿ ಎಡಿಸನ್. 1931ನೇ ಅಕ್ಟೋಬರ್ 18 ಲ್ ಈ ಅದ್ಭುತ ವಿಜ್ಞಾನಿ ಲೋಕ ಬುಟ್ಟಿತ್. ನಾನೂರ್ ಪಾಳೆಲ್ ಎಳ್ಲನನ್ನತ ಚರಿತ್ರನ ನಾಲ್ ಪಾಳೆಲ್ ತೇಪಕ್ ಕಯ್ಯಲೆ.

ಏದೇ ವಿಜ್ಞಾನಿಯಾಡ್, ಬಲ್ಯ ವ್ಯಕ್ತಿಯಳೇ ಆಡ್, ಅಯಿಂಡ ಜೀವನ ಚರಿತ್ರಲ್ ನೋಟಿ, ಸಾಧನೆ ಮಾಡುವಕ್ ಅದೆಚ್ಚಕ್ ಕಷ್ಟಪಟ್ಟಿತಿಪ್ಪ. ತ್ಯಾಗ ಮಾಡಿ ತಿಪ್ಪಾಂದ್. ಬೋರೀ ಸುಖಿತ್‌ಲ್ ಒರೂ ಸಾಧನೆ ನಡಪ್‌ಲೆ. ನಿಂಗಕ್ ಸಾಧನೆಕ್ ಒರ್ ಗುರಿ ಇರಂಡು, ಅದ್‌ಂಗ್ ಬಟ್ಟೆ ತೇಡಂಡು. ಕಷ್ಟಪಟ್ಟಿತ್ ಗುರಿ ಮುಟ್ಟಂಡು. ಎಂತ ಕಷ್ಟ ಬಂದಕಲೂ, ಬಯ್ಯಕ್ ನಿಕ್ಕತೆ, ಧೈರ್ಯತ್ ಮಿಂಞಕ್ ಮೊಟ್ಟ್ ಇಡಂಡು. ಇದೇ ಧಾಮಸ್ ಆಲ್ವ ಎಡಿಸನ್‌ರ ಸಂದೇಶ. □



## ಕೋಪರ್ನಿಕಸ್

ಪುಟ್ಟನ ದಿನ - 1473ನೇ ಇಸವಿ, ಫೆಬ್ರವರಿ 19  
ಪುಟ್ಟನ ಜಾಗ - ತೋರುನ್, ಪೋಲೆಂಡ್ ದೇಶ  
ಕನ್ಮರೆ - 1543ನೇ ಇಸವಿ ಮೇ 24

ಅಪ್ಪ ಅವ್ವನ ಚಿರಿಯ ಬಯತ್‌ಲೇ ಕಳಂದಂಡ ನಿಕೋಲಸ್ ಕೋಪರ್ನಿಕಸ್ ತಾಂಡ ತಮ್ಮಾವೊ ಬಿಷಪ್ ಲ್ಯೂಕಾಸ್ ಎಣ್ಣವಯಿಂಡ ಮನೆಲ್ ಬೊಳಂದತ್. ಚಿರಿಯಂವೊನಾಯಿತಿಪ್ಪಕಲೇ ಲೆಕ್ಕ, ಭೂಗೋಳಶಾಸ್ತ್ರ, ವಿಜ್ಞಾನ, ವೈದ್ಯ ವಿದ್ಯೆನೋ ಪಡ್‌ಚಿತ್. ಅಂವೊ ಚರ್ಚಲ್ ಫಾದರ್ ಆಂಡೂಂದ್ ಮಾಂವಂಡ ಆಸೆ ಆಯಿತಿಂಜತ್. ಅದ್‌ಂಗಾಯಿತ್ ಧರ್ಮಗ್ರಂಥ ಓದಂಡೂಂದ್ ಎಣ್ಣಚಿ. ಚರ್ಚರ ಗುರು ಎಂತೆಲ್ಲ ಪಡಿಕಂಡು, ಅದನ್ನೆಲ್ಲ ಕೋಪರ್ನಿಕಸ್ ಚುರ್‌ಕ್‌ಲ್ ಪಡ್‌ಚಿತ್. ಅಲ್ಲಿಂಜ ಅನುಭವಕಾಯಿತ್ ವಿಯನ್ನಾ, ರೋಂ ದೇಶತ್‌ಲ್ ಪ್ರವಾಸ ಮಾಡ್‌ಚಿ. ಇಟಲಿ ವಿಶ್ವವಿದ್ಯಾನಿಲಯತ್ ಓದುವಕ್ ಪ್ರವೇಶ ಕೊಟ್ಚಿ.

ತಾಂಡ ಇರುವತ್ತೇಳನೆ ಬಯತ್‌ಲ್ ಕೋಪರ್ನಿಕಸ್ ರೋಂ ನಗರತ್ ಉಪಾದ್ರಿಯಾಯಿತ್ ಕೆಲಸಕ್ ಕೂಡ್‌ಚಿ. ಅಲ್ಲಿ ಖಗೋಳ ವಿಜ್ಞಾನ ಪಡ್‌ಪ್ ಚಿಡಂಡಿಂಜತ್. ಅಲ್ಲಿಕೆತ್ತನೆ ಭೂಮಿ ಚಪ್ಪಟೆಯಾಯಿತುಂಡೊಂದೂ, ಸೂರ್ಯ ಭೂಮಿರ ಸುತ್ತ ದಿನಕ್ಕೊಮ್ಮೆ ಸುತ್ತುವಾಂದೂ ಎಲ್ಲರೂ ನಂಬಿತಿಂಜತ್. ಅದ್‌ನೇ ಸ್ಕೂಲ್‌ಲ್ ಮಕ್ಕಕೂ ಎಣ್ಣವಯಿಂಜತ್. ಆಚೀಂಗಿ, ಕೋಪರ್ನಿಕಸ್ ಎಚ್ಚಕೋ

ಅಧ್ಯಯನ ಮಾಡಿತ್, ಭೂಮಿ ಚೆಂಡಾರ ಮಾದಾರಿ ಉಂಡೆಯಾಯಿತ್ ಉಂಡೇಂದೂ, ಸೂರ್ಯಂಡ ಸುತ್ತ ಭೂಮಿ ಸುತ್ತವೋಂದೂ, ದಿನಕ್ಕೊಮ್ಮೆ ಭೂಮಿ ತಾಂಡ ಅಕ್ಕತಾರ ಸುತ್ತ ಸುತ್ತವೋಂದೂ ಕಂಡ್ಪಡ್ಚಿತಿಂಜತ್, ಅದಾನೇ ಬಲವಾಯಿತ್ ನಂಬುವಯಿಂಜತ್. ಆಚೇಂಗಿ, ಅದಾನ ಸ್ಕೂಲ್‌ಲ್ ಪಡ್‌ಪ್ ಚಿಡುವನೆಕೆ ಇಂಜಿಲೆ.

ತಾಂಡ ಪುನ್‌ಸಾಕ್ ವಿರೋಧವಾಯಿತ್ ನಡ್‌ಪದ್ ಸೆರಿ ಕಾಂಗತೆ, ಕೆಲಸ ಬುಟ್ಟಿತ್ ಪೋಲೆಂಡ್‌ಕೇ ವಾಪಾಸ್ ಬಾತ್. ಅಲ್ಲಿಂಜ ಚರ್ಚಾರ ಗುರುವಾಯಿತ್ ಕೆಲಸ ಎಡ್‌ತಂಡತ್. ದಿನಾ ಚರ್ಚಾರ ಆಡಳಿತ ನೋಟಿಯೋವದಲ್ಲತೆ, ಚರ್ಚಾಕ್ ಬಪ್ಪೆ ಭಕ್ತಂಗಕ್ ಧರ್ಮತಾರ ವಿಷಯ ಎಣ್ಣೆ ಕೊಡ್‌ಕಂಡು. ಜನಡ ಕಾಹಿಲ ಕಸಾಲೆ ನೋಟಿತ್ ಅಯಿಂಗಕ್ ಮದ್ದಾ ಕೊಡ್‌ಕಂಡು. ಸಮಾಜ ಕಲ್ಯಾಣ ಕೆಲಸ ಮಾಡ್‌ಕೊಂಡು. ನಮ್ಮೆ, ನಾಳ್, ಉಪವಾಸ ಇನ್ನತ ದಿವಸತಾರದೆಲ್ಲ ಒರ್ ಕ್ಯಾಲೆಂಡರ್ ಮಾಡ್‌ಕೊಂಡು. ಇಚ್ಚಕೆಲ್ಲ ಕೆಲಸತಾರ ಮಧ್ಯತ್ ಕೋಪರ್ನಿಕಸ್‌ಕ್ ಸಂಶೋಧನೆಕ್ ಸಮಯವೇ ಕಾಟ್ಟುವಯಿಂಜಿಲೆ. ಆಚೇಂಗಿಯೂ, ಸೋಮಾರಿ ಯಲ್ಲತ ಕೋಪರ್ನಿಕಸ್ ಕಾಟ್ಟುವ ಚೆನ್ನಂಗ್ ನೇರತಾನ ತಾಂಡ ಸಂಶೋಧನೆಕ್ ಉಪಯೋಗ್‌ಚಿಟ್ಟಿಂಡ್ ಕೆಲಸ ಮಾಡುವಯಿಂಜತ್. ಚರ್ಚಾರ ಕೊಡಿಲ್ ಒರ್ ಚೆರಿಯ ಬಿರ್‌ಕ್ ಇಂಜತ್. ಅದಂಡ ಮೂಲಕ ಕಾಂಬ ಗ್ರಹ, ನಕ್ಷತ್ರ, ಸೂರ್ಯ ಇನ್ನತಾಂಡ ಚಲನೆ, ವೇಗ, ಅದಾನ್ನೆಲ್ಲ ಎಳೆದಿ ಚೆಚ್ಚಿಂಡ್, ಲೆಕ್ಕ ಮಾಡಿತ್, ಸೂರ್ಯ ಉಳ್ಳಲ್ಲಿಯೇ ಇಪ್ಪ. ಬೋರೆ ಗ್ರಹ ಎಲ್ಲ ಅದಂಡ ಸುತ್ತ ಸುತ್ತವ, ಭೂಮಿ ದಿನಕ್ಕೊಮ್ಮೆ ತಾಂಡ ಅಕ್ಕತಾರ ಸುತ್ತ ಸುತ್ತವಾನಗುಂಡೇ ಪೋಲ್ - ಬೈಟ್ ಆಪ ಎಣ್ಣುವ ವಿಷಯತಾರ ಲೆಕ್ಕಾಚಾರ ಎಲ್ಲ ಎಳೆದಿತ್, ಒರ್ ಪುಸ್ತಕ ಮಾಡ್‌ಚಿ. ಆಚೇಂಗಿ, ಅದಾನ ಪ್ರಕಟ ಮಾಡುವ ಧೈರ್ಯ ಮಾತ್ರ ಅಯಿಂಗಕ್ ಇಂಜಿಲೆ. ಅಕ್ಕತಾರ ಕ್ರೈಸ್ತ ಗುರುವ ಅರಿಸ್ಸಾಟಲ್ ಸಮರ್ಥನೆ ಮಾಡ್‌ನ ಭೂ ಕೇಂದ್ರ ವಾದತಾನೇ ಎಣ್ಣುವಯಿಂಜದಲ್ಲತೆ, ಅದಾನ ವಿರೋಧ ಮಾಡುವಯಿಂಗಕ್ ಶಿಕ್ಷೆ ಕೊಡ್‌ಪಯಿಂಜತ್.

ಆಚೇಂಗಿ, 1539 ಲ್ ಕೋಪರ್ನಿಕಸ್‌ರ ಅಭಿಪ್ರಾಯತಾನ ಅನುಮೋದನೆ ಮಾಡ್‌ನ ಜಾರ್ಜ್ ಎಣ್ಣುವ ಇರುವತ್ತಂಜಿ ಬಯತಾರ ಕಾಣ್ಣಿ, ಅಂವೊಂಡ ಪುಸ್ತಕ ಪ್ರಕಟ ಮಾಡುವಕ್ ಕೇಟಿತ್. ಆಚೇಂಗಿ, ಶಿಕ್ಷೆಕ್ ಬೊತ್ತಿಯಂಡ್ ಆ ಕೆಲಸಕ್ ಕೋಪರ್ನಿಕಸ್ ಒತ್ತಲೆ. ಜಾರ್ಜ್ ಅಂವೊನ ಒಪ್ಪಾಚಿಟ್ಟಿತ್, ಕೈಎಳ್ತಾನ ಎಡ್‌ತಂಡ್ ಪೋಚಿ. ಅದೇ ಸಮಯತ್ ಕೋಪರ್ನಿಕಸ್ ಪಾರ್ಶ್ವವಾಯುಕ್

ಬಲಿಯಾಚಿ. ಜಾರ್ಜ್ ಕೋಪರ್ನಿಕಸ್‌ರ ಪುಸ್ತಕತ್‌ನ ಜರ್ಮನಿಲ್ ಮುದ್ರಣ ಮಾಡಿತ್ ಎಡ್‌ತಂಡ್ ಬಾತ್. ಬುದ್ಧಂಡಲ್ಲಿಯೇ ಇಂಜ ಕೋಪರ್ನಿಕಸ್ ದೃಷ್ಟಿ ಸೆರಿಯಿಲ್ಲತಾನಗುಂಡ್, ತಾಂಡ ಪುಸ್ತಕತ್‌ನ ಕಣ್ಣಾರೆ ನೋಟುವ ಭಾಗ್ಯ ಇಲ್ಲತಾಚಿ. ಆಚೀಂಗಿಯೂ, ಕೈಲೇ ತೊಟ್ಟಿತ್ ನೋಟಿತೇ ಸಂತೋಷಪಟ್ಟತ್.

1543 ನೇ ಮೇ 24 ಕೋಪರ್ನಿಕಸ್ ಮರಣಪಟ್ಟತ್! ಪುಸ್ತಕ ಮುದ್ರಣ ಆನ ಪಿಂಞ ಅಂವೊ ಚತ್ ಪೋನಾಂಗ್ ಅಂವೊಂಗ್ ಏದ್ ರೀತಿಯೊ ತೊಂದರೆ ಆಯಿಲೆ. ಅದೇ ಗ್ರಂಥತ್‌ರ ಆಧಾರತ್‌ರ ಮೇಲೆ ಕೆಪ್ಲರ್, ನ್ಯೂಟನ್, ಗೆಲಿಲಿಯೋಂ ಡನ್ನತ ವಿಜ್ಞಾನಿಯ ಸಂಶೋಧನೆ ಮಾಡ್‌ಚಿ.

ಮನುಷ್ಯ ಪಡಿಪಕುಳ್ಳದ್ ಒನ್ನಾಂದೂ ತೋರುಲೆ. ಬದ್‌ಕ್‌ಲ್ ಒರ್ ನಲ್ಲ ಹವ್ಯಾಸ ಬೊಳ್‌ತಿಯಂಡಕ, ಅದ್ ನಂಗಕ್ ಕೀರ್ತಿ ಪಣ ತಂದಾಲೆಂಗಿಯೂ, ಮನ್‌ಸಾಕ್ ಶಾಂತಿ, ಸಮಾಧಾನ ಖಂಡಿತಾ ತಪ್ಪ. ಅದ್ ಸಮಾಜಕ್ ನಂದಾಪ.





## ಮದನ ಮೋಹನ ಮಾಳವೀಯ

ಪುಟ್ನನ ದಿನ	-	1861ನೇ ಇಸವಿ, ಡಿಸೆಂಬರ್ 25
ಪುಟ್ನನ ಜಾಗ	-	ಅಹಿಯಾಪುರ, ಪ್ರಯಾಗ, ಬಿಹಾರ
ಅಪ್ಪ	-	ವ್ರಜನಾಥ ಮಾಳವೀಯ
ಅವ್ವ	-	ಮೂನಾದೇವಿ
ಕಣ್ಮರೆ	-	1946ನೇ ಇಸವಿ ನವೆಂಬರ್ 12

ದೇವಭಕ್ತನಾನ ಅಪ್ಪ, ಮನೆಲ್ ದೇವಡ ಭಜನೆ ಮಾಡುವಕ್ ಶ್ಲೋಕ ಎಣ್ಣೆ ಕೊಡ್ ತಿತ್ತಿಂಜತ್. ಮದನ ಮೋಹನಂಗ್ ಅಂಜಿ ವಯಸ್ಸಾಪಕ ಸ್ಕೂಲ್ ಕ್ ಕೂಟುವಕ್ ಅಪ್ಪ ಕೂಟಿಯಂಡ್ ಪೋಚಿ. ಪಂಡಿತ ಹರದೇವ ಎಣ್ಣುವ ಗುರು ಸಂಸ್ಕೃತ ಸ್ಕೂಲ್ (ಧರ್ಮಚ್ಛಾನೋಪದೇಶ ಪಾಠಶಾಲಾ) ನಡ್ ತಿಯಂಡಿಂಜತ್. ಅಲ್ಲಿಕ್ ಮೋಂವೊನ ಕೂಟಿಯಂಡ್ ಪೋಯಿತಿಪ್ಪಕ ಗುರು, ಎಂತಾಚೆಂಗಿ ಶ್ಲೋಕ ಗೊತ್ತುಂಡಾಂದ್ ಕೇಟಿತ್.

“ಗೊತ್ತುಂಡ್” ಎಣ್ಣೆ ಚಿ ಮದನ ಮೋಹನ.

“ಎಣ್ಣೆ ನೋಟಿನಾ”ಂದ್ ಎಣ್ಣೆ ಚಿ ಗುರು. ಅಕ್ಕ ಅಂಜಿ ವಯಸ್ಸಾರ ಮದನ ಮೋಹನ ಗುರುರ ಪಕ್ಕ ಬಂದಿತ್ ಕಾಲ್ ಪುಡ್ ಚಿತ್. ಅಲ್ಲಿಂಜ ಅಪ್ಪಂಡ ಪಕ್ಕ ಬಂದಿತ್ ಕಾಲ್ ಪುಡ್ ಚಿತ್, ಒರ್ ಜಾಗತ್ ಕೈ ಕಟ್ಟಿತ್ ನಿಂದಿತ್, ಚಾಯುಳ್ಳ ಶ್ಲೋಕ ಒಂದಾನ ಎಣ್ಣೆ ಚಿ.

“ಅದೇ ಶ್ಲೋಕ ರಾಗತ್‌ಲ್ ಎಣ್ಣ್” ಎಣ್ಣ್ ಚಿ ಗುರು.

ಪುನಃ ರಾಗತ್ ಎಣ್ಣ್ನ ಆ ಕುಂಞ್ನ ಕಂಡಿತ್ ಕುಸಿ ಪಟ್ಟು ಗುರು, ಅವಂಡ ಮಂಡೆರ ಮೇಲೆ ಕೈ ಬೆಚ್ಚಿತ್ - “ನೀನ್ ಪುಟ್ಟ್ವಾನ ಮನೆಕೂ, ವಂಶಕೂ ಬಲ್ಯ ಕೀರ್ತಿ ಎಡ್‌ತಂಡ್ ಬಪ್ಪಿಯಾ”ಂದ್ ಆಶೀರ್ವಾದ ಮಾಡ್‌ಚಿ.

ಆ ಚೆರಿಯ ಕಣ್ಣಂಡ ಅದೇ ಸಂಸ್ಕಾರ, ವಿನಯ ಬಲ್ಯಂವೊ ಆನ ಪಿಂಞವೊ ಇಂಜತ್. ಬೋರೆ ಮಕ್ಕಡ ಮಾದಾರಿ ತಾನೂ ಇಂಗ್ಲಿಷ್ ಸ್ಕೂಲ್‌ಕ್ ಪೋಂಡೂಂದ್ ಮೋಂವೊ ಆಸೆಪಡುವಕ, ಗರೀಬತಿ ಅವ್ವ, ತಾಂಡ ಕೈಲಿಂಜ ಪೊನ್ನಾರ ಬಳೆನ ಅಡ ಬೆಚ್ಚಿತ್, ಇಂಗ್ಲಿಷ್ ಸ್ಕೂಲ್‌ಕ್ ಕೂಟ್‌ಚಿ. ಅಲ್ಲಿ ನೇರಕ್ ಸೆರಿಯಾಯಿತ್ ಪೋಕತ ಪೋಚೀಂಗಿ ಶಿಕ್ಷೆ ಕೊಟ್ಟವಯಿಂಜತ್. ಅದ್‌ಂಗಾಯಿತ್ ಮದನ ಮೋಹನ ಪಳೆಯ ಒಟ್ಟಿನ ಮೋರ್‌ಲ್‌ಟ್ಟಂಡ್ ತಿಂದಿತ್ ಸ್ಕೂಲ್‌ಕ್ ಪೋಪಯಿಂಜತ್. ಚಾಯಿಲ್ ಇಂಗ್ಲಿಷ್ ಭಾಷೆನ ಪಡ್‌ಚಿತ್, ಚೆನ್ನಂಗೇ ದಿನತ್ ನಲ್ಲ ತಕ್ಕಾಕಾರನೂ, ಎಳ್ಳಾಕಾರನೂ ಆಚಿ. ಮನೆಲ್ ಓದುವಕ್ ಜಾಗ ಇಲ್ಲತೆ ಸಿನೇತಕಾರ ಕಣ್ಣಂಡ ಮನೆಲ್ ಪೋಯಿತ್ ಓದುವಯಿಂಜತ್. ಪೊಲಾಕ ಬೆರಿಯ ಎವಯಿಂಜತ್. ತಪ್ಪತೆ ವ್ಯಾಯಾಮ ಮಾಡುವಯಿಂಜತ್. ಪಾಂಗೊಳ ಪಿಂಞ ಸಿತಾರ್ ವಾದನ ಕೂಡ ಪಡ್‌ಚತ್. ಆಗ್ರಾತ್ ಬಿ.ಎ. ಮಾಡ್‌ಚಿ. ಎಂ.ಎ. ಓದುವ ಆಸೆ ಇಂಜಕಲೂ ಮನೆರ ಆರ್ಥಿಕ ಪರಿಸ್ಥಿತಿ ಸೆರಿಯಿಲ್ಲತಾಂಗ್ ನಾಪದ್ ಉರ್‌ಪಿಯ ಸಂಬಳಕ್ ಉಪಾದ್ರಿ ಕೆಲಸಕ್ ಕೂಡ್‌ಚಿ.

ಒಮ್ಮೆ ಮದನ ಮೋಹನ ಪದ್‌ನಂಜಿ ವಯಸ್ಸಾಕಾರನಾಯಿತಿಪ್ಪಕ, ಅವಂಡ ಕುಂಞಪ್ಪಂಡ ಕೂಡ, ಮಿರ್ಜಾಪುರಕ್ ಪೋಯಿತಿಂಜತ್. ಅಲ್ಲಿ ಪಂಡಿತಂಗಡ ಚರ್ಚಾಕೂಟತ್ ಚರ್ಚೆ ಕೇಟಿತಾಪದು, ತಾನೂ ತಕ್ಕ ಪರೆಯಂಡೂಂದಾಚಿ. ಅವಂಗ್ ಅವಕಾಶ ಕೊಡ್‌ತತ್. ಅವಂಡ ಸಂಸ್ಕೃತ ಭಾಷೆರ ಮೇಲೆ ಪುಡ್‌ತ, ಆ ಚಾಯಿ, ತಕ್ಕಾರ ರಸ, ವಯಸ್‌ಕಿಂಜ ಬಲ್‌ಂಜನೆಯಿಂಜ ಅವಂಡ ಜ್ಞಾನ ನೋಟಿತ್ ಬಲ್ಯ ಬಲ್ಯ ವಿದ್ವಾಂಸಂಗಳೇ ಬೆರಗಾಯಿಪೋಚಿ. ಮಿಂಞಕ್ ಈ ಕಣ್ಣ ಬಲ್ಯ ವಿದ್ವಾಂಸನಾಪಾಂದ್ ಅಯಿಂಗೆಲ್ಲ ತಕ್ಕ ಪರ್‌ಂದತ್.

ಬಯ್ಯಂಜಿ ಕಾಶಿಲುಳ್ಳ ಹಿಂದೂ ವಿಶ್ವವಿದ್ಯಾಲಯ ಸ್ಥಾಪನೆ ಆಪಕ್ ಮದನ ಮೋಹನ ಮಾಳವೀಯನೇ ಮುಖ್ಯ ಕಾರಣಕರ್ತನಾಚಿ. ಇಯಂಗ ಒರ್ ಕವಿಯಾಯಿ ತಿಂಜತ್. ‘ಹಿಂದೂಸ್ತಾನ’ ಪತ್ರಿಕೆರ ಸಂಪಾದಕ ಆಯಿತಿಂಜತ್. 1892 ಲ್ ಅಲಹಾಬಾದ್ ಹೈಕೋರ್ಟ್‌ಲ್ ಲಾಯರ್ ಆಚಿ. ಬಡವಡ ಪರ, ಸತ್ಯತ್‌ರ ಪರ ಇಂಜ ಕೇಸ್ ಮಾತ್ರ ಎಡ್‌ತವಯಿಂಜದಲ್ಲತೆ, ದುಡ್ಡ್ ಮಾಡಂಡೂಂದ್ ಗೇನ

ಮಾಡ್‌ನವನೇ ಅಲ್ಲ. ಇಡೀ ದೇಶ ಸುತ್ತಿತ್, ಕಾಶಿ ಹಿಂದೂ ವಿಶ್ವವಿದ್ಯಾನಿಲಯ ಸ್ಥಾಪನೆಕ್ ಚಂದಾ ಎಡ್‌ತತ್. ಅಕ್ಕ ಹೈದರಾಬಾದ್‌ರ ನಿಜಾಮಂಡಲ್ಲಿ ಕೂ ಪೋಚಿ. ಮುಸಲ್ಮಾನನಾನ ನಿಜಾಮ ಹಿಂದೂ ವಿಶ್ವವಿದ್ಯಾಲಯಕ್ ದುಡ್ಡ್ ಕೊಡ್‌ಪಕ್ ಮಾಡ್‌ಚತ್. ಬರೀ ಕೈಲ್ ಪೋಪಕ್ ಮಾಳವೀಯಂಗ್ ಮನ್‌ಸ್ ಇಂಜಿಲೆ. ಅಂದೇ ಒರ್ ಪಣಕಾರ ನಿಜಾಮ ಚತ್‌ಪೋನಾಂಗ್ ಚಾವ್ ಎಡ್‌ತಂಡ್ ಮರವಣಿಗೆ ಪೋಯಂಡಿಪ್ಪಕ, ಚಾವ್‌ರ ಮೇಲೆ ಚಾಡಿಯಂಡಿಂಜ ದುಡ್ಡ್‌ನೆಲ್ಲ ನೋಟಿತ್, ಅದ್‌ನೆಲ್ಲ ಮದನ ಮೋಹನ ಆಂಜಂಡತ್. ಅದ್‌ನ ಅರ್‌ಂಜಿತ್ ನಿಜಾಮಂಗ್ ತಾಂಡ ಚೆರಿಯ ಬುದ್ಧಿಕ್ ಇಗಾಣ ಆಚಿ. ಮಾಳವೀಯನ ಕಾಕ್‌ಚಿಟ್ಟಿತ್ ಬೋಂಡಿ ಯಚ್ಚಕ್ ಪಣತ್‌ನ ದಾನ ಕೊಡ್‌ತಿತ್ ಅಯೆಚತ್.

“ಭಾರತ ಪುಣ್ಯಭೂಮಿ, ಹಿಂದೂ ಧರ್ಮ ಶ್ರೇಷ್ಠವಾನ ಧರ್ಮ, ಇಲ್ಲಿ ಪುಟ್ಟುವಂತಯಿಂಗ ಪುಣ್ಯವಂತಂಗ. ದೇವಳ ನಂಬಂಡು, ಬದ್‌ಕ್‌ಲ್ ನಲ್ಲದ್ ಮಾಡಂಡು. ದಾರ್‌ನೋ ಬೋತ್‌ಚಿಡುವಕಾಗ, ನಂಗಳೂ ಬೊತ್ತುವಕಾಗ”. ಇದ್ ಮದನ ಮೋಹನ ಮಾಳವೀಯಂಡ ಸಂದೇಶ. ಚೆರಿಯ ವಯಸ್‌ಲೇ ನಲ್ಲ ಸಂಸ್ಕಾರ, ಆಚಾರ, ವಿಚಾರ, ಭಕ್ತಿ, ದೇಶಪ್ರೇಮ - ಇನ್ನತ ನಲ್ಲ ವಿಚಾರ ಎಲ್ಲ ಪಡ್‌ಚಂಡ್ ಮಿಂಗಳೂ ಬೊಳ್‌ತಿಯಂಡ್ ಪೋಪದ್ ನಂಗಡೆಲ್ಲಡ ಆದ್ಯ ಕರ್ತವ್ಯ. □





## డా| ఎస్. రాధాకృష్ణన్

- పుట్టిన దిన - సెప్టెంబర్ 5, 1888నాి ఇసవి  
 పుట్టిన జాగ - తిరుత్తణి, ఓత్తూర్ జిల్లా, తమిళనాడూ  
 అప్ప - విరసామయ్య  
 అప్ప - సీతమ్మ  
 కణ్ణరే - ఏప్రిల్ 15, 1975నాి ఇసవి


సెప్టెంబర్ 5నాి తారీకూల్ నంగడ దేశత్ "ఁపాద్రియడ దిన" (శిక్షక దినాఓరణే) ఎణ్ణిత్ ఆఓరణే మాడూవ. రాష్ట్రపతియాయితంజ డా| సర్వపల్లి రాధాకృష్ణనూర పుట్టిన దినత్న ఁపాద్రియడ దినాందూ కయిప. తలుగూ - ఁందూ కుటుంబత్, ఒర్ సామాన్య జమీన్దూర్, తహశీల్దూర్ ఆయితంజ విరసామయ్యండ దండనే మొంవొనాయితూ పుట్టినయింగ ఁ రాధాకృష్ణనూ. రాధాకృష్ణనూర విద్యాభ్యాస ఎల్లా క్రిష్టియనూ విద్యాసంస్థలీ నడూదానగుండూ, ఓరీయ బయత్లే బ్యేబల్ గ్రంథ బాయిపాఠ ఆయితంజత్. క్రిష్టియనూ ధర్మత్ర విషయ పూర్తి గొత్తింజత్. క్రిష్టియనూ మిషనరి ఁందూ ధర్మత్ర విషయత్ సుమూర్ ఓకే మాడువయింజత్. తానూ ఒర్ సంప్రదాయస్థ ఁందూ మనేతనత్ పుట్టిత్, ఁందూ ధర్మత్ర విషయత్ గూరవవుళ్ళ కణ్ణనాయితంజ

ರಾಧಾಕೃಷ್ಣನ್‌ನು ಟೀಕೆ ಕೇಟಿಕ್ ಮನಸ್‌ನು ದುಂಬ ನೊಂಬಲ ಆಪಯಿಂಜತ್. ಆ ಚಿರಿಯ ಬಯತ್‌ಲೇ, ಟೀಕೆಕ್ ಕಾರಣ ಎನ್ನೆ? ಹಿಂದೂ ಧರ್ಮತರ ಸತ್ಯ ಎಂತ? ಅದ್‌ಲುಳ್ಳ ದೋಷ ಎಂತದೇಂದ್ ಅರಂಜವಕ್ ತತ್ವಶಾಸ್ತ್ರ (Philosophy) ಓದ್‌ಚಿ. ಪೋಸ್ಟ್ ಗ್ರಾಜುಯೇಶನ್‌ಲ್ “ವೇದಾಂತತ್ ನೀತಿತತ್ವ” ಎಣ್ಣುವ ವಿಷಯತ್ ಥಿಸೀಸ್ ಎಳ್‌ದ್‌ಚಿ. ತಾಂಡ 21ನೇ ಬಯತ್‌ಲೇ ಎಂ. ಎ. ತೇತಿತ್, ಮದ್ರಾಸ್ (ಚೆನ್ನೈ)ರ ಪ್ರೆಸಿಡೆನ್ಸಿ ಕಾಲೇಜ್‌ಲ್ ಲೆಕ್ಚರರ್ ಆಯಿತ್ ಕೂಡ್‌ಚಿ. ದಂಡೇ ಕಾಲತ್ ತಾಂಡ ಅರ್ಹತೆರ ಮೇಲೆ ಪ್ರಿನ್ಸಿಪಾಲ್ ಆಚಿ. ಸಂಸ್ಕೃತ, ತೆಲುಗ್, ಹಿಂದಿ, ಇಂಗ್ಲಿಷ್ ಅಲ್ಲತೆ, ಬೋರೆ ಸುಮಾರ್ ಭಾಷೆ ಪಡ್‌ಚಿಂಜತ್. ತಾಂಡ ಜೀವನಪೂರ್ತಿ ಓದುವಾತೇ ಕುಸಿಪಡುವ ಮನುಷ್ಯನಾಯಿ ತಿಂಜತ್. 1917 ಲ್ ಮೈಸೂರ್ ವಿಶ್ವವಿದ್ಯಾನಿಲಯಕ್ ಬಾತ್. ಅಕ್ಕ ಅಯಿಂಗಕ್ 29 ವಯಸ್ಸ್. ಇಡೀ ಭಾರತತ್‌ಲೇ ಚಿರಿಯ ಬಯತ್‌ರ ಪ್ರಿನ್ಸಿಪಾಲ್ ಆಯಿ ತಿಂಜತ್. ಅಯಿಂಗಡ ಪಾಠ ಕೇಪಕ್ ವಿದ್ಯಾರ್ಥಿಯ ಅಲ್ಲತೆ ಲೆಕ್ಚರರ್‌ಳೂ, ಬೋರೆ ವಿಭಾಗತರ ಪ್ರಿನ್ಸಿಪಾಲಳೂ ಬಂದಿತ್ ಕ್ಲಾಸ್‌ಲ್ ಅಳ್‌ಪಯಿಂಜತ್. ರಾಧಾಕೃಷ್ಣನ್ ಒರ್ ನಲ್ಲ ಎಳ್‌ಕ್ತಾರನೂ ಆಯಿತಿಂಜತ್. ಈ ಚಿರಿಯ ಬಯತ್‌ರ ತತ್ವಜ್ಞಾನಿರ ಮೇಲೆ ಪರದೇಶಕಾರಡ ಕಣ್ಣ್ ಬುದ್ದತ್. ಆಕ್ಸ್‌ಫರ್ಡ್ ಕಾಲೇಜ್‌ಲ್ ಲೆಕ್ಚರ್ ಕೊಡ್‌ಪಕ್ ಕಾಕ್‌ಚಿಟ್ಟತ್. ಅಲ್ಲಿ ಕೊಡ್‌ತ ಉಪನ್ಯಾಸ ಎಲ್ಲ ಪುಸ್ತಕ ರೂಪತ್ ಪ್ರಕಟಾಯಿತ್ ಪೆದ ಪೋಚಿ. ಅಲ್ಲಿಂಜ ಕಾಶಿ ಹಿಂದೂ ವಿಶ್ವವಿದ್ಯಾಲಯತರ ವೈಸ್ ಛಾನ್ಸಲರ್ ಆಚಿ. ಪೊರದೇಶತ್‌ಲೆಲ್ಲ ಹಿಂದೂ ಧರ್ಮತರ ವಿಷಯತ್ ಭಾಷಣ ಮಾಡ್‌ಚಿ. ಅಲ್ಲಿಂಜ 1949 ಲ್ ರಷ್ಯಾಕ್ ಭಾರತತರ ಆದ್ಯ ರಾಯಭಾರಿ ಯಾಯಿತ್ ಆಯೆಚಿತ್. ಅಂದ್ ರಷ್ಯಾತರ ಜೊತೆಲ್ ತಕ್ಕ್ ಪರಂದಿತ್, ಭಾರತ ದೇಶತರ ನಲ್ಲರಿಕೆ ಅರಿಚಿಟ್ಟಿತ್, ಅಕ್ಕತರ ರಷ್ಯಾತರ ಸರ್ವಾಧಿಕಾರಿ ಸ್ಟಾಲಿನ್‌ರ ಮನ್‌ಸ್ ಮಾತಿತ್, ರಷ್ಯಾ ಪಿಂಞ ಭಾರತ ದೇಶತರ ಸ್ನೇಹ ಸಮ್ಮಂಧಕ್ ಆದ್ಯ ಮೊಳಿ ಇಟ್ಟಿ ವ್ಯಕ್ತಿ ಡಾ| ಸರ್ವಪಲ್ಲಿ ರಾಧಾಕೃಷ್ಣನ್. ಅಲ್ಲಿಂಜ 1952 ಲ್ ಉಪರಾಷ್ಟ್ರಪತಿಯಾಯಿತೂ, 1962 ಲ್ ರಾಷ್ಟ್ರಪತಿಯಾಯಿತೂ ಕೆಲಸ ಮಾಡ್‌ಚಿ.

ಭಾರತತರ ರಾಷ್ಟ್ರಪತಿಯಾನ ಪಿಂಞ ಪತ್ತಾಯಿರ ಉರ್‌ಪಿಯ ಇಂಜ ಸಂಬಳತನ ಮೂಂದ್ ಆಯಿರಕ್ ಉಳ್‌ಪಿತ್, ಟ್ಯಾಕ್ಸ್ ಕೊಡ್‌ತಿತ್, ಉಳ್‌ಂಜ ಆಯಿರತ ಒಂಬೈನೂರ್ ಉರ್‌ಪಿಯ ಸಂಬಳ ಎಡ್‌ತವಯಿಂಜತ್. ರಾಷ್ಟ್ರಪತಿನ ವಾರತ್‌ಲ್ ದಂಡ್ ದಿನ ಎದೇ ಸಾಮಾನ್ಯ ಜನ ಕಾಂಗೊಲು ಎಣ್ಣಿತ್ ಪ್ರಕಟಣೆ ಕೊಡ್‌ತತ್.

1953 ಲ್ ಡಾ| ರಾಧಾಕೃಷ್ಣನ್ ನಂಗಡ ದೇಶತ್‌ರ ಶ್ರೇಷ್ಠ ಪ್ರಶಸ್ತಿಯಾನಂತ ಭಾರತರತ್ನ ಬಿರ್‌ದ್ ಪಡ್‌ಂದತ್. ಸುಮಾರ್ ದೇಶ ಪರದೇಶತ್‌ರ ನೂರಾಂಗೂ ಜಾಸ್ತಿ ವಿಶ್ವವಿದ್ಯಾನಿಲಯ ರಾಧಾಕೃಷ್ಣನ್‌ಕ್ ಡಾಕ್ಟರೇಟ್ ಕೊಡ್‌ತತ್. ಸ್ವತಃ ಒರ್ ಉಪಾಧ್ಯಾಯತೀಂಜಿತ್, ಉಪಾಧ್ಯಯಡ ವಿಷಯತ್, ಮಕ್ಕಡ ವಿಷಯತ್ ನೇರಾನ ಮುತುವರ್ಜಿಯಿಂಜ ರಾಧಾಕೃಷ್ಣನ್‌ರ ಪುಟ್ನ ದಿನತ್‌ನ “ಉಪಾಧ್ಯಯಡ ದಿನ” ಆಯಿತ್ ಆಚರಣೆ ಮಾಡುವದ್ ಆರ್ಥಪೂರ್ಣ!

ಬದ್‌ಕ್‌ರ ಉದ್ದಕೂ ಬೋರೆ ಬೋರೆ ಪುಸ್ತಕ ಓದಿತ್ ಜ್ಞಾನ ಸಂಪಾದನೆ ಮಾಡಿಯಂಡ್, ಬದ್‌ಕ್‌ರ ಸಮಯತ್‌ನ ಚೆನ್ನಂಗೂ ವ್ಯರ್ಥ ಮಾಡತೆ, ದೇಶಕಾಯಿತ್ ನೈಚಿತ್ ಸಾರ್ಥಕ ಬದ್‌ಕ್‌ನ ನಡ್‌ತಾನಂತ ಡಾ| ರಾಧಾಕೃಷ್ಣನ್‌ರ ವ್ಯಕ್ತಿತ್ವತ್‌ರ ನೂರಾಲ್ ಒರ್ ಪಾಲ್ ಆಚೀಂಗಿಯೂ, ನಂಗಡ ಬದ್‌ಕ್‌ಲ್ ಕೂಟಿಯಂಡ್ ಈ ದೇಶತ್ ಪುಟ್ನಾಂಗ್ ಸಾರ್ಥಕ ಆಯಿತ್ ಬಾವಂಡು. □



## ಲೂಯಿ ಪ್ಯಾಶ್ಚರ್

- ಪುಟ್ನನ ದಿನ - 1822ನೇ ಇಸವಿ ಡಿಶಂಬರ್ 27  
 ಪುಟ್ನನ ಜಾಗ - ಡೂಲ್, ಫ್ರಾನ್ಸ್ ದೇಶ  
 ಅಪ್ಪ - ಜೋಸೆಫ್  
 ಅಮ್ಮ - ಎತ್ತಿಯನೆತ್  
 ಕಣ್ಮರೆ - 1895ನೇ ಇಸವಿ ಸೆಪ್ಟೆಂಬರ್ 27

ಲೂಯಿ ಪ್ಯಾಶ್ಚರ್ ಅಪ್ಪ ಜೋಸೆಫ್ ಪೆದಪೋನ ಮೋಚಿ. ಇಯಂಗ ಪೈಮರಿ ಸ್ಕೂಲ್‌ಲ್ ಇಪ್ಪಕ ತಾಂಡ ಕೂಟ್‌ಕಾರ ಮಕ್ಕಡಾತ್ ಕುಳ್ಳನೂ, ದಡ್ಡನೂ ಆಯಿತಿಂಜತ್. ಉಪಾದ್ರಿಯ ಎಲ್ಲ ಇವಂಡನ್ನತ ಮಂದ ಬುದ್ದಿರ ಕ್ಕಣ್ಣ ಇಡೀ ಸ್ಕೂಲ್‌ಲೇ ಇಲ್ಲೇಂದ್ ಎಣ್ಣುವಯಿಂಜತ್. ಆಚೇಂಗಿಯೂ ಪ್ಯಾರಿಸ್‌ರ ಒರ್ ನಲ್ಲ ಸ್ಕೂಲ್‌ಲ್ ವಿದ್ಯೆ ಪಡಿಕಂಡು ಎಣ್ಣುವ ಆಸೆ ಲೂಯಿಕ್.

“ಒರ್ ಮೋಚಿರ ಮೋಂವೊ ಪ್ಯಾರಿಸ್‌ಲ್ ಓದುವದುಂಡಾ? ಅದೂ ಬುದ್ದಿವಂತನೂ ಅಲ್ಲ,” ಇದ್ ಅಪ್ಪಂಡ ಬೇರ. ಆಚೇಂಗಿಯೂ ಲೂಯಿ ಪ್ಯಾಶ್ಚರ್ ಪದ್‌ನಾರನೇ ಬಯತ್‌ಲ್ ಪ್ಯಾರಿಸ್‌ಕ್ ಪೋಚಿ. ಆಚೇಂಗಿ ಅಲ್ಲಿಯತ್‌ರ ಹವಾಮಾನ ಒಗ್ಗತೆ ವಾಪಾಸ್ ಬರಂಡಿಯಾಚಿ. ಗಣಿತ ಎಣ್ಣಕ ಮಂಡೆನೊಂಬಲ ಈ ಕ್ಕಣ್ಣಿಂಗ್. ಅದೇ ರಸಾಯನಶಾಸ್ತ್ರ ಭಾರೀ ಕುಸಿ. ಮಿಂಞಕೋರ್ ನಲ್ಲ ರಸಾಯನಶಾಸ್ತ್ರಜ್ಞ ಆಂಡೊಂದ್ ಆಸೆ ಚಿಗ್‌ರೊಚಿ. ಪದವಿ ಪಡೊಂದತ್.

ರಸಾಯನಶಾಸ್ತ್ರತ್ ಪ್ರಬಂಧ ಎಳಾದಿತ್ ಡಾಕ್ಟರೇಟ್ ಎಡ್ತಿತೇ ಎಡ್ಕಂಡು ಎಣ್ಣವ ದೃಢ ನಿರ್ಧಾರತಿಂಜ ಕಷ್ಟಪಟ್ಟಿತ್ ಓದ್ಚಿ. ಪಣಕಾಸ್ ತೊಂದರೆನುಂಡ್ ಮಕ್ಕಕ್ ಟ್ಯೂಷನ್ ಮಾಡಿಯುಂಡ್, ವಿದ್ಯಾಭ್ಯಾಸ ಮಾಡ್ಚಿ. ಅವಂಡ ಪರಿಶ್ರಮಕ್ ಫಲ ಕ್ಚಿತ್ತೇ ಕ್ಚಿಟ್ಟಿ. ರಸಾಯನಶಾಸ್ತ್ರತ್ ಡಾಕ್ಟರೇಟ್ ಕ್ಚಿಟ್ಟಿ. ಅಲ್ಲಿಂಜ ವಿಜ್ಞಾನಿಯಾಯಿತ್ ಸಂಶೋಧನೆ ಸುರು ಮಾಡ್ಚಿ. ಅಕ್ಟೆ ಫ್ರೆನ್ಸ್‌ಲ್ 1848ರ ಕ್ರಾಂತಿ ಸುರುವಾಚಿ. ಒರ್ ಯೋಧನಾಯಿತ್ ಸ್ವಾತಂತ್ರ್ಯ ಸಮರತ್ ಭಾಗವಹಿಸ್ಚಿ. ಕ್ರಾಂತಿ ತ್ಲೆಂದದು ಪುನಃ ಸಂಶೋಧನೆ ಸುರು ಮಾಡ್ಚಿ. ಸ್ಪಾಸ್‌ಬರ್ಗ್ ವಿಶ್ವವಿದ್ಯಾನಿಲಯತ್ ಉಪಾದ್ರಿ ಕೆಲಸ ಕ್ಚಿಟ್ಟಿ. ಮೇರಿ ಎಣ್ಣವ ಕನ್ನಿನ ಮಂಗಲಕ್ ಏರ್ಪಡಾಚಿ. ಮಂಗಲಂದ್ ಎಲ್ಲಾರೂ ಚರ್ಚಲ್ ಕೂಡಿತಿಂಜತ್. ಆಚೇಂಗಿ ಮಂಗಲಕಾರ ನಾಪತ್ತೆ. ಸುಮಾರ್ ನೇರ ಪಾರಕಾತಿತ್ ಮಂಗಲಕಾರ ಬರತಿಪ್ಪಕ ಅಂವೊಂಡ ಒರ್ ಸಿನೇತಕಾರಂಗ್ ಅನುಮಾನ ಬಂದಿತ್ ಲೂಯಿರ ಪ್ರಯೋಗ ಶಾಲೆಕ್ ಬಾತ್. ಅಲ್ಲಿ, ತಾಂಡ ಮಂಗಲ ಮರಂದಿತ್ ಎನ್ನತದೊ ಒರ್ ಪ್ರಯೋಗತ್ ಮುಳಿತಿಂಜ ಒರ್ ವಿಜ್ಞಾನಿನ ಕಂಡತ್. ಅಂವೊ ಆ ಪ್ರಯೋಗ ತ್ಲೆಂದ ಪಿಂಞೇ ಚರ್ಚಕ್ ಬಂದಿಯೆ.

1854 ಲ್ ಲಿಲ್ ನಗರತ್‌ರ ವಿಶ್ವವಿದ್ಯಾನಿಲಯತ್ ಕೆಲಸಕ್ ಕೂಡ್ಚಿ. ಅಲ್ಲಿಯತ್‌ರ ಜನ ಬೀಟ್‌ರೂಟ್‌ಂಜ ಕಳ್ಳ ಮಾಡುವಯಿಂಜತ್. ಆಚೇಂಗಿ ಅದ್ ಬೆರಿಯ ಪಾಳಾಯಿತ್ ವ್ಯಾಪಾರ ಭಾರೀ ನಷ್ಟ ಆಯಂಡಿಂಜತ್. ವಿಷಯ ಅರಂಜಿತ್ ಲೂಯಿ ಅದ್‌ಂಡ ವಿಷಯತ್ ಸಂಶೋಧನೆ ಮಾಡಿತ್ “ಬ್ಯಾಕ್ಟೀರಿಯಾ” ಎಣ್ಣವ ಬೊರಿಕಣ್ಣ್‌ಕ್ ಕಾಂಗತನ್ನತೋರ್ ವಿಷಕ್ರಮಿ ಕಳ್ಳನ ಪಾಳೆಮಾಡುವಾಂದ್ ಕಂಡ್‌ಪುಡ್‌ಚಿತ್. ಅದ್‌ನ ಕೊದ್‌ಪ್‌ಚಿಟ್ಟಿತ್ತೇಂಗಿ, ಆ ಕ್ರಮಿ ನಾಶ ಆಪಾಂದ್ ಗೊತ್ತಾಚಿ. ಅಲ್ಲಿಂಜ ಪಾಲ್ ಪಾಳಾಕತನ್ನೆ ಮಾಡುವಕ್ ಅದ್‌ನ ಜಾಸ್ತಿ ಕೊದ್‌ಪ್‌ಚಿಟ್ಟಿಕ್ ಸುಮಾರ್ ಸಮಯ ಪಾಳಾಕತನ್ನೆ ಮಾಡಲೂಂದ್ ಕಂಡ್‌ಪುಡ್‌ಚಿತ್. ಈ ವಿಧಾನಕೇ ಪ್ಯಾಶ್ಚರೀಕರಣ (Paesturisation) ಎಣ್ಣವೊ. ಇನ್ನೆ ಪ್ಯಾಶ್ಚರಾರ ಪೆದ ಅಮರ ಆಚಿ.

ಅಲ್ಲಿಂಜ ಫ್ರೆನ್ಸ್‌ಲ್ ರೇಷ್ಮೆ ಪುಳುಕ್ ಬಪ್ಪಯಿಂಜ ಸಾಂಕ್ರಾಮಿಕ ರೋಗಕ್ ಮದ್ದ್ ಕಂಡ್‌ಪುಡ್‌ಚಿತ್. ಫ್ರೆನ್ಸ್‌ಕೂ, ಜರ್ಮನಿಕೂ ಆನ ಪಡೆಲ್ ಗಾಯ ಆನ ಸೈನಿಕಂಗಕ್ ಆಪರೇಷನ್ ಮಾಡ್‌ಚೇಂಗಿಯೂ, ಸುಮಾರ್ ಜನ ಚಾವದ್ ಕಂಡಿತ್ ಡಾಕ್ಟರಾರ ಕೈ, ಅಯಿಂಗ ಉಪಯೋಗ್‌ಚಿಡುವ ಉಪಕರಣ, ಬಟ್ಟೆ ಎಲ್ಲಾತೂ ಬೊರಿಕಣ್ಣ್‌ಕ್ ಕಾಂಗತ ಕ್ರಮಿಯ ಲಕ್ಷಾಂತರ ಇಪ್ಪ. ಅದ್‌ನಗುಂಡೇ ರೋಗಿ

ಚಾವೋಂದ್ ಕಂಡ್‌ಪುಡ್‌ಚತ್. ಆಪರೇಷನ್‌ಲ್ ಉಪಯೋಗ ಮಾಡುವ ಪ್ರತಿ ವಸ್ತುನೋ ಕೊಡ್‌ಪಾಚಿಟ್ಟಿತ್ ಉಪಯೋಗ ಮಾಡ್‌ಚೇಂಗಿ ಇನ್ನನೆ ಆಪಾಲೇಂದ್ ಎಣ್ಣುವಕ ಫ್ರಾನ್ಸ್‌ರ ಡಾಕ್ಟರ್ಸ್ ತಳಾಚತ್. ಆಚೇಂಗಿ ಸ್ಯಾಟ್ಲೆಂಡ್‌ರ ಒರ್ ಡಾಕ್ಟರ್ ಅನ್ನನೆ ಮಾಡಿತಾಪಕ, ಸುಮಾರ್ ರೋಗಿಯ ಬದ್‌ಕೆಚಿ.

ಅಲ್ಲಿಂಜ ಅತ್ತಕ್ ಬಪ್ಪ ಕಾಹಿಲತ್‌ರ ವಿಷಯ ಸಂಶೋಧನೆ ಮಾಡ್‌ಚಿ. ಏದ್ ಕ್ರಿಮಿಯಿಂಜ ಕಾಹಿಲ ಬಪ್ಪೊ, ಅದೇ ಕ್ರಿಮಿಕ್ ಶಕ್ತಿ ಇಲ್ಲತೆ ಮಾಡಿತ್ ಚಾವ ಸ್ಥಿತಿಕ್ ಕೊಂಡ ಬಂದಿತ್ ಅಲ್ಲಿಂಜ ಅದ್‌ನ ಕಾಹಿಲ ಬಂದ ಪ್ರಾಣಿಕ್ ಇಂಜೆಕ್ಷನ್ ಮಾಡ್‌ಚೇಂಗಿ ಕಾಹಿಲ ವಾಸಿಯಾಪ ಎಣ್ಣುವಾನ ಕಂಡ್‌ಪುಡ್‌ಚತ್. ಕಂಡ್‌ಪುಡ್‌ಚಕೋ ಪೋರ ಅದ್‌ನ ಸಾಧ್‌ಚಿಟ್ಟಿತ್ ಕಾಟಂಡುವಲ್ಲ? 1881ನೇ ಇಸವಿ ಜೂನ್ 2ನೇ ತಾರೀಕ್ ಎಚ್ಚಕೋ ಜನ ಅಯಿಂಗಡ ಪ್ರಯೋಗ ನೋಟುವ ಕ್ಲೇಂದ್ ಬಂದಿಂಜತ್. ತಯಾರ್ ಮಾಡ್‌ನ ಮದ್ದ್‌ನ ಪ್ರಾಣಿಯಕ್ ಇಂಜೆಕ್ಷನ್ ಮಾಡ್‌ಚಿ. ಮದ್ದ್ ಕೊಡ್‌ತ ಪ್ರಾಣಿಯ ಬದ್‌ಕೆಚಿ. ಕೊಡ್‌ಕತದ್ ಚತ್ತತ್. ಅಂವೊ ಎನ್ನ್ ಡಾಕ್ಟರ್‌ರಾ? ಮದ್ದ್ ಕಂಡ್‌ಪುಡಿಪಕ್ಲೇಂದ್ ಹಂಗ್‌ಚಿಟ್ಟಿಯಿಂಗ್ ತ್ಲೇರ ಕ್ಷಮೆ ಕೇಟತ್. ಇನ್ನನೇ ಅಂವೊ ಪುಚ್ಚಿನಾಯಿ ಕಡ್‌ಚತೇಂಗಿ ಬಪ್ಪ ಕಾಹಿಲಕೂ (ರೇಬಿಸ್) ಮದ್ದ್ ಕಂಡ್‌ಪುಡ್‌ಚತ್. ಆಚೇಂಗಿ ಮನುಷ್ಯಂಡ ಮೇಲೆ ಪ್ರಯೋಗ ಮಾಡುವಕ್ ಧೈರ್ಯ ಇಂಜಿಲೆ. ಒರ್ ದಿನ ಒರ್ ಅಪ್ಪ, ಒಯಿಂಬದ್ ಬಯತ್‌ರ ಒರ್ ಕುಂಞಿನ ಕಾಕಿಯಂಡ್ ಬಾತ್. ಆ ಕುಂಞಿಕ್ ಪದ್‌ನಾಲ್ ಜಾಗತ್ ನಾಯಿ ಕಡ್‌ಚಿತಿಂಜತ್. ವಿಧಿ ಇಲ್ಲತೆ, ಧೈರ್ಯ ಮಾಡಿತ್ ಲೂಯಿ ಪ್ಯಾಶ್ಚರ್ ತಾನ್ ಕಂಡ್‌ಪುಡ್‌ಚ ಮದ್ದ್‌ನ ಆ ಕ್ಲೆಂಂಗ್ ಇಂಜೆಕ್ಷನ್ ಮಾಡ್‌ಚಿ. ಪದ್‌ನಾರ್ ದಿನತ್‌ರ ಆರೈಕೆಲ್ ಕ್ಲೆಂಂಗ್ ಒರ್ ತಿಂಗತ್ ಚಾಯಾಚಿ. ಅಲ್ಲಿಂಜ ಜನ ಬಂದಿತ್ ಈ ಮದ್ದ್‌ನ ಕುತ್‌ಚಿಟ್ಟಿಂಡತ್. ಅಂವೊ ಚೆರಿಯಂವೊನಾಯಿತಿಪ್ಪಕ, ದಾರ್‌ಕೋ ಪುಚ್ಚಿನಾಯಿ ಕಡ್‌ಚಿತ್, ನಾಯಿರ ಮಾದ್‌ರಿಯೆ ಕಳಾಚಿತ್, ಕೂತ್ ಕೊಡ್‌ತಿತ್ ಚಾವನ್ನತ ಭಯಂಕರ ಪರಿಸ್ಥಿತಿ ಕಂಡಿತ್, ಇದ್‌ಂಗ್ ಎಂತೇಂಗಿ ಮದ್ದ್ ಕಂಡ್ ಪುಡಿಕಂಡು ಎಣ್ಣಿಯಂಡ್ ಗೇನ ಮಾಡಿತಿಂಜತ್. ಅದ್ ಇಂದ್ ಸಾಧ್‌ಚಿಟ್ಟಿತಿಂಜತ್. ಮಕ್ಕಳ ಭಾರೀ ಪ್ರೀತಿಯಿಂಜ ಪ್ಯಾಶ್ಚರ್, ಮಕ್ಕಡ ಕೂಡ ಮಕ್ಕಡನೆಕೇ ಕಳಿಪ ಯಿಂಜತ್.

ಸಾಧನೆಕೋರ್ ಗುರಿ, ಅದ್‌ನ ಸಾಧ್‌ಚಿಡುವನ್ನತ ದೃಢ ನಿರ್ಧಾರ ಉಂಡೇಂಗಿ ಬಲ್ಯ ಬಲ್ಯ ವ್ಯಕ್ತಿತ್ವ ಪಡ್‌ಂದವಲು. ಲೂಯಿಪ್ಯಾಶ್ಚರ್‌ರನ್ನತ ವಿಜ್ಞಾನಿರ ಆದರ್ಶ ಜೀವನ ಎಲ್ಲಾಕೂ ಬೊಳಿ ಕಾಟಡ್. □



## ಸರ್ ಸಿ. ವಿ. ರಾಮನ್

- ಪುಟ್ಟನ ದಿನ - 1888ನೇ ಇಸವಿ ನವಂಬರ್ 7  
 ಪುಟ್ಟನ ಜಾಗ - ಅಯ್ಯನ್‌ಪೇಟ್ಟೈ, ತಿರುಚಿರಪಳ್ಳಿ, ತಮಿಳುನಾಡು  
 ಅಪ್ಪ - ಚಂದ್ರಶೇಖರ ಅಯ್ಯರ್  
 ಅಮ್ಮ - ಪಾರ್ವತಿ ಅಮ್ಮಾಳ್  
 ಕಣ್ಮರ - 1970ನೇ ಇಸವಿ ನವಂಬರ್ 20

ಅಪ್ಪ ಚಂದ್ರಶೇಖರ ಅಯ್ಯರ್ ಆದ್ಯ ಸ್ಕೂಲ್ ಉಪಾಧ್ಯಾಯಿಯಿರಬಹುದು. ಅಲ್ಲಿಂದ ಆಂಧ್ರಪ್ರದೇಶ ವಿಶ್ವವಿದ್ಯಾನಿಲಯದ ಕಾಲೇಜ್ ಲೆಕ್ಚರರ್ ಆಯಿತ್ ಕೆಲಸ ಕೊಟ್ಟು. ಅಕ್ಕ ರಾಮನ್‌ಕ್ ಮೂಂದ್ ವಯಸ್ಸು. ಮನೆಲ್ ಭೌತಶಾಸ್ತ್ರ, ಗಣಿತ, ವೇದಾಂತ, ಇನ್ನನೆ ಸುಮಾರ್ ಗ್ರಂಥತನ ಸಂಗ್ರಹ ಮಾಡಿತ್ ಬೆಚ್ಚಿತ್ತಿಂಜತ್. ರಾಮನ್‌ರ ಮನೆ ವಿಜ್ಞಾನ, ಸಂಸ್ಕೃತ, ಸಂಗೀತ ಪಿಂಞ ಬುದ್ಧಿ ಜೀವಿಯಡ ಸಂಗಮ ಆಯಿತ್ತಿಂಜತ್. ಇನ್ನತ ನಲ್ಲ ವಾತ್ಸಾಪರಣತ್ ಬೊಳಂದ ರಾಮನ್ ಬಾರೀ ಬುದ್ಧಿವಂತ. ಪನ್ನೊಂದನೆ ಬಯತ್‌ಲ್ ಎಫ್. ಎ. (ಇಕ್ವಿಟರ್ ಎಸ್ಸೆಸ್ಸೆಲ್ಸಿ) ಮಾಡಿತ್ ಮದ್ರಾಸ್‌ರ ಪ್ರೆಸಿಡೆನ್ಸಿ ಕಾಲೇಜ್‌ಕ್ ಕೂಡ್‌ಚಿ. 1907 ಲ್ ಎಂ. ಎ. ಮಾಡ್‌ಚಿ. ಅಕ್ಕ ಪತ್ತೊಯಿಂಬದ್ ವಯಸ್ಸು. "ರಾಮನ್ ಬುದ್ಧಿವಂತ, ವಿಜ್ಞಾನತರ್ ವಿಷಯ ಕ್ಲಾಸ್‌ಕ್ ಬಂದಿತ್ ಪಡಿಪನ್ನತದ್ ಒಂದೂ ಇಲ್ಲೇ"ಂದ್ ಲೆಕ್ಚರರೇ ಎಣ್ಣುವ ಯಿಂಜತ್‌ಲೊ. ಎಲ್ಲ ಕ್ಲಾಸ್‌ಲ್ ಆದ್ಯತರಂವೊನಾಯಿತೇ ಪಾಸಾಂನುಂಡ್ ಬಾತ್.

1907 ಲ್ಲ ಕಲ್ಕತ್ತಾತ್ ಅಕೌಂಟೆಂಟ್ ಜನರಲ್ ಆಯಿತ್ ಕೆಲಸಕ್ ಕೂಡ್ಚಿ. ಲೋಕಸುಂದರಿ ಎಣ್ಣುವಯಿನ ಮಂಗಲಾಚಿ. ಅಲ್ಲಿ ಆಳತಂಡ್ ಮಾಡುವ ಕೆಲಸ ರಾಮನ್‌ಕ್ ಕುಸಿ ಆಯಿಲೆ. ವಿಜ್ಞಾನತ್ ಸಂಶೋಧನೆ ಮಾಡಂಡೂಂದಾಚಿ. ಕಲ್ಕತ್ತಾತ್ ಒರ್ ಸಂಶೋಧನಾಲಯತ್ ಸಂಶೋಧನೆಕ್ ಅವಕಾಶ ಕೊಟ್ಚಿ. ರಜಾ ದಿನತೂ ಅಲ್ಲಿಯೇ ಇಪ್ಪಯಿಂಜತ್. ವಿಜ್ಞಾನತ್ ಪುದಿಯ ಪುದಿಯ ಸಂಶೋಧನೆ ಮಾಡಂಡೂಂದ್ ಅಯಿಂಗಡ ಆಸೆ. ಸಂಗೀತ ವಾದ್ಯತ್ (Musical Instruments) ಬಪ್ಪನ್ನತ ಶಬ್ದತ್ ವಿಷಯ ಲೇಖನ ಎಳ್ದೊಚಿ. ಸಮುದ್ರ ನೀಲಿ ಎನ್ನ್ಯಾಂಗ್? ಆಕಾಶ ನೀಲಿ ಉಳ್ಳಾಂಗಾಂದ್ ಗೇನ ಮಾಡಿತ್ ಸಂಶೋಧನೆ ಮಾಡ್ಚಿ. ನೀರ್‌ಲುಳ್ಳ ಅಣು ಬೊಳಿನ ಚದರುವನೆಕೆ ಮಾಡುವದೇ ಸಮುದ್ರತ್ ನೀರ್ ನೀಲಿ ಕಾಂಬಕ್ ಕಾರಣಾಂದ್ ತೋಂದ್ಚಿ. ಲಂಡನ್‌ರ ರಾಯಲ್ ಸೊಸೈಟಿಕ್ ಲೇಖನ ಅಯೆಚತ್. ಅಲ್ಲಿಯತ್ ವಿಜ್ಞಾನಿಯಕ್ ಲೇಖನ ಕುಸಿಯಾಚಿ. 1924 ಲ್ಲ ರಾಮನ್‌ಕ್ ರಾಯಲ್ ಸೊಸೈಟಿರ ಫೆಲೋಶಿಪ್ ಕೊಟ್ಚಿ.

1925 ಲ್ಲ ರಷ್ಯಾಕ್ ಪೋಚಿ, ಅಲ್ಲಿ ಸೈನ್ಸ್ ಅಕಾಡೆಮಿ ರಾಮನ್‌ಕ್ ಗೌರವ ಕೊಡ್ತತ್. 1928 ಲ್ಲ ಬೆಂಜೀನ್ ಪಿಂಞ ಕಾರ್ಬನ್ ಟ್ರಾಕ್ಟೋರೈಡ್‌ರ ಮೂಲಕ ಬೊಳಿನ ಅಯೆಚಿತ್ ರೋಹಿತತ್ (Spectrum) ಮೂಲಕ ನೋಟುವಕ ಬೋರೆ ಬೋರೆ ಗೆರೆ ಕಂಡತ್. ಏದೇ ಘನ, ದ್ರವ, ಅನಿಲ (Solid, Liquid, Gas) ರೂಪತ್ ಮೂಲಕ ಬೊಳಿ ಪಾಂಚಿತ್ ಚದರುವಕ ಮೂಲ ಬೊಳಿಕಿಂಜ ಜಾಸ್ತಿ ಪಿಂಞ ಕಮ್ಮಿ ದಂಡ್ ತರತ್ ಗೆರೆ ನಿಶ್ಚಿತ ರೂಪತ್ ಕಾಂಬಾನ "ರಾಮನ್ ಪರಿಣಾಮ" (Raman Effect) ಎಣ್ಣವ. ರಾಮನ್ ಪರಿಣಾಮ ಭೌತ ವಿಜ್ಞಾನಕ್ ದುಂಬ ಉಪಯೋಗ ಆಚಿ. ಸುವಾರ್ ದಂಡ್ ಆಯಿರ ಕೆಮಿಕಲ್ಸ್‌ರ ಅಣು ರಚನೆ ಕಂಡ್ಪುಡಿಪಕ್ ಉಪಯೋಗ ಆಚಿ. ಲೇಸರ್ ಕಂಡ್ಪುಡ್ಚಿ ಪಿಂಞ ರಾಮನ್‌ರ ಸಂಶೋಧನೆ ಒರ್ ವರ ಆಚಿ. ರಾಮನ್ ಸ್ವತಃ ಒರ್ ಸಂಶೋಧನಾ ಸಂಸ್ಥೆ ಸ್ಥಾಪನೆ ಮಾಡ್ಚಿ. ಇದಂಡ ಪೆದ "ರಾಮನ್ ರಿಸರ್ಚ್ ಇನ್‌ಸ್ಟಿಟ್ಯೂಟ್".

1929 ಲ್ಲ "ನೈಟ್‌ಹುಡ್" ಪದವಿ ಕೊಟ್ಚಿ. ಅಲ್ಲಿಂಜ ಸಿ. ವಿ. ರಾಮನ್, ಸರ್ ಸಿ. ವಿ ರಾಮನ್ ಆಚಿ. ರೋಮ್ ದೇಶ "ಯುಟಿಯುಟಿ" ಪದಕ ಕೊಡ್ತತ್. 1930 ಲ್ಲ "ರಾಮನ್ ಪರಿಣಾಮ" ಸಂಶೋಧನೆಕ್ "ನೋಬೆಲ್ ಪ್ರಶಸ್ತಿ" ಕೊಟ್ಚಿ. ಅದೇ ಕಾಲ ರಾಯಲ್ ಸೊಸೈಟಿ "ಹ್ಯೂಸ್" ಪದಕ ಕೊಡ್ತತ್. 1951 ಲ್ಲ ಫಿಲಿಡೆಲ್ಫಿಯಾ ಇನ್‌ಸ್ಟಿಟ್ಯೂಟ್ "ಫ್ರಾಂಕ್ಲಿನ್" ಪದಕ ಕೊಡ್ತತ್. ಮೈಸೂರ್ ಮಾರಾಜ ನಾಲ್ವಡಿ ಕೃಷ್ಣರಾಜ ಒಡೆಯರ್ 1935 ಲ್ಲ "ರಾಜಸಭಾ ಭೂಷಣ" ಬಿರ್‌ದ್ ಕೊಡ್ತತ್. 1954 ಲ್ಲ ಭಾರತ ಸರ್ಕಾರ "ಭಾರತ ರತ್ನ"



ಬಿರ್ಡ್ ಕೊಡ್ತತ್. ಸುಮಾರ್ ದೇಶತ್‌ರ ವಿಶ್ವವಿದ್ಯಾನಿಲಯ ಎಲ್ಲ ಗೌರವ ಡಾಕ್ಟರೇಟ್ ಕೊಡ್ತತ್.

ಸಿ. ವಿ. ರಾಮನ್ ಬಲ್ಯ ಪೈಚ್ಛಾನಿಕ ಎಳ್ತಕಾರ ಆಯಿತಿಂಜತ್. ನಲ್ಲ ತಮಾಸಿಕಾರನೂ, ಭಾಷಣಕಾರನೂ ಆಯಿತಿಂಜತ್. ಅಯಿಂಗ ಭಾಷಣ ಮಾಡುವಲ್ಲಿ ಚೂದ್ ಬುದ್ಧ ಕಲೂ ಕೇಪನ್ನತ ನಿಶ್ಚಿತ್ತೆ ಇಪ್ಪಯಿಂಜತ್. ಪ್ರಕೃತಿರ ವಿಷಯತ್ ಆಸಕ್ತಿಯಿಂಜ ರಾಮನ್‌ಕ್ ಪೂವ್ ಎಣ್ಣಕ ಭಾರೀ ಕುಸಿ. ರಾಮನ್ ತಾಂಡ ಜೀವನತ್‌ರ ಕಡೇಕೆತ್ತನೆಯೂ, ವಿಜ್ಞಾನತ್‌ರ ವಿದ್ಯಾರ್ಥಿಯೇ ಆಯಿತಿಂಜತ್. ತಾಂಡ ಎಂಬತ್ತಮೂಂದನೆ ಬಯತ್‌ಲ್ ಮರಣಪಟ್ಟ ರಾಮನ್‌ನ ಅಯಿಂಗಡ ಆಸೆ ಪೋಲೆ ಅಯಿಂಗಡ ಸಂಶೋಧನಾಲಯ ಇಂಜಲ್ಲಿಯೇ ಅಂತ್ಯಸಂಸ್ಕಾರ ಮಾಡ್‌ಚಿ. 1928ನೇ ಫೆಬ್ರವರಿ 28 ಲ್ ಬೆಂಗಳೂರ್‌ರ ಸೆಂಟ್ರಲ್ ಕಾಲೇಜ್‌ಲ್ ಆದ್ಯ "ರಾಮನ್ ಪರಿಣಾಮ" ಸಂಶೋಧನೆರ ವಿಷಯ ಭಾಷಣ ಮಾಡ್‌ಚಿ. ಈ ದಿನತ್‌ನ ನಂಗಡ ದೇಶತ್ "ರಾಷ್ಟ್ರೀಯ ವಿಜ್ಞಾನ ದಿನ" ಎಣ್ಣೆತ್ ಆಚರಣೆ ಮಾಡುವ.

ಚೆನ್ನಂಗ್ ವಿಷಯ ಗೊತ್ತಿಂಜಿಟಕ, ಡಿಗ್ರಿ, ಮಾಸ್ಪರ್ ಡಿಗ್ರಿ ಕ್‌ಟ್ಟಿಟಕ ನಂಗ ಬಲ್ಯ ವಿದ್ಯಾವಂತ ಬುದ್ಧಿ ವಂತಂದ್ ಅಹಂಕಾರ ಪಡುವಕಾಗ. ಬದ್‌ಕ್‌ರ ಉದ್ದಕ್ ಪಡ್‌ಚತೇಂಗಿಯೂ ತೇರತಚ್ಚಕ್ ವಿಷಯ ಉಂಡ್‌ಂದ್ ಕಾಟಿ ತಂದ ರಾಮನ್ ಆದರ್ಶ ವ್ಯಕ್ತಿ. □



## ಡಾ| ಬಿ. ಆರ್. ಅಂಬೇಡ್ಕರ್

- ಪುಟ್ಟಾನ ದಿನ - ಏಪ್ರಿಲ್ 14, 1891ನೇ ಇಸವಿ  
 ಪುಟ್ಟಾನ ಜಾಗ - ಅಂಬಾವಾಡೆ, ರತ್ನಗಿರಿ ಜಿಲ್ಲೆ, ಮಹಾರಾಷ್ಟ್ರ  
 ಅಪ್ಪ - ರಾಮಾಜಿ ಸಕ್‌ಪಾಲಾ  
 ಅಮ್ಮ - ಭೀಮಾಭಾಯಿ  
 ಕಣ್ಮರೆ - ಡಿಶಂಬರ್ 6, 1956ನೇ ಇಸವಿ

ರಾಮಾಜಿ ಸಕ್‌ಪಾಲಾರ ಪದನಾಲನೆ ಮೋಂವೊನಾಯಿತ್ ಪುಟ್ಟಾನ ಅಂಬೇಡ್ಕರಾರ ಪೂರ್ತಿ ಪೆದ ಭೀಮರಾವ್ ರಾಮಾಜಿ ಅಂಬಾವಾಡೇಕರ್. ಇಂವೊ ಅಂಜಿ ಬಯತಾಲಿಪ್ಪಕ ಅವ್ವನ ಕಳಂದಂಡತ್. ಅಂದೇತ ಕಾಲತ್ ಮಹಾರಾಷ್ಟ್ರತ್ ಮಹರ್ ಎಣ್ಣುವ ಜಾತಿಲ್ ಪುಟ್ಟಾನಯಿಂಗಳ ಸಮಾಜತ್ ಕೇಳಾಯಿತ್ ಕಾಂಬ ಯಿಂಜತ್. ಸ್ಕೂಲ್‌ಲ್ ಎಲ್ಲ ಮಕ್ಕಡ ಜೊತೆಲ್ ಅಳಪನೆಕಿಲ್ಲೆ, ದಾರನೋ ತೊಡುವನೆಕಿಲ್ಲೆ. ಬಾಯಾರಿಕೆ ಆಚೀಂಗಿ ದಾರಾಚೀಂಗಿ ನೀರನ ಕೊಡಿಲಿಂಜ ಬೂಕುವಕ, ಬಾಯಿಕ್ ಕೈ ಅಡ್ಡ ಪುಡ್‌ಚಂಡ್ ಕುಡಿಕಂಡು. ಇದನೆಲ್ಲ ಅನುಭವಿಚಿಟ್ಟಿ ಆ ಚೆರಿಯ ಕಣ್ಣಿಂಗ್ ಇದೆಲ್ಲ ಎನ್ನಿಂಗ್‌ಂದ್ ಗೊತ್ತಾಯಿಲೆ. ಒಮ್ಮೆ ಅಣ್ಣ ತಮ್ಮಣಿಂಗ ದಂಡಾಳೂ ಅಪ್ಪನ ನೋಟುವಕೆಂದ್ ರೈಲ್‌ಲ್ ಪೋಯಿತ್ ಅಲ್ಲಿಂಜ ಚೆನ್ನಿಂಗ್ ದೂರಕ್ ಗಾಡಿಲ್ ಪೋಕಂಡಿಯಾಚಿ. ಗಾಡಿಲ್ ಚೆನ್ನ ದೂರ ಪೋಯಿ ತಾನದು, ಮಕ್ಕ ದಂಡಾಳೂ ಮಹರ್ ಜಾತಿಕ್ ಕೂಡನೆಯಿಂಗಾಂದ್ ಗೊತ್ತಾನದು


ಗಾಡಿ ನಿಪ್ಪಚಿಟ್ಟಿತ್ ಗಾಡಿರ ನೊಗತ್ನ ಎಡ್ತಿತ್, ಮಕ್ಕಳ ದಂಡಾಳೊನೋ, ತೊಡತೆ ಕೊಡಿಂಜ ಅಡಿಕ್ ಉಳಪ್ಪಚಿ. ಮಜ್ಜಣ ನೇರ, ಬಾಯಾರಿಕೆ, ದಾರೂ ನೀರ್ ಕೊಡ್ಪಾಲೆ. ಭೀಮರಾವ್‌ಕ್ ಬಾಯಾರಿಕೆ ತಡ್ಪಕ್ ಕಯ್ಯತೆ ಒರ್ ಕೆರೆರ ನೀರ್‌ನ ಕೈಲ್ ಕೋತಿತ್ ಕುಡ್ಚತ್. ಅದ್‌ನ ಕಂಡ ಜನ ಚುಮ್ಮಿಮಕ್ಕಳ ಪೊಜ್ಜಿತ್‌ಟ್ಟಿತ್. ಏದ್ ಚವರಕಾರನು ಅಯಿಂಗಕ್ ಚವರ ಮಾಡುವಯಿಂಜಿಲೆ. ಅಯಿಂಗಯಿಂಗಳೇ ಮಾಡಿಯವಯಿಂಜತ್. ಒರ್ ದಿವಸ ಮಳೆ ಬಾತ್‌ಂದ್ ರಸ್ತೆರ ಪಕ್ಕತುಳ್ಳ ಮನೆರ ತೆತ್ತಿಲ್ ಚುಮ್ಮಿಕ್‌ಣ್ಣ ಅಂಬೇಡ್ಕರ್ ನಿಂದಿತಿಂಜತ್. ಆ ಮನೆರ ಯಜಮಾನಿ ಬಂದಿತ್ ನೋಟಿತ್, ಚೆಡಿಲ್ ಕ್ಣ್ಣನ ಉಂದಿತ್‌ಟ್ಟಿತ್. ಆ ಕ್ಣ್ಣ ಕೆತ್ತೆಕ್ ಬುದ್ಧಿತ್, ಮೇಲ್ ಪುಸ್ತಕ ಎಲ್ಲ ಕೆತ್ತೆ ಆಚಿ. ಇನ್ನನೆ ಆ ಚುಮ್ಮಿ ಮನಸ್ಸರ ಮೇಲೆ ಒಂದಾನ ಪಿಂಞ ಒಂದ್ ಬರೆ ಬುದ್ಧಂಡೇ ಇಂಜತ್. ಜನ ಎಲ್ಲ ಎನ್ನೊಗಿನ್ನನೆ ಮಾಡುವೊ? ಜಾತಿ ಎಣ್ಣಕ ಎಂತ? ಎಣ್ಣವ ಸುಮಾರ್ ಅರ್ಥ ಆಕತ ಪ್ರಶ್ನೆ ಆ ಚುಮ್ಮಿ ಕ್ಣ್ಣನ ಕಾಡುವಯಿಂಜತ್. ಅಂದೇತರ ಆ ಅವಮಾನ, ಕಷ್ಟ ಮಿಂಞಕ್ ಅಂವೊನ ನ್ಯಾಯಕಾಯಿತ್ ಪೋರಾಟ ಮಾಡುವ ಬಲ್ಯ ವ್ಯಕ್ತಿ ಆಪನೆಕೆ ಮಾಡ್ಚಿ.

ಹೈಸ್ಕೂಲ್‌ಲ್ ಓದಿಯಂಡಿಪ್ಪಕ ಭೀಮರಾವ್‌ರ ಬುದ್ಧಿವಂತಿಕೆ ಕಂಡಿತ್ ಕುಸಿಯಾನ ಒರ್ ಉಪಾದಿ, ಭೀಮರಾವ್‌ರ ಪೆದತರ ಮಿಂಞಲ್ ಇಂಜ ಅಂಬವಾಡೇಕರ್ ಎಣ್ಣವಾನ ಎಡ್ತಿತ್ ಅಂಬೇಡಕರ್ ಎಣ್ಣಿತ್ ಬದ್‌ಲ್ ಮಾಡ್ಚಿ. ಚೆರಿಯ ಕ್ಣ್ಣನಾನ ಭೀಮರಾವ್‌ಕ್ ಎಚ್ಚಕ್ ಓದ್‌ನಕಲೂ ಪೋರ. ಅವಂಡ ಅಪ್ಪೊ ಸಾಲ ಮಾಡಿತಾಚೆಂಗಿಯೂ ಮೋಂವಂಡ ಪುಸ್ತಕತರ ಆಸೆನ ತೋಪಯಿಂಜತ್.

ಹೈಸ್ಕೂಲ್‌ಲ್ ಓದಿಯಂಡಿಪ್ಪಕ, ಎಲ್ಲಾರೂ ಸಂಸ್ಕೃತ ಪಡಿಪದ್ ಕಂಡಿತ್, ತಾನೂ ಪಡಿಕಂಡೊಂದ್ ಆಸೆಪಟ್ಟಿತ್. ಬೋರೆ ದೇಶತ್ ಪುಟ್ವಾನಂವೊ, ಮುಸಲ್ಮಾನ, ಕ್ರಿಶ್ಚಿಯನ್ ಧರ್ಮಕಾರ ದಾರ್ ಬೋಡೇಂಗಿಯೂ ಸಂಸ್ಕೃತ ಪಡಿಕಲಿಂಜತ್. ವೇದ ಉಪನಿಷತ್ ಓದಲಿಂಜತ್. ಆಚೆಂಗಿ ಹಿಂದುವೇ ಆನ ಈ ಅಸ್ಪೃಶ್ಯಂಗ (Untouchables) ಮಾತ್ರ ಸಂಸ್ಕೃತ ಪಡಿಪನೆಕಿಲ್ಲೆ ಎಣ್ಣವ ವಿಚಾರ ಭೀಮರಾವ್‌ರ ಮನಸ್‌ಕ್ ಬಲ್ಯ ಗಾಯ ಮಾಡ್ಚಿ. ಬಯ್ಯಂಜಿ ಬಲ್ಯಂವೊ ನಾಪದು ಸಂಸ್ಕೃತ ಪಡಿಕತೆ ಬುಟ್ವಾಲೆ. ಪದವಿ ತೋರುವಕಾಪಕ ಅಪ್ಪ ಚಿತ್ತ್‌ಪೋಚಿ. ಭೀಮರಾವ್ ಬರೋಡತರ ಮಾರಾಜಂಡಲ್ಲಿ ಕೆಲಸಕ್ ಕೂಡ್ಚಿ. ರಾಜ ಅವನ ಏರ ಪಡಿಪಕ್ ಅಮೇರಿಕಾಕ್ ಅಯೆಚಿತ್. ಮೇಲ್, ಕೋಳ್ ಎಣ್ಣವ ಜಾತಿ

ಭೇದ ಇಲ್ಲತ ಅಮೇರಿಕಾ ದೇಶ ಅಂಬೇಡ್ಕರ್‌ರ ಮನಸ್ಸುಕ್ ದುಂಬ ಪುಡ್‌ಚತ್. ಅಲ್ಲಿ ಎಂ.ಎ., ಪಿ.ಎಚ್.ಡಿ. ಮಾಡ್‌ಚಿ. ಆ ದೇಶ ಚಾಯುಂಡ್‌ಲೆಂದ್ ಸ್ವಾರ್ಥಿ ಯಾಯಿತ್ ಅಲ್ಲಿಯೇ ಇರಲುಯಿಂಜತ್. ಆಚೀಂಗಿ, ಅನ್ನನೆ ಮಾಡ್‌ಲೆ. ತಾಂಡನ್ನನೆ ನೊಂಬಲ ಪಟ್ಟಿಂಡುಳ್ಳ ಎಚ್ಚಕೋ ಜನಕ್ ನ್ಯಾಯ ಕೊಡ್‌ಕಂಡು, ಅಯಿಂಡ ಕಣ್ಣೇರ್ ತ್ತೇಚೊಂಡು, ಜಾತಿ ಏದಾಚೇಂಗೂ ಮನುಷ್ಯ ಎಲ್ಲ ಒಂದೇ, ಅಯಿಂಗಡ ಮೇಲ್‌ಲೂ ಬೋರೆ ಮನುಷ್ಯಂಗಡ ಮೇಲ್‌ಲ್ ಪರಿವನ್ನತ ಚೋರೆಯೇ ಪರಿವೋಂದ್ ಕಾಟಕೊಡ್‌ಕೊಂಡು ಎಣ್ಣುವ ಗೇನತ್, ಅಂಬೇಡ್ಕರ್ ಭಾರತಕ್ ವಾಪಾಸ್ ಬಾತ್. ಎಚ್ಚಕ್ ಓದಿತ್ ಬಾತೇಂಗೂ ಅಂಬೇಡ್ಕರ್‌ಕ್ ಭಾರತತ್ ಕಯಿಪು ಅನುಭವವೇ ಆಚಿ. ಆಫೀಸ್‌ಲ್ ಎಲ್ಲಾರು ಕುಡಿಪ ನೀರ್‌ನ ಕುಡಿಪಕ್ ಕಯ್ತಲೆ, ಆಫೀಸ್‌ಲ್ ಜವಾನ ಪೈಲನ್ ದೂರತಿಂಜ ಕನಿಪೊ, ಪಾರ್ಸಿ - ಮುಸಲ್ಮಾನಂಗ ಕೂಡ ಮುಟ್ಪಚಿಟ್ಟಿಪುಲೆ, ಇನ್ನನೆ ನೊಂದಿತ್ ಪುನಾದಿಯ 'ಲಾ' ಓದುವಕ್ ಲಂಡನ್‌ಕ್ ಪೋಚಿ. ಅಲ್ಲಿಂಜ ಬ್ಯಾರಿಸ್ಟರ್ ಪದವಿ ಪಡ್‌ಂದಿತ್ ಭಾರತಕ್ ವಾಪಾಸ್ ಬಾತ್. ಅಸ್ಪೃಶ್ಯಂಗ ಅನುಭವಿಚಿಡುವನ್ನತ ನೊಂಬಲತ್‌ನ ಸಮಾಜಕ್ ಕಾಟುವಕ್ ಒರ್ ಪತ್ರಿಕೆ ಸುರು ಮಾಡ್‌ಚಿ. ಅದ್‌ಂಡ ಪೆದ "ಮೂಕನಾಯಕ". ಅಲ್ಲಿಂಜ ಸುರುವಾನ ಪೋರಾಟ ಪ್ರಕೃತಿರ ಕೊಡುಗೆ ಆನಂತ ನೀರ್‌ನ ಎಲ್ಲಾರೂ ಕುಡಿಪನೆಕೆ ಆಂಡೊಂದ್ ಚಳುವಳಿ ಮಾಡಿತ್ ಸಫಲ ಆಚಿ. ಎಲ್ಲಾರ್‌ಕೂ ದೇವಸ್ಥಾನತ್‌ರೊಳ್‌ಕ್ ಪೋಪಕ್ ಅವಕಾಶ ಬೊಂಡೊಂದ್ ಪೋರಾಟ ಮಾಡಿತ್ ಗೆದ್ದತ್. ಇದೆಲ್ಲ ಒಂದ್ ದಂಡ್ ದಿನತ್ ಆನದಲ್ಲ. ಕಾಲಗಟ್ಟಲೆ ಪೋರಾಡಿತ್ ಕಷ್ಟಪಟ್ಟಿತ್ ದೇಶಕ್ ಸ್ವಾತಂತ್ರ್ಯ ಕೊಟ್ಪನ ಪಿಂಞ ಆದ್ಯ ಕಾನೂನ್ ಮಂತ್ರಿಯಾಚಿ. ಅಲ್ಲಿಂಜ ಸಂವಿಧಾನ ರಚನೆ ಮಾಡಿತ್ "ಸಂವಿಧಾನ ಶಿಲ್ಪಿ" ಎಣ್ಣುವ ಬಿರ್‌ದ್ ಪಡ್‌ಂದತ್. ಅಸ್ಪೃಶ್ಯಂಗಕಾಯಿತ್ ಪೋರಾಟ ಮಾಡಿತ್ ಅಯಿಂಗಕ್ ನ್ಯಾಯ ಕೊಟ್ಪನದ್ ಕಂಡಿತ್ ಕುಸಿಪಟ್ಟಿತ್. ಆಚೀಂಗಿ ಮೇಲ್ ಜಾತಿ ಎಣ್ಣೆ ಚಿಟ್ಟಿಂಡ ಜನಡ, ಕೋಳ್ ಬುದ್ದಿನ ಕಂಡಿತ್ ನೊಂದಿತ್, 1956 ಲ್ ಬೌದ್ಧ ಧರ್ಮಕ್ ಕೂಡ್‌ಚಿ. ಅಲ್ಲಿಂಜ ಕೂಡ ಸಮಾಜತ್ ನೊಂದಯಿಂಡ ಸೇವೆ ಮಾಡಿಯಂಡೇ ಕಾಲ ಕಯಿಚತ್. 1956 ಡಿಶಂಬರ್ 6 ಲ್ ಬೈಟ್ ವರ್‌ನಲ್ಲಿಯೇ ಚತ್‌ಪೋಚಿ.

ಎಲ್ಲ ಧರ್ಮಕಿಂಜ ಮಾನವ ಧರ್ಮ ಬಲ್ಕದ್. ಮನ್‌ಷ್ಯ ಮನ್‌ಷ್ಯಂಡ ನಡುಲ್ ಮೇಲ್ - ಕೋಳ್ ಇಪ್ಪಕ್ ಕಯ್. ಮಾನವತೆ, ಮನ್‌ಷ್ಯತ್ತ್ ಎಣ್ಣುವದೇ ಎಲ್ಲ ಮತ, ಧರ್ಮ, ಜಾತಿಕಿಂಜ ಬಲ್ಕದೊಂದ್ ಎಣ್ಣೆನ ಭೀಮರಾವ್ ರಾಮಾಜಿ ಅಂಬೇಡ್ಕರ್‌ರ ತಕ್ಯ ಸೂರ್ಯ, ಚಂದ್ರ, ಭೂಮಿ ಇಪ್ಪಲ್ಲಿ ಕೆತ್ತನೆಯೂ ಸತ್ಯ. □



## ಅರವಿಂದ ಘೋಷ್

- ಪುಟ್ಟಾನ ದಿನ - ಆಗಸ್ಟ್ 15, 1872 ನೇ ಇಸವಿ  
ಅಪ್ಪ - ಡಾ| ಕೃಷ್ಣ ಧನ ಘೋಷ್  
ಅಮ್ಮ - ಸ್ವರ್ಣಲತಾದೇವಿ  
ಪುಟ್ಟಾನ ಜಾಗ - ಪಶ್ಚಿಮ ಬಂಗಾಳ  
ಕಣ್ಮರೆ - ಡಿಶಂಬರ್ 5, 1950ನೇ ಇಸವಿ

ಅರವಿಂದ ಘೋಷ್‌ರ ಅಪ್ಪ ಜಾಸ್ತಿ ಪಡಿಪಕಾಯಿತ್ ವಿದೇಶಕ್ (ಇಂಗ್ಲೆಂಡ್) ಪೋಯಿತ್ ಬಂದಾಂಗ್ ಸಮುದ್ರ ದಾಟುವದ್, ಹಿಂದೂ ಧರ್ಮಕ್ ವಿರುದ್ಧ ಎಣ್ಣೆತ್ ಅಯಿಂಗಳ ಅಯಿಂಗಡ ಬೆಂದು ಚಂಜಾದಿಯ ಬಹಿಷ್ಕಾರ ಬೆಚ್ಚತ್.

ಇನ್ನತ ಮೂಢನಂಬಿಕೆರ, ಜಾಗ, ಸಂಸ್ಕೃತಿ, ಧರ್ಮ ಒಂದೂ ಬೋಂಡ ಎಣ್ಣೆಯಂಡ್ ಪುಟ್ಟಾನ ಊರ್‌ನ ಬುಟ್ಟಿತ್ ಖುಲ್ಲಾ ಎಣ್ಣುವ ಜಾಗತ್ ಸರ್ಕಾರಿ ಸೇವೆ ಮಾಡಿಯಂಡಿಂಜತ್. ಇನ್ನತ ಸಮಯತ್ ಪುಟ್ಟಾನ ಮೋಂವೊಂಗ್ "ಅರವಿಂದ ಅಕ್ರಾಯಿಡ್ ಘೋಷ್" ಎಣ್ಣೆತ್ ಪೆದ ಇಟ್ಟತ್. ಅಕ್ರಾಯಿಡ್ ಎಣ್ಣುವದ್ ಕ್ರಿಶ್ಚಿಯನ್ ಪೆದ. ಇಂಗ್ಲೆಂಡ್‌ಲ್ ಇಂಜಿತ್, ಅಲ್ಲಿಯತ್‌ರ ಜನಜೀವನ, ಜಾತಿಭೇದ ಇಲ್ಲತ ನಡಪು ಕಂಡಿತ್ ಕೃಷ್ಣ ಧನಂಗ್ ಕುಸಿಯಾಯಿ ತಿಂಜತ್. ಅದ್‌ಂಗಾಯಿತ್ ಮೋಂವೊಂಗ್ ಬಂಗಾಳಿ ಭಾಷೆರ ಗಾಳಿಯೂ ಪಡುವ ಕಾಗಾಂದ್ ಗೇನ ಮಾಡಿತ್ ಇಂಗ್ಲಿಷ್‌ಕರ್ತಿ ಆಯಾನ ಗೊತ್ತ್ ಮಾಡಿತಿಂಜತ್.

ಆ ಆಯಾಂಡ ಕೂಡ ಬೊಳೊಂದ ಅರವಿಂದ, ಚೆನ್ನಂಗ್ ಹಿಂದಿಯೂ, ಅರೆ ಬರೆ ಇಂಗ್ಲಿಷ್ ಪಡ್ಚೆಂಡೂ ಬೊಳೊಂದತ್. ಮಾತೃಭಾಷೆಯಾನ ಬಂಗಾಳಿ ಗೊತ್ತೇ ಇಂಜಿಲೆ. ಅಂಜಿ ಬಯತ್‌ಲ್ ಅರವಿಂದನ ಡಾರ್ಜಿಲಿಂಗ್‌ರ ಒರ್ ಇಂಗ್ಲಿಷ್ ಸ್ಕೂಲ್‌ಕ್ ಅಯೆಚತ್. ಅಲ್ಲಿ ದಂಡ್ ಕಾಲ ಆಪದು ಕೃಷ್ಣಧನ ಫೋಷ್‌ಕ್ ಸರ್ಕಾರಿ ಖರ್ಚ್‌ಲ್ ಇಂಗ್ಲೆಂಡ್‌ಕ್ ಪೋಪ ಅವಕಾಶ್ ಕೊಟ್ಪಚಿ. ಇನ್ನತ ಸಂದರ್ಭಕೇ ಪಾರಕಾತಂಡಿಂಜ ಕೃಷ್ಣಧನ, ಪೋಣ್ಣ್ ಮಕ್ಕಳ ಕೂಟಿಯಂಡೇ ಇಂಗ್ಲೆಂಡ್‌ಕ್ ಪೋಚಿ. ಏಳು ಬಯತ್‌ರ ಅರವಿಂದನೋ ಅವಂಡ ದಂಡ್ ಅಣ್ಣಂಗಳೋ ಇಂಗ್ಲಿಷ್‌ಕಾರಡ ಸಂಸ್ಕೃತಿಲೇ ಬೊಳೊತಂಡು ಎಣ್ಣುವ ಉದ್ದೇಶತ್ ಇಂಗ್ಲೆಂಡ್‌ರ ಒರ್ ಕ್ರಿಶ್ಚಿಯನ್ ಪಾದ್ರಿ ರೆವರೆಂಡ್ ವಿಲಿಯಂ ಹೆಚ್. ಡ್ರೂವೆಟ್ ಎಣ್ಣುವಯಿಂಗ್, ಭಾರತತಿಂಜ ಒರ್ ಪರಿಚಯ ಪತ್ರ ಎಡ್‌ತಂಡೇ ಪೋಯಿತಿಂಜತ್. ಇಂಗ್ಲೆಂಡ್‌ಂಜ ವಾಪಾಸ್ ಬಪ್ಪಾಂಗಿಂಜ ಮಿಂಞ ತಾಂಡ ಮೂಂದೂ ಮಕ್ಕಳ ಡ್ರೂವೆಟ್ ದಂಪತಿಯಡ ಮನೆಲ್ ಆಕುವಕ್ ಎಲ್ಲ ಏರ್ಪಾಡೂ ಮಾಡ್ಚಿ. ಅಯಿಂಗ್ ಎನ್ನತೆಲ್ಲ ವಿಷಯತ್ ಪಡ್‌ಪ್‌ಚಿಡಂಡೂಂದೂ ಸಹ ಎಣ್ಣ್ಚಿ. ಆ ಸಂದರ್ಭತ್ ಪಾದ್ರಿರ ಪೋಣ್ಣ್, ಅಯಿಂಗ್ ಏದ್ ಧರ್ಮ ಅನುಕರಣೆ ಮಾಡುವಕ್ ಎಣ್ಣಿ ಕೊಡ್ ಕಂಡೂಂದ್ ಕೇಟತ್. ಅಕ್ಕ ಅರವಿಂದಂಡ ಅಪ್ಪ ಎಣ್ಣ್ಚಿ - "ಇಕ್ಕ ಧರ್ಮತ್‌ರ ವಿಷಯ ಬೋಂಡ. ಮಕ್ಕ ಬಲ್ಯಯಿಂಗ ಆಯಿತ್, ಏದ್ ಧರ್ಮ ಅಯಿಂಗ್ ಬೋಂಡೂಂದಾಪ ಅದ್‌ನ ಆಯ್ಕೆ ಮಾಡಿಯವ".

ಅರವಿಂದಂಡ ಅಣ್ಣಂಗ ಅಲ್ಲಿ ಸ್ಕೂಲ್‌ಕ್ ಕೂಡ್‌ಚಿ. ಅರವಿಂದಂಗ್ ಅಲ್ಲಿಯತ್‌ರ ಸ್ಕೂಲ್‌ಕ್ ಕೂಡುವ ಬಯತ್ ಆಯಿತಿಂಜಿಲೆ. ಅಂವೊಂಗ್ ಡ್ರೂವೆಟ್ ದಂಪತಿಯ ಮನೆಲೇ ಪಾಠ ಎಣ್ಣಿ ಕೊಡ್‌ಪ ಇಂಜತ್. ಲ್ಯಾಟಿನ್, ಇಂಗ್ಲಿಷ್ ಪಿಂಞ ಪ್ರೆಂಚ್ ಭಾಷೆ, ಇತಿಹಾಸ (History), ಭೂಗೋಳ (Geography), ಗಣಿತ (Mathematics) ಇದೆಲ್ಲ ವಿಷಯ ಎಣ್ಣಿ ಕೊಡ್‌ಪ ಯಿಂಜತ್. ಸ್ಕೂಲ್‌ರ ಮಾದಾರಿ ಇನ್ನತದೇ ಪಾಠ ಓದಂಡು, ಇಚ್ಚಕೇ ನೇರಕ್ ಓದೊಂಡು, ಎಣ್ಣುವ ನಿರ್‌ಕ್ ಇಲ್ಲತಾನಗುಂಡ್ ಅರವಿಂದಂಗ್ ಎಕ್ಕ ಬೋಂಡಿಕೆಯೂ ಏದ್ ಪುಸ್ತಕ ಆಚೆಂಗಿಯೂ ಓದುವ ಸ್ವಾತಂತ್ರ್ಯ ಇಂಜತ್. ಅನ್ನನಾಯಿತ್ ಪನ್ನೆರಂಡ್ ಬಯತ್‌ಕ್ ಅರವಿಂದ ಬೈಬಲ್ ಪೂರ್ತಿ ಓದಿತಿಂಜತ್. ಷೇಕ್ಸ್‌ಪಿಯರ್, ಷೆಲ್ಲಿ, ಕೀಟ್ಸ್‌ರನ್ನತ ಬಲ್ಯ ಬಲ್ಯ ಕವಿಯಡ ಎಳ್ಳೆಕಾರಡ ಪುಸ್ತಕ ಎಲ್ಲ ಓದಿತಿಂಜತ್. ಇಂಗ್ಲಿಷ್ ಭಾಷೆಲ್ ಕವನ ಎಳ್ಳೆದುವಚ್ಚಕ್ ಭಾಷಾಜ್ಞಾನ ಬೊಳೊಂದಿತಿಂಜತ್.

1884 ಲ್ ಕ್ರಿಶ್ಚಿಯನ್ ದಂಪತಿಯಕ್ ಆಸ್ಟ್ರೇಲಿಯಕ್ ಪೋಕಂಡಿಯಾಚಿ. ಆಂಗಾಯಿತ್ ಮಕ್ಕಳ ಅಯಿಂಡ ಅವ್ವಂಡ ಮನೆಲ್ ಲಂಡನ್‌ಲ್ ಬುಟ್ಟಿತ್. ಲಂಡನ್‌ಲ್ ಸ್ಕೂಲ್‌ಕ್ ಕೂಡುವಾಂಗ್ ಮಿಂಞ, ಸ್ಕೂಲ್‌ರ ಮುಖ್ಯೋಪಾದ್ರಿ ಅರವಿಂದನ ಪರೀಕ್ಷೆ ಮಾಡ್‌ಚಿ. ಅವಂಡ ಭಾಷಾಜ್ಞಾನವೂ, ಇತಿಹಾಸ, ಗಣಿತ ಜ್ಞಾನವೂ ಕಂಡಿತ್ ಬೆರಗಾಚಿ. 17ನೇ ಬಯತ್‌ರ ಅರವಿಂದ ಗ್ರೀಕ್, ಲ್ಯಾಟಿನ್, ಇಂಗ್ಲಿಷ್, ಫ್ರೆಂಚ್ ಇಚ್ಚೆಕೂ ಭಾಷೆರ ಸಾಹಿತ್ಯತ್‌ನ ಪೂರ್ತಿ ಓದಿತಿಂಜತ್. ಬಾಲೆಕಾರಂಡ ಸಾಹಿತ್ಯ ಜ್ಞಾನಕಾಯಿತ್ ಅಲ್ಲಿಯತ್‌ರ “ಬಟರ್‌ವರ್ತ್”, ಪಿಂಞ “ಬೆಡ್‌ಪೋರ್ಟ್” ಇನಾಂ ಕಾಟ್‌ಚಿ. ಅನ್ನತ ಬುದ್ಧಿವಂತ ಮಕ್ಕ ಅಂದಾಕಣೆ ಆ ಸ್ಕೂಲ್‌ಲ್ ಕೂಡಿತಿಂಜಿಲೆ. ಡ್ರೂವೆಟ್‌ರ ಅವ್ವ ಮನೆಲ್ ದಿನಾ ಬೈಬಲ್ ಓದಿತ್ ಪ್ರಾರ್ಥನೆ ಮಾಡುವಯಿಂಜತ್. ಒರ್ ದಿನ ಅರವಿಂದಂಡ ಅಣ್ಣ ಪ್ರಾರ್ಥನೆಕ್ ಪೋಪ್‌ಲೇಂದ್ ಎಣ್ಣಾಂಗ್, ದೇವಡ ಮೇಲೆ ಭಕ್ತಿ, ನಂಬಿಕೆ ಇಲ್ಲತ ಪಿಶಾಚಿಯಡ ಕೂಡೆ ಇಪ್ಪಕಾಗಾಂದ್ ಚೆಡಿಂಜಂಡ್, ಆ ಮೂಂದ್ ಮಕ್ಕಳ ಬುಟ್ಟಿತ್ ಪೋಯಿರ್‌ತ್. ಜೀವನ ಕಷ್ಟ ಆಚಿ. ಅಪ್ಪ ಅಯೆಪಯಿಂಜ ದುಡ್ಡೂ ನಿಂದ್ ಪೋಚಿ. ದಂಡ್ ಕಾಲ ಕೆಲಕ್ ಸೆರಿ ತಿಂಗತೆ, ಉಂಗತೆ ಅಲ್ಲಿಯತ್‌ರ ಭಿಕ್ಷೆಕಾರಂಗಕೂ ಕಡೆಯಾಯಿತ್ ಬಟ್ಟೆ ಇಟ್ಟಂಡ್, ಇರ್‌ಲ್ ಕೋಟಿಕ್ ಸೆರಿಯಾಯಿತ್ ಪೊದಾಪ ಕಿಲ್ಲತೆ ಆಗ್ಲಿಸ್ಪಿಕೆಕ್ ತಿತ್ ಇಡುವಕ್ ಬೋಂಡಿಯಾನ ಪುಳ್ಳಿ ಸಹ ಇಲ್ಲತೆ ದಿನ ಎನ್ನನೆ ಕಯಿಚತೋ ದೇವಕೇ ಗೊತ್. ಆಚೇಂಗಿಯೂ ಓದುವಾತ್ ಮಾತ್ರ ಬಯ್ ಆಯಿಲೆ. ಎಲ್ಲಾಕಿಂಜ ಏರ ಮಾರ್ಕ್ಸ್‌ ಎಡ್‌ತಿತ್, ಪಾಸಾಯಿತ್ ಸ್ಕಾಲರ್‌ಶಿಪ್ ಪಡ್‌ಂದತ್. ಅಲ್ಲತೆ ಐ. ಸಿ. ಎಸ್. (ಇಕ್ಯತ್‌ರ ಐ. ಎ. ಎಸ್.) ಪರೀಕ್ಷೆಲ್ ರ್ಯಾಂಕ್‌ಲ್ ಪಾಸಾಚಿ. ವಿದ್ಯಾರ್ಥಿ ಜೀವನತ್‌ರ ಅಮೂಲ್ಯ ಸಮಯತ್‌ನ ಚೆನ್ನಂಗೂ ಪಾಳಾಕತೆ ಓದಿತ್ ಪ್ರತಿಯೋರ್ ವಿದ್ಯಾರ್ಥಿಕೂ ಮಾದರಿಯಾಚಿ. ಅರವಿಂದ ಪರೀಕ್ಷೆಲ್ ಎಳಾದ್‌ನಂತ ಪ್ರಬಂಧ, ಪ್ರಶ್ನೆಕ್ ಉತ್ತರ ಎಲ್ಲ ಅಲ್ಲಿ ಒರ್ ಮಾದರಿಯಾಯಿತ್ ಇಂಜತ್.

ಬಯ್ಯಂಜಿ, ಭಾರತತ್‌ರ ಗುಲಾಮ ಸ್ಥಿತಿನ ನೋಟಿತ್ ಸರ್ಕಾರಿ ನೌಕರಿಕ್ ಕೂಡತೆ ಸ್ವಾತಂತ್ರ್ಯಕಾಯಿತ್ ಪೋರಾಟ ಮಾಡಿತ್ ಜೈಲ್‌ಶಿಕ್ಷೆ ಅನುಭವಿಚಿಟ್ಟತ್. ಎಲ್ಲಾರ್‌ಕೂ, ಜೈಲ್‌ವಾಸ ಒರ್ ಶಿಕ್ಷೆ ಆಚೇಂಗಿ, ಅರವಿಂದ ಘೋಷ್‌ರನ್ನತ ಮಹಾತ್ಮಂಗ್ ವರದಾನ ಆಚಿ. ಸಮಯತ್‌ನ ಎನ್ನನೆ ಸದುಪಯೋಗ ಮಾಡಿಯ ವಂಡು ಎಣ್ಣುವಾನ ಅಯಿಂಗ ಅರ್‌ಂಜಿತಿಂಜತ್. ಜೈಲ್‌ಶಿಕ್ಷೆರ ಸಮಯತ್ ಯೋಗಾಭ್ಯಾಸ, ಪ್ರಾಣಾಯಾಮ, ಧ್ಯಾನ ಮಾಡಿತ್ ಭಗವಂತಂಡ ಅನುಗ್ರಹ, ಸಾಕ್ಷಾತ್ಕಾರ ಪಡ್‌ಂದತ್. ಎಕ್ ದೇವ ಸಾಕ್ಷಾತ್ಕಾರ ಆಚಿ, ಅಲ್ಲಿಂಜ ಮಿಂಞಕ್

ಅರವಿಂದ ಘೋಷ್ ಯೋಗಿಯಾಯಿತ್ ಆಶ್ರಮತ್‌ಲೇ ಬದ್‌ಕ್ ನೀಸ್‌ಚಿ. ಜೈಲ್‌ಂಜ ಬಂದ ಪಿಂಞ ಪಾಂಡಿಚೇರಿಲ್ ಆಶ್ರಮ ಮಾಡಿತ್ ಅಲ್ಲಿಯೇ ಇಂಜಿತ್ "ಸಾವಿತ್ರಿ" ಎಣ್ಣವ ಮಾಕಾಪ್ಪ ಕೂಡ್‌ನನೆಕೆ ಸುಮಾರ್ ನುಪ್ಪದ್ ಪುಸ್ತಕ ಎಳ್ದಾಚಿ.

ಚೆರಿಯ ಮಕ್ಕಕ್ ಶ್ರೀ ಗುರು ಅರವಿಂದಂಡ ಸಂದೇಶ ಇನ್ನನೆ ಉಂಡ್ -  
"ಜೀವನತ್ ಬಲ್ಯ ಗುರಿನ ಸಾಧನೆ ಮಾಡೊಂಡು. ಅವ್ವಭೂಮಿರ ಸೇವೆಕಿಂಜ ಬಲ್ಯ ಸೇವೆ ಏದೂ ಇಲ್ಲೆ. ತಡಿ, ಮನಸ್ಸು, ಆತ್ಮ ಸಮೇತ ಮಾತೃಭೂಮಿರ ಸೇವೆಕ್ ತ್ಯಾಗ ಮಾಡಿ, ದೇಶತ್‌ನ ಅಭಿವೃದ್ಧಿ ಪಡಾತಿ...!" □





## ರುಷ್ನಿರಾಣಿ ಲಕ್ಷ್ಮೀಬಾಯಿ

ಪುಟ್ಟಿನ ದಿನ	- 1835 ನೇ ಇಸವಿ ನವೆಂಬರ್ 19
ಪುಟ್ಟಿನ ಜಾಗ	- ವಾಯಿ, ಸತಾರ, ಮಹಾರಾಷ್ಟ್ರ
ಅಪ್ಪ	- ಮೋರೋಪಂಥ
ಅವ್ವ	- ಭಾಗೀರಥಿಬಾಯಿ
ಕಣ್ಮರೆ	- 1858 ನೇ ಇಸವಿ ಜೂನ್ 18

ಲಕ್ಷ್ಮೀಬಾಯಿರ ಮಿಂಞಾತ್ ಪೆದ ಮನೂಬಾಯಿ. ಅಪ್ಪ ಮೋರೋಪಂಥ. ಬಾಜೀರಾಯ ಪೇಶ್ವೆರಲ್ಲಿ, ಗುಮಾಸ್ತ ಕೆಲಸ ಮಾಡುವಯಿಂಜತ್. ಬಾಜೀರಾಯಂಗ್ ಮಕ್ಕ ಇಲ್ಲತಾಂಗ್ ನಾನಾಸಾಹೇಬ ಎಣ್ಣುವ ಒರ್ ಕಣ್ಣನ ದತ್ತು ಎಡ್ತಂಡಿಂಜತ್. ಆ ನಾನಾ ಸಾಹೇಬಂಡ ಕೂಡ ಮನೂಬಾಯಿ ಒರ್ ಚಾಕ್ ಮೋವಡ ಮಾದಾರಿಯೇ ಬೊಳ್ಂದಂಡಿಂಜತ್. ಅನ್ನನಾಯಿತ್ ಉಂಬ, ತಿಂಬೊ, ಕಳಿಪೊ, ವಿದ್ಯೆ, ಕುದುರೆ ಸವಾರಿ, ಕತ್ತಿವರಸೆ, ಕುಸ್ತಿ ಎಲ್ಲ ನಾನಾ ಸಾಹೇಬಂಡ ಜೊತೆಲ್ ಮನೂಬಾಯಿಯೂ ಪಡ್ಚೆಂಡಿಂಜತ್.

ಅಪ್ಪ, ಅಯಿಂಗ ಬಲ್ಯ ಮನ್ಷ್ಯಂಗ, ನಂಗ ಬಡವಾಂದ್ ಮನೂಬಾಯಿಕ್ ಎಣ್ಣಾಚೀಂಗಿ, ಬಲ್ಯಯಿಂಗ ಎಣ್ಣಕ ಎಂತ? ಅಯಿಂಗಡ ಮಾದಾರಿಯೇ ನಂಗಕೂ ಕಣ್ಣ್, ಬಾಯಿ, ಮೂಕ್ ಎಲ್ಲ ಉಂಡಲ್ಲಾಂದ್ ಅಪ್ಪಂಡ ಕೂಡ ವಾದ ಮಾಡುವ ಯಿಂಜತ್.

ಒಮ್ಮೆ ಕುದುರೆ ಸವಾರಿ ಮಾಡಿಯಂಡಿಪ್ಪಕ ಕುದುರೆ ನಾನಾಸಾಹೇಬನ ಬೂಕಿತ್ ಓಡ್ಚಿ. ಅಕ್ಕ ಮನೂಬಾಯಿ ಅವಡ ಕುದುರೆಲ್ ನಾನಾಸಾಹೇಬನೋ ಅಳ್‌ಪ್ ಚಿಟ್ಟಿಂಡ್ ಇಂಞೋರ್ ಕೈಲ್ ಲಗಾಮ್ ಪುಡ್‌ಚಂಡ್ ಅರಮನೆಕ್ ಕಾಕಿಯಂಡ್ ಬಾತ್. ನಾನಾಂಗಿಂಜ ಮನೂ ಬಯತ್‌ಲ್ ಚೆರಿಯವ ಆಯಿತಿಂಜಕಲೂ ಅವಳೇ ಜಾಸ್ತಿ ಧೈರ್ಯಕರ್ತಿ ಆಯಿತಿಂಜತ್. ನಾನಾಂಗ್ ಗಾಯ ಆನದ್ ಕಂಡಿತ್, "ಅಯ್ಯೊ ಎಚ್ಚಕ್ ಗಾಯ ಆಯಿರ್‌ತಲ್ಲಾ"ಂದ್ ಮೋರೋಪಂಥ ಎಣ್ಣೆ ಚಿ.

ಮನೂಬಾಯಿ, "ಅಭಿಮನ್ಯುಕ್ ಅದ್‌ಂಗ್‌ಂಜ ಬಲ್ಯ ಗಾಯ ಆಯಿತೂ ಅಂವೊ ಯುದ್ಧ ಮಾಡಿತಿಲ್ಲೆ ಯ ಅಪ್ಪಾ"ಂದ್ ಕೇಟತ್.

"ಅಕ್ಕತ ಕಾಲವೇ ಬೋರೆ ಇಕ್ಕತ ಕಾಲವೇ ಬೋರೆ" ಎಣ್ಣೆ ಚಿ ಅಪ್ಪ.

"ಅದೆನ್ನೆ ಬೋರೆ ಆಪೊ? ಅದೇ ಸೂರ್ಯ, ಚಂದ್ರ, ಭೂಮಿ ಎಲ್ಲ ಉಂಡಲ್ಲ ಅಪ್ಪ" ಎಣ್ಣೆ ನ ಮೋವಳ ಹೆಮ್ಮೆಲ್ ನೋಟಿ ಚಿ ಅಪ್ಪ.

ಒಮ್ಮೆ ಝಾನ್ಸಿಯಿಂಜ ಒರ್ ಪಟ್ಟಿ ಪೇಶ್ವೆರಲ್ಲಿಕ್ ಬಂದಿತಿಂಜತ್. ಬಂದ ಪಟ್ಟಿಂಗಳೆಲ್ಲ ಮೋವಕ್ ಕ್ಣೆ ನೋಟುವಕೆಣ್ಣಿವಯಿಂಜತ್ ಮೋರೋಪಂಥ. ಅನ್ನನೇ ಈ ಪಟ್ಟಿಂಗೂ ಮೋವಡ ಜಾತಕ ಕಾಟ್‌ನಲ್ಲಿ ನೀಡ ಮೋವಕ್ ರಾಣಿ ಆಪ ಯೋಗ ಉಂಡ್ ಎಣ್ಣೆ ಚಂವೊ. ಝಾನ್ಸಿರ ರಾಜ ಗಂಗಾಧರ ರಾಯಂಡ ಪೊಣ್ಣೆ ಚತ್‌ಪೋಯಿತಿಂಜತ್. ಅಂವೊಂಡ ಜಾತಕ ಸೆರಿ ಬರತೆ ಅಂವೊಂಗ್ ದಂಡನೆ ಮಂಗಲ ಆಯಿತೇ ಇಂಜಿಲೆ. ಅಂವೊ ರಾಜ್ಯತ್‌ರ ವಿಷಯತ್ ನಿಗಾ ಇಡತೆ ಎಕ್ಕೊಲು ನಾಟಕ, ನೃತ್ಯ ಎಣ್ಣೆಯಂಡ್ ಕಾಲ ಕಯಿಚಂಡಿಂಜತ್. ಚೆಡಿ ಮಾತ್ರ ಮೂಕ್‌ರ ತುದಿಲೇ ಇಪ್ಪಯಿಂಜತ್. ಈ ಗಂಗಾಧರ ರಾಯಂಡ ಜಾತಕಕ್ ಮನೂಬಾಯಿರ ಜಾತಕ ಕೂಡುವಯಿಂಜಾನ ಅರ್‌ಂಜ ಪಟ್ಟಿ ಮಂಗಲ ಕುರ್‌ಚತ್. ಪದಾನಂಜಿ ಬಯತೂ ದುಂಬತ ಮನೂಬಾಯಿನ ನಾಪತಂಜಿ ಬಯತ್‌ರ ಗಂಗಾಧರ ರಾಯಂಗ್ ಮಂಗಲ ಕಯಿಚತ್. ಮಹಾರಾಷ್ಟ್ರತ್‌ರ ಸಂಪ್ರದಾಯತ್‌ರನೆಕೆ ಮಂಗಲ ಕಯಿಂಜಿತ್ ಮನೆಕ್ ಬಂದ ಮೂಡಿಕ್ ಲಕ್ಷ್ಮೀಬಾಯಿ ಎಣ್ಣೆತ್ ಪೆದ ಇಟ್ಟಿತ್. ಮಂಗಲಾನ ಪಿಂಞ ಲಕ್ಷ್ಮೀಬಾಯಿ ತಾಂಡ ನಲ್ಲರಿಕೆಲ್ ವಡಿಯನ ಚೆನ್ನಂಗ್ ತಿದ್ದ್ ಚಿ. ಅವಂಡ ನಾಟಕತ್‌ರ ಪುಚ್ಚಿನ ಬುಡ್‌ತಿತ್, ರಾಜ್ಯತ್‌ರ ಅಭಿವೃದ್ಧಿ ಕಾರ್ಯ ನೋಟುವನೆಕೆ ಮಾಡ್‌ಚಿ. ಚೆರಿಯ ವಯಸ್‌ಲ್ ತಾನ್ ಪಡ್‌ಚಿ ವಿದ್ಯೆನ ತಾಂಡ ಕೂಟ್‌ಕರ್ತಿಯಕೂ ರಾಜ್ಯತ್ ಆಸಕ್ತಿ ಉಳ್ಳ ಬೋರೆ ಪೊಂಗಕೂ ಪಡ್‌ಪ್‌ಚಿಟ್ಟಿತ್, ಸಭೆ ಕಾಕಿತ್ ಪೊಣ್ಣಾಳಕ್, ಶರೀರತ್‌ನ ವ್ಯಾಯಾಮ ಮಾಡಿತ್ ಗಟ್ಟಿಯಾಯಿತ್ ಬೆಚ್ಚವಕ್ ಎಣ್ಣೆ ಕೊಡ್‌ಪಯಿಂಜತ್. ಇದೇ ಸ್ತ್ರೀ ಸೈನ್ಯ ಬಯ್ಯಂಜಿ ಬ್ರಿಟಿಷಡ ಕೂಡೆ ಪಡೆಕ್ ಸಹಾಯ ಆಚಿ.

ಲಕ್ಷ್ಮೀಬಾಯಿಕ್ ಒರ್ ಕ್ಕಣ್ಣುಕುಂಞಿ ಆಚಿ. ರಾಜ್ಯತ್‌ಲೆಲ್ಲ ಜನಕ್ ಸಂಭ್ರಮ, ಸಡಗರ, ರಾಜ್ಯಕೋರ್ ಉತ್ತರಾಧಿಕಾರಿ ಕ್ಕಟ್ವಚೀಂದ್. ಆಚೀಂಗಿ ಮೂಂದೇ ತಿಂಗತ್ ಆ ಕುಂಞಿ ಚತ್ತ್ ಪೋಚಿ. ಮಿಂಞಾಲೇ ಕಾಹಿಲಕಾರನಾನ ಗಂಗಾಧರ ರಾಯಂಗ್ ಕುಂಞಿರ ಚಾವುರ ದುಃಖ ತಡ್‌ಪ ಶಕ್ತಿ ಇಂಜಿಲೆ. ಸಂತಾನ ಇಲ್ಲತೆ ಮಿಂಞಾಕ್ ರಾಜ್ಯ ಎನ್ನನೆ ಆಪೊ? ಬ್ರಿಟಿಷ್‌ಕಾರ ರಾಜ್ಯತ್‌ನ ಬಲ್‌ಚವಾಂ ದೆಣ್ಣವ ಚಿಂತೆಲ್ ಗಂಗಾಧರ ರಾಯಂಗ್ ಕಾಹಿಲ ಜಾಸ್ತಿ ಆಚಿ. ಆ ಸಮಯತ್ ಆನಂದ ರಾವ್ ಎಣ್ಣವ ಕ್ಕಣ್ಣನ ದತ್ತು ಎಡ್‌ತಂಡ್ ದಾಮೋದರ ರಾವ್ ಎಣ್ಣತ್ ಪೆದ ಇಟ್ಟಿತ್ ಒರ್ ವಿಲ್ ಮಾಡ್‌ಚಿ. ನಾನ್ ಚತ್ತ್ ಪೋಚೀಂಗಿ ದಾಮೋದರ ರಾವ್ ಭವಿಷ್ಯತ್ ರಾಜನಾಂಡು. ಕ್ಕಣ್ಣ ಬಲ್ಯಂವೊ ಆಕಣೆಕೂ ಲಕ್ಷ್ಮೀಬಾಯಿಯೇ ರಾಜ್ಯತ್‌ನ ನೋಟಿಯವಂಡೂಂದ್ ಎಳಾದ್‌ಚಿಟ್ಟಿತ್ ಅದ್‌ಂಡ ಒರ್ ಪ್ರತಿನ ಬ್ರಿಟಿಷ್ ಸರ್ಕಾರಕೂ ಆಯೆಚತ್. 1853ನೇ ಇಸವಿ ನವಂಬರ್ 16ಂಗ್ ದತ್ತು ಎಡ್‌ತಂಡತ್. 21ಂಗ್ ರಾಜ ಚತ್ತ್‌ಪೋಚಿ. ಪದ್‌ನೆಟ್ವ ಬಯತ್‌ರ ಮೂಡಿ ಲಕ್ಷ್ಮೀಬಾಯಿ ರಾಜ್ಯತ್‌ನ ಆಳಂಡು. ಜನಡ ಸಹಕಾರ ರಾಣಿಕಿಂಜತ್. ಅಕ್ಯತ್‌ರ ಗವರ್ನರ್ ಲಾರ್ಡ್ ಡಾಲ್‌ಹೌಸಿ ಮಕ್ಕ್ ಇಲ್ಲತ ರಾಜಂಗಡ ರಾಜ್ಯತ್‌ನೆಲ್ಲ ಬ್ರಿಟಿಷ್ ಸರ್ಕಾರಕ್ ಕೂಟಿಯವಯಿಂಜತ್. ಅಂತದೇ ಸಂದರ್ಭ ರುನ್ಸಿಕೂ ಬಂದೆತ್ತ್‌ಚಿ. ದತ್ತು ಮಕ್ಕ್‌ಕ್ ಅಧಿಕಾರ ಇಲ್ಲೆ; ರಾಜ್ಯ ನಂಗಕ್ ಒಪ್ಪ್‌ಚಿಡಂಡೂಂದ್ ತಕರಾರ್ ಸುರುವಾಚಿ. ಪೆನ್‌ಶನ್ ತಪ್ಪಾಂದ್ ಆಸೆ ಕಾಟ್‌ಚಿ. ರಾಣಿ ಬಗ್ಗತೆ ಯುದ್ಧಕ್ ತಯಾರಿ ಮಾಡ್‌ಚಿ.

ರಾಣಿ ಲಕ್ಷ್ಮೀಬಾಯಿ ಮಾಡ್‌ನ ಯುದ್ಧ ಬ್ರಿಟಿಷ್‌ಕಾರಡ ಕೂಡೆ ಸ್ವಾತಂತ್ರ್ಯ ಪೋರಾಟಕ್ ಆದ್ಯ ಮೊಳಿ ಇಟ್ಟಿ ಯುದ್ಧ ಆಚಿ. ಬ್ರಿಟಿಷ್‌ಕಾರಡ ಕೂಡ ಯುದ್ಧ ಮಾಡುವಕ್ ಸಹಾಯಕ್ ಬಂದ ಬೋರೆ ಸೈನಿಕಂಗ ಕಡೇ ಗಳಿಗೇಲ್ ಬ್ರಿಟಿಷ್‌ಕಾರಡ ಕೂಡೆ ಕೂಡಿಯಂಡತ್. ಇದ್‌ನಗುಂಡ್ ರಾಣಿಕ್ ಚೋಪದ್ ಅನಿವಾರ್ಯಂದ್ ಗೊತ್ತಾಚಿ. ಆಚೀಂಗಿ ರಾಣಿ ಶರಣಾಪಕ್ ತಯಾರಿಂಜಿಲೆ. ಯುದ್ಧ ಮಾಡಿತೇ ವೀರ ಮರಣ ಪಡ್‌ಂದತ್.

ಧೈರ್ಯ, ಸಾಸಕ್ ಆಣ್, ಪೋಣ್ಣ್ ಎಣ್ಣವ ಭೇದ ಭಾವ ಇಲ್ಲೆ. ಮನಸ್ಸಿ ಗಟ್ಟಿ ಅಯಿತಿಂಜಕ ಪೋಣ್ಣ್ ಆಣ್‌ರ ಸಮಕ್ ನಿಕ್ಕಲೂಂದ್ ಅಂದ್ ಕಾಲತೇ ಕಾಟತಂದ ಈ ಮನೂಬಾಯಿ (ಲಕ್ಷ್ಮೀಬಾಯಿ) ನಂಗಕ್ ಒರ್ ಆದರ್ಶ ವ್ಯಕ್ತಿ.





## ಶ್ರೀನಿವಾಸ ರಾಮಾನುಜಂ

ಪುಟ್ಟಾನ ದಿನ	- 1887 ನೇ ಇಸವಿ, ಡಿಶಂಬರ್ 22
ಪುಟ್ಟಾನ ಜಾಗ	- ಈರೋಡ್, ತಮಿಳುನಾಡ್
ಅಪ್ಪ	- ಶ್ರೀನಿವಾಸ ಅಯ್ಯಂಗಾರ್
ಅಮ್ಮ	- ಕೋಮಲಮ್ಮಾಳ್
ಕಣ್ಮರೆ	- 1920ನೇ ಇಸವಿ ಏಪ್ರಿಲ್ 26

ಚಿರಿಯ ಬಯತ್‌ಲೇ ರಾಮಾನುಜಂಕ್ ಗಣಿತತ್ (ಲೆಕ್ಕ) ದುಂಬಾ ಆಸಕ್ತಿ. ಅಂಜನೇ ಬಯತ್‌ಲ್ ಸ್ಕೂಲ್‌ಕ್ ಕೂಡ್‌ಚಿ. ರಾಮಾನುಜಂಡ ಬುದ್ಧಿಶಕ್ತಿಕ್ ಉಪಾದ್ರಿಯಳೇ ಬೆರ್‌ಗಾಪಯಿಂಜತ್. ಒಮ್ಮ ಉಪಾದ್ರಿ ಭಾಗಾಕಾರ ಲೆಕ್ಕ ಎಣ್ಣೆಕೊಡ್‌ತಂಡಿಂಜತ್. ಒರ್ ಸಂಖ್ಯೆನ ಆದೇ ಸಂಖ್ಯೆಯಿಂಜ ಭಾಗ್‌ಚಿಟ್ಟತೇಂಗಿ ಬಪ್ಪ ಭಾಗಲಬ್ಬ ಒಂದ್ ಎಣ್ಣೆಚಿ. ಅಕ್ಕ ಚುಮ್ಮಿ ರಾಮಾನುಜಂ ಎದ್ ನಿಂದಿತ್ ಸೊನ್ನೆನ ಸೊನ್ನೆಯಿಂಜ ಭಾಗಾಕಾರ ಮಾಡ್‌ಚೇಂಗಿ ಭಾಗಲಬ್ಬ ಎಚ್ಚಕೇಂದ್ ಕೇಟತ್. ಉಪಾದ್ರಿ ನೆಟ್ಚಿ. ಮೂಂದನೆ ಕ್ಲಾಸ್‌ಲಿಪ್ಪಕಲೇ ಬಲ್ಯ ಬಲ್ಯ ಲೆಕ್ಕ ಪಡ್‌ಚಿತಿಂಜತ್. ನಾಲನೆ ಕ್ಲಾಸ್‌ಲಿಪ್ಪಕ ಡಿಗ್ರಿಕಾರಡ ಪುಸ್ತಕತಲಿಂಜ "ಲೋನಿಯ ಕೋನಶಾಸ್ತ್ರ" ಎಣ್ಣುವ ಲೆಕ್ಕತನ ಡಿಗ್ರಿ ವಿದ್ಯಾರ್ಥಿಕ್ ಎಣ್ಣೆ ಕೊಡ್‌ತತ್. ಆರನೆ ಕ್ಲಾಸ್‌ಲಿಪ್ಪಕ "ಕಾರ್" ಎಣ್ಣುವ ಗಣಿತಶಾಸ್ತ್ರಂಡ "ಸಿನಾಪ್‌ಸಿಸ್ ಆಫ್ ಪ್ಯೂರ್ ಮಾಥಮ್ಯಾಟಿಕ್ಸ್" ಎಣ್ಣುವ ಗ್ರಂಥತನ ಓದಿತ್ ಅರ್ಥ ಮಾಡಿಯಂಡಿಂಜತ್. 1903 ಲ್ ಮೆಟ್ರಿಕ್ಯುಲೇಷನ್‌ಲ್ ಫೆಸ್ಟ್‌ಕ್ಲಾಸ್‌ಲ್ ಪಾಸಾನ ಚೆನ್ನಂಗೇ

ವಿದ್ಯಾರ್ಥಿಯಡಾತ್ ರಾಮಾನುಜಂ ಕೂಡ ಒಬ್ಬ. ಅದ್‌ಂಗಾಯಿತ್ ಇಯಂಗಕ್ “ಸುಬ್ರಹ್ಮಣ್ಯಂ ಸ್ಕಾಲರ್‌ಶಿಪ್” ಕೊಟ್ಟಿ. ಅಲ್ಲಿಂಜ ಕುಂಭಕೋಣಂರ ಸರ್ಕಾರಿ ಕಾಲೇಜ್‌ಕ್ ಕೂಡ್‌ಚಿ. ಅಲ್ಲಿ ಗಣಿತ, ಶರೀರಶಾಸ್ತ್ರ, ಗ್ರೀಸ್ ಪಿಂಞ ರೋಮ್ ಇತಿಹಾಸ, ಇಂಗ್ಲಿಷ್ ಪಿಂಞ ಸಂಸ್ಕೃತ ಪಡಿಕಂಡಿಂಜತ್. ಆಚೇಂಗಿ ರಾಮಾನುಜಂಕ್ ಗಣಿತ ಬುಟ್ಟತೇಂಗಿ ಬೋರೆ ಒಂದಾಲೂ ಆಸಕ್ತಿ ಇಂಜಿಲೆ. ಅನ್ನನಾಯಿತ್ ಬೋರೆ ವಿಷಯತ್ ಫೇಲಾಯಿತ್ ಸ್ಕಾಲರ್‌ಶಿಪ್ ನಿಂದತ್. ಬಡತನತ್‌ಲಿಂಜ ರಾಮಾನುಜಂಕ್, ಮಿಂಞಕ್ ಓದುವದ್ ಕಷ್ಟ ಆಚಿ. ಕೆಲಸ ತೇಡ್‌ಚಿ. ಪುನಃ ಮದ್ರಾಸ್‌ಕ್ ಪೋಯಿತ್ ಕಾಲೇಜ್‌ಕ್ ಕೂಡ್‌ಚಿ. ಆರೋಗ್ಯ ಸೆರಿಯಿಂಜಿಲೆ. ಇದೆಲ್ಲ ಆಯಿತ್ ಏದ್ ವಿಶ್ವವಿದ್ಯಾಲಯ ಪದವಿಯೂ ಕೊಟ್ಟಿಲೆ. ಆಚೇಂಗಿ ಗಣಿತತ್‌ರ ಜ್ಞಾನತ್ ಮಾತ್ರ ಏದ್ ಪ್ರೊಫೆಸರ್‌ಕೂ ಕಮ್ಮಿ ಇಂಜಿಲೆ.

ಸಂಸಾರ ಚಾಕುವಕಾಯಿತ್ ಕೆಲಸ ತೇಡಿಯಂಡ್ ಸುತ್ತಿಚಿ. ಪ್ರೊ| ವಿ. ರಾಮಸ್ವಾಮಿ ಅಯ್ಯಂಗಾರ್, ಪ್ರೊ| ಪಿ. ವಿ. ಶೇಷು ಅಯ್ಯರ್ ಇನ್ನತಯಿಂಡ ಶಿಫಾರಸ್ಸಲ್ ಗುಮಾಸ್ತ ಕೆಲಸ ಕೊಟ್ಟಿ. ಪ್ರತಿಭಾವಂತ ಲೆಕ್ಕಶಾಸ್ತ್ರಜ್ಞ ಆಪಯಿಂಜ ರಾಮಾನುಜಂ ಅವಕಾಶ ಇಲ್ಲತೆ ಗುಮಾಸ್ತ ಕೆಲಸ ಮಾಡಿಯಂಡಿಂಜತ್. ಆಚೇಂಗೂ ಗಣಿತತ್‌ರ ಸಂಶೋಧನೆ ನಡತಿಯಂಡೇ ಇಂಜತ್. ಇನ್ನತ ಸಂಶೋಧನಾ ಲೇಖನತ್‌ನ, “ಜನರಲ್ ಆಫ್ ದಿ ಇಂಡಿಯನ್ ಮ್ಯಾಥಮೆಟಿಕಲ್ ಸೊಸೈಟಿ” ಎಣ್ಣುವ ಪತ್ರಿಕೆಲ್ ಪ್ರಕಟ ಮಾಡ್‌ಚಿ. ಇದ್‌ನ ನೋಟಿತ್ ನೆಲ್ಲೂರ್‌ರ ಕಲೆಕ್ಟರ್ ಆಯಿತಿಂಜ ದಿವಾನ್ ಬಹಾದ್ದೂರ್ ರಾಮಚಂದ್ರರಾಯ ಇಂಗ್ಲೆಂಡ್‌ರ ಕೇಂಬ್ರಿಡ್ಜ್ ಟ್ರಿನಿಟಿ ಕಾಲೇಜ್‌ರ ಗಣಿತ ಪ್ರಾಧ್ಯಾಪಕ ಪ್ರೊ| ಜಿ. ಹಾರ್ಡಿಕ್ ಕಾಗದ ಎಳ್‌ದುವಕ್ ರಾಮಾನುಜಂಕ್ ಸೂಚನೆ ಕೊಡ್‌ತತ್. ರಾಮಾನುಜಂ ತಾನ್ ಸಂಶೋಧನೆ ಮಾಡಿತ್ ಎಳ್‌ದಿ ಬೆಚ್ಚಿ ಎಳ್‌ಲ್ ನೂಯಿಟ ಇರುವದ್ ಪ್ರಮೇಯತ್‌ನ ಕೂಟಿತ್ ಒರ್ ಕಾಗದ ಎಳ್‌ದ್‌ಚಿ. ಪ್ರೊ| ಹಾರ್ಡಿ ಪಿಂಞ ಕೂಟ್‌ಕಾರಂಡ ಮಂಡೆ ತಿಂದಂಡಿಂಜ ಎಚ್ಚಕೋ ಗಣಿತತ್‌ರ ಪ್ರಶ್ನೆಕ್ ಉತ್ತರ ಇಂಜ ರಾಮಾನುಜಂರ ಎಳ್‌ ಕಂಡಿತ್ ಹಾರ್ಡಿ ಬೆರಗಾಚಿ. ಮದ್ರಾಸ್ ವಿಶ್ವವಿದ್ಯಾಲಯಕ್ ಕಾಗದ ಎಳ್‌ದಿತ್ ರಾಮಾನುಜಂನ ಸಂಶೋಧನಾ ವಿದ್ಯಾರ್ಥಿಯಾಯಿತ್ ಪರಿಗಣನೆ ಮಾಡಿತ್ ಅಂವೊಂಗ್ ಸ್ಕಾಲರ್‌ಶಿಪ್ ಕೊಡ್‌ಕಂಡು ಎಣ್ಣೆಯಂಡ್ ಸಲಹೆ ಮಾಡ್‌ಚಿ. ವಿಶ್ವವಿದ್ಯಾಲಯತ್‌ರ ಕುಲಪತಿ ಸಭೆ ಕಾಕಿತ್ ವಿಷಯ ಸಭೆಲ್ ಬೆಚ್ಚತ್. ಆಚೇಂಗಿ ಏದೇ ವಿಶ್ವವಿದ್ಯಾಲಯತ್‌ರ ಪದವಿ ಇಲ್ಲತವಂಗ್ ಸ್ಕಾಲರ್‌ಶಿಪ್ ಎನ್ನನೆ ಕೊಡ್‌ಪೋಂದ್ ಸಮಸ್ಯೆ ಬಾತ್. ಆಚೇಂಗಿ ಪುದಿಯ ಪುದಿಯ ಸಂಶೋಧನೆ ಮಾಡುವಕ್ ಪುರ್‌ಡ್ ಕೊಡ್‌ಪದ್ ಎಲ್ಲ ವಿಶ್ವವಿದ್ಯಾಲಯತ್‌ರ ಕರ್ತವ್ಯಾಂದ್ ಗೇನ ಮಾಡಿತ್

ರಾಮಾನುಜಂಕ್ ಸಂಶೋಧನಾ ವಿದ್ಯಾರ್ಥಿ ವೇತನಾಂದ್ ಎಳ್ವತ್ತಂಜಿ ಉರ್ಪಿಯ ಕೊಡ್ಪಕ್ ಸುರು ಮಾಡ್ಚಿ. ಇರುವತ್ತಂಜಿ ಉರ್ಪಿಯ ಸಂಬಳಕ್ ಕೆಲಸ ಮಾಡಿಯಂಡಿಂಜ ರಾಮಾನುಜಂ, 1913 ಲ್ ಎಳ್ವತ್ತಂಜಿ ಉರ್ಪಿಯತ್ತರ ಸ್ಕಾಲರ್‌ಶಿಪ್ ಪಡ್ಂದಿತ್, ಮದ್ರಾಸ್ ವಿಶ್ವವಿದ್ಯಾಲಯತ್ ಸಂಶೋಧನಾ ವಿದ್ಯಾರ್ಥಿಯಾಯಿತ್ ಕೂಡ್ಚಿ. 1914 ಲ್ ಕೇಂಬ್ರಿಡ್ಜ್ ವಿದ್ಯಾಂಸ ಇ. ಹೆಚ್. ನೆವಿಲ್ ಮದ್ರಾಸ್‌ಕ್ ಬಂದಿಂಜತ್. ಅಕ್ಕ ರಾಮಾನುಜಂನ ಇಂಗ್ಲೆಂಡ್‌ಕ್ ಒತ್ತಾಯ ಮಾಡಿತ್ ಕಾಕಿಯಂಡ್ ಪೋಚಿ. ಅಕ್ಕಲೂ ಅಚ್ಚಿಕ್ ಪ್ರೆಸಿಡೆನ್ಸಿ ಕಾಲೇಜ್‌ರ ಪ್ರೊಫೆಸರ್ ಲಿಟ್ಲೆ ಹೆಯಿಲ್ಸ್, ಮದ್ರಾಸ್ ವಿಶ್ವವಿದ್ಯಾಲಯಕ್ ಕಾಗದ ಎಳ್ವದಿತ್, ಇಕ್ಕ ನಿಂಗ ಅಂವೊಂಗ್ ಕೂಳ್ ಕೊಡಿ, ಮಿಂಞಾಕ್ ಒರ್ ದಿವಸ ಪ್ರಪಂಚತೇ ಬಲ್ಯ ಗಣಿತ ಪಂಡಿತನಾಪಾಂದ್ ಎಣ್ಣಾನ ಪೋಲೆ, ಇರ್‌ನೂಯಿಟ ಅಯಿಂಬದ್ ಪೌಂಡ್ ಸ್ಕಾಲರ್‌ಶಿಪ್ ಪಿಂಞ ಇಂಗ್ಲೆಂಡ್‌ಕ್ ಪೋಪ ಬಪ್ಪ ಖರ್ಚ್‌ನ ಕೊಡ್ತತ್. ಇದಲ್ ತಿಂಗಳ್ ಅರುವದ್ ಉರ್ಪಿಯ ತಾಂಡ ವಯಸ್ಸಾನ ಅವ್ವಂಗ್ ಕೊಟ್ಟವನೆಕೆ ಮಾಡಿತ್ ರಾಮಾನುಜಂ ಇಂಗ್ಲೆಂಡ್‌ಕ್ ಪೋಚಿ. ಅಲ್ಲಿಯೂ ಟ್ರಿನಿಟಿ ಕಾಲೇಜ್‌ಂಜ ಕಾಲಕ್ ಅರುವದ್ ಪೌಂಡ್ ಸ್ಕಾಲರ್‌ಶಿಪ್ ಕೊಟ್ಟವನೆಕೆ ಪ್ರೊ. ಹಾರ್ಡಿ ವ್ಯವಸ್ಥೆ ಮಾಡ್ಚಿ. ಇಂಗ್ಲೆಂಡ್‌ಕ್ ಬಂದಿತ್ ಎಳ್ವದಾನ ಸಂಶೋಧನಾ ಗ್ರಂಥತ್‌ನ ಕೇಂಬ್ರಿಡ್ಜ್ ಪ್ರೆಸ್‌ಲೇ ಮುದ್ರಣ ಮಾಡ್ಚಿ. ರಾಮಾನುಜಂರ ಕೀರ್ತಿ ಪ್ರಪಂಚತ್‌ಲ್ಲ ಕೇಳಿ ಪಡ್ಂದತ್. 1916 ಲ್ ಕೇಂಬ್ರಿಡ್ಜ್ ವಿಶ್ವವಿದ್ಯಾಲಯ ಗೌರವ ಪದವಿ ಕೊಡ್ತತ್. 1918 ಲ್ ಇಂಗ್ಲೆಂಡ್‌ರ ರಾಯಲ್ ಸೊಸೈಟಿ ಫೆಲೋಶಿಪ್ ಕೊಡ್ತತ್. ಎಫ್. ಆರ್. ಎಸ್. ಸದಸ್ಯತ್ವ ಕೊಟ್ಟನ ಆದ್ಯ ಭಾರತೀಯ ವ್ಯಕ್ತಿ ರಾಮಾನುಜಂ. ಅಕ್ಕ ಅವಂಡ ವಯಸ್ಸು ನುಪ್ಪದ್ ಮಾತ್ರ. ಇಂಗ್ಲೆಂಡ್‌ಲಿಪ್ಪಕ ಆರೋಗ್ಯ ಚಾಯಿಲ್ ನೋಟಿಯವತೆ ಎಕ್ಕೊಲು ಗಣಿತ, ಸಂಶೋಧನೆ ಎಣ್ಣಿಯಂಡ್ ನೈಚಿತ್ ಅಲ್ಲಿ ಯತ್‌ರ ಹವಾಗುಣಕ್ ಹೊಂದಿಯವತೆ ಕ್ಷಯ ರೋಗ ಬಾತ್. ಅಲ್ಲಿಯೇ ಚಿಕಿತ್ಸೆ ಪಡ್ಂದಕಲೂ ಪೂರ್ತಿ ವಾಸಿಯಾಯಿಲೆ. 1919 ಲ್ ಭಾರತಕ್ ವಾಪಾಸ್ ಬಂದ ಪಿಂಞ ಪುನಃ ಆರೋಗ್ಯ ಪಾಳಾಚಿ. ಡಾಕ್ಟರ್ ವಿಶ್ರಾಂತಿ ಎಡ್ತವಕೆಣ್ಣೆಚಿ. ಆಚೇಂಗಿಯೂ ಬುದ್ದಂಡಲ್ಲಿ ಪೊಣ್ಣೊ ಜಾನಕಿಯಮ್ಮಂಗ್ ಎಣ್ಣಿತ್ ಪನ್ನೆರಂಡ್ ಸಂಶೋಧನ ಲೇಖನ ಎಳ್ವದ್‌ಚಿಟ್ಟತ್. ರಾಮಾನುಜಂ ಎಣ್ಣಿವಾನೆಲ್ಲ ಪೊಣ್ಣೊ ಎಳ್ವದುವಯಿಂಜತ್. 1920 ಲ್ ರಾಮಾನುಜಂ ಲೋಕ ಬುಟ್ಟತ್. ಆಚೇಂಗಿ ಇಂದೆಕೂ ಅಯಿಂಡ ಸಂಶೋಧನೆಕ್ ಚಾವ್ ಇಲ್ಲೆ.

ಅಂದ್ ಸಾಧನೆ ಮಾಡುವಕ್ ಎಚ್ಚಿಕ್ಲ ಕಷ್ಟ ಇಂಜತ್. ಅದ್‌ನೆಲ್ಲ ನೀಸಿತ್ ಸಾಧನೆ ಮಾಡ್ಚಿ ರಾಮಾನುಜಂ. □



## ಡಾ| ಎ. ಪಿ. ಜಿ. ಅಬ್ದುಲ್ ಕಲಾಂ

- ಪುಟ್ಟಿದ ದಿನ - 1931ನೇ ಇಸವಿ, ಅಕ್ಟೋಬರ್ 15  
ಪುಟ್ಟಿದ ಜಾಗ - ರಾಮೇಶ್ವರಂ, ಚೆನ್ನೈ  
ಅಪ್ಪ - ಜೈನುಲಬ್ದೀನ್  
ಅಮ್ಮ - ಅಶಿಯಮ್ಮ

ಅವ್ವಲ್ ಪಕೀರ್ ಜೈನುಲಬ್ದೀನ್ ಅಬ್ದುಲ್ ಕಲಾಂ ಎಣ್ಣುವದ್, ಭಾರತತಾರ ಇಕ್ಕತಾರ ರಾಷ್ಟ್ರಪತಿರ ಪೂರ್ತಿ ಪೆದ. ದೋಣಿ ನಡತುವ ಜೈನುಲಬ್ದೀನ್ ಅಕ್ಷರಸ್ಥನಲ್ಲತ ಪೋಚಿಂಗಿಯೂ ಬುದ್ಧಿವಂತನೂ, ವಿವೇಕಮಂತನೂ ಆಯಿತಿಂಜತ್. ಮೂಂದ್ ಅಣ್ಣಂಗ, ಮೂಂದ್ ಅಕ್ಕಂಗಡ ಜೊತೆಲ್ ಎಳಿಯಂವೊನಾಯಿತ್ ಪುಟ್ಟಿದ ಅಬ್ದುಲ್ ಕಲಾಂ, ರಾಮೇಶ್ವರಂರ ಮಸೀದಿ ರಸ್ತೆಲುಳ್ಳ ಅಜ್ಜ ಕೆಟ್ಟೊನ ಪಳೆಯ ಮನೆಲ್ ಬಾಲ್ಯ ಕಯಿಚತ್. ತಾನ್ ಓದತ ಪೋಚಿಂಗೂ, ಮಕ್ಕಳ ಓದ್‌ಚಿಡಂಡು ಎಣ್ಣುವದೇ ಜೈನುಲಬ್ದೀನ್‌ರ ಆಸೆ ಆಯಿತಿಂಜತ್. ರಾಮೇಶ್ವರಂರ ಈಶ್ವರ ದೇವಸ್ಥಾನತಾರ ಪಟ್ಟಿನೂ, ಜೈನುಲಬ್ದೀನ್ ದಂಡಾಳು ಸಿನೇತಂಗ ಆಯಿತಿಂಜತ್. ಅಯಿಂಗ ದಂಡಾಳು ತಕ್ಕ ಪರೆವಾನ ಕಂಡಿತ್ ಒಮ್ಮ, ಪ್ರಾರ್ಥನೆ ಎನ್ನಾಂಗ್ ಮಾಡುವೊಂದ್ ಕೇಟತ್ ಅಬ್ದುಲ್ ಕಲಾಂ. ಅದಾಂಗ್ ಅಪ್ಪ ಎಣ್ಣಾಚಿ, ಪ್ರಾರ್ಥನೆ ಮನುಷ್ಯಂಡ ಬಯತ್, ಜಾತಿ, ಮತ, ಅಂತಸ್ತ ಎಲ್ಲಾಂಡ ವ್ಯತ್ಯಾಸ ದಾಟಿತ್ ಬ್ರಹ್ಮಾಂಡತಲ್ ಎಲ್ಲ ಒಂದೇ ಎಣ್ಣುವನ್ನತ ಸ್ಥಿತಿನ ಮನಸ್‌ಲ್ ಸೃಷ್ಟಿ ಮಾಡುವಂದ್.

ಜೈನುಲಬ್ದೀನ್ ಎಕ್ವೋಲು ಕೋಳಿ ಕೂವಕ ಏವಯಿಂಜತ್. ನಮಾಜ್ ಮಾಡಿತ್ ಮನೆಂಜ ನಾಲ್ ಕಿ.ಮೀ. ದೂರತಾಲಿಂಜ ತೆಗೆ ತೋಟಕ್ ನಡ್ಂದಂಡೇ ಪೋಯಿತ್ ಬಪ್ಪಕ ಚೆನ್ನಂಗ್ ತೆಗೆ ಎಡ್ತಂಡ್ ಮನೆಕ್ ಬಂದಿತ್, ಇಂಞ ಪೋಲಾಕತರ ಕಾಫಿ ಕುಡಿಪಯಿಂಜತ್. ಅದೇ ಅಭ್ಯಾಸ ಎಳ್ವದ್ ಬಯತ್ ದಾಟ್ಚೇಂಗಿಯೂ ಬದಲಾಯಿತಿಂಜಿಲೆ. ಇನ್ನೆತ ಶಿಸ್ತ್, ನಲ್ಲರಿಕೆ ಅಬ್ದುಲ್ ಕಲಾಂರ ಮೇಲೆ ನಲ್ಲ ಪರಿಣಾಮ ಬೀರ್ಚಿ.

ಕಲಾಂರ ಭಾವ ಅಹ್ಮದ್ ಜಲಾಲ್ದೀನ್ ಕಲಾಂಕ್ ನಲ್ಲೋರ್ ಸಿನೇತಕಾರ ನಾಯಿತಿಂಜತ್. ಮಸೀದಿಲ್ ನಂಗ ಮಾಡುವ ಪ್ರಾರ್ಥನೆಯೂ, ದೇವಸ್ಥಾನತ್ ಹಿಂದುವ ಮಾಡುವ ಪ್ರಾರ್ಥನೆಯೂ ಒರೇ ಶಕ್ತಿಕ್ ಎತ್ತವ ಎಣ್ಣುವ ವಿಷಯತ್ನ ಜಲಾಲ್ದೀನ್ರ ತಕ್ಮಲ್ ಅರ್ಂಜಂಡತ್ ಕಲಾಂ. ಜಾಸ್ತಿ ಓದತ ಪೋಚೇಂಗಿಯೂ ಜಾಸ್ತಿ ವಿಷಯ ಅರ್ಂಜಿತಿಂಜ ಜಲಾಲ್ದೀನ್ ಎಕ್ವಾಲು ಪುದಿಯ ಪುದಿಯ ವಿಷಯ ಚರ್ಚೆ ಮಾಡುವಯಿಂಜತ್. ದುಂಬ ಓದುವನೆಕೆ ಕಲಾಂಕ್ ಪುರ್ಡ್ ಕೊಡ್ಪಯಿಂಜತ್. ಲೈಬ್ರರಿ ಬೆಚ್ಚಂಡಿತಿಂಜ ಮಾಣಿಕಂ ಎಣ್ಣುವ ವ್ಯಕ್ತಿ ಕೂಡ ಅಬ್ದುಲ್ ಕಲಾಂಕ್ ಜಾಸ್ತಿ ಜಾಸ್ತಿ ಪುಸ್ತಕ ಓದುವನೆಕೆ ಎಣ್ಣುವ ಯಿಂಜತ್. ಕಲಾಂಕ್ ಎಟ್ವ್ ಬಯತಾಯಿತಿಪ್ಪಕ ದಂಡನೆ ಮಾಪಡೆ ಸುರುವಾಚಿ. ಆ ಸಮಯತ್ ಪುಳ್ಂಜೆ ಕುರುಕ್ ಮಾರ್ಕೆಟ್ಲ್ ರೇಟ್ ಇಂಜತ್. ಅಕ್ಕ ಕಲಾಂ ಪುಳ್ಂಜೆ ಕುರು ಆಂಜಿತ್ ಮಾರಿತ್ ದಿನಕೋರ್ "ಆಣ" ಸಂಪಾದನೆ ಮಾಡುವ ಯಿಂಜತ್. ಯುದ್ಧತ್ರ ವಿಷಯ ಕಣ್ಣಕ್ ಕಾಂಬನೆಕೆ ಜಲಾಲ್ದೀನ್ ಕಲಾಂಕ್ ಎಣ್ಣೆ ಕೊಡ್ಪಯಿಂಜತ್. ರಾಮೇಶ್ವರಂಲ್ ನಿಂದಂಡಿಂಜ ಟೈನ್, ಯುದ್ಧತ್ರ ಪರಿಸ್ಥಿತಿಲ್ ಇಂಜಕಿಂಜನ್ನೆ ರಾಮೇಶ್ವರಂಲ್ ಟೈನ್ ನಿಕ್ಕತೆ, ಓಡುವ ಟೈನ್ಂಜೇ ಪತ್ರಿಕೆರ ಕಟ್ವನ ಚಾಡುವಯಿಂಜತ್. ಅಕ್ಕ ಪತ್ರಿಕೆರ ಏಜೆಂಟ್ ಸಂಪುದ್ದೀನ್ಕ್ ಸಹಾಯ ಮಾಡುವಕ್ ಕಲಾಂ ನಿಂದತ್. ಪತ್ರಿಕೆರ ಕಟ್ವನ ಪೂರ್ತಂಡ್ ಬಪ್ಪ ಕೆಲಸಕ್ ಕೂಡ್ನ ಕಲಾಂ ಸ್ವಂತ ಸಂಪಾದನೆ ಮಾಡುವಕ್ ಕೂಡ್ಚಿ.

ರಾಮೇಶ್ವರಂರ ಎಲಿಮೆಂಟರಿ ಸ್ಕೂಲ್ಲ್ ಅಂಜನೆ ಕ್ಲಾಸ್ಲ್ ಓದಿಯಂಡಿಪ್ಪಕ ಒರ್ ಪುದಿಯ ಉಪಾದ್ರಿ ಬಾತ್. ಮುಸ್ಲಿಂ ಕ್ಣ ಕಲಾಂರ ಕೂಡ, ಜನಿವಾರ ಇಡುವ ಪಟ್ಟ ಕ್ಣ ರಾಮನಾಥ ಶಾಸ್ತ್ರಿ ಅಳ್ತತಿಂಜತ್. ಇದ್ ಸೆರಿ ಕಾಂಗತೆ ಉಪಾದ್ರಿ, ಕಲಾಂನ ಬಯ್ಯತ್ರ ಬೆಂಚಿಕ್ ಅಯೆಚತ್. ಇದ್ಲಂಜ ದಂಡ್ ಮಕ್ಕಕೂ ಬೇಜಾರಾಚಿ. ಪಟ್ಟಕ್ಣ ಮೊರ್ಚಾರ್ತ್. ದಂಡ್ ಮಕ್ಕಳೂ ಮನೆಲ್ ಪೋಯಿತ್ ವಿಷಯತ್ನ ಎಣ್ಣೆ ಚಿ. ರಾಮನಾಥ ಶಾಸ್ತ್ರಿರ ಅಪ್ಪ ರಾಮೇಶ್ವರ



ದೇವಸ್ಥಾನತರ ಅರ್ಚಕ ಲಕ್ಷ್ಮಣ ಶಾಸ್ತ್ರಿ. ಅಯಿಂಗ ಉಪಾದ್ರಿಕ್ ಮಕ್ಕಡ ಮಿಂಗಳಲೇ ಬುದ್ಧಿವಾದ ಎಣ್ಣೆ ಚಿ. ಚೆರಿಯ ಮಕ್ಕಡ ಮನ್‌ಸ್ಸಲ್ ಸಾಮಾಜಿಕ ಅಸಮಾನತೆ, ಕೋಮುವಾದ ಇನ್ನತ ವಿಷಬೀಜತನ ಉಪಾದ್ರಿಯಾನಂವೊ ಬಿತ್ತುವಕಾಗಾಂದ್. ಉಪಾದ್ರಿ ಒತ್ತಂಡ್ ತಾಂಡ ತಪ್ಪು ನ ತಿದ್ದಿಯಂಡತ್. ಕಲಾಂಕ್ ಮೂಂದ್ ಜನ ಪಟ್ಟಿ ಕುಟುಂಬಕ್ ಕೂಡ್‌ನ ಮಕ್ಕಳೇ ಕೂಟಾಕಾರ ಆಯಿತಿಂಜತ್. ಕಲಾಂರ ವಿಜ್ಞಾನ ಉಪಾದ್ರಿ ಶಿವಸುಬ್ರಹ್ಮಣ್ಯ ಅಯ್ಯುರಾಕ್ ಕಲಾಂನ ದುಂಬ ಕುಸಿ ಇಂಜತ್. ಕಲಾಂ, ನೀನ್ ಬಲ್ಯ ನಗರತಲುಳ್ಳ ಬಲ್ಯ ವ್ಯಕ್ತಿಯಕ್ ಸರಿ ಸಮಾನ ನಾಯಿತ್ ಬೊಳೆಯೊಂಡೂಂದ್ ಎಣ್ಣೆಯಂಡಿಪ್ಪಯಿಂಜತ್. ರಾಮನಾಥಪುರಂಲ್ ಹೈಸ್ಕೂಲ್‌ಕ್ ಕೂಡ್‌ನ ಕಲಾಂಕ್ ಮನೆ ಜನಡ ಗೇನ ಕಾಡುವಯಿಂಜತ್. ಬೇಜಾರ ಆಪಯಿಂಜತ್. ಆಚೇಂಗಿಯೂ, ಭಾವನೂ, ಸಿನೇತಕಾರನೂ ಆಯಿತಿಂಜ ಜಲಾಲುದ್ದೀನ್ ಸಕಾರಾತ್ಮಕ ಆಲೋಚನೆರ ವಿಷಯತ್ ಕಲಾಂಕ್ ಸುಮಾರ್ ಎಣ್ಣೆ ಕೊಡ್‌ತಿತಿಂಜಾನೆಲ್ಲ ಗೇನ ಮಾಡಿತ್ ತಾನ್ ಬಲ್ಯ ವ್ಯಕ್ತಿಯಾಂಡು, ಅಪ್ಪ ನಾಡ ಮೇಲೆ ದುಂಬ ವಿಶ್ವಾಸ ಬೆಚ್ಚಿತ್ ಓದುವಕ್ ಅಯೆಚಿತ್, ಮೊಂವೊ ಬಲ್ಯ ಕಲೆಕ್ತರ್ ಆಂಡೂಂದ್ ಆಸೆಪಟ್ಟಿ ಅಪ್ಪಂಡ ಸೊಪನತಾನ ಸಾಕಾರ ಮಾಡುವದ್ ನಾಡ ಕರ್ತವ್ಯಾಂದ್ ಗೇನ ಮಾಡಿತ್ ಓದುವಾತ್ ಮನ್‌ಸ್ಸೆಟ್ಟಿತ್. ರಾಮನಾಥಪುರಂ ಹೈಸ್ಕೂಲ್‌ಲ್ ಸೊಲೊಮನ್ ಎಣ್ಣುವ ಉಪಾದ್ರಿ, ಕಲಾಂಕ್ ಒರ್ ಫ್ರೆಂಡ್‌ರನೆಕೇ ಇಂಜತ್. ಬದ್‌ಕ್‌ಲ್ ಎಂತೆಂಗಿ ಸಾಧನೆ ಮಾಡಂಡುವೇಂಗಿ ಆಸೆ, ನಂಬಿಕೆ, ನಿರೀಕ್ಷೆ ಇದ್ ಮೂಂದಂಡ ಮೇಲೆ ಪುಡ್‌ತ ಬೆಚ್ಚವಂಡು. ತಾಂಡ ಮೇಲೆ ನಂಬಿಕೆ ಒಂದುಂಡೇಂಗಿ ಮದಿ, ನೀನ್ ನೀಡ ವಿಧಿನೇ ಬದ್‌ಲ್ ಮಾಡೊಲೂಂದ್ ಎಣ್ಣು ವಯಿಂಜತ್.

ಬಾಲ್ಯತೇ ಆಕಾಶತರ ವಿಷಯತ್, ಆಕಾಶತ್ ಪಾರುವ ಪಕ್ಷಿರ ವಿಷಯತ್ ಏರ ಆಸಕ್ತಿ ಇಂಜ ಕಲಾಂ, ನಾನೂ ಒರ್ ದಿನ ಆ ಪಕ್ಷಿಯಡ ಮಾದರಿ ಆಕಾಶತ್ ಪಾರೊಂಡೂಂದ್ ಸೊಪನ ಕಾಂಬಯಿಂಜತ್. ಪಕ್ಷಿ ಎನ್ನನೆ ಪಾರುವೊಂದ್ ಪಾರ ಮಾಡ್‌ನ ಉಪಾದ್ರಿ, ಮಕ್ಕಕ್ ಅರ್ಥ ಆಯಿತಿಲ್ಲೆಂದ್ ಅರ್‌ಂಜಿತ್, ಮಕ್ಕಳ ಸಮುದ್ರತರ ಪಕ್ಕ ಪಕ್ಷಿ ಪಾರುವ ನೇರತ್ ಕೂಟಿಯಂಡ್ ಪೋಯಿತ್, ಪಕ್ಷಿಯಳ ಚಾಯಿಲ್ ನೋಟುವಕ್ ಎಣ್ಣೆತ್, ಮಕ್ಕಕ್ ಅರ್ಥ ಆಪನೆಕೆ ಎಣ್ಣೆ ಕೊಡ್‌ತತ್. ಅಂದೇ ಕಲಾಂ ತಾನೂ ಆಕಾಶತ್ ಪಕ್ಷಿರ ಮಾದರಿ ಪಾರೊಂಡು ವಿಮಾನತರ ವಿಷಯತ್ ಏರ ಪಡಿಕಂಡೂಂದ್ ತೀರ್ಮಾನ ಮಾಡ್‌ಚಿ. ಸ್ಕೂಲ್‌ರ ರಜತ್ ಮನೆಕ್ ಬಪ್ಪಕೆಲ್ಲ ರಾಮೇಶ್ವರತ್ ಅಂಗಡಿ ಬೆಚ್ಚಿತಿಂಜ ಅವಂಡ ಅಣ್ಣ ಮುಸ್ತಾಫಾ ಕಮಲ್, ಕಲಾಂನ ಅಂಗಡಿಲ್ ಅಳ್‌ಪಾಚಿಟ್ಟಿತ್ ಎಲ್ಲಿಕೇಂಗಿ ಪೋಯಿತ್ ಬಪ್ಪ

ಇಂಜತ್. ಅಕ್ಕ ಕಲಾಂ ಅಂಗಡಿಲ್ ಅಳ್ತಂಡ್ ಸಾಮಾನ್ ಮಾರುವಯಿಂಜತ್. ಜನ ಬೀಡಿ, ಸಿಗರೇಟ್ ಎಡ್ ಪಕ, ಈ ಜನ ಕಷ್ಟಪಟ್ಟಿತ್ ಸಂಪಾದನೆ ಮಾಡ್‌ನ ದುಡ್ಡ್‌ನ ದುರಭ್ಯಾಸಕ್ ಎನ್ನ್‌ಂಗ್ ಪಾಳ್ ಮಾಡುವೋಂದ್ ಗೇನ ಮಾಡುವ ಯಿಂಜತ್.

1950 ಲ್ ತಿರುಚಿನಾಪಲ್ಲಿಲ್, ಸೈಂಟ್ ಜೋಸೆಪ್ಸ್ ಕಾಲೇಜ್‌ಕ್ ಕೂಡ್‌ಚಿ. ಅಲ್ಲಿ ಸಾಹಿತ್ಯಕ್ ಸಂಬಂಧಪಟ್ಟ ಪುಸ್ತಕ, ತತ್ವಶಾಸ್ತ್ರ, ವಿಶ್ವಶಾಸ್ತ್ರ, ಖಗೋಳಶಾಸ್ತ್ರಕ್ ಸಂಬಂಧಪಟ್ಟ ಸುಮಾರ್ ಪುಸ್ತಕ ಓದಿತ್ ಜ್ಞಾನಾಭಿವೃದ್ಧಿ ಮಾಡಿಯಂಡತ್. ಪಿ.ಯು.ಸಿ. ಆಯಿತ್ ಭೌತಶಾಸ್ತ್ರತ್ ಬಿ.ಎಸ್ಸಿ. ಕ್ ಕೂಡ್‌ಚಿ. ಪದವಿ ಕ್‌ಟ್ವೊನ ಪಿಂಞ ಗೊತ್ತಾಚಿ ತಾಂಡ ಸೊಪನ ನೇರ್ ಆಂಡೂಂದಾಚೇಂಗಿ ಇಂಜಿನಿಯರಿಂಗ್ ಓದೊಂಡೂಂದ್. ಅಲ್ಲಿಂಜ ಮದ್ರಾಸ್ ಇನ್‌ಸ್ಟಿಟ್ಯೂಟ್ ಆಫ್ ಟೆಕ್ನಾಲಜಿಕ್ ಕೂಡುವಕ್ ಅರ್ಜಿ ಇಟ್ಟಿತ್. ಅಲ್ಲಿಕ್ ಕೂಡುವಕ್ ಆಯಿರ ಉರ್‌ಪಿಯ ಬೋಂಡಿ ಯಾಚಿ. ಆಚೇಂಗಿ ಅಪ್ಪಂಡ ಪಕ್ಕ ಅಚ್ಚಕ್ ದುಡ್ಡ್ ಇಂಜಿಲೆ. ಅಕ್ಕ ಜೊಹರಾ ತಾಂಡ ಪೊನ್ನಾರ ಬಳೆ, ಚೈನ್‌ನ ಅಡ ಬೆಚ್ಚಿತ್ ದುಡ್ಡ್ ಕೂಟಿತ್ ಕೂಡ್‌ತತ್. ಅಕ್ಕ ಕಲಾಂ, ತಾಂಡ ಸ್ವಂತ ಸಂಪಾದನೆಂಜೇ ಬಳೆನ ಬುಡ್‌ತುವೀಂದ್ ಪ್ರತಿಜ್ಞೆ ಮಾಡ್‌ಚಿ. 'ಏರೋನಾಟಿಕಲ್ ಎಂಜಿನಿಯರಿಂಗ್' ವಿಷಯ ಎಡ್‌ತಂಡ್, ಇಂಜಿನಿಯರಿಂಗ್ ಓದುವ ಸಂದರ್ಭತ್ 'ಪ್ರೊಜೆಕ್ಟ್ ವರ್ಕ್'ಕ್ 'ಕೋದಲ್ ಪಾರುವನ್ನತ ದಾಳಿ ವಿಮಾನ' ಎಣ್ಣುವ ವಿಷಯ ಕೊಡ್‌ತತ್. ಕಲಾಂ ಅಲ್ಲತೆ ಇಂಞೂ ನಾಲ್ ವಿದ್ಯಾರ್ಥಿಯ ಕೂಡಿತ್ ಪ್ರೊಜೆಕ್ಟ್ ವರ್ಕ್ ಯಶಸ್ವಿಯಾಯಿತ್ ತೇತತ್. ಅದೇ ಸಮಯತ್ "ನಂಗಡ ವಿಮಾನ ನಂಗಲೇ ತಯಾರ್ ಮಾಡನ" ಎಣ್ಣುವ ವಿಷಯತಾರ ಪ್ರಬಂಧ ಸ್ಪರ್ಧೆಲ್ ಕಲಾಂಕ್ ಪ್ರಥಮ ಇನಾಂ ಕ್‌ಟ್ವೊಚಿ.

ದುಂಬ ಕಷ್ಟಪಟ್ಟಿತ್ ಓದುವಯಿಂಜ ಕಲಾಂನ ಕಂಡಿತ್ ಪ್ರೊ| ಸ್ಪೋಂಡರ್ ಎಣ್ಣುವ ಉಪಾದ್ರಿ ನೀನ್ ಪಡುವ ಪರಿಶ್ರಮತ್‌ಂಜ ನೀಕ್ ಮಾತ್ರ ಅಲ್ಲ, ನೀಡ ಉಪಾದ್ರಿಯಕೂ ನಲ್ಲ ಪೆದ ಕ್‌ಟ್ಟುವಾಂದ್ ಎಣ್ಣುವಯಿಂಜತ್. ಎಂ.ಐ.ಟಿ. ಲ್ ಓದಿತಾನ ಪಿಂಞ ಬೆಂಗಳೂರ್‌ರ ಹೆಚ್.ಎ.ಎಲ್. ಲ್ ತರಬೇತಿ ಪಡ್‌ಂದತ್. ಅಲ್ಲಿಂಜ ಪೊರ್‌ಮೆ ಬಪ್ಪಕ ದಂಡ್ ಜಾಗತ್ ಕೆಲಸ ಇಂಜತ್. ಒಂದ್ ವಾಯುಪಡೆಲ್ (Air Force) ಇಂಞೊಂದ್ ರಕ್ಷಣಾ ಸಚಿವಾಲಯತ್ (Defence) ದಂಡ್ ಜಾಗಕೂ ಅರ್ಜಿ ಇಟ್ಟಿತ್, ಸಂದರ್ಶನಕೂ ಭಾತ್. ದಂಡ್ ಜಾಗತ್ ಸಂದರ್ಶನವೂ ಚಾಯಿಲೇ ಆಚಿ. ಆಚೇಂಗಿ ವಾಯುಪಡೆಲ್ ಬುದ್ಧಿವಂತಿಕೆ ಕಿಂಜ ದೇಹಧಾರ್ಡ್ಯಕೇ ಜಾಸ್ತಿ ಒತ್ತ್ ಕೊಡ್‌ತಾಂಗ್ ಕಲಾಂಕ್ ಆ ಕೆಲಸ ಆಯಿಲೆ.

ಬೇಜಾರತ್ ಹ್ಯಪಿಕೇಷಕ್ ಬಂದಿತ್ ಗಂಗಾಪೊಳಲ್ ಕುಳ್ಚತ್. ಅಲ್ಲಿಯೇ ಇಂಜ ಆಶ್ರಮಕ್ ಪೋಚಿ. ಪೈಲಟ್ ಆಂಡೂಂದ್ ಆಸೆಪಟ್ಟಿತ್ ನಿರಾಶೆ ಆನಾನೆಲ್ಲ ಸ್ವಾಮಿ ಶಿವಾನಂದ ಅಯಿಂಗಡ ಕೂಡ ಎಣ್ಣೆ ಚಿ. ಸ್ವಾಮೀಜಿ ಧೈರ್ಯ ಎಣ್ಣೆತ್ ಅಯೆಚತ್. ರಕ್ಷಣಾ ಸಚಿವಾಲಯತಿಯೆ ಸೀನಿಯರ್ ಸೈಯೆಚಿಕ್ ಅಸಿಸ್ಟೆಂಟ್ ಆಯಿತ್, 1950ಲ್ ಕೆಲಸಕ್ ಕೂಡ್ಚಿ. ಪೈಲಟ್ ಆಗತ ಪೋಚಿಂಗೂ ವಿಮಾನ ಪಾರ್ಚಿಡುವ ಕೆಲಸವೇ ಮಾಡ್ಚಿ ಕಲಾಂ. ಬೆಂಗಳೂರ್ಲ್ ಎ.ಡಿ.ಇ. ಸಂಸ್ಥೆ ಆಯಿತ್ ಕಲಾಂನ ಅಲ್ಲಿಕ್ ಅಯೆಚತ್. ನಂದಿ ಹೋವರ್ಕ್ರಾಪ್ಪ್ ಮಾಡುವ ಕೆಲಸ ವಹಿಸ್ಚಿ. ಕಷ್ಟಪಟ್ಟಿತ್ ಹೋವರ್ಕ್ರಾಪ್ಪ್ ಮಾಡಿತಾಪದು ಆ ಯೋಜನೆನ ಸರ್ಕಾರಕ್ಕೆ ಬುಟ್ಟಿತ್. ಕಲಾಂಕ್ ನಿರಾಶೆ ಆಚಿ. ಪಟ್ಟಿ ಪರಿಶ್ರಮಕ್ ಪ್ರತಿಫಲ ಕೊಟ್ಲೆ. ಈ ನಿರಾಶೆ ದುಂಬ ಸಮಯ ಇಂಜಿಲೆ. ಇಂಡಿಯನ್ ಕಮಿಟಿ ಫಾರ್ ಸ್ಪೇಸ್ ರಿಸರ್ಚ್ (INCOSPAR) ಸಂಸ್ಥೆಲ್ ರಾಕೆಟ್ ಇಂಜಿನಿಯರ್ ಆಯಿತ್ ಕೆಲಸ ಕೊಟ್ಲೆ. ರಾಕೆಟ್ ಪಾರ್ಚಿಡುವ ತರಬೇತಿಕ್ ಅಮೆರಿಕಾಕ್ ಪೋಯಿತ್ ಬಾತ್. 1963ನೇ ಇಸವಿ ನವಂಬರ್ 21 ಲ್ ನಂಗಡ ದೇಶತಂಜ ಆದ್ಯವಾಯಿತ್ ರಾಕೆಟ್ ಆಕಾಶಕ್ ಪಾರ್ಚಿ. ಅದೊಂದ ಜವಾಬ್ದಾರಿ ಅಬ್ಬಲ್ ಕಲಾಂ ವಹಿಸಿಯಂಡಿತಿಂಜತ್. ಅಲ್ಲಿಂಜ ನಂಗಡ ದೇಶತೇ ಉಪಗ್ರಹ ಪಾರ್ಚಿಡುವ ವಾಹನ (S.L.V.) ಮಾಡಂಡು ಎಣ್ಣುವ ಸೊಪನ ಕಲಾಂದ್. ಅದೊಂದ ಜೊತೆಲ್ ಪ್ರೊ. ವಿಕ್ರಮ್ ಸಾರಾಭಾಯಿ ಕೂಡ ಇಂಜತ್. ಇದೇ ಸಂದರ್ಭತ್ ಭಾರತತ್ ಕ್ಷಿಪಣಿ ತಯಾರಿಕೆರ ವಿಷಯತ್ ಚರ್ಚೆ ಆಯಂಡಿಂಜತ್. ಇದೊಲೆಲ್ಲ ಕಲಾಂರ ಪ್ರಮುಖ ಪಾತ್ರ ಇಂಜತ್. ಸಮಯ ಇಲ್ಲತೆ ನಯಿಚಿಂಡಿಂಜ ಸಮಯತೇ ಕಲಾಂರ ಭಾವ, ಅಪ್ಪ, ಅವ್ವ ಮೂಂದಾಳು ಕೂಡ ಮರಣಪಟ್ಟಿತ್. ಕಲಾಂ ಮಾನಸಿಕವಾಯಿತೂ, ದೈಹಿಕವಾಯಿತೂ ಕುಗ್ಗಿ ಚಿ. ಇದೊಂದ ಜೊತೆಕ್ ಕಲಾಂ ತಂಡಕಾರ ತಯಾರ್ ಮಾಡ್ನ SLV ಕೂಡ ವಿಫಲ ಆಚಿ. ಉಂಬೊ, ತಿಂಬೊ, ವರ್ಕ್ ಎಲ್ಲ ಬುಟ್ಟಿತ್ ಮಾಡ್ನ ಕೆಲಸ ವಿಫಲ ಆಪದು ಕಲಾಂಕ್ ಭಾರೀ ಬೇಜಾರ ಆಚಿ. ಆಚಿಂಗೂ, ಪುನಃ ಎಸ್.ಎಲ್.ವಿ. - 3 ಯೋಜನೆ ಪಳೆಯ ವಾಹನತ್ ಲೋಪದೋಷ ಎಲ್ಲ ತಿದ್ದಿಯಂಡ್ ತಯಾರ್ ಮಾಡ್ಚಿ. 1980ನೇ ಜುಲೈ 18ಂಗ್ SLV-3 ರೋಹಿಣಿ ಎಣ್ಣುವ ಉಪಗ್ರಹತ್ನ ಎಡ್ತಂಡ್ ಆಕಾಶಕ್ ಪಾರಿತ್ ರೋಹಿಣಿನ ಕಕ್ಷೆಕ್ ಕೂಟುವಲ್ಲಿ ಸಫಲ ಆಚಿ. ಇಡೀ ರಾಷ್ಟ್ರ ಕಲಾಂ ತಂಡಕ್ ಶುಭಾಶಯ ಬಯಂದತ್. (ಡಿ.ಆರ್.ಡಿ.ಓ.) ರಕ್ಷಣಾ ಸಂಶೋಧನೆ ಪಿಂಞ ಅಭಿವೃದ್ಧಿ ಸಂಸ್ಥೆ ಮಿಸೈಲ್ ಡೆವಲಪ್‌ಮೆಂಟ್ ಪ್ರೋಗ್ರಾಂಕ್ ಕಲಾಂರ ಸಹಾಯ ಬಯಂದತ್. ಇಸ್ರೊ ಸಂಸ್ಥೆ ಕಲಾಂನ ಬುಟ್ಟಿ ಕೊಡ್ಪಕ್

ತಯಾರಿಂಜಿಲೆ. 1982 ಫೆಬ್ರವರಿಲ್ ಅಬ್ದುಲ್ ಕಲಾಂ ಡಿ.ಆರ್.ಡಿ.ಓ. ತಾರ ನಿರ್ದೇಶಕನಾಚಿ. 1981ನೇ ಜನವರಿ 25 ಲ್ ಪದ್ಮಭೂಷಣ ಪ್ರಶಸ್ತಿ ಕೊಟ್ಪಾಚಿ.

ಪೃಥ್ವಿ, ತ್ರಿಶೂಲ್, ಆಕಾಶ್, ನಾಗ್ ಪಿಂಞ ಅಗ್ನಿ ಎಣ್ಣುವ ಅಂಜಿ ಕ್ಷಿಪಣಿ (Missile) ಯಶಸ್ವಿ ಪ್ರಯೋಗ ಕಂಡತ್. 1989ನೇ ಮೇ ಲ್ ಅಗ್ನಿ ಕ್ಷಿಪಣಿ ಪರೀಕ್ಷೆ ಆಪದು ಭಾರತ ಬೋರೆ ಅಭಿವೃದ್ಧಿ ರಾಷ್ಟ್ರತಾರ ಮಾದಾರಿಯೇ ತಾನೂ ಕ್ಷಿಪಣಿಲ್ ಸ್ವಾವಲಂಬಿ ರಾಷ್ಟ್ರವಾಯಿತ್ ಎಲ್‌ಂಗ್‌ಚಿ. ಈ ಕೆಲಸತ್ ನಾನೂರ್ ಜನ ವಿಜ್ಞಾನಿಯಡ ನಾಯಕನಾಯಿತ್ ಪಟ್ಟಿ ಪರಿಶ್ರಮ, ಕಷ್ಟ ಚೆನ್ನಂಗೊಂದೂ ಅಲ್ಲ. 1990ನೇ ಗಣರಾಜ್ಯೋತ್ಸವತ್ ಅಬ್ದುಲ್ ಕಲಾಂಕ್ ಪದ್ಮವಿಭೂಷಣ ಕೊಡ್‌ತಿತ್ ಗೌರವ ಕಾಟ್‌ಚಿ. ತಾಂಡ ಕೂಟ್‌ಕಾರಕ್ ಎಲ್ಲ ತರತೂ ಪುರ್‌ಡ್ ಕೊಡ್‌ಪ ಅಭ್ಯಾಸ ಕಲಾಂಕಿಂಜತ್. 1992 ಲ್ ರಕ್ಷಣಾ ಸಚಿವಂಡ ವೈಜ್ಞಾನಿಕ ಸಲಹೆಗಾರ ಆಯಿತ್ ನೇಮಕ ಆಚಿ. ಅಲ್ಲಿಂಜ 1998 ಲ್ ಪೋಖ್ರಾನ್ ಅಣ್ಣಸ್ತ ಪರೀಕ್ಷೆ ಮಾಡ್‌ಚಿ. ಇದಾನ ಪಿಂಞ ಭಾರತ ಪ್ರಪಂಚತೇ ಒರ್ ವಿಶೇಷ ಸ್ಥಾನ ಪಡ್‌ಂದಂಡತ್. ಜಾಧವಪುರ ವಿಶ್ವವಿದ್ಯಾನಿಲಯ, ಮುಂಬೈ ಐಐಟಿ ಎಲ್ಲ ಗೌರವ ಡಾಕ್ಟರೇಟ್ ಕೊಡ್‌ತತ್. 1997 ಲ್ ಭಾರತರತ್ನ ಪ್ರಶಸ್ತಿ ಕೊಡ್‌ತತ್. ಎಚ್ಚಕೇ ಪ್ರಶಸ್ತಿ ಕೊಟ್ಟಡ್, ಎಚ್ಚಕೇ ಬಲ್ಯ ಬಲ್ಯ ಕುರ್ಚಿ ಕೊಟ್ಟಡ್, ತಾಂಡ ಸರಳತೆ, ವಿನಯ ಸ್ವಭಾವ ಎಂದಿಕೂ ಬುಡತ ಕಲಾಂ ಭಾರತತಾರ ಪ್ರತಿಯೋರ್ ಪ್ರಚಿಕೂ ಒರ್ ಆದರ್ಶ ವ್ಯಕ್ತಿ.

ಅಬ್ದುಲ್ ಕಲಾಂ ಮುಸಲ್ಮಾನನಾಚಿಂಗಿಯೂ ಆದ್ಯ ನಾನೊಬ್ಬ ಭಾರತೀಯ ಅಲ್ಲಿಂಜ ಮುಸಲ್ಮಾನ ಎಣ್ಣುವ. ಕಲಾಂ ಭಗವದ್ಗೀತೆ, ರಾಮಾಯಣ, ಮಹಾಭಾರತ ರನ್ನತ ಸುಮಾರೆಲ್ಲ ಹಿಂದೂ ಪವಿತ್ರ ಗ್ರಂಥ ಓದಿತ್. ಅದಲ್ಲತೆ ವೇದತನ ಕೂಡ ಓದಿತ್. ಮಸೀದಿಕೂ ಪೋಪ, ದೇವಸ್ಥಾನಕೂ ಪೋಪ. ಸಂಸ್ಕೃತ, ತಮಿಳ್ ಭಾಷೆರ ಪಂಡಿತ. ಎಕ್ಕೊಲು ಬ್ರಾಹ್ಮಣ ಜೊತೆಕಾರಂಗಡ ಜೊತೆಲೆ ಒಡನಾಡಿತ್, ಸಸ್ಯಾಹಾರವೇ ಅಭ್ಯಾಸ ಮಾಡಿಯಂಡ ಕಲಾಂನ ಸುಮಾರ್ ಜನ 'ಕಲಾಂ ಅಯ್ಯರ್' ಎಣ್ಣಿತ್ ಕಾಕುವದೂ ಉಂಡ್. ಬೀಡಿ, ಸಿಗರೇಟ್, ಕುಡಿ ಇನ್ನತ ದುರಭ್ಯಾಸತನ ಎಂದೂ ಪಡಿಕತ ಕಲಾಂ ಸಂಗೀತ, ಸಾಹಿತ್ಯ, ಕಲೆ ಇಂತಾಲೆಲ್ಲ ಆಸಕ್ತಿ ಬೆಚ್ಚಂಡಿತ್. ರುದ್ರವೀಣೆ ಪಡ್‌ಚಿತ್, ತ್ಯಾಗರಾಜ ಕೀರ್ತನೆ ಜಾಸ್ತಿ ಕುಸಿ, ನಲ್ಲ ಎಳ್ತಾರ ಕವಿ ಕೂಡ. ಎಕ್ಕೊಲು ಬಲ್ಯ ಬಂಗಲೆಲ್ ಇರಂಡೂಂದ್ ಆಸೆಪಟ್ಟವನಲ್ಲ. ತಾಂಡ ಬದ್‌ಕಾರ ಉದ್ದಕೂ ಒರೇ ಕೋಂಬರೆರ ಮನೆ, ಅದಲ್ ದುಂಬ್‌ನ ಪುಸ್ತಕ ಮಾತ್ರ. ಟಿ.ವಿ. ಪೋಡ್, ರೇಡಿಯೋ ಕೂಡ ಅಯಿಂಗಡ ರೂಂಲ್ ಇಂಜಿಲೆ.

ರಾಷ್ಟ್ರಪತಿ ಆಪಲ್ಲಿಕೆತ್ತನೆಯೂ ಇದೇ ತರತರ ಜೀವನ. ಊಟತಲೂ ಸರಳತೆಯೆ. ಮೆಸ್ಸಿಂಜ ಕೂಳಕರಿಯೋ, ಇಡ್ಡಿಯೋ ಎಡತ ಬಪ್ಪಚಿಟ್ಟಿತ್ ಉಂಬೊ, ತಿಂಬೊ. ಉಡ್ಪಲೂ ಅಚ್ಚಿಕೆ ಸಾದಾ ಪ್ಯಾಂಟು ಶರ್ಟ್, ಕಾಲಕೋರ್ ರಬ್ಬರ್ ಚಪ್ಪಲ್.

SLV ಪಾರ್ಚಿಟ್ಟಿ ಸಮಯತ್ ಇಂದಿರಾಗಾಂಧಿ ಡೆಲ್ಲಿಕ್ ಬಪ್ಪಕೆಣ್ಣಚಿ. ಅಕ್ಕ ಸೂಟ್ ಬೂಟ್ ಇಲ್ಲತೆ ಎನ್ನನೆ ಪೋಪೋಂದ್ ಗೇನ ಮಾಡಿಯಂಡಿಂಜ ಕಲಾಂನ ಇಸ್ಕೋ ಮುಖ್ಯಸ್ಥ ಪ್ರೊ| ಸತೀಶ್ ಧವನ್ ನೀಡ ಯಶಸ್ಸೇ ನೀಕ್ ಸೂಟ್. ಗೇನ ಮಾಡತೆ ಪೋಯಿತ್ ಬಾ ಎಣ್ಣಚಿ. ಎಚ್ಚಕೋ ಸಭೆ, ಸಮಾರಂಭಕ್ ಚಪ್ಪಲ್ಲೇ ಪೋಪಯಿಂಜತ್. ಅಕ್ಕ ಅತಿಥಿಯ ಇಂವೊ ಒಬ್ಬ 'ಮರೆಗುಳಿ ವಿಜ್ಞಾನಿ' ಎಣ್ಣಿಯಂಡ್ ಗೇನ ಮಾಡುವಯಿಂಜತ್. ವಿದೇಶಕ್ ಪೋಂಡು ದುಡ್ಡ್ ಸಂಪಾದನೆ ಮಾಡಂಡೂಂದ್ ಗೇನ ಮಾಡ್ನ ಮನುಷ್ಯನೇ ಅಲ್ಲ. ಡಾ| ಕಲಾಂ ಪೋರ್ಮೆ ಪೋಯಿತ್ ದುಡ್ಡ್ ಸಂಪಾದನೆ ಮಾಡೊಲು ಅವ್ವ ನಾಡ್‌ರ ಜನಡ ಪ್ರೀತಿಕ್ ಅದ್ ಸಮವಾ? ಎಣ್ಣಿಯಂಡ್ ಕೇಪ ಕಲಾಂ ನಂಗಡ ದೇಶತರ ದೇಶಭಕ್ತ ಆದ್ಯ ಪ್ರಜೆ. 2002ನೇ ಇಸವಿ ಜುಲೈ 15 ಲ್ ಅಬ್ದುಲ್ ಕಲಾಂ ಭಾರತ ದೇಶತರ ರಾಷ್ಟ್ರಪತಿ ಆಯಿತ್ ಆಯ್ಕೆ ಆಪಕ ಜನ ಎಲ್ಲ ರಾಜಕೀಯ ಅನುಭವ ಇಲ್ಲತ ಒರ್ ವ್ಯಕ್ತಿ ಎನ್ನನೆ ರಾಷ್ಟ್ರಪತಿ ಆಯಿತ್ ಆಡಳಿತ ನಿರ್ವಹಣೆ ಮಾಡುವಾಂದ್ ಗೇನ ಮಾಡ್ಚಿ. ಆಚೇಂಗಿ ಇಂದ್ ಪ್ರತಿಯೊಬ್ಬನೂ ಕಲಾಂರನ್ನತ ರಾಷ್ಟ್ರಪತಿ ಕ್ಷುಣ್ಣವಕ್ ಭಾರತ ದೇಶವೂ ಭಾರತತರ ಪ್ರಜೆಯಳೂ ಪುಣ್ಯ ಮಾಡಿತೇಂದ್ ಎಣ್ಣವ. ಎಲ್ಲಿಕೇ ಪೋಡ್ ಮಕ್ಕಳ, ಬಾಲೆಕಾರಳ ಕಂಡಿತ್, ಬಲ್ಯ ಬಲ್ಯ ಸೊಪನ ಕಾಂಗಂಡು ಅದ್‌ನ ಸಾಕಾರ ಮಾಡಂಡು. ದೇಶತನ ಅಭಿವೃದ್ಧಿ ಪಡ್ತಂಡೂಂದ್ ಪುರಾಡ್ ಕೊಡ್ಪ. 'ವಿಂಗ್ಸ್ ಆಫ್ ಫೈರ್' ಎಣ್ಣವ ಆತ್ಮಕತೆ 'ಎ ವಿಷನ್ ಫಾರ್ ದ ನ್ಯೂ ಮಿಲೆನಿಯಂ' ಇಗ್ನಿಟೆಡ್ ಮೈಂಡ್ಸ್ ಎಣ್ಣವ ಮೂಂದ್ ಪುಸ್ತಕ ಎಳಾದಿತ್. 'ಮೈ ಜರ್ನಿ' ಎಣ್ಣವ ಕವನ ಸಂಕಲನ ತಮಿಳರ ಅನುವಾದ. ಇಚ್ಚಕೆಲ್ಲ ಸಾಧನೆ ಮಾಡ್‌ನಾಂಡ ಬಯ್ಯತ್ ಕಲಾಂರ ಪರಿಶ್ರಮ, ಕರ್ತವ್ಯನಿಷ್ಠೆ ಎಚ್ಚಕಿಕ್ಕು?

ಅಬ್ದುಲ್ ಕಲಾಂ ಇಂಜಿನಿಯರ್ ಆಯಿತೂ, ವಿಜ್ಞಾನಿ ಆಯಿತೂ, ಕವಿ, ಲೇಖಕ, ರಾಷ್ಟ್ರಪತಿ, ಇಚ್ಚಕೆಲ್ಲ ಸಾಧನೆ ಮಾಡಿತಿಪ್ಪಕ ನಂಗಕ್ ಇದಲ್ ಎದೇಂಗಿ ಒಂದಾಚೇಂಗೂ ಮಾಡುವ ಕಯ್ಯಲೆಯಾ? ನಂಗಡ ಕಣ್ಣ್ ಮಿಂಞಲುಳ್ಳ ಈ ದೇಶಭಕ್ತ ಅದ್ಭುತ ವಿಜ್ಞಾನಿ ನಂಗಡ ದೇಶತರ ಪ್ರತಿ ಪ್ರಜೆಕೂ ಆದರ್ಶ ವ್ಯಕ್ತಿಯಾಡ್. □



## ಮದರ್ ಥೆರೆಸಾ

- ಪುಟ್ಟನ ಜಾಗ - ಸ್ಕೂಪೆಜ್, ಯುಗೋಸ್ಲಾವಿಯಾ  
 ಪುಟ್ಟನ ದಿನ - 1910ನೇ ಇಸವಿ ಆಗಸ್ಟ್ 27  
 ಅಪ್ಪ - ನಿಕೋಲಾಸ್ ಬೋಜಾಕ್ಸಿಯಾ  
 ಅಮ್ಮ - ಡ್ರೆನ್‌ಫೆಲ್ ಬೆಕ್ಸಿಲ್  
 ಕಣ್ಮರೆ - 1997ನೇ ಇಸವಿ ಸೆಪ್ಟೆಂಬರ್ 5

ಥೆರೆಸಾಂಡ ನೇರಾನ ಪೆದ ಆಗ್ನೇಸ್ ಗಾನ್‌ಗ್ಸಾ ಬೋಜಾಕ್ಸಿಯಾ. 'ಗಾನ್‌ಗ್ಸಾ' ಎಣ್ಣೆ ಚೀಂಗೆ ಆಲ್ಬೇನಿಯನ್ ಭಾಷೆಲ್ ಪೂ ಮೊಗ್ಗೊಂದ್. ಸರ್ಕಾರಿ ಸ್ಕೂಲ್‌ಲ್ ಪೈಮರಿ ಓದ್‌ಚಿ. ಏಳ್ ಬಯತ್‌ಲ್ ಅಪ್ಪನ ಕಳಂದಂಡತ್. ಚಿರಿಯ ಬಯತ್‌ಲೇ ಸರಳ ಜೀವನತ್‌ನ ಋಷಿ ಪಡುಪಯಿಂಜ ಥೆರೆಸಾ ಅಪ್ಪ ಚಿತ್ತ ದುಃಖ ಮರಾಪಕ್ ಕಯ್ಯತೆ ಪನ್ನೆರಂಡನೆ ವಯಸ್‌ಲ್ ಸನ್ಯಾಸಿನಿ ಆಂಡೊಂದ್ ಹಟಿ ಮಾಡ್‌ಚಿ. ಮೋವ 'ನನ್' ಆಪದ್ ಅವ್ವಂಗ್ ಕುಸಿ ಇಂಜಿಲೆ. ಪದ್‌ನೆಟ್ಟನೆ ವಯಸ್‌ಲ್ ಅವ್ವನ ಒಪ್ಪಾಚಿಟ್ಟಿತ್ ಸನ್ಯಾಸಿನಿ ಆಚಿ. 1929 ಲ್ ಭಾರತಕ್ ಬಾತ್. ಕಲ್ಕತ್ತಾತ್‌ರ ರಸ್ತೆಲ್ ಕುಷ್ಟರೋಗಿಯ, ಅಂಗವಿಕಲಂಗ, ಕೂಳ್‌ಕಾಯಿತ್ ಬೋರೆಯಿಂಗಡ ಕಾಲ್ ಪುಡಿಪ ಬೆತ್ತಲೆ ಮಕ್ಕಳ ಕಂಡಿತ್ ಥೆರೆಸಾಂಡ ಮನ್‌ಸ್ ನೊಂದತ್. ಕಲ್ಕತ್ತಾತ್‌ರ ಲೊರೆಟೊ ಕಾನ್ವೆಂಟ್‌ಲ್ ಉಪಾದ್ರಿಣಿಯಾಯಿತ್ ಕೆಲಸ ಮಾಡಿತ್, ಬಯ್ಯಂಜಿ ಅಲ್ಲಿಯೇ ಪ್ರಿನ್ಸಿಪಾಲ್ ಆಚಿ. 1931 ಲ್ ಮೇ 24ಂಗ್ ಬ್ರಹ್ಮಚರ್ಯ ದೀಕ್ಚೆ

ಎಡ್ತಂಡ್ ತಾಂಡ ಬದ್ಕನ ಬಡವಡ, ರೋಗಿಯಡ ಸೇವೆಕೇ ಬೆಚ್ಚತ್. ಕೊಲ್ಕತ್ತಾತ್ ಕುಷ್ಕರೋಗಿಯಕ್ ಒರ್ ಆಶ್ರಮ ಮಾಡ್ಚಿ. ಅಂದೇತ ಕಾಲತ್ ಕುಷ್ಕ ರೋಗಿಯಳ ಎಲ್ಲರೂ ತಿರಸ್ಕಾರತ್ ನೋಟುವಯಿಂಜತ್. ಅಕ್ಕ ಥೆರೆಸಾ ಕುಷ್ಕರೋಗಿಯಡ ಗಾಯತ್ನೆಲ್ಲ ತಾನೇ ಕತ್ತಿತ್ ಮದ್ನ್ ಇಟ್ಟಿತ್ ಸೇವೆ ಮಾಡುವ ಯಿಂಜತ್. ಕುಷ್ಕ ರೋಗ ವಾಸಿಯಾನಯಿಂಗಳಕ್ ಬದ್ಕುವಕ್ ಸುಲಭ ಆಪನೆಕೆ 'ಪ್ರೇಮ ನಿವಾಸ' ಎಣ್ಣುವ ಸ್ವಯಂ ಉದ್ಯೋಗ ಸಂಸ್ಥೆನ ಸ್ಥಾಪನೆ ಮಾಡ್ಚಿ. 1950 ಲ್ 'ಮಿಷನರೀಸ್ ಆಫ್ ಚಾರಿಟಿ' ಸಂಘಕ್ ಲೈಸೆನ್ಸ್ ಕ್ಷಾಚ್ಚಿ. ಅಲ್ಲಿ ನಾಲ್ ಆಯಿರಕಿಂಜ ಜಾಸ್ತಿ ಸನ್ಯಾಸಿನಿಯ ಸೇವಾ ದೀಕ್ಚೆ ಎಡ್ತಂಡತ್.


1963 ಲ್ ಮಿಷನರಿ ಬ್ರದರ್ಸ್ ಆಫ್ ಚಾರಿಟಿ ಸಂಸ್ಥೆಲ್ ಆಣಾಳೂ ಸೇವಾದೀಕ್ಚೆ ಎಡ್ತಂಡತ್. ಅನಾಥಾಶ್ರಮ, ವೃದ್ಧಾಶ್ರಮ, ಕಳ್ಳ ಕುಡಿಪ ಅಭ್ಯಾಸ ಬುಡ್ತಿತ್ ಆಯಿಂಗಳ ಸುಧಾರಣೆ ಮಾಡುವಕ್ 'ಕರುಣಾ ನಿಲಯ' ಇನ್ನನೆ ಅದೆಚ್ಚಕೋ ಸ್ವಯಂಸೇವಾ ಸಂಸ್ಥೆನ ಕ್ಷಾಚ್ಚಿ. 1971 ಲ್ ಭಾರತ ಪಾಕಿಸ್ತಾನ ಯುದ್ಧ ಆಯಿತಿಪ್ಪಕ ಬಾಂಗ್ಲಾತಿಂಜ ಬಂದ ನಿರಾಶ್ರಿತಂಗಳಕ್ ಆಶ್ರಯ ಮಾಡಿ ಕೊಡ್ತತ್. 1977 ಲ್ ಆಂಧ್ರಪ್ರದೇಶತ್ ಬಿರುಗಾಳಿಲ್ ಮನೆಮರ ಕಳಂದಯಿಂಡ ಸೇವೆ ಮಾಡ್ಚಿ. 1981 ಲ್ ಇಥಿಯೋಪಿಯಾತ್ ಬರ ಬಂದಿತ್ ಉಂಬಕಿಲ್ಲತ ಜನಕ್ ಕೂಳ್ ಒದಗ್ಚಿಟ್ಟತ್. ಇನ್ನನೆ ಸರ್ಕಾರ, ಸಂಘ ಸಂಸ್ಥೆ ಕೂಡಿತ್ ಮಾಡುವ ಕಯ್ತಚ್ಚಕ್ ಕಾರ್ಬಾರ್ ಮದರ್ ಥೆರೆಸಾ ಒಬ್ಬಳೇ ಜವಾಬ್ದಾರಿ ಎಡ್ತಂಡ್ ಮಾಡಿತ್ ಕಾಟ್ಚಿ. ಪ್ರಪಂಚತ್ 115 ದೇಶತ್ಲ್ ಬಡವಕಾಯಿತ್ ಸ್ಥಾಪನೆ ಮಾಡ್ತನ ಆಶ್ರಮ ಉಂಡ್. 1929 ಲಿಂಜ 1948 ಕೆತ್ತನೆ ಇಡೀ ಪ್ರಪಂಚತ್ನ ಸುತ್ತಿತ್ ಬಾತ್. ಪೋನಲ್ಲಿ ಎಲ್ಲ; ಜಾತಿ, ಧರ್ಮ, ರಾಷ್ಟ್ರ ಭಾಷೆ ಎಣ್ಣುವ ಭೇದ ಇಲ್ಲತೆ ಬಡವಡ, ಕಾಯಿಲಕಾರಡ ಸೇವೆ ಮಾಡ್ಚಿ. ವಯಸ್ಸಾಯಿತ್ ಬಗ್ಗಿ ನಡಂದಕಲೂ ಸೇವೆಯೇ ಆ ಮಾಮಾತೆರ ಗುರಿ ಆಯಿತಿಂಜತ್. ಹೃದಯ ಆಪರೇಶನ್ ಮಾಡಿತ್ ಫೇಸ್ ಮೇಕರ್ ಇಟ್ಟಿತಿಂಜತ್. ಆಕ್ಸಿಡೆಂಟ್ಲ್ ಬೋಳೆರ ಮೂಳೆ ಪೋಳಂಜಿತಿಂಜತ್. ಇನ್ನತೆ ಎಚ್ಚಕೋ ತೊಂದರೆ ತಾಂಡ ಶರೀರತ್ ಇಂಜಕಲೂ ಅದನ್ನೆಲ್ಲ ಲೆಕ್ಕಕ್ಡತೆ ಜೀವನತ್ ಉದ್ದಕೂ ಜನಡ ಸೇವೆ ಮಾಡ್ಚಿ. ಆ ಮಾತೆನ ಸನ್ಮಾನ ಮಾಡತ ದೇಶವೇ ಇಲ್ಲೆ. ಎಚ್ಚಕೋ ದೇಶತ್ರ ವಿಶ್ವವಿದ್ಯಾನಿಲಯ ಗೌರವ ಡಾಕ್ಟರೇಟ್ ಕೊಡ್ತಿತಿಂಜತ್. ಮದರ್ ಥೆರೆಸಾಂಗ್ ಕ್ಷಾಚ್ಚಿನ ಪ್ರಶಸ್ತಿರ ಮಾಲೆ ಇನ್ನನೆ ಉಂಡ್.

- 1962 - ಪದ್ಮಶ್ರೀ
- 1970 - ಮ್ಯಾಗ್ಸೆಸೆ ಪ್ರಶಸ್ತಿ
- 1971 - ಪೋಪ್ ಜಾನ್ ಶಾಂತಿ ಪ್ರಶಸ್ತಿ, ಗುಡ್ ಸಮಾರಿಟಿನ್ ಜಾನ್ ಎಫ್ ಕೆನಡಿ ಅಂತರರಾಷ್ಟ್ರೀಯ ಪ್ರಶಸ್ತಿ
- 1972 - ಜವಹರಲಾಲ್ ಅಂತರರಾಷ್ಟ್ರೀಯ ಪ್ರಶಸ್ತಿ
- 1973 - ಟೆಂಪಲ್‌ಟನ್ ಪ್ರಶಸ್ತಿ
- 1974 - ಮ್ಯಾಟರ್ ಆಫ್ ಮೆಜಿಸ್ಟ್ರಾ (ಅಮೇರಿಕಾ)
- 1979 - ನೋಬೆಲ್ ಶಾಂತಿ ಪ್ರಶಸ್ತಿ
- 1980 - ಭಾರತ ರತ್ನ
- 1983 - ಆರ್ಡರ್ ಆಫ್ ಮೆರಿಟ್ (ಇಂಗ್ಲೆಂಡ್)
- 1993 - ರಾಜೀವ್ ಗಾಂಧಿ ಸದ್ಭಾವನಾ ಪ್ರಶಸ್ತಿ
- 1994 - ಯುನೆಸ್ಕೋ ಶಾಂತಿ ಪ್ರತಿಷ್ಠಾನ ಪ್ರಶಸ್ತಿ, ಉಧಾಂಟ್ ಶಾಂತಿ ಪ್ರಶಸ್ತಿ

ಇಚ್ಛಕೆಲ್ಲ ಪ್ರಶಸ್ತಿ ಕಿಂಜ ನಾಡ ಮೇಲೆ ಜನಕುಳ್ಳ ಪ್ರೀತಿಯೇ ಬಲ್ಯದಾಂದ್ ಎಣ್ಣುವಯಿಂಜತ್. "ಬೋರೆಯಿಂಗಡ ಕಣ್ಣೀರ್ ನೀನ್ ತಾಟ್.... ದೇವ ನೀಡ ಕಣ್ಣೀರ್ ತಾಟ್ವಾ" ಎಣ್ಣುವ ತಕ್ಕಾಲ್ ಪೆರ್ತ್ ನಂಬಿಕೆ ಇಂಜತ್. ಇಡೀ ಪ್ರಪಂಚಕೇ ಅವ್ವನಾಯಿತಿಂಜ ಥೆರೆಸಾ ಮರಣಪಟ್ಟಿಂದ್ ಇಡೀ ಪ್ರಪಂಚವೇ ತಬ್ಬಲಿ ಭಾವನೆನ ಅನುಭವಿಚಿಟ್ಟತ್.

ಸಾಮಾನ್ಯ ಜನಕ್ ಇನ್ನತ ಸೇವೆ ಮಾಡುವಕ್ ಕಯ್ಯಲೆ. ಆಚೀಂಗಿ ಗರೀಬಂಗಳ ತಿರಸ್ಕಾರ ಮಾಡತೆ, ಕರುಣೆ ಕಾಟುವಚ್ಚಕೇಂಗಿ ಮನುಷ್ಯತ್ವ, ಹೃದಯವಂತಿಕೆನ ಬೊಳ್ತಿಯವಂಡು. □





## ರಾಮಕೃಷ್ಣ ಪರಮಹಂಸ

- ಪುಟ್ನಾನ ದಿನ - 1836ನೇ ಇಸವಿ, ಫೆಬ್ರವರಿ 18  
 ಪುಟ್ನಾನ ಜಾಗ - ಕಾಮಾರಪ್ರಕುರ, ಹೂಗ್ಲಿ ಜಿಲ್ಲೆ, ಪಶ್ಚಿಮ ಬಂಗಾಳ  
 ಅಪ್ಪ - ಕ್ಷುದಿರಾಮ ಚಕ್ರೋಪಾಧ್ಯಾಯ  
 ಅಮ್ಮ - ಚಂದ್ರಾದೇವಿ  
 ಕಣ್ಮರೆ - 1886ನೇ ಇಸವಿ ಆಗಸ್ಟ್ 16

ದೇವಭಕ್ತ ಅಪ್ಪವ್ವಂಗಕ್ ಪುಟ್ನಾನ ಮೋಂವೊ ಗಧಾದರ. ಮಿಂಞಕ್ ಶ್ರೀ ರಾಮಕೃಷ್ಣ ಪರಮಹಂಸ ಎಣ್ಣೆತ್ ಪೆದ ಎಡ್ತಿತ್ ಎಚ್ಚಿ ಕೋ ಜನಕ್ ದೇವಳ ಕಾಟಿ ಕೊಡ್ತ ಮಾಪುರುಷ. ಆಶ್ಚರ್ಯ ಆಫಚ್ಚಕ್ ಬಲ್ಯ ತರತಾರ ಗೇನಶಕ್ತಿ ಚೆರ್ಪತ್ಲೇ ಇಂಜತ್. ಏದೇ ಒರ್ ಶ್ಲೋಕ, ಸ್ತೋತ್ರ, ಪುರಾಣ ಕಥೆ ಒಮ್ಮೆ ಎಣ್ಣೆಕ ಮದಿ ಆಚ್ಚಕ್ ಚಾಯಿಲ್ ಗೇನ ಬೆಚ್ಚವಯಿಂಜತ್. ಆಚೇಂಗಿ ಲೆಕ್ಕ ಮಾತ್ರ ಎಚ್ಚಕ್ ಎಣ್ಣೆ ಕೊಡ್ತಕಲೂ ಗೊತ್ತಾಪಯಿಂಜಿಲೆ. ಕಣ್ಣಿ ಗಲಾಟೆ ಜಾಸ್ತೀಂದ್ ಸ್ಕೂಲ್‌ಕ್ ಅಯೆಚತ್. ಎಂತಾಚೇಂಗಿ ಮಾಡತೇಂದ್ ಎಣ್ಣೆಕ ಪೋರ, ಅದ್‌ನ ಎನ್‌ಂಗ್ ಮಾಡುವಕಾಗಾಂದ್ ಎಣ್ಣೆ ಚೇಂಗಿ ಮಾತ್ರ ಕೇಪಯಿಂಜತ್.

ಅಯಿಂಗಡ ಮನೆರ ಪಕ್ಕ ಒರ್ ಚೆರಿಯ ಕೆರೆ ಇಂಜತ್. ಅಲ್ಲಿ ಪೊಣ್ಣಾಳ್‌ಕೂ ಆಣಾಳ್‌ಕೂ ಕುಳಿಪಕ್ ಬೋರೆ ಬೋರೆ ಜಾಗ ಇಂಜತ್. ಒರ್ ದಿವಸ ಪೊಣ್ಣಾಳ್ ಕುಳಿಪ ಜಾಗತ್ ಗಧಾದರ ಸಿನೇತಕಾರಂಗಡ ಕೂಡ ಕೂಡಿಯಂಡ್ ನೀರ್‌ಲ್

ಕಳಚಂಡ್ ಇಂಜತ್. ಈ ಮಕ್ಕ ಪಾರ್ಚಿಡುವ ನೀರ್ ಆ ಪೊಣ್ಣಾಳ್‌ಕ್ ಪಾರುವ ಯಿಂಜತ್. ಇದ್‌ಂಗ್ ಚೆಡಿ ಬಂದ ಒರ್ ಪೊಣ್ಣಾಳ್, ಪೊಣ್ಣಾಳ್ ಕುಳಿಪಾನ ನೋಟುವಕಾಗಾಂದ್ ಗೊತ್ತಿಲ್ಲೆ ಯೆ? ಎನ್‌ಂಗ್ ಇಲ್ಲಿಕ್ ಬಂದಿಯೆ. ಆಣಾಳ್ ಕುಳಿಪ ಜಾಗಕ್ ಪೋಯಿಂಂದ್ ಬಜ್ಜತ್.

ಪೊಣ್ಣಾಳ್ ಕುಳಿಪಾನ ಎನ್‌ಂಗ್ ನೋಟುವಕಾಗಾಂದ್ ಪರೀಕ್ಷೆ ಮಾಡೊಂಡೊಂದ್ ಗೇನ ಮಾಡ್‌ನ ಗಧಾದರ ದಂಡ್ ಮೂಂದ್ ದಿನ ಒಳ್‌ಚಿತ್ ನೋಟ್‌ಚಿ. ಅಲ್ಲಿಂಜ ಬಂದಿತ್ ಆ ಬಜ್ಜ ಪೊಣ್ಣಾಳ್‌ರ ಕೂಡ, ಮೊನಿಯಾಂದ್ ನಾಲ್ ಪೊಣ್ಣಾಳ್ ಕುಳಚಿತ್, ನಿನ್ನಾಂದ್ ಆರ್ ಪೊಣ್ಣಾಳ್ ಕುಳಚಿತ್, ಇಂದ್ ಎಟ್ತ್ ಪೊಣ್ಣಾಳ್ ಕುಳಚಿತ್. ನಾನ್ ನೋಟ್‌ನ. ಆಚೇಂಗಿಯೂ ನಾಕ್ ಒಂದೂ ಆಯಿತ್‌ಲ್ಲೆಂದ್ ಎಣ್ಣೆ ಚಿ. ಅದ್‌ನ ಕೇಟ ಪೊಣ್ಣಾಳ್ ಕ್ಕೆಣ್ಣಂಡ ಮುಗ್ಗತೆಕ್ ತೆಳಚಿತ್, ಅವಂಡ ಅವ್ವಂಗ್ ಎಣ್ಣೆ ಕೊಡ್‌ತತ್. ಅಕ್ಕ ಅವ್ವ ಚಂದ್ರಾದೇವಿ, ಮೋಂವೊನ ಕಾಕಿತ್ ಪೊಣ್ಣಾಳ್ ಕುಳಿಪಾನ ನೋಟ್‌ಚೇಂಗಿ ನೀಕ್ ಒಂದೂ ಆಪಲೆ. ಆಚೇಂಗಿ ಆ ಪೊಣ್ಣಾಳ್‌ಕ್ ಅವಮಾನ ಆಪ. ಅಯಿಂಗಳೂ ನೀಡ ಅವ್ವಂಡ ಮಾದ್‌ರಿಯೆ. ಅಯಿಂಗಳ್ ಅವಮಾನ ಆಪನೆಕೆ ನಡ್‌ಂದಕ ನೀಡ ಅವ್ವಂಗ್ ಅವಮಾನ ಆನಕೆ. ಅಮ್ಮಂಗ್ ಅವಮಾನ ಮಾಡ್‌ವದ್ ಸೆರಿಯಾಂದ್ ಕೇಟತ್. ಅಲ್ಲಿಂಜ ಒನ್ನಾಂದೂ ಅಂವೊ ಪೊಣ್ಣಾಳ್ ಕುಳಿಪಲ್ಲಿಕ್ ಪೋಯಿಲೆ.


ಗಧಾದರ ಆರ್ ಬಯತ್‌ಲಿಪ್ಪಕ ಒಮ್ಮ, ಕರ್ತ ಮೋಡ ದುಂಬ್‌ನ ಆಕಾಶತ್ ಬೊಳ್‌ತ ಪಕ್ಷಿಯ ಪಾರುವ ಚಾಯಿರ ದೃಶ್ಯ ನೋಟಿತ್, ಸೋಯ ತಪ್ಪಿತ್ ಬುದ್ಧಿ ತಿಂಜತ್. ಅದ್‌ನ ಕಂಡಿತ್, ಕುಂಞಿಕ್ ಸೌಖ್ಯ ಇಲ್ಲತಾಚಿ ಕಾಂಬಾಂದ್ ಅಪ್ಪವ್ವ ಬೊತ್ತಿಯಂಡತ್. ಆಚೇಂಗಿ ಅವಂಗ್ ಒಂದೂ ಆಯಿತಿಂಜಿಲೆ. ಧ್ಯಾನ ಮಾಡುವಕ ಮನ್‌ಸ್ಸ್ ಪ್ರಪಂಚತ್‌ರ ಅರಿವು ಇಲ್ಲತೆ ದಿವ್ಯಾನಂದತ್‌ಲಿಪ್ಪ. ಈ ಸ್ಥಿತಿಕ್ ಧ್ಯಾನಾವಸ್ಥೆ ಎಣ್ಣುವ. ಗಧಾದರಂಗ್ ಅನ್ನನೆ ಆಯಿತಿಂಜತ್. ಅಲ್ಲಿಂಜ ಸುಮಾರ್ ಕುರಿ ಅನ್ನನೆ ಆಪಯಿಂಜತ್. ಏಳ್ ವಯಸ್‌ಲ್ ಒಮ್ಮ ಸನ್ಯಾಸಿಯಡ ಕೂಡ ಇಂಜಿತ್, ಅಯಿಂಗಳಡನೆಕೇ ಬಟ್ಟೆ ಇಟ್ಟುಂಡ್ ಮೇಲ್‌ಕೆಲ್ಲ ಭಸ್ಮ ತೇಚಂಡ್ ಅವ್ವಂಗ್ ಕಾಟುವಕ, ಮೋಂವೊನ ಸನ್ಯಾಸಿಯ ಕೂಟಿಯಂಡ್ ಪೋಯಿರುವಾಂದ್ ಬೊತ್ತಿಯಂಡ್ ಪೊರ್‌ಮೆ ಅಯೆಪಕೇ ಬೊತ್ತುವಯಿಂಜತ್. ಗಧಾದರಂಗ್ ಒಯಿಂಬದನೆ ಬಯತ್‌ಲ್ ಉಪನಯನ ಮಾಡ್‌ಚಿ. ಉಪನಯನ ಆನದು ಅಂವೊ ಶಾಸ್ತ್ರಕ್ ಭಿಕ್ಷೆ ಬೋಡೊಂಡು. ಅನ್ನತ ಸಮಯತ್ ಪ್ರಥಮ ಭಿಕ್ಷೆ ತನ್ನ ಕುಂಞಿ ಲಿಂಚೇ ನೋಟಿಯಂಡಿಂಜ ಕಮ್ಮಾರ ಜಾತಿರ ಪೊಣ್ಣಾಳ್‌ರ ಕೈಲಿಂಚೇ ಆಂಡೊಂದ್

ಹರ ಪುಡ್ಚತ್. ಎಲ್ಲಾರೂ ವಿರೋಧ ಮಾಡ್ಚಿ. ಪಟ್ಟತಿ ಪೊಮ್ಮಕ್ಕ ಆದ್ಯ ಭಿಕ್ಷೆ ಇಡೊಂಡೊಂದ್ ಎಣ್ಣಕಲೂ ಕೇಕತೆ, ಕಮ್ಮಾರ ಜಾತಿರ ಪೊಣ್ಣಾಳ್ 'ಧನಿ' ಎಣ್ಣವವಡ ಕೈಲಿಂಜೇ ಆದ್ಯ ಭಿಕ್ಷೆ ಎಡ್ತಂಡತ್. ಚಿರಿಯ ಬಯತ್ಲೇ ಪ್ರೀತಿಕೂ, ಭಕ್ತಿಕೂ, ವಾತ್ಸಲ್ಯಕೂ ಜಾತಿ ಭೇದ ಇಲ್ಲೆಂದ್ ಕಾಟಿಕೊಡ್ತತ್.

ಒಮ್ಮೆ ಶಿವರಾತ್ರಿಲ್ ನಾಟಕ ಇಂಜತ್. ಶಿವಂಡ ಪಾತ್ರಧಾರಿಕ್ ಕಾಯಿಲ ಆಯಿತ್ ಬರತಾಪಕ, ಎಲ್ಲಾರೂ, ಶಿವಂಡ ವೇಷ ಗಧಾದರನೇ ಇಡ್ಡೆಂದ್ ಎಣ್ಣಚಿ. ಗಧಾದರ ಶಿವಂಡ ವೇಷ ಇಟ್ಟಿತ್ ವೇದಿಕೆಲ್ ಬಪ್ಪಕ ಸಾಕ್ಷಾತ್ ಈಶ್ವರನೇ ಕಂಡಚ್ಚಕ್ ಕುಸಿಪಟ್ಟಿತ್ ಜನ. ಶಿವಂಡದೇ ಧ್ಯಾನತ್ ಮುಳಿತಿಂಜ ಗಧಾದರಂಗ್ ಸೊಯ ತಪ್ಪಿತಿಂಜತ್. ಬಲ್ಯ ಪಂಡಿತಂಗಡ ಕೂಡೆ ಚರ್ಚೆಕ್ ಕೂಡ್ಚೇಂಗಿ ಬಯತ್ಲ್ ಚಿರಿಯಂವೊನಾಚೇಂಗಿಯೂ, ವಿಚಾರ ಶಕ್ತಿಲ್ ಬಲ್ಯಂವೊನಾಯಿ ತಿಪ್ಪಯಿಂಜತ್. ಗಧಾದರಂಡ ಅಣ್ಣ ರಾಂಕುಮಾರ ಅವನ ವಿದ್ಯಾವಂತನಾಯಿತ್ ಮಾಡಿತ್ ಕೆಲಸಕ್ ಕೂಟೊಂಡೊಂದ್ ಕಲ್ಯಾತ್ ಕೂಟಿಯಂಡ್ ಬಾತ್. ಆಚೇಂಗಿ ಅಂವೊ ಈ ಸಂಸಾರ ವ್ಯವಹಾರ ಎಲ್ಲ ನಾಕ್ ಬೊಂಡೊಂದ್ ಖಿಡಾಖಂಡಿತ ಎಣ್ಣೆರ್ತ್. ಅಲ್ಲಿಂಜ ದಕ್ಷಿಣೇಶ್ವರತ್ ರಾಣಿ ರಾಸಮಣಿ ಕೆಟ್ಚಿಟ್ಟಿ, ಕಾಳೇದೇವಿರ ಮಂದಿರತ್ ಪೂಜಾರಿಯಾಯಿತ್ ಕೂಡ್ಚಿ. ಅಪ್ಪಂಡ ಮಾದರಿ ಅವನೂ ದೇವಳ ತಾಂಡ ಸ್ವಂತ ಮಕ್ಕಡನೆಕೆ ಪ್ರೀತಿಚಿಡುವಯಿಂಜತ್. ಸಾಮಾನ್ಯ ಜನಕ್ ಅಂವೊನ ಪುಚ್ಚನನೆಕೆ ಆಪಯಿಂಜತ್. ಒಬ್ಬನೇ ದೇವಡ ಕೂಡ ತಕ್ ಪರವೊ, ನೇವೇದ್ಯತ್ನ ಉಂಬ್ಚಿಡುವೊ ಇನ್ನತಾನೆಲ್ಲ ಮಾಡುವಯಿಂಜತ್. ಮಹಾನ್ ಸಂತನಾಯಿತ್, ಸ್ವಾಮಿ ವಿವೇಕಾನಂದಂಡ ಗುರುವಾಯಿತ್ ಲೋಕತ್ ಎಲ್ಲ ಧರ್ಮವೂ ಒಂದೇ, ಎಲ್ಲ ದೇವಳೂ ಒಂದೇ. ಪೆದ ಬೋರೆ, ರೂಪ ಬೋರೆ ಅಚ್ಚಿಕೆ. ಶಕ್ತಿ ಒಂದೇ ಎಣ್ಣವಾನ ಪ್ರತ್ಯಕ್ಷ ಕಂಡಿತ್ ಲೋಕಕ್ ಸಾರ್ನ ಮಹಾಮಹಿಮ ರಾಮಕೃಷ್ಣ ಪರಮಹಂಸ. ಒರ್ ಕೆರೆಲ್ ನೀರ್ ಇಂಜಕ ಒಬ್ಬೊ ಅದ್ಂಗ್ 'ನೀರ್' ಎಣ್ಣವ. ಇಂಇೊಬ್ಬ 'ಪಾನಿ' ಎಣ್ಣವ. ಇಂಇೊಬ್ಬ 'ವಾಟರ್' ಎಣ್ಣ... ಎಂತ ಎಣ್ಣಕಲೂ ಅದ್ ನೀರೇ ಎಣ್ಣವದ್ ಪರಮಸತ್ಯ. ಅನ್ನನೇ ಭಗವಂತ ಒಂದೇ, ಪೆದ ಮಾತ್ರ ಬೋರೆ ಎಣ್ಣವಾನ ಸಾಮಾನ್ಯ ಜನಕೂ ಅರ್ಥ ಆಪನೆಕೆ ಎಣ್ಣೆ ಕೊಡ್ತ. ಅಧಿಕಾರಿಯಾಯಿತ್ ಕೆಲಸ ಮಾಡಿಯಂಡುಳ್ಳ ಒರ್ ಮನುಷ್ಯ ಅಫೀಸ್‌ಕ್ ಪೋಪಕ ಕೋಟ್ ಇಟ್ಟಂಡ್ ಪೋಪ. ಮನೆಲಿಪ್ಪಕ ಪಂಚೆ ಶರ್ತ್‌ಲ್ ಇಪ್ಪ. ಇಂಇೊಮ್ಮ ಬೋರೆ ತರತರ್ ಬಟ್ಟೆ ಇಟ್ಟಿತಿಪ್ಪ. ಬೋರೆ ಬಟ್ಟೆ ಇಟ್ಚೊಟ ಮಾತ್ರಕ್ ವ್ಯಕ್ತಿ ಬೋರೆಯಾ? ಅನ್ನನೇ ಭಗವಂತಂಗೂ ಬೋರೆ ಬೋರೆ ರೂಪಾಂದ್ ಜನಸಾಮಾನ್ಯಂಗಡ ಮನುಸ್‌ಕ್ ಮುಟ್ಟುವನೆಕೆ ಎಣ್ಣೆಕೊಡ್ಪಯಿಂಜತ್. ಇನ್ನತ

ಒರ್ ಮಹಾನ್ ವ್ಯಕ್ತಿರ ತಕ್ಕಾನ ಕೇಟನ್ನತ ಜನ ಪುಣ್ಯವಂತಂಗ. ದೇವ ಎಲ್ಲಿಯ ಕಾಟಿ ತಾರೀಂದ್ ಬಂದ ನರೇಂದ್ರ (ಸ್ವಾಮಿ ವಿವೇಕಾನಂದ)ಂಡನ್ನತ ಎಚ್ಚಿಕೋ ಜನಕ್ ಭಗವಂತನ ಕಾಂಬ ಬಟ್ಟೆ ಕಾಟಿ ಕೊಡ್ತಿತ್, ಸಮಾಜ ಸೇವೆರ ಅರ್ಥ ಎಣ್ಣೆ ಕೊಡ್ತಿತ್, ಸಾರ್ಥಕತೆಲ್ ಬದ್ಕುವ ರೀತಿನ ಎಣ್ಣೆ ಕೊಡ್ತಿತ್. 1886ನೇ ಆಗಸ್ಟ್ 16ಂಗ್ ಶ್ರೀ ರಾಮಕೃಷ್ಣ ಪರಮಹಂಸ ದೇಹ ತ್ಯಾಗ ಮಾಡ್ಚಿ.

ದೇವ ಎಣ್ಣುವ ಒರ್ ಮಾಶಕ್ತಿ ಈ ಲೋಕತ್ ಉಂಡೇ ಉಂಡ್. ದೇವಳ ನಂಬಿತ್ ಮಾಡುವ ಪ್ರಾರ್ಥನೆ ಮನ್‌ಸಾಕ್ ಶಕ್ತಿ ತಪ್ಪ. ಆತ್ಮವಿಶ್ವಾಸತ್‌ನ ಬೊಳ್‌ತುವ, ನಲ್ಲ ಬಟ್ಟೆ ಕಾಟುವ. ದೈವಭಕ್ತಿರ ಕೂಡ ಆತ್ಮವಿಶ್ವಾಸತ್‌ನೋ ಬೊಳತಿಯಪಂಡು. □



## ಸಂತ ಕಬೀರದಾಸ

ಪುಟ್ಟಾನ ದಿನ - 1448ನೇ ಇಸವಿ  
ಪುಟ್ಟಾನ ಜಾಗ - ಲಹರ್‌ತಾರ, ಕಾಶಿ, ಉತ್ತರಪ್ರದೇಶ  
ಕನ್ಮರೆ - 1518ನೇ ಇಸವಿ

ಕಾಶಿರ ಲಹರ್‌ತಾರ ಎಣ್ಣುವ ಜಾಗತ್‌ರ ಪಕ್ಕ, ಒರ್ ಮಂಗಲ ಬಂದಡಿವ್ವಕ ಪಿಲ್ಲರ ಮಧ್ಯತ್ ಬಟ್ಟೆಲ್ ತುರ್‌ಟ್‌ನ ಒರ್ ಚಾಯಿಕಾರ ಕುಂಞಿ ಮೊರ್‌ಟಂ ಡಿಂಜತ್. ಮಂಗಲಕಾರನಾಯಿತಿಂಜ ನೀರೂ, ದಯೆವ್ವಳ ಮನುಷ್ಯ. ಅಂವೊ ಆ ಕುಂಞಿನ ಎಡ್‌ತ ಬಂದಿತ್ ಚಾಕ್‌ಚಿ. ಅವಂಡ ಪೊಣ್ಣ್ ನೀಮಾ, ಅವಡ ಕೆಲತ್ ಪುಟ್ಟಾನ ಕುಂಞಿರ ಮಾದಾರಿಯೆ ಅದಾನ ಚಾಕಿ ಪೊಲತ್‌ಚಿ. ಅಯಿಂಗಳೇ ಆ ಕುಂಞಿರ ಅಪ್ಪವ್ವನಾಚಿ. ಅಯಿಂಗಳೇ ಆ ಕುಂಞಿಕ್ ಕಬೀರ ಎಣ್ಣಿಯಂಡ್ ಪೆದ ಇಟ್ಟತ್. ಕಬೀರ ಚೆರಿಯತಿಪ್ಪಕಲೇ ಬುದ್ಧಿ ಕಾರನೂ, ಜ್ಞಾನಿಯೂ ಆಯಿತಿಂಜತ್. ಕಾಶಿರನ್ನತ ನಲ್ಲ ಜಾಗತ್ ಅವಂಗ್ ನಲ್ಲ ಮಹಾತ್ಮಂಗಡ ಸಂಗ ಕ್‌ಟ್‌ಚಿ. ಇದೇ ಅವಂಡ ಸ್ಕೂಲಾಚಿ.

ಆ ಸಮಯತ್ ರಾಮಾನಂದ ಎಣ್ಣುವ ಒರ್ ಗುರು ಮಹಾತ್ಮ ಇಂಜತ್. ತ್ರೈಮೂರಲಂಗ ಎಣ್ಣುವ ಒರ್ ಪಾಪಿ ಹಿಂದೂ ಜನಳ ಕೊಲ್ ಚಿಟ್ಟಂಡಿಂಜತ್. ಕಾಶಿರ ಹಿಂದು ಜನಕ್ ಅಲ್ಲಿಯತ್‌ರ ಬೋರೆ ಧರ್ಮಕಾರ ಕಷ್ಟ ಕೊಡ್‌ತಂಡಿಂಜತ್. ಅಕ್ಕ ಹಿರಿಮುಪ ಎಲ್ಲ ಮಹಾತ್ಮ ರಾಮಾನಂದಂಡ ಪಕ್ಕ ಪೋಯಿತ್ ಅಯಿಂಡ

ಕಷ್ಟತನ ಎಣ್ಣಿಯಂಡತ್. ಗುರು ತಾಂಡ ತಪಃಶಕ್ತಿಲ್ ಪ್ರಾರ್ಥನೆರ ಸಮಯತ್ ಸ್ವರ ಬರತನ್ನನೆ ಮಾಡ್ಚಿ. ಕಾಶಿಲ್ ರಾಮಾನಂದ ಸ್ವಾಮಿರ ಶಕ್ತಿ ಅರ್ಂಜ ದಂಡ್ ಧರ್ಮಗುರುವ ರಾಮಾನಂದಂಡ ಪಕ್ಕ ಬಂದಿತ್ ಕೇಪಕ ಎಲ್ಲಾಕೂ ದೇವ ಒಬ್ಬನೆ. ಪೂಜೆ ಮಾಡುವ ರೀತಿ ಬೋರೆ ಬೋರೆ ಅಚ್ಚಿಕೆ. ಒಬ್ಬನ ಇಂಗಳೊಬ್ಬ ಕೊಲ್ಲುವಕಾಗ. ಎಲ್ಲರೂ ಅಪ್ಪರಿಪ್ಪರ ಪ್ರೀತಿ ಸ್ನೇಹತ್ ಬದ್ಕಂಡೊಂದ್ ಎಣ್ಣಿಚಿ. ರಾಜ ಧರ್ಮಗುರುವ ಗಯಾಸುದ್ದೀನ್ ತುಗಲಖ್ ಎಣ್ಣಿತ್, ಒರ್ ಒಪ್ಪಂದ ಮಾಡ್ನ ಪಿಂಗಳ ರಾಮಾನಂದ ಸ್ವಾಮಿ ಶಂಖ ಉರ್ಪುಚಲೊ, ಅಲ್ಲಿಂಜ ಮಿಂಗಳ್ ನಮಾಜ್ ಮಾಡುವಕ್ ಒರೂ ತೊಂದರೆ ಆಯಿಲೆಲೊ. ಈ ಘಟನೆ ಬಾಲೆಕಾರ ಕಬೀರಂಡ ಮೇಲೆ ನಲ್ಲ ಪ್ರಭಾವ ಆಚಿ. ಎನ್ನನಾಯಿತೂ ಸ್ವಾಮಿ ರಾಮಾನಂದನ ಗುರುವಾಯಿತ್ ಪಡೆಯಂಡೊಂದ್ ಗೇನ ಮಾಡಿತ್, ಗುರುನ ಕಂಡಿತ್ ಬೋಡಿ ಯಂಡತ್. ಆಚೀಂಗಿ ರಾಮಾನಂದ ಕಬೀರನ ಶಿಷ್ಯನಾಯಿತ್ ಎಡ್ತೋವಕ್ ಒತ್ತಂಡ್ಲೆ. ಅದ್ಂಗೆ ಕಬೀರ ಎಕ್ಕೊಲು ಗುರು ಎಚ್ಚಕ್ ನೇರಕ್, ಎಲ್ಲಿಕ್ ಪೋಪಾಂದೆಲ್ಲ ಅರ್ಂಜತ್. ಒಮ್ಮ ರಾಮಾನಂದ ಪೊಲಾಕ ನೇರ್ತೆ ಬೊಪ್ಪಾಪಕ್ ಮಿಂಗಳಲೆ ಪೊಳೆಲ್ ಕುಳಿಪಕ್ ಪೋಪ ಸಮಯ ನೋಟಿಯಂಡ್, ಗಂಗೇರ ಕರಲ್ ಪೊಳೆಕ್ ಇಳಿವ ಮೊಟ್ವಲ್ ಬುದ್ಧಂಡತ್. ಅದೇ ಬಟ್ಟೆಲ್ ಬಂದ ರಾಮಾನಂದ ಕಾಲಾನ ನೇರ ಕಬೀರಂಡ ಎದರೆ ಮೇಲೆ ಬೆಚ್ಚತ್. ಎನ್ನತನೊ ಚೌಟಿಟಿಲ್ಲಾಂದ್ ಕಾಲ್ ಬಯ್ಯಕ್ ಎಡ್ಪಕ, 'ರಾಮ ರಾಮ' ಎಣ್ಣಿಚಿ. ಕಬೀರ ಕುಸಿಲ್ ಎದ್ದಿತ್ ಗುರುಕ್ ತೊತ್ತಿತ್, ನಿಂಗಳೇ ನಾಡ ಗುರು, ನಿಂಗಡ ಬಾಯಿಂಜ ಉದ್ಚ ರಾಮನಾಮವೇ ಗುರೂಪದೇಶ ಎಣ್ಣಿಯಂಡ್ ಪಾಡಿಯಂಡ್ ಆಡಿ ಕಳ್ಚತ್. ಅಂದ್ಂಜ 'ಕಬೀರದಾಸ' ಆಯಿತ್ ಅದೆಚ್ಚಕೋ ಭಕ್ತಿಗೀತೆ ರಚನೆ ಮಾಡ್ಚಿ. ಅಂವೊಂಗೆ ಓದುವಕ್ ಎಳುದುವಕ್ ಗೊತ್ತಿಲ್ಲತಾಂಗೆ ಅವಂಡ ಶಿಷ್ಯಂಗ ಆ ಗೀತೆನೆಲ್ಲ ಎಳುದಿ ಬೆಚ್ಚತ್.

ಕಬೀರದಾಸಂಡ ಅಂತ್ಯ ಎಕ್ಯ ಆಚಿ ಎಣ್ಣಿವಾಂಗೆ ಸರಿಯಾನ ದಾಖಲೆ ಇಲ್ಲೆ. 1447ನೇ ಇಸವೀಂದೂ, 1494ನೇ ಇಸವೀಂದೂ, 1517ನೇ ಇಸವೀಂದೂ ಎಣ್ಣಿವ. ಕಡೆಗಾಲತ್ ಕಾಶಿ ಬುಟ್ಟಿತ್ ಮಗಹರ ಎಣ್ಣಿವ ಜಾಗಕ್ ಪೋಯಿ ತಿಂಜತ್. ಕಬೀರ ಚತ್ಪೋನ ಸಂದರ್ಭತ್ ಹಿಂದೂ ಶಿಷ್ಯಂಗ, ಚಾವುನ ಚುಡೊಂಡೊಂದೂ... ಮುಸ್ಲಿಂ ಶಿಷ್ಯಂಗ, ಮಣ್ಣೊಲ್ ಪೊಕೊಂಡೊಂದೂ ಜಗಳ ಸುರು ಮಾಡ್ಚಿ. ಧರ್ಮತ್ ಪೆದತ್ ಪಗೆತನ ಬೋಂಡೊಂದ್ ಉಪದೇಶ ಮಾಡ್ನ ಕಬೀರದಾಸಂಡ ಚಾವುರ ದಫನತ್ ವಿಷಯತ್ ಮತ ಭೇದ ಬಾತಲ್ಲ! ಅಂತೂ ಗಲಾಟೆ ಆಯಂಡಿಪ್ಪಕಲೇ ದಾರೋ ಚಾವುರ ಮೇಲೆ ಇಂಜ ಬಟ್ಟೆನ ನೀಕ್ಚಿ.

ಅಲ್ಲಿ ಕಂಡದಂತೆ? ಅಲ್ಲಿ ಚಾವು ಶರೀರ ಇಲ್ಲತೆ ಬೊರಿ ಪೂವಾರ ರಾಶಿ ಇಂಜತ್. ಪೂವಾನ ಹಿಂದುವ ಚುಡುಲೆ, ಮುಸಲ್ಮಾನಂಗ ಪೂಪಾಲೆ. ಅನ್ನನಾಯಿತ್ ಎಲ್ಲರೂ ಅದಾನ ಪ್ರಸಾದ ಎಣ್ಣೆತ್ ಎಡ್ತಂಡ್ ಪೋಚಿ! ಎಚ್ಚಕ್ ಆಶ್ಚರ್ಯ! "ಶರೀರ ಬೊಳ್ಂದಿತ್, ಭಜನೆ ಮಾಡ್, ಪಣ ಚಾಸ್ತಿಯಾಯಿತ್ ದಾನ ಮಾಡ್, ಬುದ್ಧಿವಂತನಾಯಿತ್ ಇಂಞೊಬ್ಬಂಗ್ ಎನ್ನನೆ ಉಪಕಾರ ಮಾಡ್ವೊಂದ್ ಗೇನ ಮಾಡ್, ಇದ್ ನೀನ್ ಬದ್ಕನಾಂಗ್ ಸಾರ್ಥಕ್" ಇದ್ ಕಬೀರದಾಸಂಡ ಸಂದೇಶ.

ಪಂಡೇತ ಕಾಲತ್ ಒರ್ ನಲ್ಲ ಗುರು ಕ್ಕೊಂಡೊಂದಾನಕ ಶಿಷ್ಯಂಗ ಅದೆಚ್ಚಕ್ ಕಷ್ಟ ಪಡುವಯಿಂಜತ್? ಇಂದ್ ಅಚ್ಚಕ್ ಕಷ್ಟ ಇಲ್ಲೆ. ಗುರುರ ಮೇಲೆ ಭಕ್ತಿ, ಗೌರವ ಬೆಚ್ಚಿತ್, ಅಯಿಂಗ್ ಎಣ್ಣೆತಂದ ನಲ್ಲರಿಕೆನ ಪಡ್ಚಿತ್, ಧರ್ಮತಾರ ಪೆದತ್ ಪಗೆತನ ಬೊಳ್ತತೆ, ಸಮಾಜಕೂ, ದೇಶಕೂ ಒರ್ ಮೊದ ಆಯಿತ್ ಬಾಳಂಡು. □



## ಸ್ವಾಮಿ ವಿವೇಕಾನಂದ

ಪುಟ್ಟಾನ ದಿನ	- 1863ನೇ ಇಸವಿ ಜನವರಿ 12
ಪುಟ್ಟಾನ ಜಾಗ	- ಕಲ್ಕತ್ತಾ
ಅಪ್ಪ	- ವಿಶ್ವನಾಥ ದತ್ತ
ಅಮ್ಮ	- ಭುವನೇಶ್ವರಿ ದೇವಿ
ಕಣ್ಮರೆ	- 1902ನೇ ಇಸವಿ ಜುಲೈ 4

ಕ್ಷತ್ರಿಯ ಕುಲತ್ ದತ್ತ ವಂಶತ್ ಪುಟ್ಟಾನ ವಿವೇಕಾನಂದಂಡ ನಕ್ಷತ್ರ ಪೆದ ವೀರೇಶ್ವರ. ಕಾಕುವ ಪೆದ ನರೇಂದ್ರನಾಥ ದತ್ತ. ಅವ್ವ ಇಟ್ಟು ಕೊದಿ ಪೆದ 'ಬಿಲೆ'. ಚೆರ್ಪತಿಂಜಲೂ ಬಲ್ಯ ದೇವಭಕ್ತನಾಯಿತಿಂಜ ನರೇಂದ್ರ, ಅಚ್ಚಿಕೇ ಕರುಣೆ ಉಳ್ಳವನೂ ಆಯಿತಿಂಜತ್. ಪರೀಕ್ಷೆ ಮಾಡತೆ ಏದೇ ವಿಷಯತ್‌ನೊ ನಂಬುವ ಯಿಂಜಿಲೆ. ಅಪ್ಪ ವಿಶ್ವನಾಥ ದತ್ತ ಕಲ್ಕತ್ತಾತ್ ಲಾಯರ್ ಆಯಿತಿಂಜತ್. ಲಾಯರ್‌ನ ಕಾಂಬಕ್ ಬಪ್ಪ ಬೋರೆ ಬೋರೆ ಜನಾಂಗತ್‌ರ ಕಕ್ಷಿದಾರಕ್ ಬೋರೆ ಬೋರೆ ಹುಕ್ಕ (ಪೊಗೆಬಲಿ) ಬೆಚ್ಚಿತಿಂಜತ್. ಮುಸಲ್ಮಾನಂಗಕ್ ಬೆಚ್ಚ ಹುಕ್ಕತ್‌ಲಾ ಹಿಂದುವ ಬಲಿಪಯಿಂಜಿಲೆ. ಮನೆಲುಳ್ಳ ಪೆರಿಯಯಿಂಗಳ ಕೇಪಕ ಬೋರೆ ಜನಾಂಗಕಾರಕ್ ಬೆಚ್ಚ ಹುಕ್ಕತ್, ಹಿಂದು ಆನಂವೊ ಬಲ್‌ಚತೆಂಗಿ ಕೆಟ್ಟದಾಪಾಂದ್ ಎಣ್ಣಾಚಿ. ಒರ್ ದಿವಸ ನರೇಂದ್ರ ದಾರೂ ಇಲ್ಲತಿಪ್ಪಕ ಕಕ್ಷಿದಾರಂಗ ಅಳೆಪ ಕೋಂಬರೆಕ್ ಪೋಚಿ. ಅಲ್ಲಿ ಉಳ್ಳ ಎಲ್ಲ ಹುಕ್ಕತ್‌ನೋ ಒಮ್ಮೊಮ್ಮೆ ಬಲ್‌ಚತ್.



ಎನ್ನೆಂಗಿ ಆಕುವಾಂದ್ ಚೆನ್ನ ನೇರ ಅಲ್ಲಿಯೇ ಇಂಜಿತ್ ನೋಟ್‌ಚಿ. ಒಂದೂ ಆಯಿಲೆ. ಅಕ್ಕ ಅಂವೊ, ಇದ್ ಪಂಡಂಜಲೂ ನಡಂದಂಡ್ ಬಂದೋರ್ ಆಚಾರ ಅಚ್ಚಿ ಕೆ ಎಣ್ಣುವಾನ ಅರ್‌ಂಜತ್. ನರೇಂದ್ರಂಗ್ ಸಾಧು ಸನ್ಯಾಸಿ ಎಣ್ಣುಕ ಭಾರೀ ಗೌರವ, ಮರ್ಯಾದಿ, ಪ್ರೀತಿ ಎಲ್ಲ ಇಂಜತ್. ಸನ್ಯಾಸಿಯ ಭಿಕ್ಷೆಕಾರ ಬಂದಿತ್ ಎನ್ನತ ಕೇಟಕಲೂ ಕೊಡ್‌ತೆರುವಯಿಂಜತ್. ಅದಂಗಾಯಿತ್ ಅವ್ ಭಿಕ್ಷೆಕಾರ ಬಾತೇಂಗಿ ಮೋಂವನ ಒರ್ ಕೋಂಬರೆಲ್ ಕೂಟಿತಿಪ್ಪಯಿಂಜತ್. ಆಚೇಂಗಿಯೂ ನರೇಂದ್ರ ಕಿಡ್‌ಕೆರೊಳಿಯ ಅಂವೊ ಇಟ್ಟು ಬಟ್ಟೆನೇ ಕನಚಿ ಕೊಡ್‌ತೆರುವಯಿಂಜತ್.

ನರೇಂದ್ರ ಆರ್ ವಯಸ್ಸಾರ ಕ್ಷಣ್ಣನಾಯಿತಿಪ್ಪಕ ಒಮ್ಮ ಒರ್ ಬೆಂದ್‌ಕಡ ಕ್ಷಣ್ಣಂಡ ಕೂಡ ನಮ್ಮೆಕ್ ಪೋಯಿತಿಂಜತ್. ವಾಪಾಸ್ ಬಪ್ಪಕ ನೂಕಾನುಗ್ಗಲ್ ದಂಡಾಳೂ ಕೂಟ್ ತಪ್ಪಿಪೋಚಿ. ಅವನ ತೇಡಿಯಂಡ್ ನರೇಂದ್ರ ಮಿಂಞಲ್ ಪೋಯಂಡಿಂಜತ್. ಬಯ್ಯಲ್ ರಭಸತ್ ಬಂದಂಡುಳ್ಳ ಕುದುರೆ ಗಾಡಿರ ಸದ್ದಾ ನರೇಂದ್ರಂಗ್ ಕೇಟಿತ್ ತಿರಿತ್ ನೋಟುವಕ, ಅಂವೊಂಡ ಜೊತೆಕಾರ ಕ್ಷಣ್ಣ ರಸ್ತೆರ ಮಧ್ಯತ್ ಇಂಜತ್. ಒರ್ ಸೆಕೆಂಡ್ ತಡ ಆಚೇಂಗೂ ಗಾಡಿರ ಚಕ್ರ ಕ್ಷಣ್ಣಂಡ ಮೇಲೆ ಪತ್ತಿರುವಯಿಂಜತ್. ಪಾರಿತ್ ಬಯ್ಯಕ್ ಓಡ್‌ನ ನರೇಂದ್ರ ಆ ಕ್ಷಣ್ಣನ ಒರ್ ಬರಿಕ್ ಬಲೆಚಿತ್ ಅವಂಡ ಪ್ರಾಣ ಕಾಪಾಡ್‌ಚಿ. ಇದ್‌ನುಂಡ್ ನರೇಂದ್ರಂಡ ಚೆರಿಯ ವಯಸ್ಸಾರ ಧೈರ್ಯ, ಸಾಸ, ಸಮಯ ಸ್ಫೂರ್ತಿರ ಗುಣ ನಂಗಕ್ ಕಾಂಬ.

ಇಂಞೊಮ್ಮ ನರೇಂದ್ರ ಕ್ಷಾಸ್‌ಲ್ ಬೋರೆ ಮಕ್ಕಡ ಕೂಡ ಕೂಡಿತ್ ಗಲಾಟೆ ಮಾಡಿಯಂಡಿಂಜತ್. ಪಾಠ ಮಾಡಿಯಂಡಿಂಜ ಮಾಸ್ಪರ್ ಮಕ್ಕಳೆಲ್ಲ ಓರೊಬ್ಬಳೇ ನಿಪ್ಪೆಚಿಟ್ಟಿತ್, ತಾನ್ ಮಾಡಿಯಂಡಿಂಜ ಪಾಠತರ ಪ್ರಶ್ನೆ ಕೇಟಿತ್. ಏದ್ ಮಕ್ಕಳೂ ಉತ್ತರ ಎಣ್ಣಿತ್‌ಲೆ. ನರೇಂದ್ರ ಉತ್ತರ ಎಣ್ಣಿಚಿ. ಅಕ್ಕ ಮಾಸ್ಪರ್ ನರೇಂದ್ರನ ಬುಟ್ಟಿತ್ ಬೋರೆ ಎಲ್ಲ ಮಕ್ಕಳೂ ಬೆಂಚಿರ ಕೊಡಿಲ್ ನಿಪ್ಪೆಚಿಟ್ಟಿತ್. ಅಕ್ಕ ನರೇಂದ್ರ ಅಯಿಂಡ ಕೂಡ ನಾನೂ ಗಲಾಟೆ ಮಾಡಿಯೆಂದ್ ಎಣ್ಣಿತ್ ತಾನೂ ಬೆಂಚಿರ ಕೊಡಿಲ್ ನಿಂದತ್.

ನರೇಂದ್ರಂಗ್ ಪ್ರತಿಯೋರ್ ವಿದ್ಯೆಯೂ ಗೊತ್ತಿಂಜತ್. ನಲ್ಲ ಪಾಟ್‌ಕಾರ ನಾಯಿತಿಂಜತ್. ನಾಟಕ ಮಾಡುವಯಿಂಜತ್. ಭಗವದ್ಗೀತೆ, ರಾಮಾಯಣ, ಮಹಾಭಾರತತರ ಶ್ಲೋಕತೆನೆಲ್ಲ ಬಾಯಿಪಾಠ ಮಾಡಿತಿಂಜತ್. ಕುಸ್ತಿ ಮಾಡುವ ಯಿಂಜತ್, ನೀರ್‌ಲ್ ಮೀನರ ಮಾದರಿ ಮೀಂದುವಯಿಂಜತ್, ಚಾಯಿಲ್ ಅಡಿಗೇ ಸಹ ಮಾಡುವಯಿಂಜತ್. ಚೆರಿಯ ವಯಸ್ಸಲೇ ಧ್ಯಾನ (Meditation) ಮಾಡುವಯಿಂಜತ್. ಅನ್ನನಾಯಿತ್ ದೃಢವಾಸ ಮನಸ್ಸೂ, ಏಕಾಗ್ರತೆಯೂ

(Concentration) ದುಂಬ ಇಂಜತ್. ಅದ್ಭುತವಾನ ಗೇನಶಕ್ತಿ ಇಂಜತ್. ಬುದ್ಧಿಶಕ್ತಿ ಕೂಡಿತ್ ಕಾಲೇಜ್ ಲೆಕ್ಚರರ್ಸ್‌ಕ್ ಆಶ್ಚರ್ಯ ಆಪಯಿಂಜತ್. ದಾಡ ಕೂಡೆ ಬೋಂಡಿಕೆಯೂ ವಾದ ಮಾಡಿತ್ ಗೆಲ್ಲುವಯಿಂಜತ್. ಭಾಷಣ ಮಾಡ್‌ಚೇಂಗಿ ಎಲ್ಲಾರೂ ತಕ್ಯನ ಕೇಟಿಂಜೇ ಇಪ್ಪಯಿಂಜತ್. ದೇವಳ ಕಾಂಗೊಂಡು ಎಣ್ಣುವ ಆಸೆ ದಿನ ದಿನಕೂ ಬಲವಾಯಂಡ್ ಪೋಚಿ. ಏದ್ ಗುರು, ಸಂತಂಗಳ ಕಂಡಕಲೂ ನಿಂಗ ದೇವಳ ಕಂಡಿತುಳ್ಳಿರಾಂದೇ ಕೇಪಯಿಂಜತ್. ಅನ್ನತ ಸಮಯತ್ ದಾರೋ ದಕ್ಷಿಣೇಶ್ವರತ್‌ಲುಳ್ಳಿ ರಾಮಕೃಷ್ಣ ಪರಮಹಂಸಂಡ ವಿಷಯ ಎಣ್ಣೊಚಿ. ರಾಮಕೃಷ್ಣ ಪರಮಹಂಸನ ಕಂಡಿತಾಪದು ನರೇಂದ್ರಂಡ ಎಲ್ಲ ಪ್ರಶ್ನೆಕೂ ಉತ್ತರ ಕೊಟ್ಚೊಚಿ.

ನರೇಂದ್ರಂಡ ಬಿ. ಎ. ಆಪಕ್ ಮಿಂಗಳೇ ಅಪ್ಪ ಚತ್‌ಪೋಚಿ. ಅಲ್ಲಿಂಜ ಬದ್‌ಕ್‌ಲ್ ಕಷ್ಟ ಎಣ್ಣಕ ಎಂತಂದ್ ಅರಿವಾಚಿ. ಆ ಸಮಯತ್ ರಾಮಕೃಷ್ಣ ಪರಮಹಂಸಂಡ ಪಕ್ಕ ಪೋಯಿತ್ ತಾಂಡ ಪಿಂಗಳ ತಾಂಡ ಸಂಸಾರತ್‌ರ ಕಷ್ಟತ್‌ನ ಎಣ್ಣೆಯಂಡತ್. ಅಕ್ಕ ಪರಮಹಂಸ, “ನೀನ್ ಪೋಯಿತ್ ಜಗನ್ಮಾತೆನ ಐಶ್ವರ್ಯ ಬೋಂಡೂಂದ್ ಕೇಳ್ ತಪ್ಪಾ”ಂದ್ ಎಣ್ಣೊಚಿ. ಅನ್ನನೇ ನರೇಂದ್ರ ದೇವಿರ ವಿಗ್ರಹತ್‌ರ ಮಿಂಗಳತ್‌ಲ್ ಮನೆರ ಕಷ್ಟ ಪರಿಹಾರ ಮಾಡ್‌ಂದ್ ಕೇಪಕ್ ನಿಂದತೇಂಗಿ, ಎಂತ ಕೇಪಕ್ ಬಂದಿಯೇಂದ್ ಮುರಂದ್ ಪೋಪಯಿಂಜತ್. ಮೂಂದ್‌ಕುರಿ ಪೋಯಿತ್ ದೇವಿರ ಮಿಂಗಳತ್ ನಿಂದಕಲೂ ಭಕ್ತಿ, ಜ್ಞಾನ ಬುಟ್ಟಿತ್ ಬೋರೆ ಒಂದೂ ಕೇಪಕೂ ಕಯ್ಯತಾಚಿ. ಅಂತ ಮಾಪುರುಷನೂ ಉಂಬಕಿಲ್ಲತೆ, ತಿಂಬಕಿಲ್ಲತೆ, ಚಿರಿಯ ಚಿರಿಯ ಕೆಲಸ ಮಾಡಿತ್, ತಾನ್ ಉಪವಾಸ ಇಂಜಿತ್, ಅವ್ವಂಡ, ತಂಗೆ ತಮ್ಮಣಂಗಡ ಕೆಲ ದುಂಬ್‌ಚಿಡುವಕ್ ಪ್ರಯತ್ನಪಟ್ಟಿತ್ ಚೋತ್ ಪೋಯಿತ್, ದೇವಳ ಕೇಪಕ್ ಪೋಯಿತೂ ಸಾಧ್ಯ ಇಲ್ಲತಾಚಿ. ಆಚೇಂಗಿಯೂ ಕಷ್ಟತ್ ಎಲ್. ಎಲ್. ಬಿ. ಓದಿಯಂಡಿಂಜತ್. ಬಯ್ಯಂಜಿ ಅದೂ ಬೋಂಡತಾಯಿತ್ ಸನ್ಯಾಸ ಎಡ್‌ತಂಡತ್. ಅಲ್ಲಿಂಜ ಬದ್‌ಕ್‌ಲ್ ಒರ್ ಬಲ್ಯ ತಿರುವು ಕೊಟ್ಚೊಚಿ. ಸಂನ್ಯಾಸಿಯಾಯಿತ್ ದೇಶತ್‌ರ ಉದ್ದಗಲ ಸುತ್ತೊಚಿ. ರಾಮಕೃಷ್ಣ ಪರಮಹಂಸಂಡ ಶಿಷ್ಯನಾಯಿತ್, ಆಧ್ಯಾತ್ಮತ್‌ರ ಆಳತ್‌ನ ಚಾಯಿಲ್ ಅರಂಜಂಡತ್. ಭಾರತ ದೇಶ ಸುತ್ತಿತಾಪದು, ಜನಡಲ್ಲಿ ಉಳ್ಳ ಅಜ್ಞಾನ, ಬಡತನ ಗೊತ್ತಾಚಿ. ಉಂಬಕಿಲ್ಲತವಂಗ್ ದೇವಳ ಕಾಟುವಿ ಬಾಂದ್ ಕಾಕ್‌ಚೇಂಗಿ ಅವೊ ಬಕ್ಕುವಾ? ಓದುವಕ್, ಎಳೆದುವಕ್ ಪಡ್‌ಪುಚಿಡುವಿ ಬಾ ಎಣ್ಣೊಚೇಂಗಿ ಬಕ್ಕುವಾಂದ್ ಗೇನ ಮಾಡಿತ್, ಭಾರತ ದೇಶತ್‌ರ ಜನಳ ಉದ್ದಾರ ಮಾಡುವಕ್ ಎಂತ ಮಾಡಂಡೂಂದ್ ಪೋಲೂ ಬೈಟೂ ಗೇನ ಮಾಡುವಯಿಂಜತ್. 1893ನೇ

ಇಸವಿ ಸೆಪ್ಟೆಂಬರ್ 11 ಲ್ ಅಮೆರಿಕಾತ್ ಚಿಕಾಗೋತ್ ಸರ್ವಧರ್ಮ ಸಮ್ಮೇಳನ ನಡಂದತ್. ಅಲ್ಲಿ ಭಾರತತ್ ಹಿಂದೂಧರ್ಮತ್ ಪ್ರತಿನಿಧಿ ಆಯಿತ್ ಸ್ವಾಮಿ ವಿವೇಕಾನಂದ ಭಾಗವಹಿಸ್ಚಿ. ಅಂದೇತ್ ದಿನ ಅಲ್ಲಿ ಭಾರತಕ್ ಬಲ್ಯ ಗೌರವ ಎಡತಂಡ್ ಬಂದ ಮಹಾತ್ಮ ವಿವೇಕಾನಂದ. ಅಲ್ಲಿಂಜ ಇಂಗ್ಲೆಂಡ್ ಪೋನಲ್ಲಿ ಮಾರ್ಗರೇಟ್ ನೋಬಲ್ ಎಣ್ಣವ ಮೂಡಿ ವಿವೇಕಾನಂದಂಡ ಶಿಷ್ಯೆಯಾಯಿತ್ ಕೂಡಿತ್ ಭಾರತಕ್ ಬಂದಿತ್ ಸಿಸ್ಟರ್ ನಿವೇದಿತಾ ಎಣ್ಣವ ಪೆದತ್ ಸೇವೆ ಮಾಡ್ಚಿ. ತಾಂಡ ಉಸರ್ ಇಪ್ಪಲ್ಲಿ ಕೆತ್ತನೆಯೂ, ಭಾರತಕಾಯಿತೇ, ನಂಗಡ ದೇಶತ್ ಏಳಿಗೇಕಾಯಿತೇ ಉಸರಾಡ್ಚಿ. “ತಾಂಡ ಅವ್ವನ ಗೌರವತ್ ಕಾಂಗತ ಏದ್ ವ್ಯಕ್ತಿಯೂ ಮಹಾತ್ಮ ಆಯಿತಿಲ್ಲೆ” ಎಣ್ಣ್ಚಿ, ಸ್ವಾಮಿ ವಿವೇಕಾನಂದ.

ಎಲ್ಲಾರೂ ವಿವೇಕಾನಂದಂಡ ಮಾದಾರಿ ಸನ್ಯಾಸಿ ಆಕಂಡೂಂದಿಲ್ಲೆ. “ಏಳಿ, ಎದ್ದೆಳಿ ನಿಂಗಡ ಗುರಿ ಮುಟ್ಟುವಲ್ಲಿ ಕೆತ್ತನೆಯೂ ನಿಕ್ಕತಿ” ಎಣ್ಣನ ವಿವೇಕಾನಂದಂಡ ತಕ್ಕನ ಎಕ್ಕೊಲು ಗೇನ ಮಾಡಿಯವಂಡು. ಆರೋಗ್ಯತ್ ತಡಿ, ನಲ್ಲ ಮನ್‌ಸಸ್ ಬೆಚ್ಚಂಡ್ ಸಮಾಜಕ್, ದೇಶಕ್ ಉಪಕಾರಿಯಕಾಯಿತ್ ಬಾವದ್ ನಲ್ಲದ್. □



## ಕನಕದಾಸ

- ಪುಟ್ಟಾನ ಸಮಯ - 15ನೇ ಶತಮಾನ (1506)
- ಪುಟ್ಟಾನ ಜಾಗ - ವಿಜಯನಗರ ಸಾಮ್ರಾಜ್ಯದ ಬಂಕಾಪುರ ರಾಜ್ಯದ 'ಬಾಡ' ಜಿಲ್ಲೆ (ಧಾರವಾಡದ ಕಾಗಿನೆಲೆ)
- ಅಪ್ಪ - ಬೀರಪ್ಪನಾಯಕ
- ಅವ್ವ - ಬಚ್ಚಮ್ಮ
- ಕಣ್ಮರೆ - 98ನೇ ಬಯತ್ (1904)  
(ಪುಟ್ಟಾನ ಕಾಲದಿಂದ ಮರಣ ಕಾಲದವರೆಗೆ ಸರಿಯಾದ ಮಾಹಿತಿ ಇಲ್ಲ)

ಈ "ಬಾಡ" ಎಣ್ಣುವ ಜಾಗ ಗೋವಾಕ್ ಪೋಪ ರಸ್ತೆಲೆ ಇಂಜತ್. ಕುರುಬ ಜನಾಂಗಕ್ ಕೂಡ್‌ನ ಒರ್ ವ್ಯಕ್ತಿ ಆ ಜಾಗದ್‌ರ ಸೇನಾಪತಿ ಆಯಿತ್ತಿಂಜತ್. ಅವನೂ ಅವಂಡ ಪೊಣ್ಣು ತಿರುಪತಿ ವೆಂಕಟೇಶ್ವರ ಸ್ವಾಮಿರ ಭಕ್ತಂಗ್. ತಿರುಪತಿ ತಿಮ್ಮಪ್ಪಂಡ ಆಶೀರ್ವಾದತ್ ಪುಟ್ಟಾನ ಮೋಂವೊಂಗೆ ತಿಮ್ಮಪ್ಪ ಎಣ್ಣೆತ್ ಪೆದ ಇಟ್ಟಿತ್. ಬಯ್ಯಂಜಿ ಕನಕದಾಸನಾಚಿ. ಪುಟ್ಟಾನ ದಿನ ಸೆರಿಕ್ ಗೊತ್ತಲೆ. ಪದ್‌ನಂಜನೆ ಶತಮಾನದ್ ಅಂತ್ಯಭಾಗದ್ ಪುಟ್ಟಿಕ್ಕೊಂದ್ ಇತಿಹಾಸಕಾರಂಗ ಅಂದಾಚ್ ಮಾಡಿತ್. ಸೇನಾಪತಿರ ಮೋಂವೊನಾನ ತಿಮ್ಮಪ್ಪ ಚಿರಿಯದಿಪ್ಪಕಲೆ ಅಕ್ಕರ, ವ್ಯಾಕರಣ, ಕತ್ತಿವರಸೆ, ಕುದುರೆಸವಾರಿ ಇನ್ನತನೆಲ್ಲ ಪಡಿಚಿತ್ತಿಂಜತ್. ಅವೊ

ಚೆರಿಯ ಬಯತ್ಲೇ ಅಪ್ಪ ಅವ್ವನ ಕಳಂದಂಡತ್. ಅನ್ನನಾಯಿತ್ ಚೆರಿಯ ಬಯತ್ಲೇ ತಿಮ್ಮಪ್ಪ ಬಂಕಾಪುರತ್ ಸೇನಾಪತಿ ಆಚಿ. ಈ ತಿಮ್ಮಪ್ಪ ಭಾರಿ ಬಲ್ಯ ಮನಸ್ಸಾಕಾರ ಆಯಿತಿಂಜತ್. ಒಮ್ಮೆ ಪುದಿಯ ಮನೆ ಕೆಟ್ಟುವಹೇಂದ್ ಪಾಯ ಕಳತಂಡಿಪ್ಪಕ ಪೊನ್ನ, ವಜ್ರ, ವೈಡೂರ್ಯ ಉಳ್ಳನ್ನತ ಬಲ್ಯ ಕುಡಿಕೆ ಕೊಟ್ಟಚಿ. ಸುಮಾರೆಲ್ಲ ಬಡವಕ್ ದಾನ ಮಾಡ್ಚಿ. ಅನ್ನತ ದಾನಶೂರನಾನ ಪೊನ್ನರನ್ನತ ವ್ಯಕ್ತಿನ ಜನ ಕನಕನಾಯಕ (ಕನಕ = ಪೊನ್ನ) ಎಣ್ಣೆತ್ ಕಾಕುವಕ್ ಕೂಡ್ಚಿ. ತಾಂಗ್ ಪೊನ್ನ ಕೊಟ್ಟನದ್ ಆದಿಕೇಶವಂಡ (ಕೃಷ್ಣ) ದಯತ್ಲೇಂದ್ ಸಂಬಿತಿಂಜ ಕನಕನಾಯಕ ಒರ್ ದೇವಸ್ಥಾನ ಕೆಟ್ಟೊಂಡೊಂದ್ ಬಯಂದತ್. ತಾನ್ ವಾಸ ಇಂಜ ಬಾಡ ಜಿಲ್ಲೆ ಮುಖ್ಯರಸ್ತೆಲ್ ಇಂಜಾನಗುಂಡ್ ಅಲ್ಲಿಕ್ ಬಹಮನಿ ಸುಲ್ತಾನಂಗ ಅಕ್ಕಕ್ಕ ದಾಳಿ ಮಾಡುವಯಿಂಜತ್. ಅದ್‌ಂಗ್ ಕನಕನಾಯಕ ಆದಿಕೇಶವಂಡ ದೇವಸ್ಥಾನತ್‌ನ ಬಲ್ಯ ರೋಡ್‌ಂಜಿ ಚೆನ್ನಂಗ್ ಒಳ್ಳೆಲುಳ್ಳ 'ಕಾಗಿನೆಲೆ' ಎಣ್ಣುವ ಜಾಗತ್ ಕೊಟ್ಟಚಿ.

ಕನಕನಾಯಕಂಗ್ ಅಕ್ಕಕ್ಕ ಸ್ವಪ್ನತ್ ಆದಿಕೇಶವ ಕಂಡಿತ್, ನೀನ್ ನಾಡ ದಾಸನಾಂಡೊಂದ್ ಎಣ್ಣುವಯಿಂಜತ್‌ಲೊ. ಸೇನಾಧಿಪತಿಯಾಯಿತ್, ಕತ್ತಿ ಪುಡ್‌ಚಿತ್ ಯುದ್ಧ ಮಾಡುವನ್ನತ ನಾನ್ ತಂಬೂರಿ ಸದ್ ಮಾಡಿಯಂಡ್ ಭಿಕ್ಷೆ ಬೋಡುವದಾ? ಅದ್ ನಾಕ್ ಕಯ್ಯಲೇಂದ್ ಗೇನ ಮಾಡುವಯಿಂಜತ್. ಒಮ್ಮೆ ಯುದ್ಧಕ್ ಪೋನ ಸಂದರ್ಭತ್ ಸುಮಾರ್ ಸೈನಿಕಂಗೆಲ್ಲ ಚಿತ್ತತ್, ಕನಕನಾಯಕಂಗೂ ದುಂಬ ಗಾಯ ಆಯಿತಿಂಜತ್. ಈ ಸಮಯತ್ "ಇಕ್ಕಾಚೇಂಗೂ ನಾಡ ದಾಸ ನಾಪಿಯಾ? ದಾಸನಾಪಿಯಾ? ಬೆರಿಯ ಎಣ್ಣೆ" ಎಣ್ಣೆಚಿ, ದೇವ. ಅಕ್ಕ ಕನಕನಾಯಕ ದೇವಡ ಆಜ್ಞೆನ ಮೀರತೆ ಒತ್ತಂಡ್ ದೇವಳ ಇನ್ನನೆ ಬೋಡ್‌ಚಿ - "ದೇವಾ, ನಾನ್ ನೀಡ ದಾಸನಾಪಿ ಆಚೇಂಗಿ, ನಾನ್ ಕಾಕುವಕೆಲ್ಲ, ನಾನ್ ಬೋಡುವ ರೂಪತ್ ನೀನ್ ನಾಕ್ ದರ್ಶನ ತರೊಂಡು". ದೇವ "ತಥಾಸ್ತು" ಎಣ್ಣೆಚಿ.

ಅಲ್ಲಿಂಜ ಗುರುನ ತೇಡಿಯಂಡ್ ಪೋಚಿ. ವಿಜಯನಗರ ರಾಜನಾನ ಶ್ರೀಕೃಷ್ಣದೇವರಾಯಂಡಲ್ಲಿ ವ್ಯಾಸರಾಯ ಎಣ್ಣುವ ಗುರು ಇಂಜತ್. ಅವಂಡ ಪಕ್ಕ ಕನಕನಾಯಕ ಪೋಚಿ. ರಾಜ ದಾನ ಕೊಡ್‌ತ ಜಾಗಕ್ ವ್ಯಾಸರಾಯ ಕೆರೆ ಎಡ್‌ಪ್‌ಚಿಟ್ಟುಂಡಿಂಜತ್. ಅದೇ ಸಮಯಕ್ ಅಲ್ಲಿಕ್ ಪೋನ ಕನಕ ಕೆರೆ ಎಡ್‌ತಂ ಡಿಂಜ ಜಾಗತ್ ಬಲ್ಯ ಬಲ್ಯ ಕಲ್ಲನ ತೆರಕುವಕ್ ಕಯ್ಯತೆ ನೋಟಿಯಂಡಿಂಜ ವ್ಯಾಸರಾಯಂಡ ಪಕ್ಕ ಬಾತ್. "ಸ್ವಾಮಿ, ನಾನ್ ಕನಕ, ಕುರುಬ. ನಿಂಗಡ ಕೈಲ್ ಗುರೂಪದೇಶ ಬೋಡುವಕ್ ಬಂದಿಯೆ. ದಯಬೆಚ್ಚಿತ್ ಉಪದೇಶ ತಾರೀ"ಂದ್

ಬೋಡ್‌ಚಿ. ಅಕ್ಕ ವ್ಯಾಸರಾಯ ತೆಳೊಚಂಡ್ “ಓ... ನೀನ್ ಕುರುಬನಾ? ನೀಕಿಕ್ಕ ಕೊರಿಮಂತ್ರ ಗೊತ್ತುಂಡಲ್ಲಾ? ಇಂಞ ಮಿಂಞತೆರ ಪಾಠ ನೀಕ್ ಪೋರಿ ಮಂತ್ರ” ಎಣ್ಣೊಚಿ.

ಅಂವೊಂಡ ತಕ್ಕಲಿಂಜ ವ್ಯಂಗ್ಯತನ ಮನಸಾಕ್ ಎಡೊತೋವತೆ ಕನಕ “ಸರಿ ಸ್ವಾಮಿ ಆಕು” ಎಣ್ಣೆತ್ ಅಲ್ಲಿಯೇ ಅಳೊತಂಡ್ “ಪೋರಿ... ಪೋರೀ...”ಂದ್ ಜಪ ಸುರು ಮಾಡ್‌ಚಿ. ಚೆನ್ನಂಗ್ ನೇರತ್ ಸಾಕ್ಷಾತ್, ಯಮಧರ್ಮರಾಯಂಡ ಪೋರಿ ಪ್ರತ್ಯಕ್ಷ ಆಚಿ. ಅಕ್ಕ ಗುರು ವ್ಯಾಸರಾಯಂಗ್ ದುಂಬ ಕುಸಿಯಾಯಿತ್ ಎಣ್ಣೊಚಿ, “ಕನಕ... ಈ ಪೋರಿಕ್ ಎಣ್ಣೊ ಕಲ್ಲನ ತೆರೊಕುವಕ್”. ಅಂವೊ ಎಣ್ಣುವದೂ ಆ ಪೋರಿ ಕಲ್ಲನ ತೆರೊಕಿತ್ ಜಾಗ ಮಾಡಿಕೊಡೊತತ್. ಅಂದೇ ಕನಕನ ವ್ಯಾಸಗುರು ಶಿಷ್ಯನಾಯಿತ್ ಸ್ವೀಕಾರ ಮಾಡ್‌ಚಿ. ಕನಕದಾಸನ ಕಂಡಕ ಗುರುಕ್ ಬೋರೆ ಎಲ್ಲ ಶಿಷ್ಯಂಗಕಿಂಜ ಏರ ಕುಸಿ ಇಂಜತ್. ಇದೊನ ಕಂಡಿತ್ ಬೋರೆ ಶಿಷ್ಯಂಗಕ್ ಕಿಚ್ಚ್ ಸುರುವಾಚಿ.

ಒಮ್ಮೆ ಗುರು “ಕನಕಾ..., ನಾನ್ ಮೋಕ್ಷಕ್ ಪೋಲುವಾ”ಂದ್ ಕೇಟತ್.

“ಇಲ್ಲೆ” ಎಣ್ಣೊಚಿ.

“ಪುರಂದರದಾಸ ಪೋಪಾ”ಂದ್ ಕೇಟತ್.

“ಇಲ್ಲೆ” ಎಣ್ಣೊಚಿ.

ಅಂದಕ “ನೀನ್ ಮೋಕ್ಷಕ್ ಪೋಪಿಯಾ”ಂದ್ ಕೇಟತ್.

“ಪೋಚೀಂಗಿ ಪೋಕು” ಎಣ್ಣೊಚಿ.

ಅಕ್ಕ ಬೋರೆ ಶಿಷ್ಯಂಗ ಎಲ್ಲ “ಎಂಥ ಚೊಕ್ಕಾ!” ಎಣ್ಣೆಯಂಡ್ ಕೂತ್ ಕೊಡೊತಂಡ್ ಎದ್ದೊ ನಿಂದತ್. ಅಯಿಂಗಳೆಲ್ಲ ಅಳೊಪೊಚಿಟ್ಟು ಗುರು ಕನಕನ ಕೇಟತ್, “ಅದೆನ್ನನೆ ಮೋನೆ ನೀನ್ ಮಾತ್ರ ಮೋಕ್ಷಕ್ ಪೋಪೊ”. “ನಾನ್” ಎಣ್ಣುವ ಅಹಂ ಪೋಚೀಂಗಿ ಮೋಕ್ಷಕ್ ಪೋಲೊಂದ್ ನಾನೆಣ್ಣೆಯೆ. ಈ “ಕನಕ” ಪೋಪಾಂದಲ್ಲ ಎಣ್ಣುವಕ ಎಲ್ಲ ಶಿಷ್ಯಂಗಳೂ ಮಂಡೆ ಕುಂಬೊಟ್ಟತ್.

ಅನ್ನನೇ ಇಂಞೊಮ್ಮೆ ಗುರು ಏಕಾದಶಿರಂದ್ ಎಲ್ಲಾರೊನೋ ಕಾಕಿತ್, ಇಂದ್ ಉಪವಾಸ ಎನ್ನನೆ ಕೆಲಪಯಿಪು ತಡೊಪೊ? ಎಲ್ಲಾರೊಕೂ ಓರೊಂದ್ ಬಾಳೆಪಣ್ಣ್ ತಪ್ಪಿ. ಆಚೀಂಗಿ ನಿಂಗ ಎಲ್ಲಾರೂ ಈ ಪಣ್ಣೊನ ದಾರೊಕೂ ಕಾಂಗತನೆಕೆ, ದಾರೂ ಇಲ್ಲತ ಜಾಗತ್ ತಿಂಗಂಡೊಂದ್ ಎಣ್ಣೊಚಿ. ಎಲ್ಲ ಶಿಷ್ಯಂಗಳೂ ತಿಂದಿತ್ ಬಾತ್. ಗುರು ಕೇಪಕ ಎಲ್ಲಾರೂ ಓರೊಂದ್ ಜಾಗ ಎಣ್ಣೊಚಿ. ಇನ್ನತ ಜಾಗತ್

ಪಣ್ಣ ತಿಂದಿಯೇಂದ್. ಆಚೇಂಗಿ ಕನಕದಾಸ ಮಾತ್ರ ಬಾಳೆಪಣ್ಣನ ವಾಪಾಸ್ ಎಡ್ತಂಡ್ ಬಂದಿತ್ ಕೊಡ್ತತ್. “ಎನ್ನೊಂಗಪ್ಪ ನೀನ್ ತಿಂದಿತ್ಲೆ”ಂದ್ ಗುರು ಕೇಪಕ, “ಸ್ವಾಮಿ, ನಾಕ್ ಎಲ್ಲಿ ಪೋಚೇಂಗೂ ಆ ದೇವಡ ಕಣ್ಣ ನಾಡ ಬಯ್ಯೆ ಇಪ್ಪಯಿಂಜತ್. ದೇವ ಇಲ್ಲತ ಏದ್ ಜಾಗವೂ ನಾಕ್ ಕಂಡ್ಲೆ ಅದ್‌ಂಗ್ ನಾನ್ ಪಣ್ಣ ತಿಂದಿತಿಲ್ಲ” ಎಣ್ಣವಕ ಬೋರೆ ಶಿಷ್ಯಂಗಡ ಮೂಡ್ ನೋಟುವಕ್ ಕಯ್ಯವಯಿಂಜಿಲೆ. ದೇವ ಇಲ್ಲತ ಜಾಗ ಇಲ್ಲೆ. ಅಂವೊ ನಂಗ ಮಾಡುವ ಎಲ್ಲ ಕೆಲಸತ್‌ನೋ ನೋಟಿಯಂಡಿಪ್ಪಾಂದ್ ಗುರು ಎಣ್ಣನಾನ ಎಲ್ಲ ಶಿಷ್ಯಂಗಲೂ ಮರಂದ್‌ರಾತಿಂಜತ್. ಆಚೇಂಗಿ ಕನಕದಾಸ ಅದ್‌ನ ತಾಂಡ ಜೀವನತ್ ಅಳವಡಿ ಚಿಟ್ಟಂಡತ್. ಇನ್ನತೆಲ್ಲ ಎಚ್ಚಕೋ ಘಟನೆ ನಡಂದಿತ್ ಕನಕದಾಸಂಡ ಯೋಗ್ಯತೆ ಅರಂಜ ಪಿಂಞವೇ ಅಂವೊ ಗುರುಕ್ ಪ್ರೀತಿರ ಶಿಷ್ಯನಾಯಿತಿಂಜತ್. ಆಚೇಂಗಿ ಬೋರೆ ಶಿಷ್ಯಂಗಕ್ ಅಸಮಾಧಾನ ಪೋಯಿಲೆ.

ಒಮ್ಮೆ ಗುರು ಕನಕನ ಕಮ್ಮಿ ತರತ್ ಕಾಂಗತಿ... ಅಂವೊ ದೇವಳ ಕಂಡಂವೊಂದ್ ಎಣ್ಣನಾಂಗ್ ನಂಗೆಲ್ಲ ಬ್ರಾಹ್ಮಣಂಗ ಆಚೇಂಗೂ ಪ್ರಾಮುಖ್ಯತೆ ತರತ ಗುರು ಕುರುಬನಾನ ಅಂವೊಂಗ್ ಬೆಲೆ ಕೊಡ್‌ಪಲ್ಪಾಂದ್ ಗೇನ ಮಾಡಿತ್ ಒರ್ ದಿವಸ, “ಗುರುವೇ, ನಂಗಕೂ ದೇವಳ ಕಾಂಗಂಡು, ಕನಕಂಗಣ್ಣಿತ್ ನಂಗಕೂ ದೇವಡ ದರ್ಶನ ಮಾಡ್‌ಚಿಡಿ” ಎಣ್ಣಚಿ. ಗುರು ಕನಕನ ಕಾಕಿತ್ ಎಣ್ಣವಕ ಅಂವೊ ಒತ್ತಂಡತ್. ನಾಳೆತರ ಮಾಪೂಚೆಕ್ ಸ್ವಾಮಿನ ಬಪ್ಪಕ್ ಮಾಡುವೀಂದ್ ಎಣ್ಣಚಿ. ಅಂದ್ ಮರತ್ ಪೂಜೆಕ್ ಜನಡ ನೂಕ್‌ನುಗ್ ಇಂಜತ್. ನಂಗಲೂ ದೇವಳ ಕಾಂಗೊಲೂಂದ್. ಆಚೇಂಗಿ ಕಷ್ಟಪಟ್ಟಿತ್ ಸಾಧನೆ ಮಾಡಿತ್ ಆಸೆ ಸ್ವಾರ್ಥ ಬುಟ್ಟಿತ್ ಮನಸ್ಸು ಶುದ್ಧ ಉಳ್ಳವಂಗ್ ದೇವ ದರ್ಶನ ಕೊಡ್‌ತನೆಕೆ ಎಲ್ಲಾರ್‌ಕೂ ಕೊಡ್‌ಪಾಲೆ. ಸ್ವಾಮಿನ ಕನಕದಾಸ ಬೋಡ್‌ಚಿ - “ನಾನ್ ಬೋಡುವಕ ನೀನ್ ಬರಂಡೂಂದ್” ಎಣ್ಣಿತ್ ತಕ್ಕ ಕೊಡ್‌ತಾಂಗ್ ದೇವ ಬರತೆ ಕಯಿಂಜಿಲೆ. ಏದ್ ರೂಪತ್ ಬರಡ್‌ಂದ್ ಕೇಟಿತ್ ದೇವ. ಭೈರವ ರೂಪತ್ (ನಾಯಿ) ಬಾ ಎಣ್ಣಚಿ. ಮಾಮಂಗಲಾರತಿ ಆಯಂಡಿಪ್ಪಕ ಇಂಜಿಂಜನೆಕೇ ಒರ್ ನಾಯಿ ಮರತ್‌ರೊಳುಕ್ ಬಾತ್. ವ್ಯಾಸರಾಯ, ಕನಕದಾಸ ಪಿಂಞ ಪುರಂದರದಾಸ ಮೂಂದಾಳೂ ನಾಯಿನ ಕಂಡಿತ್ ಕೈ ತೊತ್ತತ್. ಬಾಕಿ ಎಲ್ಲಾರೂ ಈ ಪಾಳಾನ ನಾಯಿ ಇಲ್ಲಿ ಎನ್ನೊಂಗ್ ಬಾತ್? ಮೈಲಿಗೆ ಮಾಡುವಕ್‌ಂದ್ ಕೋಲ್ ಎಡ್‌ತಂಡ್ ದವುತುವಕ್ ಸುರು ಮಾಡ್‌ಚಿ. ಅಕ್ಕ ಅದ್ ನೈವೇದ್ಯ ಮಾಡಿಯಂಡಿಂಜ ಅಡಿಗೆ ಮನೆಕ್ ನುಗ್ಗುವಕ್ ಪೋಪಕ ಕ್‌ಟ್‌ನಾತ್ ಪೊಜ್ಜಿತ್ ದವುತ್‌ಚಿ. ಪೂಜೆ ತೇಂದಿತ್ ಉಂಡಿತಾಚಿ. ಜನಕೆಲ್ಲ ಅಸಮಾಧಾನ ಆಚಿ. ಎಲ್ಲಿಯಾ ದೇವ ಬಂದ್‌ಲೇಂದ್ ಕೇಪಕ್ ಸುರು

ಮಾಡ್‌ಚಿ. ಅಕ್ಕ ಗುರು, “ಕನಕ, ಇಯಂಗೆಲ್ಲ ದೇವಳ ಕಂಡ್‌ಲೆಲೊ ನೀನ್ ದರ್ಶನ ಮಾಡಿಚಿಟ್ಟಿತ್‌ಲ್ಲೆಯಾ”ಂದ್ ಕೇಟತ್. ಕನಕದಾಸ, “ನಾಯಿರ ರೂಪತ್ ಬಂದ ಸ್ವಾಮಿನ ಎಲ್ಲಾರೂ ಕಂಡಿತಲ್ಲ. ಆಚೇಂಗಿ ದೇವಕ್ ಕೋಲ್‌ರ ಪ್ರಸಾದ ಕೊಡ್‌ತಿತ್ ಆಯೆಚಕ. ನಾನೆನ್ನೊ ಮಾಡ್‌ಡ್” ಎಣ್ಣೆಚಿ. ಅಯ್ಯೋ ನಾಯಿರ ರೂಪತ್ ಬಂದ ಭಗವಂತನ ನಂಗಕ್ ಗೊತ್ತಾಯಿಲ್ಲೆಲ್ಲಾಂದ್ ಜನ ಎಲ್ಲ ಬೇಜಾರ ಪಟ್ಟಂಡತ್. ಜಾತಿಲ್ ಕುರುಬನಾಚೇಂಗೂ ಮನಃಶುದ್ಧಿ ಬೆಚ್ಚಾನಗುಂಡ್ ದೇವಳ ಕಂಡತ್. ತಾಂಡ ತೊಂಬತೆಟ್ಟನೆ ಬಯತ್‌ಕೆತ್ತನೆಯೂ ಕಾಗಿನೆಲೆ ಆದಿಕೇಶವಂಡ ಪೂಜೆ ಮಾಡಿಯಂಡೇ ಸ್ವರ್ಗ ಸೇರ್‌ಚಿ.

ಇಂದೇತ ಕಾಲಕ್ ಇದ್ ನಿಂಗಕ್ ಕಟ್ಟಾಕತೆ, ಪೊಟ್ಟಾಕತೆಯಾಯಿತ್ ಕಾಂಗು. ಆಚೇಂಗಿ ಜೀವನತ್‌ರ ಪ್ರತಿಯೋರ್ ಘಟನೆಯೂ ನಂಗಡ ಬದ್‌ಕ್‌ಕ್ ಬೊಳಿ ಕಾಟುವನ್ನತದೆ. ಭಗವಂತ ನಂಗ ಮಾಡುವ ಪ್ರತಿ ನಲ್ಲ ಪಿಂಞ ಕೆಟ್ಟಿ ಕಾರ್ಯತ್‌ನ ನೋಟಿಯಂಡಿಪ್ಪ ಎಣ್ಣುವದ್ ಮನ್‌ಷ್ಯಂಗ್ ಕೆಟ್ಟಿ ಕೆಲಸ ಮಾಡತನೆಕೆ ಮಾಡು ವಾಂದೂ, ಪ್ರತಿಯೋರ್ ಪ್ರಾಣಿ, ಪಕ್ಷಿ ಮನ್‌ಷ್ಯಂಡಲ್ಲಿಯೂ ಭಗವಂತ ಉಂಡ್. ಅದ್‌ನ ಗುರ್‌ತ್ ಮಾಡುವ ದೃಷ್ಟಿ ನಂಗಕ್ ಬೊಂಡೂಂದ್ ಪಡ್‌ಪಾಚಿಡುವನ್ನತ ಸತ್ಯದರ್ಶನ ಈ ಕನಕದಾಸಂಡ ಕತೆ. ಪ್ರಕೃತಿರ ಮೇಲೆ, ಸೃಷ್ಟಿರ ಮೇಲೆ ಕರುಣೆ ಇಂಜಕ ಮನಸ್ ಶುದ್ಧ ಆಪ. ಇದೇ ಭಗವಂತಂಡ ದರ್ಶನ. □





## ಬಸವಣ್ಣ

ಪುಟ್ಟಾನ ಸಮಯ	- 1131ನೇ ಇಸವಿ
ಪುಟ್ಟಾನ ಜಾಗ	- ಬಾಗೇವಾಡಿ, ಬಿಜಾಪುರ ಜಿಲ್ಲೆ, ಕರ್ನಾಟಕ
ಅಪ್ಪ	- ಮಾದರಸ
ಅವ್ವ	- ಮಾದಲಾಂಬಿಕೆ
ಕಣ್ಮರೆ	- 1167ನೇ ಇಸವಿ

ಪುಟ್ಟಾನ ಕುಂಞಿ ಮೊರ್ಡತೆ, ಕಣ್ಣೂ ತೊರ್ಕತೆ ಬುದ್ದಂಡಿಪ್ಪಕ ಗಾಬರಿಯಾನ ಅಪ್ಪ, ಅವ್ವ ಕೂಡಲ ಸಂಗಮತುಳ್ಳ ಅಯಿಂಡ ಪೆರಿಯ ಗುರುಕ್ ಎಣ್ಣೆತಯೆಚಿತ್. ಆ ಗುರು ಬಂದಿತ್, ಸಂಗಮೇಶ್ವರ ದೇವಸ್ಥಾನತ್‌ಂಜ ಎಡ್‌ತ ಬಂದ ಭಸ್ಮತನ ನೆತ್ತಿಕ್ ಇಡುವಕ ಕುಂಞಿ ಕಣ್ಣೂ ತೊರ್‌ಂದತ್. ಅದ್‌ಂಡ ಬೋಳೆಕ್ ಈಶ್ವರ ಲಿಂಗತ್‌ನ ಕೆಟ್ಟುವಕ ಆ ಕುಂಞಿ ತೆಳೆಚಿತ್. ಅಕ್ಕ ಗುರು, ಈಶ್ವರ ತಾಂಡ ವಾಹನ ಆಯಿತುಳ್ಳ ನಂದಿನೇ ನಿಂಗಡ ಮನೆಕ್ ಅಯೆಚಿತ್. ಇಂವೊ ಮಿಂಞಾಕ್ ಹಿಂದೂ ಧರ್ಮತ್‌ನ ಬೊಳತುವನ್ನತ ಬಲ್ಯ ವ್ಯಕ್ತಿ ಆಪ್‌ಇವಂಗ್ ಬಸವ ಎಣ್ಣೆತ್ ಪೆದ ಇಡಿ ಎಣ್ಣೆ ಚಿ. ಆ ಕುಂಞಿಯೇ ಮಿಂಞಾಕ್ ಬಸವೇಶ್ವರ, ಬಸವಣ್ಣ ಆಯಿತ್ ಪೆದ ಪೋನಯಿಂಗ.

ಬಾಗೇವಾಡಿಲೇ ಪ್ರೆಮರಿ ಸ್ಕೂಲ್‌ಕ್ ಕೂಡ್‌ನ ಬಸವ ಭಾರೀ ಬುದ್ಧಿವಂತಂದ್ ಪೆದ ಎಡ್‌ತತ್. ಅಚ್ಚಕ್ ಚೆರಿಯ ಬಯತ್‌ಲೇ ಉಪಾದ್ರಿಯ ಮಾಡ್‌ನ ಪಾಲತಾರ

ವಿಚಾರ 'ಅದೆನ್ನಾಂಗ್?' 'ಇದೆನ್ನನೆ?' ಎಣ್ಣೆಯಂಡ್ ಪ್ರಶ್ನೆ ಕೇಪಕ ಕ್ಕಣ್ಣಂಡ್ ಸ್ವತಂತ್ರ ವಿಚಾರಶಕ್ತಿ ಕಂಡಿತ್ ಉಪಾದ್ರಿಯಕ್ ಕುಸಿಯೂ ಆಪಯಿಂಜತ್. ಅಂವೊಂಡ ಪ್ರಶ್ನೆಕ್ ಉತ್ತರ ಕೊಡ್ಪದ್ ಕಷ್ಟವೂ ಆಪಯಿಂಜತ್. ಊರ್ಲಾ ನಡ್ಪನ್ನತ ಧಾರ್ಮಿಕ ವಿಧಿವಿಧಾನ ನಮ್ಮೆ ಇನ್ನತಾಂಡೆಲ್ಲ ಅರ್ಥ ಎಂತೆ? ಅದ್ನ ಎನ್ನಾಂಗಾಯಿತ್ ಆಚರಣೆ ಮಾಡುವೊಂದ್ ಕೇಟಿತ್ ಅರಿವಯಿಂಜತ್. ಕ್ಕೇಳ್ ಜಾತಿ ಎಣ್ಣಕ ಎಂತೆ? ಅಯಿಂಗಳ ಎನ್ನಾಂಗ್ ಪಕ್ಕ ಕೂಟುಲೆ? ದೇವ ಎಲ್ಲಾರ್ಕೂ ಒಂದೇ ಅಲ್ಲ? ಇನ್ನೆಲ್ಲ ಪ್ರಶ್ನೆನ ಪೆರಿಯಯಿಂಗಳ ಕೇಪಕ ಅಯಿಂಗಡ ಪಕ್ಕ ಉತ್ತರ ಇಪ್ಪಯಿಂಜಿಲೆ.

ಬಸವಂಗ್ ಎಟ್ವ ವಯಸ್ಸ ಆಪಕ ಉಪನಯನ ಮಾಡಂಡು (ಲಿಂಗಧಾರಣೆ) ಎಣ್ಣೆತ್ ಅಪ್ಪ ತೀರ್ಮಾನ ಮಾಡ್ಚಿ. ಅಕ್ಕ ಮೊಂವೊ ನಾನ್ ಕುಂಞಿಯಾಯಿ ತಿಪ್ಪಕಲೇ ಗುರು ಲಿಂಗ ಕೆಟ್ವನ ಪಿಂಞ ಪುನಃ ಎನ್ನತೋರ್ ಸಂಪ್ರದಾಯ? ಅದ್ ಬೊಂಡ ಎಣ್ಣೆಚಿ. ಇದ್ ಅಪ್ಪಂಗ್ ಆಶ್ಚರ್ಯವೂ ಬೇಜಾರವೂ ಆಚಿ. ಸಂಪ್ರದಾಯತ್ನ ಮೀರುವಕ್ ಅಪ್ಪ ಒತ್ತಂಡೆಲೆ. ಅರ್ಥ ಇಲ್ಲತ ಸಂಪ್ರದಾಯ ಆಚರಣೆ ಬಸವಂಗ್ ಕುಸಿಯಾಯಿಲೆ. ಅಕ್ಕ ದುಂಬ ಗೇನ ಮಾಡ್ನ ಬಸವ ಇದ್ಲಾ ದಾರ್ಕೂ ಬೇಜಾರ ಬೊಂಡ, ನಾನ್ ಮನೆ ಬುಟ್ಟಿತ್ ಸಂಗಮೇಶ್ವರಕ್ ಗುರುರ ಪಕ್ಕ ಪೋಪಿ, ಅಲ್ಲಿಯೇ ಮಿಂಞಕ್ ಓದುವೀಂದ್ ಎಣ್ಣೆಚಿ. ದಾರ್ ಎಂತ ಎಣ್ಣಕಲೂ, ಎಚ್ಚಕ್ ಎಣ್ಣಕಲೂ ಕೇಕತೆ ಕೂಡಲ ಸಂಗಮಕ್ ಪೋಚಿ. ಅಲ್ಲಿ 'ಮಲಪಹಾರಿ' ಪಿಂಞ 'ಕೃಷ್ಣ' ದಂಡ್ ಪೊಳೆ ಕೂಡ್ನ ಜಾಗವೇ ಕೂಡಲ ಸಂಗಮ. ಅಲ್ಲಿಯೇ ಉಳ್ಳ ಈಶ್ವರಂಡ ದೇವಸ್ಥಾನ, ಸಂಗಮೇಶ್ವರ ದೇವಸ್ಥಾನ. ಅಲ್ಲಿಯೆತರ್ ಗುರುಕುಲಕ್ ಕೂಡಿತ್ ವಿದ್ಯೆನ ಆಸಕ್ತಿಲ್ ಪಡ್ಚಿತ್. ವಿದ್ಯೆರ ಜೊತೆಕ್ ವಿನಯ, ಭಕ್ತಿ, ನಲ್ಲ ಆಚಾರ, ವಿಚಾರ, ನೀತಿ, ನಡತೆ, ಎಲ್ಲಾಡ ಕೂಡೆ ಸಮಾನ ವರ್ತನೆ, ತೆಳಿಮೂಡ್ ಇದೆಲ್ಲ ಬಸವಣ್ಣ ವ್ಯಕ್ತಿತ್ವಕ್ ವಿಶೇಷ ರೂಪ ಕೊಡ್ತಿಂಜತ್. ವಿದ್ಯಾಭ್ಯಾಸ ತೇರುವಕಾಪಕ ಬಸವಣ್ಣ ಜೀವನಕ್ ಬೊಂಡಿ ಯಾನನ್ನತ ವಿದ್ಯೆ, ಶರೀರಕ್ ಬೊಂಡಿಯಾನ ವಿದ್ಯೆ, ಮನ್ಸಕ್ ಬೊಂಡಿಯಾನ ವಿದ್ಯೆ, ಎಣ್ಣಕ ವ್ಯವಹಾರ ಜ್ಞಾನ, ಸಾಮಾನ್ಯ ಜ್ಞಾನ, ವ್ಯಾಯಾಮ ಪಿಂಞ ಆಧ್ಯಾತ್ಮ ಇಚ್ಚಕಾನೋ ಪಡ್ಚಿತ್ ಒರ್ ಪರಿಪೂರ್ಣ ವ್ಯಕ್ತಿಯಾಯಿತ್ ಗುರುಕುಲತಿಂಜ ಪೊರಮೆ ಬಾತ್.

ಮಿಂಞ ಚಾಲುಕ್ಯಂಗಡ ರಾಜಧಾನಿ ಆಯಿತಿಂಜ ಕಲ್ಯಾಣನಗರತ್, ಇಕ್ಕ ಕಲಚೂರ್ಯ ವಂಶತ್ ರಾಜ ಬಿಜ್ಜಳ ಆಡಳಿತ ನಡ್ತಿಯಂಡಿಂಜತ್. ಅಂವೊಂಡ

ಮಂತ್ರಿ ಬಲದೇವ ಒಮ್ಮೆ ಕೂಡಲ ಸಂಗಮಕ್ ಬಂದಲ್ಲಿ ಬಸವಣ್ಣನ ಕಂಡತ್. ಬಸವಣ್ಣ ಬಿಜ್ಜಳ ರಾಜಂಡ ಆಸ್ಥಾನತ್ ಅಧಿಕಾರಿ ಆಚೇಂಗಿ ರಾಜ್ಯಕ್ ನಲ್ಲದಾಪಾಂದ್ ಗುರು ಎಣ್ಣವಕ, ಸಂಸಾರತಾಡ್, ಅಧಿಕಾರತಾಡ್ ಆಸೆ ಇಲ್ಲತ ಬಸವಣ್ಣ ಗುರುರ ತಕ್ನನ ಮೀರುವಕಾಗಾಂದ್ ಬಿಜ್ಜಳ ರಾಜಂಡಲ್ಲಿಕ್ ಪೋಯಿತ್ ಕೂಡ್ಚಿ. ಅಕ್ಕ ಇರ್ವತ್ತನಾಲ್ ಬಯತ್. ಆದ್ಯತ್ ರಾಜಂಡ ಭಂಡಾರತ್ ಒರ್ ಚೆರಿಯ ಕೆಲಸಕ್ ಕೂಡ್ನ ಬಸವಣ್ಣ, ಚೆನ್ನಂಗೇ ಕಾಲತ್ ತಾಂಡ ಬಲ್ಯ ಬುದ್ಧಿಶಕ್ತಿ ಕಾರ್ಯಕುಶಲತೆನುಂಡ್ ಬಲದೇವಂಡ ಮರುದಿನಕ್ ಮಾಮಂತ್ರಿಯಾಚಿ. ಮಂತ್ರಿರ ಮೋವಳೋ, ರಾಜಂಡ ಚಾಕ್ ತಂಗನೋ ಮಂಗಲಾಚಿ. ಒಮ್ಮೆ ಅರಮನೆಲ್ ಪಳೆಯ ಪಿಚ್ಚೋಳೆ ಲಿಪಿ ಕ್ಷೆಟ್ಟಿತ್ ಅದ್ನ ದಾರ್ನಗುಂಡೂ ಓದುವ ಕಯ್ಯತೆ, ಬಸವಣ್ಣ ಓದಿತ್ ಅರ್ಥ ಮಾಡುವದು, ಪಳೆಯ ರಾಜಂಗ ಪೂತಿತ್ ಬೆಚ್ಚಿತಿಂಜ ಬಲ್ಯ ಪೊನ್ನಾರ ಭಂಡಾರ ಕ್ಷೆಟ್ಟಿಚಿ.

ಬಸವಣ್ಣ, ಎಲ್ಲ ಮನುಷ್ಯಂಗಳೂ ಒಂದೇ. ಅಯಿಂಡ ಕೆಲಸ ಬೋರೆ ಬೋರೆ ಆನಾಕ್ಷಣ ಒಬ್ಬ ಮೇಲ್ ಜಾತಿ, ಇಂಇಂಚೊಬ್ಬ ಕ್ಷೆಟ್ಟಿ ಜಾತಿ ಆಪ್ಲೇಂದ್ ಕಲ್ಯಾಣತ್ಲಿಂಜ ಪ್ರತಿಯೊಬ್ಬಂಗೂ ಅರಿವಿಕೆ ಕೊಡ್ಪಯಿಂಜತ್. ಇನ್ನತ ಅರಿವಿಕೆ, ಜ್ಞಾನ ಬೊಳೆವಕ್ ಸಹಾಯ ಆಪನೆಕೆ "ಅನುಭವ ಮಂಟಪ" ಕೆಟ್ಟಿಚಿ. ಹರಿಜನ ಪಿಂಇ ಬ್ರಾಹ್ಮಣಂಗ ಒಂದಾಯಿತ್ ಕೂಡಿತ್ ವಿಚಾರ ವಿನಿಮಯ ಮಾಡುವೊ, ಉಂಬೊ, ತಿಂಬೊ ಕುಡಿಪೊ, ಒಕ್ಕಚೆ ಇಪ್ಪನ್ನತ ವಿಚಾರ ಸುಮಾರ್ ಜನಕ್ ಸಹಿಸುವಕ್ ಕಯ್ಯತಾಚಿ. ಬಸವಣ್ಣಂಡ ಮೇಲೆ ರಾಜಂಗ್ ಚಾಡಿ ಎಣ್ಣಚಿ. ರಾಜ್ಯತ್ ರ ಖಜಾನೆಲಿಂಜ ದುಡ್ಡ್ ಎಡ್ತಿತ್ ಸ್ವಂತ ಖರ್ಚ್ ಉಪಯೋಗ ಮಾಡಿಯಂಡುಂಡ್ ಎಣ್ಣವ ಆಪಾದನೆಲ್ ರಾಜ ಲೆಕ್ಕ ಕೇಟತ್. ಪ್ರತಿಯೋರ್ ಲೆಕ್ಕತನೋ ಸೆರಿಯಾಯಿತ್ ಕೊಡ್ತ ಬಸವಣ್ಣ ನಿರಪರಾಧಿ ಎಣ್ಣ ಚಿಟ್ಟಂಡತ್. ಅಲ್ಲಿಂಜ ಮಂತ್ರಿ ಪದವಿನ ಬುಟ್ಟಿತ್ ಕೂಡಲ ಸಂಗಮಕ್ ಬಯ್ಯಕ್ ಬಾತ್. ಸಂಗಮೇಶ್ವರಂಡ ಪೂಜೆಲೇ ಕಾಲ ಕಯಿಚ ಬಸವಣ್ಣ 1167 ಲ್ ದೇವಡ ಪಾದ ಸೇರ್ಚಿ.

ಅಂಪೊ ಗರೀಬ, ಇಂಪೊ ಬಲ್ಯಂಪೊ, ಅಂಪೊ ಮೇಲ್, ಇಂಪೊ ಕ್ಷೆಟ್ಟಿಂಂದ್ ಒಂದೂ ಇಲ್ಲೆ. ದಾಡ ಪಕ್ಕ ಎಂತ ನಲ್ಲರಿಕೆ ಉಂಡ್, ಏದ್ ತರತರ ಬುದ್ಧಿವಂತಿಕೆ ಉಂಡ್ಂದ್ ನೋಟಿತ್, ಅಂತ ವ್ಯಕ್ತಿರ ವ್ಯಕ್ತಿತ್ವಕ್ ಬೆಲೆ, ಗೌರವ ಕೊಡ್ಪಾನ ಪಡ್ಚಕ ಸಮಾಜತ್ ನಲ್ಲರಿಮೆ ಬೊಳ್ಂದ್ ಬಪ್ಪ. ಕನ್ನಡ ಪಾಠ ಪುಸ್ತಕತ್ ಬಸವಣ್ಣಂಡ ವಚನ ಸುಮಾರ್ ಉಳ್ಳಾನ ಎಲ್ಲಾರೂ ಓದಿತ್ - "ಕಳಬೇಡ,

ಕೊಲಬೇಡ, ಹುಸಿಯ ನುಡಿಯಲು ಬೇಡ, ಮುನಿಯಬೇಡ, ಅನ್ಯರಿಗೆ ಅಸಹ್ಯ ಪಡಬೇಡ, ತನ್ನ ಬಣ್ಣಿಸಬೇಡ, ಇದಿರ ಹಳಿಯಲುಬೇಡ ಇದೇ ಅಂತರಂಗ ಶುದ್ಧಿ, ಇದೇ ಬಹಿರಂಗ ಶುದ್ಧಿ, ಇದೇ ನಮ್ಮ ಕೂಡಲಸಂಗಮ ದೇವರನೊಲಿಸುವ ಪರಿ". (ಕಪ್ಪಕಾಗ, ಕೊಲ್ಲುವಕಾಗ, ಪೊಟ್ಕೊ ಪರಿವಕಾಗ, ಚೆಡಿವಕಾಗ, ಬೋರೆಯಿಂಗಳ ಕಂಡಿತ್ ಹೇಸಿಗೆ ಪಡುವಕಾಗ, ತನ್ನ ತಾನ್ ಹೊಗ್ಗಳಿಯವಕಾಗ, ಇಂಇಶೊಬ್ಬನ ಹಂಗ್ಚಿಡುವಕಾಗ ಇದಾನೇ ಒಳಲೂ ಪೊರ್ಮೆಲೂ ಶುದ್ಧತಿಪ್ಪೊಂದ್ ಎಣ್ಣೊವೊ, ಇನ್ನತ ನಡ್ಪುಲ್ ಮಾತ್ರ ದೇವಳ ಒಲಿಚಿಡುವಕ್ ಕಯ್ಯುವೊ) ಇದ್ ದಾರೋ ಎಳಾದಾನ ಒರ್ ಪದ್ಯಾಂದ್ ಮಾತ್ರ ಗ್ಯಾನ ಮಾಡುವಕಾಗ, ಎಳಾದಾನನೇಕೇ ನಡ್ಂದಿತ್ ಕಾಟನ ಬಸವಣ್ಣಂಡ ವ್ಯಕ್ತಿತ್ವತನ ಅರ್ಂಜಿತ್ ನಂಗಡ ಬದ್ಕೆಲೂ ಅನ್ನತ ನಲ್ಲರಿಕೆನ ಬೊಳ್ತಿಯವಂಡು. □



## ತ್ಯಾಗರಾಜ

- ಪುಟ್ಟಾನ ದಿನ - 1759ನೇ ಇಸವಿ (ಕೆಲವು ಪುಸ್ತಕತ್ 1797ಂದೂ,  
1767ಂದೂ ಉಂಡ್)
- ಪುಟ್ಟಾನ ಜಾಗ - ತಿರುವಾರೂರು, ತಂಜಾವೂರ್, ಆಂಧ್ರಪ್ರದೇಶ
- ಅಪ್ಪ - ರಾಮಬ್ರಹ್ಮ
- ಅವ್ವ - ಸೀತಮ್ಮ
- ಕಣ್ಮರೆ - 1847ನೇ ಇಸವಿ ಜನವರಿ 6

ಸಂಗೀತ ಕ್ಷೇತ್ರತ್ ಬಲ್ಯ ಸಾಧನೆ ಮಾಡ್‌ನನ್ನತ ಮಹಾನ್ ಸಂತ ಈ ತ್ಯಾಗರಾಜ. ಸಂಗೀತ ಪಡ್‌ಚಯಿಂಗಕ್ ಈ ಪೆದ ಪರಿಚಯ ಇಪ್ಪ. ಇಯಂಗಡ ಪೆದ ತ್ಯಾಗಬ್ರಹ್ಮ. ಎಲ್ಲಾರೂ ತ್ಯಾಗಯ್ಯಂದ್ ಕಾಕುವಯಿಂಜತ್. ವಿದ್ಯಾಭ್ಯಾಸಕ್ ತೊಂದರೆ ಆಪಕಾಗಾಂದ್ ತಿರುವಾರೂರ್‌ನ ಬುಟ್ಟಿತ್ ತಿರುವಯ್ಯಾರ್ ಎಣ್ಣುವ ಹಳ್ಳಿಕ್ ಪೋಚಿ. ಅಲ್ಲಿ ಒರ್ ಸಂಸ್ಕೃತ ಸ್ಕೂಲ್‌ಕ್ ತ್ಯಾಗಯ್ಯನ ಕೂಟ್‌ಚಿ. ಅಲ್ಲಿ ತೆಲುಗು ಪಿಂಞ ಸಂಸ್ಕೃತ ಭಾಷೆನೋ, ವೇದ ಮಂತ್ರತ್‌ನೋ ಭಾರೀ ಪುರ್‌ಡ್‌ಲ್ ಪಡ್‌ಚತ್. ಅಪ್ಪ ದಿನಾ ಪೊಲಾಕ ರಾಮಂಡ ಪೂಜೆ ಮಾಡುವಯಿಂಜತ್. ಅಪ್ಪಂಡ ಪೂಜೆ ಆನದು ಅವ್ವ ಪಾಡುವಯಿಂಜತ್. ಇದ್‌ನ ನೋಟುವಯಿಂಜ ಮೋಂವೊ ದೈವಭಕ್ತನೂ, ಸಂಗೀತತ್ ಅಭಿರುಚಿ ಉಳ್ಳವನೂ ಆಯಿತ್ ಬೊಳ್‌ಂದತ್. ಒರ್ ದಿನ ಅಪ್ಪಂಡ ಪೂಜೆ ಆಪದು ಮಾಮೂಲಿರನೆಕೆ ಅವ್ವ ಪಾಡ್‌ಚಿ. ಅದಾನ ಪಿಂಞ

ತ್ಯಾಗಯ್ಯ ತಾನೇ ಸ್ವಂತ ಎಳೆದೊಡನೆ ಒರ್ ಭಕ್ತಿಗೀತೆನ ಪಾಡ್‌ಚಿ. ಇದೊಡನೆ ಕಂಡಿತ್ ಅಪ್ಪವ್ವಂಗೆ ಭಾರೀ ಕುಸಿ ಆಚಿ. ಮೋಂವೊ ಅಚ್ಚಕ್ ಬಲ್ಯ ಬುದ್ಧಿವಂತಂದ್ ಗೊತ್ತಾಯೆ ಅಂದೆ. ಅಪ್ಪ ಆ ಪಾಟ್‌ನ ಎಳೆದಿಯಂಡ್ ಪೋಯಿತ್ ಪಂಡಿತಂಗಕ್ ಕಾಟ್‌ಚಿ. ಅಯಿಂಗ ಚೆರಿಯ ಬಯತ್‌ರ ಕ್ಕಣ್ಣಂಡ ಪ್ರತಿಭೆನ ಹೊಗಳಿತ್ ಅಂವೊಂಗೆ ಸಂಗೀತ ವಿದ್ಯೆ ಪಡ್‌ಪಾಚಿಡುವಕ್ ಎಣ್ಣೆಚಿ. ಅಲ್ಲಿಂಜ ಶೋರಿ ವೆಂಕಟರಮಣಯ್ಯ ಎಣ್ಣವ ಗುರುರ ಪಕ್ಕ ಸಂಗೀತ ಪಡ್‌ಚಿತ್ ಬಲ್ಯ ಸಂಗೀತಗಾರ ನಾಚಿ. ದೈವಭಕ್ತಿನಗುಂಡ್ ಮಹಾನ್ ಸಂತನಾಚಿ.

ಎಚ್ಚೆಕೋ ರಾಜಂಗ, ತ್ಯಾಗರಾಜನ; ಅಯಿಂಗಡ ಆಸ್ಥಾನತ್ ಬೆಚ್ಚೆವಕ್ ಪ್ರಯತ್ನಪಟ್ಟಿತ್ ಚೋತತ್. ಪಣಕ್, ಪದವಿಕ್ ಆಸೆಪಡತ ತ್ಯಾಗರಾಜ ಎಲ್ಲಿಯೂ ಇಪ್ಪಕ್ ಒತ್ತಂಡ್‌ಲೆ. ರಸ್ತೆಲ್ ದಾಸಂಡ ಮಾದಾರಿ ಪಾಡಿಯಂಡ್ ಪೋಪಕ ಜನ ಅಯಿಂಗಳಾಯಿತೆ ಆಕ್ಕಿಯೋ, ಬೇಳೆಯೋ ಕೊಡ್‌ತತೇಂಗಿ ಅದೊಡನೆ ಎಡ್‌ತಂಡ್ ಬಂದಿತ್ ಮೂಂದ್ ಗಂಟೆಕ್ ಅಡಿಗೇ ಮಾಡಿತ್ ಉಂಬಯಿಂಜತ್. ಆರ್ಥಿಕ ವಾಯಿತ್ ಬಡತನ ಇಂಜಕಲೂ ಸಂಗೀತ ಪಾಠಕ್ ಬಪ್ಪ ವಿದ್ಯಾರ್ಥಿಯಡ ಕೈಲ್ ಒರ್ ಪೈಸ ಕೇಟವಯಿಂಜಿಲೆ. ರಾಮಕೃಷ್ಣಾನಂದಸ್ವಾಮಿ ಎಣ್ಣವ ಒರ್ ಸನ್ಯಾಸಿ ತ್ಯಾಗರಾಜಂಗ್ ರಾಮತಾರಕ ಎಣ್ಣವ ಮಂತ್ರತ್‌ನ ಉಪದೇಶ ಮಾಡಿತ್, ಆ ಮಂತ್ರತ್‌ನ ತೊಂಬತ್ತಾರ್ ಕೋಟಿ ಕುರಿ ಎಣ್ಣೆಚೇಂಗಿ ದೈವ ಸಾಕ್ಷಾತ್ಕಾರ ಆಪಾಂದ್ ಎಣ್ಣೆಚಿ. ದಿನಕ್ ಒರ್ ಲಕ್ಷತ್‌ರ ಇರುವತ್ತಂಜಿ ಆಯಿರ ಕುರಿ ಈ ಮಂತ್ರತ್‌ನ ಜಪ ಮಾಡಿತ್, ನುಪ್ಪತ್ತೆಟ್ತ್ (38) ಕಾಲತ್ ತೊಂಬತ್ತಾರ್ ಕೋಟಿ ಮಂತ್ರ ಪಠಣ ಪೂರ್ತಿ ಮಾಡುವಕ ರಾಮಲಕ್ಷ್ಮಣನ ದರ್ಶನ ಆಚಿಲೊ. ಇಂಞೊಮ್ಮ ತ್ಯಾಗರಾಜ ಪೂಜೆ ಪೂಜೆ ಎಣ್ಣೆಯಂಡಿಪ್ಪಾಂದ್ ಅಣ್ಣ, ಪೂಜೆ ಮಾಡಿಯಂಡಿಂಜ (ರಾಮ ಪಂಚಾಯತನ) ರಾಮ, ಲಕ್ಷ್ಮಣ, ಸೀತೆ, ಭರತ, ಶತ್ರುಘ್ನ ಪಿಂಞ ಹನುಮಂತ ಇಂಜ ಒರ್ ವಿಗ್ರಹತ್‌ನ ಪೊಳೆಕ್ ಚಾಡಿರ್‌ತಲೊ. ಬೈಟ್ ಪೂಜೆ ಮಾಡುವಕೊಂದ್ ಬಂದ ತ್ಯಾಗರಾಜಂಗ್ ವಿಗ್ರಹ ಕಾಂಗತಿಪ್ಪಕ ದುಃಖ ತಡ್‌ಪ ಕಯ್ಯತೆ ಮೂಂದ್ ದಿನ ಕೂಳ್ ನೀರ್ ತೊಡತೆ, ವಿಗ್ರಹ ತೇಡಿಯಂಡ್ ಪೊಳೆರಲ್ಲಿಕ್ ಬಂದಿತ್, ನಾಡ ರಾಮನ ಎಲ್ಲಿ ತೇಡಡೊಂದ್ ಮೊರ್‌ಡುವಕ ಪೊಳೆರೊಳ್‌ಲಾ ತಾಂದಿತಿಂಜ ವಿಗ್ರಹ ಅನ್ನನೆ ಕೊಡಿಕ್ ಬಾತ್‌ಲೊ. ಆಚೇಂಗಿಯೂ ಅಚ್ಚೆಕೆಲ್ಲ ಕಷ್ಟ ಕೊಡ್‌ತ ಅಣ್ಣಂಡ ಮೇಲೆ ತ್ಯಾಗರಾಜಂಗ್ ಚೆಡಿ ಬಂದ್‌ಲೆ.

1847 ಲ್ ಜನವರಿ 6ನೇ ತಾರೀಕ್‌ಲ್ ಸಂನ್ಯಾಸ ಸ್ವೀಕಾರ ಮಾಡಿತ್ (ಕಡೆಗಾಲತ್ ಸಂನ್ಯಾಸ ಸ್ವೀಕಾರ ಮಾಡ್‌ಚೇಂಗಿ ಪುನರ್ಜನ್ಮ ಇಲ್ಲೆ ಎಣ್ಣವ ನಂಬಿಕೆ.) ರಾಮನ ಪೂಜೆ ಮಾಡಿತ್, ಎಲ್ಲಾರೂ ರಾಮ ಭಜನೆ ಮಾಡಿಯಂಡಿಪ್ಪಕ,

ತಾನ್ ರಾಮ ತಾರಕ ಮಂತ್ರ ಎಣ್ಣೆಯಂಡ್ ಪ್ರಾಣ ಬುಟ್ಟಿತ್. ಪ್ರಾಣ ಪೋಪಕ ಮಂಡೆ ಒಡ್ಂದಿತ್ ಒರ್ ಬೊಳಕ್ ಪೂಜೆ ಮಾಡಿಯಂಡಿಂಜ ರಾಮಂಡ ವಿಗ್ರಹತ್ ಕೂಡ್ಚೀಂದ್ ಅಲ್ಲಿ ಕೂಡ್ನಯಿಂಗ ಎಲ್ಲ ಎಣ್ಣೆಚಿಲೊ.

ಜಪತಪ ಮಾಡಿತ್ ದೈವಸಾಕ್ಷಾತ್ಕಾರ ಪಡೆಯುವಕ್ ಕಯ್ಯತ ಪೋಚೀಂಗಿಯೊ, ಬಾಡೆಕ್ ಬೊಳಚಿ ಬೆಚ್ಚಲ್ಲಿ ನಂಗಡ ಇಷ್ಟದೇವಳ ಪ್ರಾರ್ಥನೆ ಮಾಡಿತ್ ಕುರಿ ಇಡುವದ್ ಕಮ್ಮಿತರಾಂದೊ, ದುರ್ಬಲತೆಂದೊ ಗೇನ ಮಾಡುವಕಾಗ. ದೇವಡ ಪ್ರಾರ್ಥನೆ ನಂಗಡ ಒಳಲ್ ಆತ್ಮವಿಶ್ವಾಸ ಬೊಳತುವ, ನಲ್ಲರಿಕೆ ಬೊಳಿವ. ದೇವಭಕ್ತಿ ತಪ್ಪು ಬಟ್ಟೆಲ್ ನಡಕತನೆಕೆ ತಡಪ. □



## ಬಂಕಿಮಚಂದ್ರ ಚಟರ್ಜಿ

- ಪುಟ್ಟನ ದಿನ - 1838ನೇ ಇಸವಿ ಜೂನ್ 27  
ಪುಟ್ಟನ ಜಾಗ - ಕಾಂಚಾಲಪಾಡಾ, ಪಶ್ಚಿಮ ಬಂಗಾಳ  
ಅಪ್ಪ - ಯಾದವಚಂದ್ರ ಚಕ್ರೋಪಾಧ್ಯಾಯ  
ಕನ್ಯಾರೆ - 1894 (ಕೆಲವು ಪುಸ್ತಕತ್ 1898ಂದೂ ಉಂಡ್)

ಬಂಕಿಮಚಂದ್ರಂಢ ಅಪ್ಪ ಮಿಡ್ನಾಪುರತ್ ಡಿ.ಸಿ. ಆಯಿತಿಂಜತ್. ಬಂಕಿಮಚಂದ್ರ ಸ್ಕೂಲ್‌ಕ್ ಕೂಡ್‌ನ ಒರೇ ದಿವಸತ್ ವರ್ಣಮಾಲೆರ ಅಚ್ಚಕೂ ಅಕ್ಷರತ್‌ನ ಪಡ್‌ಚಿರ್‌ತ್. ಆ ಕುಂಞಿರ ಬುದ್ಧಿಶಕ್ತಿ ಕಂಡಿತ್ ಉಪಾದ್ರಿಯಕೂ, ಪೆರಿಯಯಿಂಗಕೂ ಆಶ್ಚರ್ಯ ಆಯಿರ್‌ತ್. ಅಲ್ಲಿಂಜಪ್ಪರ ಆ ಸ್ಕೂಲ್‌ಕ್ ಏದೇಂಗಿ ಹುಷಾರುಳ್ಳ ಕುಂಞಿ ಬಾತೇಂಗಿ, ಇಂಞೋರ್ ಬಂಕಿಮ ಬಾತ್‌ಂದ್ ಎಣ್ಣುಪ ಯಿಂಜತ್‌ಲೊ. ಅನ್ನನೇ ಮಿಂಞಕ್ ಸ್ಕೂಲ್‌ಲೂ, ಕಾಲೇಜ್‌ಲೂ ಆದ್ಯತ್‌ರಂವೊ ನಾಯಿತೇ ಪಾಸಾಪಯಿಂಜತ್. ಪಾಠ ಬುಟ್ಟಿತ್ ಬೋರೆ ಕಳಿಲ್ ಅವಂಗ್ ಅಚ್ಚಕೋರ್ ಆಸಕ್ತಿ ಇಲ್ಲತೆ ಪೋಚೇಂಗಿಯೂ, ಪಾಠಕುಳ್ಳ ಪುಸ್ತಕ ಅಲ್ಲತೆ ಬೋರೆ ನಲ್ಲ ನಲ್ಲ ಪುಸ್ತಕ ಓದುವಯಿಂಜತ್. ಸಂಸ್ಕೃತ ಪಡ್‌ಚಿತ್, ಪುರಾಣ, ವೇದ ಎಲ್ಲ ಓದಿತ್ ಅರಂಜಂಡತ್. ಕಾಲೇಜ್‌ರ ಲೈಬ್ರರಿರ ಒರ್ ಮೂಲೆಲ್ ಅಞಾತಂಡ್ ಓದುವಕ್ ಸುರು ಮಾಡ್‌ಚೇಂಗಿ ಲೋಕವೇ ಗೂತ್ತಿಲ್ಲೆ. ಪರೀಕ್ಷೆ ಪಕ್ಕ ಬಪ್ಪಕ ಪಾಠ ಬುಕ್ಕ್ ಓದಿತ್ ಎಲ್ಲಾಕಿಂಜ ಏರ ಮಾರ್ಕ್‌ಲ್ ಪಾಸಾಪಯಿಂಜತ್.



ಕಲ್ಕತ್ತಾ ಪ್ರೆಸಿಡೆನ್ಸಿ ಕಾಲೇಜ್‌ಲ್ ಬಿ.ಎ. ಓದಿಯಂಡಿಪ್ಪಕ, ಸಿಪಾಯಿ ದಂಗೆ ಆಯಂಡಿಂಜತ್. ಅಂದಕಲೂ ನಲ್ಲ ಮಾರ್ಕ್ಸ್‌ಲ್ ಬಿ. ಎ. ಪಾಸ್ ಮಾಡ್‌ಚಿ. ಅದೇ ಕಾಲ ಕಲ್ಕತ್ತಾತ್‌ರ ಲೆಫ್ಟಿನೆಂಟ್ ಗವರ್ನರ್ ಬಂಕಿಮಚಂದ್ರನ ಕಾಕಿತ್ ಡಿ.ಸಿ. ಕೆಲಸ ಕೊಡ್‌ತತ್. ಬಯ್ಯಂಜಿ ಎಲ್.ಎಲ್.ಬಿ. ಮಾಡಿತ್, ಡೆಪ್ಯುಟಿ ಮ್ಯಾಜಿಸ್ಟ್ರೇಟ್ ಆಚಿ. ಬ್ರಿಟಿಷ್‌ಕಾರಡ ಕೂಡೇ ಕೆಲಸ ಮಾಡ್‌ಚೇಂಗಿಯೂ ಅಯಿಂಗಕ್ ಮಂಡೆ ಬಗ್ಗೆ ಚಿಡತ ಸ್ವಾಭಿಮಾನಿ ಬಂಕಿಮಚಂದ್ರ. ಅದ್‌ಂಗಾಯಿತ್ ಸುಮಾರ್ ಕುರಿ ಟ್ರಾನ್ಸ್‌ಫರ್ ಆಪಯಿಂಜತ್.

ಬಯ್ಯಂಜಿ ಬಂಕಿಮಚಂದ್ರ, ಬಲ್ಯ ಎಳ್ತಕಾರನಾಚಿ. ಅಯಿಂಗಡ ದಾರೂ ಎಂದೂ ಮರ್‌ಕತ ಪಾಟ್ ನಂಗ, ನಿಂಗಕೆಲ್ಲ ಗೊತ್ತುಳ್ಳದೇ! ಅದೇ 'ವಂದೇ ಮಾತರಂ'.

'ಆನಂದಮಠ', 'ದೇವಿ ಚೌಧುರಾಣಿ', 'ಕೃಷ್ಣಕಾಂತನ ಉಯಿಲು', 'ವಿಷವೃಕ್ಷ', 'ದುರ್ಗೇಶನಂದಿನಿ' ಇನ್ನತ ಸುಮಾರ್ ಕಾದಂಬರಿ ಬಂಗಾಳಿ ಭಾಷೆಲೇ ಎಳ್‌ದಿತ್. ಅದೆಲ್ಲ ಬೋರೆ ಭಾಷೆಕ್ ಭಾಷಾಂತರ ಆಯಿತ್. ಬಂಕಿಮಚಂದ್ರಂಡ ಸ್ವಾಭಿಮಾನ ಬ್ರಿಟಿಷ್ ಅಧಿಕಾರಿಯಕ್ ಕುಸಿಯಾಯಿಲೆ. ಅದೇ ನೆವನತ್ ಬಂಕಿಮಚಂದ್ರ ಕೆಲಸ ಬುಡುವ ತೀರ್ಮಾನ ಮಾಡ್‌ಚಿ. ಆಚೇಂಗಿ ಬ್ರಿಟಿಷ್ ಅಧಿಕಾರಿಯ ಅದ್‌ಂಗ್ ಅವಕಾಶ ಕೊಡ್‌ತಲೆ. ಬಯ್ಯಂಜಿ ಐಂಬತ್ತಂಜನೇ ಬಯತ್‌ಲ್ ಪುದಿಯ ಗವರ್ನರ್ ಬಂದ ಸಂದರ್ಭತ್, ಸಾಹಿತ್ಯ ರಚನೆ ಮಾಡುವಕ್ ಸಮಯ ಪೋರತಾಪ, ಕೆಲಸ ಮಾಡುವಕ್ ಕಯ್ಯುಲೇಂದೆಣ್ಣೆತ್, ಒತ್ತಾಯ ಮಾಡಿತ್ ಒಪ್ಪ್‌ಚಿಟ್ಟತ್. ಅನ್ನನೇ ಐಂಬತ್ತಂಜನೇ ಬಯತ್‌ಲ್ ನಿವೃತ್ತಿಯಾಯಿತ್, ಆರೋಗ್ಯ ಪಾಳಾಯಿತ್ ಐಂಬತ್ತಾರನೆ ಬಯತ್‌ಲ್ ಮರಣಪಟ್ಟತ್. ಸಾಹಿತ್ಯ ರಚನೆ ಮಾಡೊಂಡೊಂದ್ ಎಣ್ಣುವ ಬಂಕಿಮಚಂದ್ರ ಚಟರ್ಜಿರ ಸೊಪನ ಕಾರ್ಯರೂಪಕ್ ಬಂದ್‌ಲೆ. ಆರೋಗ್ಯತ್ ಇಂಜಿತುಂಡೇಂಗಿ ಅದೆಚ್ಚಕ್ ಪುಸ್ತಕ ಎಳ್‌ದುವಯಿಂಜತೋ?

ಆರೋಗ್ಯ ಪಾಳಾನ ಸಂದರ್ಭತ್, ಡಾಕ್ಟರ್ ಎಣ್ಣೊನ ಮದ್ದೊನ ಎಡ್‌ತವ ಯಿಂಜಿಲೆ. ಮದ್ದೊ ಎಡ್‌ತವತ ಪೋಚೇಂಗಿ ನಿಂಗ ಚತ್‌ಪೋಪಿರಾಂದ್ ಡಾಕ್ಟರ್ ಎಣ್ಣುವಕ್, ನಾನೆಲ್ಲಿ ಮದ್ದೊ ಬೋಂಡಾಂದ್ ಎಣ್ಣೆಯೆ, ಎಡ್‌ತಂಡೇ ಉಳ್ಳಲ್ಲ ಎಣ್ಣೆ ಚಿಲೊ. ಡಾಕ್ಟರ್‌ಕ್ ಆಶ್ಚರ್ಯ ಆಯಿತ್ ಎಲ್ಲಿಯ ನಿಂಗ ಎಡ್‌ತಂಡುಳ್ಳ ಮದ್ದೊನ ಕಾಟೀಂದ್ ಕೇಪಕ, ಅಲ್ಲಿಯೇ ಇಂಜ ಭಗವದ್ಗೀತೆನ ಕಾಟಿತ್ ಇದೇ ನಾಡ ಮದ್ದೊ ಎಣ್ಣೊ ಚಿಲೊ.

ಬಂಕಿಮಚಂದ್ರಂಗ್ ದೇಶಭಕ್ತಿ, ತಾಂಡ ಅವ್ಯಭಾಷೆರ ಮೇಲೆ ಪ್ರೀತಿ ದುಂಬ ಇಂಜತ್. ಬ್ರಿಟಿಷ್ ಸರ್ಕಾರತ್ ಕೆಲಸ ಮಾಡ್‌ನಕಲೂ ವಂದೇ ಮಾತರಂರನ್ನತ

ದೇಶಭಕ್ತಿ ಗೀತೆ ಎಳೆದಿತ್, ಪ್ರತಿಯೊಬ್ಬ ದೇಶವಾಸಿರ ದೇಶಭಕ್ತಿನ ಬಡ್‌ಚಿತ್ ಒಪ್ಪಿತ್. ಆನಂದಮಠತ್‌ರನ್ನತ ದೇಶಪ್ರೇಮತ್‌ರ ಕಾದಂಬರಿ ಎಳೆದಿತ್ ಸ್ವಾತಂತ್ರ್ಯ ಪೋರಾಟಗಾರಂಗಕ್ ಪುರ್‌ಡ್ ಬಪ್ಪಚಿಟ್ಟಿತ್. ಅದ್‌ಂಗೆಲ್ಲ ಒನ್ನಾಂದೂ ಚಾವ್ ಇಲ್ಲೆ. ಡಿ.ಸಿ. ಆಯಿತಿಂಜಕಲೂ ಅವ್ವಭಾಷೆಯಾನ ಬಂಗಾಳಿಲೇ ಎಳೆದ್‌ನಾನ ನೋಟುವಕಲೇ ಭಾಷಾ ಪ್ರೇಮ ಗೊತ್ತಾಪ.

ದೇಶಭಕ್ತಿ, ಅಪ್ಪ ಅವ್ವಂಡ ಮೇಲೆ ಭಕ್ತಿ ಅವ್ವ ಭಾಷೆರ ಮೇಲೆ ಅಭಿಮಾನತ್‌ನ ಬುಡುವಕಾಗ. ಅದ್ ನಂಗಕ್ ವಿಶೇಷ ಶಕ್ತಿ ತಪ್ಪ. ವಿಶೇಷವಾನ ವ್ಯಕ್ತಿತ್ವತ್‌ನ ರೂಪ್‌ಚಿಡುವ. □



## ತೆನಾಲಿ ರಾಮಕೃಷ್ಣ

ಸುಮಾರ್ಕ್ ಪದ್ನಾರನೆ ಶತಮಾನತ್ ಆಂಧ್ರಪ್ರದೇಶತ್‌ರ ತೆನಾಲಿ ಎಣ್ಣುವ ಊರ್‌ಲ್, ರಾಮಯ್ಯ ಎಣ್ಣುವವಂಡ ಮೋಂವೊನಾಯಿತ್ ಪುಟ್ನನ ರಾಮಕೃಷ್ಣ ಚುಮ್ಮಿ ಇಪ್ಪಕಲೇ ಅಪ್ಪನ ಕಳಂದಂಡತ್. ಮೋಂವೊನ ಬಲ್ಯ ವಿದ್ಯಾವಂತ ಮಾಡಂಡೂಂದ್ ಅವ್ವಂಡ ಆಸೆ. ವೈಷ್ಯವಂಗಳೇ ಇಂಜಲ್ಲಿ, ಶೈವನಾನ ರಾಮಕೃಷ್ಣಂಗ್ ದಾರೂ ವಿದ್ಯೆ ಪಡ್‌ಪ್‌ಚಿಡುವಕ್ ಮಿಂಞಕ್ ಬಂದ್‌ಲೆ. ಅದ್‌ನೆಲ್ಲ ಮಂಡೆಕೇ ಎಡ್‌ತವತೆ ಪೊಲಾಕ್‌ಂಜ ಮಕ್ಕಡ ಕೂಡ, ಕಂಡ ಕಂಡಲ್ಲಿ ಸುತ್ತಿಯಂಡ್, ಕ್‌ಟ್ನಾನೆಲ್ಲ ತಿಂದಂಡ್ ಕಾಲ ಕಯಿಪ ಮೋಂವೊನ ಕಂಡಿತ್ ಅವ್ವಂಗ್ ದುಃಖ ಆಪಯಿಂಜತ್. ಇನ್ನನೆ ರಾಮಕೃಷ್ಣಂಗ್ ಪತ್ತ್ ಬಯತಾಚಿ. ಅಕ್ಕ ಅವಂಗ್, ತಾನ್ ಒರ್ ಅಕ್ಷರವೂ ವಿದ್ಯೆ ಪಡ್‌ಚಿಲೆಲ್ಲಾಂದ್ ಮಾನಕೇಡಾಚಿ. ಸುಮಾರ್ ಗುರುವಳೆಲ್ಲ ಕಂಡಿತ್, ವಿದ್ಯೆ ಪಡ್‌ಪ್‌ಚಿಡೀಂದ್ ಬೋಡ್‌ನಕಲೂ ದಾರೂ ಒತ್ತಂಡ್‌ಲೆ. ಅವಂಗ್ ವಿದ್ಯೆ ಪಡಿಕಂಡೂಂದ್ ಆಸೆ ಇಂಜತ್. ಇಂಞ ಮಿಂಞಕ್ ದಾರ್‌ನೋ ವಿದ್ಯೆ ಪಡ್‌ಪ್‌ಚಿಡೀಂದ್ ಕೇಪ್‌ಲೆ. ನಾನೇ ಪಡಿಪೀಂದ್ ತೀರ್ಮಾನ ಮಾಡಿತ್ ರಾಮಕೃಷ್ಣ ಅವ್ವಂಡ ಕಾಲ್ ಪುಡ್‌ಚಿತ್ ನಾನ್ ವಿದ್ಯೆ ಪಡಿಪಕ್ ಪೋಪೀಂದೆಣ್ಣ್ ಚಿ. ದಾರೋ ಗುರುನ ಕ್‌ಟ್ಕಿತ್ತಿಕ್ಕೂಂದ್ ಗೇನ ಮಾಡ್‌ನ ಅವ್ವ "ಮಹಾವಿದ್ಯಾಂಸನಾಯಿತ್ ಬಾ"ಂದ್ ಆಶೀರ್ವಾದ ಮಾಡ್‌ಚಿ.

ಅಲ್ಲಿಂಜ ಪೋನಂವೊ ಊರ್‌ರ ಸ್ಕೂಲ್‌ರ ಗೋಡೆರಲ್ಲಿ ಬಂದಿತ್ ನಿಂದತ್. ಒಳ್‌ಲ್ ಗುರು ಎಣ್ಣಾನೆಲ್ಲ ಪೊರ್ಮೆ ನಿಂದಂಡೇ ಕೇಟಂಡ್ ಮನೆಲ್ ಬಂದಿತ್ ಅವ್ವಂಡ ಮಿಂಞಲ್ ಎಣ್ಣುವಯಿಂಜತ್. ಆಚೀಂಗಿ ಇದ್ ದುಂಬ ದಿನ

ನಡೆದಂತೆ. ಒರ್ ದಿವಸ ಒರ್ ಕಣ್ಣು, ಗೋಡೆಕ್ ತಾಂಗಿ ನಿಂದ ರಾಮಕೃಷ್ಣನ ಕಂಡಿತ್ ಕಳ್ಳ ಕಳ್ಳಂದ್ ಕೂತ್‌ಟ್ಟತ್. ಗುರು ಪಿಂಞ ಬೋರೆ ಮಕ್ಕ ಎಲ್ಲಾ ಪೊರೊಮೆ ಬಾತ್. ಅವನ ಜೋರ್ ಮಾಡಿತ್ ಎನ್ನೊಂಗ್ ಇಲ್ಲಿ ನಿಂದಿಯೆಂದ್ ಗುರು ಕೇಪಕ, ರಾಮಕೃಷ್ಣ ತಾಂಡ ಕಥೆನೆಲ್ಲ ಎಣ್ಣೆಚಿ. ಕಣ್ಣೊಂಗ್ ವಿದ್ಯ ಪಡಿಪಕುಳ್ಳ ಆಸಕ್ತಿನ ಕಂಡಿತ್ ಗುರು ಬೆರಗಾಚಿ. ಆಚೆಂಗಿಯೂ ತಾಂಡ ಅಸಹಾಯಕತೆಕ್ ಬೇಜಾರಪಟ್ಟಂಡ್ - "ಜಾತಿ, ಮತತರ ಚೆರಿಯ ಕಳಿರ ಮನುಷ್ಯಂಗಡ ಮದ್ಯ ಬದ್‌ಕುವನ್ನತ ನಾನೂ, ನೀಡ ಮಿಂಞಾಲ್ ಚೆರಿಯ ಮನುಷ್ಯನಾಯಿಟ ಮೋನೆ. ಅಯಿಂಗಳೆಲ್ಲ ಎದ್‌ಪಾಟ್ಪಂಡ್ ನೀಕ್ ವಿದ್ಯ ದಾನ ಮಾಡ್‌ಚೆಂಗಿ ನನ್ನ ಜಾತಿಂಜ ಪೊರಂಬಡಿ ಬೆಪ್ಪ. ಮಿಂಞಾಕ್ ಒರ್ ದಿನ ನೀನ್, ಬಲ್ಮೋರ್ ವಿದ್ವಾಂಸನಾಂಡು ಎಣ್ಣುವ ಆಶೀರ್ವಾದ ಮಾತ್ರ ನಾಕ್ ತಪ್ಪಕ್ ಕಯ್ಯುವೊ..." ಎಣ್ಣೆತ್ ಗುರು ಅವಂಡ ಮಂಡೆರ ಮೇಲೆ ಕೈ ಬೆಚ್ಚಿತ್ ಆಶೀರ್ವಾದ ಮಾಡ್‌ಚಿ.

ಗುರುನ ತೇಡಿ ತೇಡಿ, ದಿಕ್‌ದಸೆ ಇಲ್ಲತೆ ಅಲ್‌ಂದಿತ್ ಕಾಡಾಕ್ ಬಾತ್. ಅಲ್ಲಿ ಒರ್ ಪಳೆಯ ಕಾಳಿದೇವಿರ ದೇವಸ್ಥಾನ ಇಂಜತ್. ಅಲ್ಲಿ ಅಳತಂಡ್ ರಾಮಕೃಷ್ಣ ಮೊರೊಟಂಡಿಂಜತ್. ಅಕ್ಕ ಅಲ್ಲಿಕೋರ್ ಸ್ವಾಮೀಜಿ ಬಂದಿತ್ ಎನ್ನೊಂಗ್ ಮೊರೊಟಂಡುಳ್ಳಿಯಾಂದ್ ಕೇಪಕ, ತಾಂಡ ಕತೆನೆಲ್ಲ ಎಣ್ಣೆಚಿ. ಸ್ವಾಮೀಜಿ ಅವಂಗ್ ಕಾಳಿಕಾದೇವಿರ ಮಂತ್ರ ಉಪದೇಶ ಮಾಡಿತ್ ಅದ್‌ನ ಪನ್ನೊಂದ್ ಕೋಟಿ ಕುರಿ ಭಕ್ತಿಪೂರ್ವಕವಾಯಿತ್ ಎಣ್ಣಂಡೊಂದ್ ಎಣ್ಣೆತ್ ಪೋಚಿ. ಆ ಕಾಳಿದೇವಿರ ಭಯಂಕರ ರೂಪ ನೋಟಿತ್ ಬೊತ್ತತೇಂದೂ ಎಣ್ಣೆಚಿ. ಅಲ್ಲಿಂಜ ರಾಮಕೃಷ್ಣ ಅಲ್ಲಿಯೇ ಪೊಳೆಲ್ ಕುಳ್‌ಚಿತ್ ಬಂದಿತ್ ಕಾಳಿದೇವಿಕ್ ಪೂ ಬೆಚ್ಚಿತ್, ಅಲ್ಲಿಯೇ ಕಣ್ಣೊ ಮುಚ್ಚಿತ್ ಅಳತಂಡ್ ಜಪ ಮಾಡುವಕ್ ಶುರು ಮಾಡ್‌ಚಿ. ಪನ್ನೊಂದ್ ದಿನಕೆತ್ತನೆ ಎಂತ ಪುಳು ಕಡ್‌ಚಿಕಲೂ, ಪಕ್ಕಿ ಕೊತ್ತನಕಲೂ, ಪಾಂಬು ಪೊಂದಕಲೂ ಗೊತ್ತಾಕತನ್ನನೆ, ಮಂತ್ರ ಎಣ್ಣೆಯಂಡಿಂಜತ್ ರಾಮಕೃಷ್ಣ. ಪನ್ನೊಂದ್ ಕೋಟಿ ಮಂತ್ರತರ ಮೇಲೆ ಪನ್ನೊಂದ್ ಮಂತ್ರ, ಎಣ್ಣೆತಾಪದು, ಕಾಳಿಕಾಮಾತೆ ಆಯಿರ ಮೂಡ್‌ರ ಭೀಕರ ರೂಪತ್ ಪ್ರತ್ಯಕ್ಷ ಆಚಿ. ದೇವಿಕ್ ಸಾಷ್ಟಾಂಗ ನಮಸ್ಕಾರ ಮಾಡಿತ್ ಎದ್ದಿತ್ ಪುನಃ ಪುನಃ ದೇವಿನ ನೋಟುವಕ್ ಕೂಡ್‌ಚಿ ರಾಮಕೃಷ್ಣ. ತಾಂಡ ರೂಪತನ ನೋಟಿತ್ ಕಣ್ಣು ಎಚ್ಚಿಕ್ ಬೊತ್ತುವೊಂದ್ ಗೇನ ಮಾಡಿಯಂ ಡಿಪ್ಪಕ, ಇನ್ನನೆ ನೋಟುವಲ್ಲಾಂದ್ ದೇವಿಕ್ ಆಶ್ಚರ್ಯ ಆಚಿ. ಅಕ್ಕ ಅವೊ ತೆಳಿಪಕ್ ಕೂಡ್‌ಚಿ. "ರಾಮಕೃಷ್ಣಾ..., ಎಂತಾ ಶೂರ ವೀರಂಗಳೂ, ರಾಕ್ಷಸಂಗಳೂ ನಾಡ ರೂಪ ನೋಟಿತ್ ಬೊತ್ತುವಕ ನೀನ್ ತೆಳಿಪಿಯಲ್ಲ?" ಎನ್ನೊಂಗ್‌ಂದ್ ಕೇಟತ್.

“ತಾಯೀ..., ನೀಡ ಆಯಿರ ಮೂಡೂ, ದಂಡೇ ಕೈ ಉಳ್ಳಾನ ನೋಟಿತ್ ಎನ್ನತೋ ಗೇನ ಮಾಡಿತ್ ತೆಳಿ ಬಾತ್. ದಯಬೆಚ್ಚಿತ್ ನನ್ನ ಮಾಘ್ ಮಾಡಿರ್”ಂದ್ ಎಣ್ಣೆಚಿ.

“ರಾಮಕೃಷ್ಣ ಅದೆಂತಂದ್ ಎಣ್ಣೆ” ಎಣ್ಣೆಚಿ ದೇವಿ. “ನಾಕ್ ನೇಡಿ ಆಚೇಂಗಿ ಉಳ್ಳ ಒರ್ ಮೂಕ್ ನ ತೋಟುವಕ್ ದಂಡ್ ಕೈ ಪೋರ, ನೀಡ ಆಯಿರ ಮೂಕ್ ನೇಡಿಯಾಚೇಂಗಿ ತೋಟುವಕ್ ದಂಡ್ ಕೈ ಮದಿಯಾಕುವಾ”ಂದ್ ಗೇನ ಮಾಡಿತ್ ತೆಳಿ ಬಾತ್‌ಂದ್ ಎಣ್ಣುವಕ, ದೇವಿಕೂ ತೆಳಿ ಬಂದ್‌ರ್‌ತ್.

ದೇವಿ ತೆಳುಚಂಡ್, “ನೀನ್ ನನ್ನೇ ತೆಳುಪ್‌ಚಿಟ್ಟಿಯು, ಇಂಞ ಮಿಂಞಕ್ ಸಕಲ ವಿದ್ಯಾಪಾರಂಗತನಾಯಿತ್, ಎಲ್ಲಾರ್‌ನೋ ತೆಳುಪ್‌ಚಿಡುವ ನೀನ್ “ವಿಕಟಕವಿ” ರಾಮಕೃಷ್ಣಾಂದ್ ಪೆದ ಎಡ್‌ಪಿಯು. ನೀಡ ತಮಾಸಿಕ್ ರಾಜಮನ್ನಣೆ ಕಟ್ಟುವ. ದಕ್ಷಿಣತ್ ವಿಜಯನಗರ ಸಾಮ್ರಾಜ್ಯ ಉಂಡ್. ಅಲ್ಲಿಯತರ್ ರಾಜ ಕೃಷ್ಣದೇವರಾಯಂಡ ಪಕ್ಕ ಪೋ”ಂದ್ ಆಶೀರ್ವಾದ ಮಾಡಿತ್ ಅಯೆಚತ್.

ಅಲ್ಲಿಂಜ ಅವ್ವನ ಕಾಕಿಯಂಡ್ ವಿಜಯನಗರಕ್ ಪೋಚಿ ರಾಮಕೃಷ್ಣ. ಆಚೇಂಗಿ ರಾಜನ ಕಾಂಬದ್ ಅಚ್ಚಕ್ ಸುಲಭತರ್ ಕೆಲಸ ಆಯಿತಿಂಜಿಲೆ. ಅವಕಾಶ ಕಾಯಿತ್ ಕಾತಂಡಿಂಜತ್.

ಒಮ್ಮೆ ಅಲ್ಲಿಕ್ ತಂಜಾವೂರ್ ಭಾಗವತ ಮೇಳ ಬಾತ್. ಅಲ್ಲಿ ಕೃಷ್ಣಲೀಲೆ ನಾಟಕ ಮಾಡುವಾಂದ್ ಗೊತ್ತಾಯಿತ್ ಮನೆಕ್ ಓಡಿಪೋಯಿತ್ ಅತ್ತಕಾರಡ ವೇಷ ಇಟ್ಟಂಡ್ ಅರಮನೆಕ್ ಬಾತ್. ಅಲ್ಲಿಂಜ ಕಾವಲುಗಾರ ಅಂವೊನ ಒಳ್ಳಕ್ ಬುಡತೆ ದಾರ್ ನೀನ್‌ಂದ್ ಕೇಟತ್. ಅಕ್ಕ ರಾಮಕೃಷ್ಣ ಇಕ್ಕ ಒಳ್ಳಕ್ ಪೋಚಿಲ್ಲ ಭಾಗವತ ಮೇಳಕಾರ ಅಯಿಂಡ ಕಡೆಕಾರ, ಬಂದದ್ ತಡ ಆಯಿಪೋಚಿ ಎಣ್ಣೆಚಿ.

ನೀನ್ ದಂಡ ತಾತೇಂಗಿ ಮಾತ್ರ ನಿನ್ನ ಒಳ್ಳಕ್ ಬುಡುವೀಂದೆಣ್ಣೆಚಿ. ಕೊಡ್‌ಪಕ್ ಅಂವಂಡ ಕೈಲ್ ಒಂದೂ ಇಂಜಿಲೆ. ಬುದ್ಧಿವಂತನಾನ ರಾಮಕೃಷ್ಣ ಎಣ್ಣೆಚಿ - ನಾನೋರ್ ತಮಾಸಿಕಾರ, ಒಳ್ಳಲ್ ರಾಜಂಡ ಮಿಂಞಲ್ ತಮಾಸಿ ಮಾಡಿತ್ ರಾಜನ ತೆಳುಪ್‌ಚಿಟ್ಟಕ ನಾಕ್ ಎಂತೇಂಗಿ ಇನಾಂ ತಂದಕ ಅದಲ್ ಪಾದಿ ನೀಕ್ ತಪ್ಪಿ ಎಣ್ಣೆಚಿ. ಆಕೂಂದ್ ಒತ್ತಂಡ್ ಅಂವೊ ಒಳ್ಳಕ್ ಬುಟ್ಟತ್. ಪುನಃ ದರ್ಬಾರ್ ಒಳ್ಳಕ್ ಪೋಪಕಲೂ ಅನ್ನನೇ ಇಂಞೋರ್ ಕಾವಲುಗಾರ ತಡ್‌ತತ್. ಅಂವಂಗೂ ಅನ್ನನೇ ಎಣ್ಣೆತ್, ಇನಾಂ ಪಾದಿ ತಪ್ಪಿಂಂದ್ ಆಸೆ ಕಾಟತ್ ಒಳ್ಳಕ್ ಬಂದಿತ್ ನೋಟುವಕ ನಾಟಕ ಸುಮಾರೆಲ್ಲ ತೇಂದಿತಿಂಜತ್. ಎಲ್ಲಾರು ಕೃಷ್ಣ ಪಾತ್ರಧಾರಿ ಸುತ್ತ ಪಾಡಿಯಂಡ್ ಆಡಿಯಂಡಿಂಜತ್. ಅದೇ ಸಮಯತ್

ರಾಮಕೃಷ್ಣ ತಾಂಡ ಕೈಲಿಂಜ ಕೋಲ್‌ಲ್, ಕೃಷ್ಣ ಪಾತ್ರಧಾರಿರ ಬೆನ್ನೊಕೊಂದ್ ಬೆಚ್ಚತ್. ಅಂವೊ ಅಯ್ಯೊ, ಅಮ್ಮಾ, ಅಪ್ಪ ಎಣ್ಣುವಕ, ನೀನೆನ್ನತ ಪರಾಕ್ರಮಿ, ಕಂಸನ ಕೊಂದಿಯಲೊ, ಈ ಚೆರಿಯ ಕೋಲ್‌ರ ಪೊಯ್ತ ತಡ್‌ಪ ಕಯ್ಯತಂವೊಂದ್ ರಾಗತ್ ಪಾಡ್‌ಚಿ.

ಅಚ್ಚಕ್ ನೇರ ತಮಾಸಿ ಇಲ್ಲತೆ ವರಿಯಂಡಿಂಜ ಸಭೆ ಕೂತ್‌ಟ್ಟೊಂಡ್ ತೆಳೊಚೆತ್. ರಾಜಂಡ ತೆಳಿ ಕಂಡ ರಾಮಕೃಷ್ಣ ಇಂಞೊಮ್ಮ ಕೃಷ್ಣ ವೇಷಕಾರಂಗ್ ಪೊಯ್ಯುವಕ ಕೋಲ್ ಎಡ್‌ಪಕ ಅಂವೊ ಕಾಲ್‌ಕ್ ಬುದ್ಧತ್. ಅಂವನ ಒಪ್ಪಿತ್ ವೀರ, ಶೂರಂದ್ ಹೊಗಳಿಯವತೆ ಇಂಞೊಬ್ಬಂಡ ಕೈಲ್ ಹೊಗಳೊಚಿಟ್ಟವತೆ ಕಾಳಿದೇವಿರ ಭಜನೆ ಮಾಡ್ ಎಣ್ಣುವಕ ಅಂವೊ ಬೊತ್ತಿತ್ ಅಲ್ಲಿಯೇ ಕಾಳಿದೇವಿರ ಪಾಟ್ ಪಾಡುವಕ ಶುರು ಮಾಡಿರ್‌ತ್. ಪುನಃ ಇಡೀ ಸಭೆ ತೆಳೊಚೆತ್. ಅಖೀರಿಲ್ ರಾಜ ಇಂದ್ ನಂಗಳೆಲ್ಲ ತೆಳೊಪ್‌ಚಿಟ್ಟ ಅತ್ತಕಾರಂಡ ವೇಷ ಇಟ್ಟಂವೊಂಗ್ ವಿಶೇಷ ಇನಾಂ ಎಣ್ಣುವಕ, ಭಾಗವತ ಮೇಳಕಾರ ಅಯ್ಯೊ! ಇಂವೊ ನಂಗಡ ಕೂಟ್‌ಕಾರ ಅಲ್ಲ ಎಣ್ಣುವದು ರಾಜಂಗ್ ರಾಮಕೃಷ್ಣ ಎಲ್ಲಾ ಎಣ್ಣಿರ್‌ತ್. ಚೆಡಿ ಬಂದ ರಾಜ ಅಂವೊಂಗ್ ನೂರ್ ಛಡಿ ಪೊಯ್ತರ ಇನಾಂ ಕೊಡ್‌ಪಕ್ ಎಣ್ಣೊ ಚಿ. ರಾಮಕೃಷ್ಣ ಪೊಯ್ಯುವಾಂಗ್ ಮಿಂಞ ಆ ದಂಡ್ ಕಾವಲುಕಾರಂಗಳ ಕಾಕುವಕೆಣ್ಣೊ ಚಿ. ಜನ ಎಲ್ಲ ಇದನ್ನೊಂಗ್ಪಾಂದ್ ಗೇನ ಮಾಡಿಯಂಡಿಪ್ಪಕ, ಕಾವಲುಕಾರಂಗಳ ಮಿಂಞತ್ ರಾಜಂಗ್ ಒಳೊಕ್ ಬುಡುವಕ್ ಮಿಂಞ ಆ ದಂಡ್ ಕಾವಲುಕಾರಂಗೆ ದಂಡ ಕೇಟಾಂಗ್, ರಾಜ ತಪ್ಪನ್ನತ ಇನಾಂಲ್ ಪಾದಿ ತರಂಡೊಂದ್ ಎಣ್ಣೊನ ವಿಷಯ ಎಣ್ಣಿತ್ ಒರ್ ಕಾವಲುಕಾರಂಗೆ ಐಂಬದೊ, ಇಂಞೊಬ್ಬಂಗ್ ಐಂಬದ್ ಪೊಯ್ಯೊ ಕೊಡ್‌ಕಂಡೊಂದ್ ರಾಜನ ಕೇಟಂಡತ್. ಪುನಃ ಅಲ್ಲಿಂಜ ಜನ ಎಲ್ಲಾ ತೆಳೊಪಕ್ ಕೊಡ್‌ಚಿ. ಕಾವಲುಕಾರಂಗೆ ಬೊತ್ತಿ ಪೋಚಿ. ಅಕ್ಕ ರಾಜ ರಾಮಕೃಷ್ಣನ ಇನ್ನೆಲ್ಲ ಮಾಡುವಕ್ ಕಾರಣ ಎನ್ನೊಂದ್ ಕೇಟತ್. ತೆನಾಲಿ ರಾಮಕೃಷ್ಣ ಅಂವಂಡ ಬದ್‌ಕರ ಕತೆನ ಎಣ್ಣಿ ಕೊಡ್‌ತತ್. ಅಕ್ಕ ರಾಜ, ನಾಡ ಆಸ್ಥಾನತ್ ಏಳೊ ಜನ ವಿಶೇಷವಟ್ಟ ಪಂಡಿತಂಗ ಉಂಡ್. ಅದ್‌ಲ್ ಎಟ್ಟನೆಯಂವೊನಾಯಿತ್ ನೀನ್ ಇರ್, ಎಣ್ಣೊ ಚಿ. ತಾಂಡ ಆಸ್ಥಾನತೇ ಇಂಜಂಡ್ ಲಂಚೆ ಎಡ್‌ಪ ಭ್ರಷ್ಟ ಕಾವಲುಗಾರಂಗೆ ಪೊಯ್ತ ಕೊಡ್‌ತಿತ್ ಕೆಲಸತ್‌ಂಜ ವಜಾ ಮಾಡ್‌ಚಿ. ಇನ್ನೆ ರಾಮಕೃಷ್ಣ ಕೃಷ್ಣದೇವರಾಯಂಡ ಆಸ್ಥಾನತ್‌ರ ಅಷ್ಟದಿಗ್ಗಜಂಗಡಾತ್ ಒಬ್ಬೊನಾಯಿತ್ ರಾಜನ ತೆಳೊಪ್‌ಚಿಡುವದ್ ಮಾತ್ರ ಅಲ್ಲತೆ ರಾಜಂಡ ಅದೆಚ್ಚೆಕೋ ಸಮಸ್ಯೆನ ತಮಾಸಿಲೇ ಪರಿಹಾರ ಕಂಡ್‌ಪುಡ್‌ಚಿ ಕೊಡ್‌ಪಯಿಂಜತ್.

ಅಂದೇತ ಕಾಲತ್ ರಾಜ ದಾರೇಂಗಿ ಬಲ್ಯ ಪಣಕಾರ ಚತ್ತತೇಂಗಿ ಅಯಿಂಗ ಕೂಟಿಬೆಚ್ಚ ಪಣ, ಪೊನ್ನ ಎಲ್ಲಾ ತಾಂಡ ಬೊಕ್ಕಸಕ್ ಎಡ್ತವಯಿಂಜತ್. ತನಾಲಿ ರಾಮಕೃಷ್ಣಂಡ ಪಕ್ಕ ರಾಜಂಡ ಕೈಲ್ ಇನಾಂ ಕೊಟ್ಟನ ಪೊನ್ನ, ಪಣವೇ ಸುಮಾರ್ ಇಂಜತ್. ಅದ್‌ಂಗ್ ಅವೊ ರಾಜನ ಪರೀಕ್ಷೆ ಮಾಡುವಕಾಯಿತ್ ರಾಮಕೃಷ್ಣ ಚತ್ತಪೋಚೀಂದ್ ಸುದ್ದಿ ಕೊಡ್ತತ್. ಅದ್ ರಾಜಂಗ್ ತಡವಾಯಿತ್ ಕೊಟ್ಟವನ್ನೆಕೆ ಮಾಡ್‌ಚಿ. ಬಲ್ಯೋರ್ ಪಣತಾರ ಪೊಟ್ಟಿಲ್ ಚೆರಿ ಚೆರಿಯ ತೂತ್ ಮಾಡಿತ್ ಗಾಳಿ ಬಪ್ಪನೆಕೆ ಮಾಡಿಯಂಡ್ ಅದ್‌ಂಡೊಳ್‌ಲ್ ರಾಮಕೃಷ್ಣ ಅಳೊತಂಡತ್. ದುಂಬಾ ಪಣ ಇಕ್ಕೂಂದ್ ಗೇನ ಮಾಡಿತ್ ರಾಜ, ಆ ಪೊಟ್ಟಿನ ಆಸ್ಥಾನಕ್ ಕೊಂಡಬಪ್ಪಕ್ ಎಣ್ಣೆಚಿ. ದರ್ಬಾರ್‌ಲ್ ಪೊಟ್ಟಿ ತೊರ್‌ಪಕ ಅದ್‌ಂಡೊಳ್‌ಲಿಂಜ ರಾಮಕೃಷ್ಣ ಎದ್ದ್ ನಿಂದತ್. ನಾನ್ ಚತ್ತ ಪಿಂಇ ನಾಡ ಸಂಸಾರಕಾರಕ್ ಎಂತ ಮಾಡುವಿರಾಂದ್ ಪರೀಕ್ಷೆ ಮಾಡುವಕಾಯಿತ್ ಇನ್ನನೆ ಮಾಡಿಯೆಂದೆಣ್ಣೆ ಚಿ.

ಇಂಇಸೊಮ್ಮ ರಾಮಕೃಷ್ಣಂಗ್ ಪಾಂಬು ಕಡ್‌ಚಿತ್ ಚಾವನ್ನತ ಪರಿಸ್ಥಿತಿಲ್ ರಾಜಂಗ್ ಎಣ್ಣೆತಯೆಚಿತ್. ಆಚೇಂಗಿ ಅವೊ ತಮಾಸಿ ಮಾಡಿಯಂಡುಳ್ಳೆಂದ್ ರಾಜ ಬಂದ್‌ಲೆ. ರಾಮಕೃಷ್ಣ ಚತ್ತೇ ಪೋಚಿ. ಬಯ್ಯಂಜಿ ಬಂದ ರಾಜ ನೀನ್ ತಮಾಸಿ ಮಾಡಿಯಂಡುಳ್ಳೊಂದ್ ಗೇನ ಮಾಡಿತ್ ನಾನ್ ಬಂದ್‌ಲೆ, ಇಲ್ಲೇಂಗಿ ಬಪ್ಪಕಿಂಜ. ಇಚ್ಚಕ್ ದಿನ ನನ್ನ ತೆಳುಪ್‌ಚಿಟ್ಟಿತ್ ಇಂದ್ ನನ್ನ ಮೊರಡುವಕ್ ಮಾಡಿಯಾಂದ್ ಎಣ್ಣೆಯಂಡ್ ದುಂಬ ದುಃಖಿಪಟ್ಟಿತ್.

ಎಂತದೇ ಪರಿಸ್ಥಿತಿ ಬಂದಕಲೂ ಬೊತ್ತತೆ, ಧೈರ್ಯತೆಲಿಂಜಿತ್, ದುಃಖಿತ್‌ರ ಪರಿಸ್ಥಿತಿಲೂ ತಮಾಸಿನ ಕಾಂಬನ್ನತ ಗುಣ ಮನ್‌ಷ್ಯಂಡಲ್ಲಿ ಅಪರೂಪ. ಪತ್ತ ಬಯತ್‌ರ ಕಣ್ಣ ದೇವಿರ ಭಯಂಕರ ರೂಪ ನೋಟಿತೂ ಬೊತ್ತತೆ, ತೆಳುಚ ಮೊಳಿಲ್, ಅವೊ ಲೋಕತ್ ಎಚ್ಚಕೋ ಜನಳ ದುಃಖ ಮರ್‌ಂದಿತ್ ತೆಳುಪನೆಕೆ ಮಾಡುವ ವರ ಪಡ್‌ಂದಂಡತ್. ಅಂತ ಗುಣತನ ಚೆನ್ನಂಗಾಚೇಂಗಿಯೂ ಬೊಳ್‌ತಿಯಂಡಕ ಬದ್‌ಕನ ಸುಲಭತ್ ನೀಸಿಯಂಡ್ ಪೋಕಲು. □



## ಸಿಷ್ಯರ್ ನಿವೇದಿತಾ

- ಪುಟ್ಟಾನ ದಿನ - 1867ನೇ ಇಸವಿ, ಅಕ್ಟೋಬರ್ 28  
ಪುಟ್ಟಾನ ಜಾಗ - ಐರೋಡ್ ದೇಶ  
ಅಪ್ಪ - ಸ್ಯಾಮ್ಯುಲ್ ನೋಬ್ಲ್  
ಅಮ್ಮ - ಮೇರಿ ಹ್ಯಾಮಿಲ್ಟನ್  
ಕಣ್ಮರೆ - 1906 ಅಕ್ಟೋಬರ್ 13

ಐರೋಡ್ ದೇಶತ್ "ಮಾರ್ಗರೇಟ್ ಎಲಿಜಬೆತ್ ನೋಬ್ಲ್" ಎಣ್ಣುವ ಪೆದತ್ ಪುಟ್ಟಾನ ಮೂಡಿಕುಂಞಿ, ಸ್ಯಾಮಿ ವಿವೇಕಾನಂದಂಡ ವ್ಯಕ್ತಿತ್ವಕ್ ಬೆರಗಾಯಿತ್, ಭಾರತ ದೇಶತ್‌ರ ಮೇಲೆ ಅಭಿಮಾನ ಬೊಳ್‌ತಿಯಂಡ್, ಸನ್ಯಾಸ ದೀಕ್ಷೆ ಪಡೊಂದಿತ್ 'ಸಹೋದರಿ ನಿವೇದಿತ' ಎಣ್ಣುವ ಪೆದತ್ ನಂಗಡ ದೇಶತ್‌ರ ಉದ್ಧಾರಕ್ ಶ್ರಮಪಟ್ಟ ಬಲ್ಯ ಸಮಾಜಸೇವಕಿ.

ಐರೋಡ್ ದೇಶ ಕೂಡ ಭಾರತತ್‌ರ ಮಾದಾರಿಯೇ ಬ್ರಿಟಿಷ್‌ಕಾರಡ ಪುಡ್‌ತತ್ ಕೆಣ್‌ಂಜಿತ್, ಸ್ವಾತಂತ್ರ್ಯಕಾಯಿತ್ ಪೋರಾಟ ಮಾಡಿಯಂಡಿಂಜ ಕಾಲತ್ ಮಾರ್ಗರೇಟ್‌ರ ಅಜ್ಜ ಚರ್ಚ್‌ರ ಪಾದ್ರಿಯಾಯಿತಿಂಜತ್. ಅಂವೊ ಹಳ್ಳಿ ಹಳ್ಳಿಲು ಸ್ವಾತಂತ್ರ್ಯ ಭಾಷಣ ಮಾಡುವಕ್ ಪೋಪಕ ಚುಪ್ಪಿ ಮಾರ್ಗರೇಟ್ ತಾತಂಡ ಕೂಡ ಪೋಪಯಿಂಜತ್. ಅಪ್ಪಂಡ ಕೂಡ ಕೊಳಗೆರಿ ಶುದ್ಧ ಮಾಡುವಕ್ ಅಪ್ಪಂಗಿಂಜ ಮಿಂಞಲ್ ಪೋಪಯಿಂಜತ್.



ಕಾಯಿಲಕಾರಡ ಸೇವೆ ಮಾಡುವೊ, ವಯಸ್ಸಂಗಡ ಸೇವೆ ಮಾಡುವೊ, ಕೊಳಗೇರಿ ಜನಕ್ ಶುದ್ಧತ್‌ಲಿಪ್ಪಕ್ ಎಣ್ಣೆ ಕೊಡ್‌ಪೊ ಇನ್ನ ತಾನೆಲ್ಲ ನೋಟಿತೊ, ಮಾಡಿತೊ ಆ ಚುಪ್ಪಿ ಮೂಡಿರ ಚೋರಲೊ, ಮನ್‌ಸ್ಸಲೊ ಸಮಾಜಸೇವೆ ಮೇಂಗಿತಿಂಜತ್.

ಭಾರತಕ್ ಬಂದಿತ್ ಪೋನ ಒರ್ ಪಾದ್ರಿ ಒಮ್ಮ ಮಾರ್ಗರೇಟ್‌ರ ಮನೆಕ್ ಪೋನಲ್ಲಿ ಎಣ್ಣೆ ಚಿ - "ಭಾರತಕ್ ನಿಸ್ವಾರ್ಥ ಸೇವೆ ಮಾಡುವಯಿಂಗಡ ಅವಶ್ಯಕತೆ ಉಂಡ್ ಕುಂಞಿ. ಒಮ್ಮ ಆ ದೇಶ ನನ್ನ ಕಾಕ್‌ಚಿ, ನಾಡ ಕೈಲಾಪನ್ನತ ಸೇವೆ ಮಾಡಿತ್ ಬಂದಿಯೆ; ಇಂಞೊಮ್ಮ ಅದ್ ನಿನ್ನ ಕಾಕು, ಪೋಪಕ್ ತಯಾರಾಯಿತ್ ಇರ್". ಮಾರ್ಗರೇಟ್‌ರ ಅಪ್ಪ ಸ್ಯಾಮ್ಯಲ್ ನುಪ್ಪತ್ತನಾಲನೇ ಬಯತ್‌ಲೇ ಚಿತ್‌ಪೋಚಿ. ಚಾವಾಂಗ್ ಮಿಂಞ ಪೋಣ್ಣ್ ಹ್ಯಾಮಿಲ್ಪನ್‌ನ ಕಾಕಿತ್ ಎಣ್ಣೆ ಚಿ - "ದೇವ ಕಾಕುವಕ ಮಾರ್ಗರೇಟ್‌ನ ಪೋಪಕ್ ಬುಡ್, ಅವ ಬಲ್ಯ ಸಾಧನೆ ಮಾಡುವ."

ಬುದ್ಧಿಯೊ ಚಾಯಿಯೊ ಒರೇ ವ್ಯಕ್ತಿಲ್ ಇಂಜನ್ನತ ಮೂಡಿ ಮಾರ್ಗರೇಟ್. ಮಕ್ಕಕ್ ಪಾಠ ಎಣ್ಣುವ ಉಪಾದ್ರಿ ಆಂಡೂಂದ್ ಸೊಪನ ಕಂಡಂಡಿಂಜತ್. ಪದಿನೇಳ್ ಬಯತ್‌ಕ್ ಓದಿತಾಯಿತ್ ಕೆಸ್ವಿಕ್ ಎಣ್ಣುವ ಊರ್‌ಲ್ ಉಪಾದ್ರಿ ಯಾಯಿತ್ ಕೆಲಸಕ್ ಕೂಡ್‌ಚಿ. ಅಲ್ಲಿಂಜ ತಾಂಡದೇ ಸ್ವಂತ ಸ್ಕೂಲ್ ತೊರ್‌ಂದತ್.

1895ನೇ ಇಸವಿಲ್ ಮಾರ್ಗರೇಟ್ ಸ್ವಾಮಿ ವಿವೇಕಾನಂದನ ಕಂಡತ್. ಸ್ವಾಮೀಜಿರ ತಕ್ಕ, ಆಚಾರ - ವಿಚಾರ ಕಂಡಿತ್ ಮಾರ್ಗರೇಟ್ ಇಯಂಗಳೇ ನಾಡ ಗುರೂಂದ್ ತೀರ್ಮಾನ ಮಾಡ್‌ಚಿ. ಒರ್ ದಿನ ಭಾಷಣತ್ ಸ್ವಾಮೀಜಿ, ಭಾರತತ್‌ರ ಪೋಣ್ಣ್‌ಳ ವಿದ್ಯೆ ಇಲ್ಲತೆ ಎಂತ ಹೀನ ಸ್ಥಿತಿಲುಂಡ್ ಎಣ್ಣುವಾನ ವಿವರಪಾಯಿತ್ ಎಣ್ಣೆ ಚಿ. ಇಡೀ ಲೋಕತ್‌ನೇ ಎಚ್ಚರ ಮಾಡುವ ಶಕ್ತಿ ನೀಡ ಪಕ್ಕ ಉಂಡ್ ನೀನ್ ಬುದ್ಧಂಡ್ ವರತೆ, ವರಾನಯಿಂಗಳೊ ಒಪ್ಪುವ ಕೆಲಸ ಮಾಡಂಡೂಂದ್ ಎಣ್ಣೆ ಚಿ. ಇದ್‌ಲಿಂಜ ಮಾರ್ಗರೇಟ್ ಭಾರತಕ್ ಬಪ್ಪಕ್ ತೀರ್ಮಾನ ಮಾಡ್‌ಚಿ. 1898 ನೇ ಇಸವಿಲ್ ಮಾರ್ಗರೇಟ್‌ಕ್ ಸ್ವಾಮಿ ವಿವೇಕಾನಂದ ಸನ್ಯಾಸ ದೀಕ್ ಕೊಡ್‌ತಿತ್ ನಿವೇದಿತಾಂದ್ ಪೆದ ಇಟ್ಟತ್. ಅಲ್ಲಿಂಜ ನಿವೇದಿತಾ ಚಾವಲ್ಲಿ ಕೆತ್ತನೆಯೊ ಭಾರತತ್‌ಲೇ ಸೇವೆ ಮಾಡಿಯಂಡಿಂಜತ್.


ಮೂಡಿಮಕ್ಕಳ ಓದುವಕ್ ಅಯೆಕತನ್ನತ ಅಂದೇತ್‌ರ ಕಾಲತ್, ಸ್ಕೂಲ್ ತೊರ್‌ಂದಿತ್ ಮೂಡಿಮಕ್ಕಳ ಓದುವನೆಕೆ ಮಾಡುವದ್ ಸುಲಭತ್‌ರ ಕೆಲಸ ಆಯಿ ತಿಂಜಿಲೆ. ಕಲ್ಕತ್ತಾತ್ ಪ್ಲೇಗ್ ಬಂದಿತಿಪ್ಪಕ, ಪ್ರತಿಯೋರ್ ಮನೆಕ್ ಪೋಯಿತ್, ಕಾಯಿಲಕಾರಡ ಸೇವೆ ಮಾಡ್‌ಚಿ. ಕಲ್ಕತ್ತಾತ್‌ರ ಗಲ್ಲಿ ಗಲ್ಲಿನೊ ತಾನೇ ಒಡ್‌ಕಿತ್

ಶುದ್ಧ ಮಾಡುವಕ್ ಇಳಂಜತ್. ಇದ್‌ನ ಕಂಡಿತ್ ಮಾನಕೇಡಾನ ನಂಗಡ ದೇಶತ್‌ರ ಬಾಲೆಕಾರ, ಬಾಲೆಕರ್ತಿಯ, ಅಯಿಂಗಳೂ ಈ ಶುದ್ಧ ಕಾರ್ಯಕ್ ಇಳಂಜತ್. ಭಾರತತ್ ಮಾಡುವ ನಮ್ಮೆ, ಪೂಜೆ, ಪುರಾಣ, ಪುಣ್ಯಕಥೆ ಇನ್ನತಾಂಡ ವಿಷಯತ್ ತೆಳಿಪನ್ನತ ಜನಡ ಬಾಯಿ ಮುಚ್ಚುವನೆಕೆ 'ದಿ ವೆಬ್ ಆಫ್ ಇಂಡಿಯನ್ ಲೈಫ್' ಎಣ್ಣುವ ಪುಸ್ತಕ ಎಳೆದ್‌ಚಿ. 'ದಿ ಮಾಸ್ಟರ್ ಆಫ್ ಬ ಸಾ ಹಿಮ್', 'ಕಾಳಿ ದಿ ಮದರ್' ಎಣ್ಣುವನ್ನತ ಸುಮಾರ್ ಪುಸ್ತಕ ಎಳೆದ್‌ಚಿ. ಜನಕಾಯಿತ್, ಸಮಾಜ ಕಾಯಿತ್, ದೇಶಕಾಯಿತ್ ಪುರ್‌ಸೊತ್ತಿಲ್ಲತೆ ನೈಚಿತ್ ನಿವೇದಿತಾ ಕಾಯಿಲ ಬುದ್ಧತ್.

1906 ಲ್ ಬಂಗಾಳ ಕ್ಲಾಮತ್ ಜನ ನೊಂದತ್. ಹಳ್ಳಿ ಹಳ್ಳಿಕೂ ನಡೊಂದಿತ್ ಬಾಲೆಕಾರಳ ಕೂಟಿತ್ ಜನಡ ಸೇವೆ ಮಾಡುವನೆಕೆ ಮಾಡ್‌ಚಿ. 1906 ಅಕ್ಟೋಬರ್ 13 ಲ್ ಈ ದಿವ್ಯಾತ್ಮ ಕಣ್ಮರ ಆಪಕ ಆನ ನಷ್ಟ, ಐರೆಂಡ್‌ಕಲ್ಲ... ಭಾರತಕ್! ಅಯಿಂಗಡ ಸಮಾಧಿ ಹಿಮಾಲಯತ್ ಉಂಡ್. ಆ ಸಮಾಧಿರ ಮೇಲೆ "ತಾಂಡ ಸರ್ವಸ್ವತ್‌ನೋ ತ್ಯಾಗ ಮಾಡ್‌ನ ನಿವೇದಿತಾ ಇಲ್ಲಿ ವಿಶ್ರಾಂತಿ ಎಡ್‌ತಂಡುಂಡ್" ಎಣ್ಣಿತ್ ಎಳೆದಿತ್. ಇಂದ್ ನಿವೇದಿತಾ ಇಲ್ಲತಾಚೀಂಗಿಯೂ ಅಯಿಂಗ ತೊರ್‌ಂದ ಸ್ಕೂಲ್‌ಲ್ ಆಯಿರಗಟ್ಟಲೆ ಮೂಡಿಮಕ್ಕ ಓದಿಯಂಡುಂಡ್.

ನಂಗ ಮಾಡ್‌ನ ಕೆಲಸ ನಂಗ ಕಣ್ಮರೆಯಾನ ಪಿಂಞವೂ ಕಾಂಬನೆಕೆ ಇರೊಂಡು. ಇಂದಿಕ್ಕ, ನಂಗ ನಂಗಡ ಮನೆಲುಳ್ಳ ಕಾಯಿಲಕಾರಡ ಸೇವೆ ಮಾಡುವಕೇ ಬಯ್ಯಕ್ ನಿಪ್ಪನ್ನತ ಕಾಲ ಬಂದಿತ್. ಪೆರಿಯಯಿಂಗಡ ಸೇವೆ ಮಾಡ್‌ನಚ್ಚಕೂ ಸಹನೆ, ಸಮಾಧಾನ, ನಲ್ಲರಿಕೆ ನಂಗಡ ಮನಸ್ಸುರೊಳ್‌ಲ್ ಬೊಳೆವ. ಇದೇ ಮಿಂಞಕ್ ಸಮಾಜಸೇವೆರ ರೂಪ ಎಡ್‌ಪ. ನಂಗಲೂ ಸಮಾಜಕಾಯಿತ್ ನಲ್ಲದ್ ಮಾಡಂಗ.

□



## ದೀನದಯಾಳ್ ಉಪಾಧ್ಯಾಯ

- ಪುಟ್ಟಾನ ದಿನ - ಸೆಪ್ಟೆಂಬರ್ 25, 1916ನೇ ಇಸವಿ  
 ಪುಟ್ಟಾನ ಜಾಗ - ಚಂದ್ರಭಾನ್, ಮಥುರಾ ಜಿಲ್ಲೆ, ಉತ್ತರ ಪ್ರದೇಶ  
 ಅಪ್ಪ - ಭಗವತಿ ಪ್ರಸಾದ  
 ಅಮ್ಮ - ರಾಮಪ್ಯಾರಿ  
 ಕಣ್ಮರೆ - ಫೆಬ್ರವರಿ 11, 1968ನೇ ಇಸವಿ

ದೀನದಯಾಳ್ ದುಂಬಿ ಚಿರಿಯಂವೊನಾಯಿತಿಪ್ಪಕಲೇ ಅಪ್ಪ ಅಮ್ಮ ದಂಡಾಳೂ ಚಿತ್ತಪೋಚಿ. ದೀನದಯಾಳ್ ಪಿಂಞ ತಮ್ಮಣ ಶಿವದಯಾಳ್ ಅವ್ವಂಡ ತಾಮನೆಲ್ ಅವಯ್ಯ, ತಾತ, ಮಾಂವಂಡ ಕೂಡ ಬೊಳ್ಂದತ್. ದೀನದಯಾಳ್ ಏಳೆಟ್ಟಾ ಬಯತ್ರೆ ಕಣ್ಣನಾಯಿತಿಪ್ಪಕ ತಾತಂಡ ಮನೆಲ್ ಎಲ್ಲಾರು ಬೈಟ್ ಅಳೆತಂಡ್ ತಕ್ಕ ಪರಂದಂಡಿಂಜಲ್ಲಿ, ಒಮ್ಮೆ ಪತ್ತ ಪನ್ನೆರಂಡ್ ಕಳ್ಳಂಗ ಅಯಿಂಡ ಮನೆಕ್ ನುಗ್ಗಿತ್ ದೀನದಯಾಳ್ನ ಬಲೆಚಿ ಅಡಿಕ್ ಬೂಕಿತ್, ಅಂವೊಂಡ ಎದೆರ ಮೇಲೆ ಕಾಲ್ ಬೆಚ್ಚಿತ್; ಮನೆಲುಳ್ಳ ಪಣಕಾಸೂ, ಮಾಲ್-ಮಟವೂ ತರತ ಪೋಚೇಂಗಿ ಕಣ್ಣನ ಕೊಲ್ಲುವಾಂದ್ ಬೊತ್ತಚಿಟ್ಟಿತ್. ಆ ಸಂದರ್ಭತ್ ಚುಪ್ಪಿಕ್ಣಿ ಚೆನ್ನಂಗೂ ಬೊತ್ತತೆ - "ಕಳ್ಳಂಗ ಪಣಕಾರಳ ಲೂಟಿ ಮಾಡಿತ್, ಬಡವಕ್ ಕೊಡ್ತಿತ್ ರಕ್ಷಣೆ ಮಾಡುವಾಂದ್ ಎಣ್ಣುವಾನ ಕೇಟಿಯೆ. ಆಚೇಂಗಿ ಇದೆಚ್ಚಕ್ ಆಶ್ಚರ್ಯ? ಬಡವನಾನ ನನ್ನ ಕೊಲ್ಲುವಿರಲ್ಲಾ"ಂದ್ ಕೇಟಿತ್. ಆ ಕಳ್ಳಂಗಡ ನಾಯಕಂಗ್

ಮನಸ್ಸು ಬೇಜಾರಾಯಿತ್ ಎಲ್ಲಾರ್‌ನೋ ಕೂಟಿಯಂಡ್ ಬಂದನ್ನೇ ವಾಪಾಸ್ ಪೋಯಿರ್‌ತ್.

ದೀನದಯಾಳ್ ಒಯಿಂಬದನೇ ಬಯತ್‌ಲ್ ಸ್ಕೂಲ್‌ಕ್ ಕೂಡ್‌ಚಿ. ಮಾಂವಂಡ ಮನೆಲ್ ಇಯಂಗ ದಂಡ್ ಅಣ್ಣ ತಮ್ಮಣಂಗ ಅಲ್ಲತೆ ಮಾಂವಂಡ ಮೂಂದ್ ನಾಲ್ ಮಕ್ಕ ಇಂಜತ್. ನೈಚಿ ನೈಚಿ ಮಾಂವಂಗ್ ಕ್ಷಯರೋಗ ಪ್ರಡ್‌ಚತ್. ದೀನದಯಾಳ್ ಅಕ್ಕ ಪನ್ನೊಂದ್ ವಯಸ್ಸ್, ಮಾಂವಂಡ ಜೊತೆಲ್ ಆಸ್ಪತ್ರೆಕ್ ಪೋಪಕ್ ದಾರೂ ಒತ್ತಂಡ್‌ಲೆ, ಆ ಕಾಯಿಲ ನಂಗಕೆಲ್ಲ ಬಂದ್‌ರೊಂದ್ ಪೋಡಿ. ದೀನದಯಾಳಂಗ್ ಪರೀಕ್ಷೆ ಪಕ್ಕ ಬಂದಿಂಜತ್. ಆಚೇಂಗಿಯೂ ಅದೊಂದಾನೋ ಗೇನ ಮಾಡತೆ, ಅಂವೊ ಮಾಂವಂಡ ಕೂಡ ಆಸ್ಪತ್ರೆಕ್ ಪೋಯಿತ್ ಅಂವೊಂಡ ಸೇವೆ ಮಾಡ್‌ಚಿ. ಮಾಂವಂಡ ಕಾಯಿಲ ಚಿನ್ನಂಗ್ ಚಾಯಾನದು ಊರ್‌ಕ್ ವಾಪಾಸ್ ಪೋಯಿತ್ ಪರೀಕ್ಷೆ ಎಳ್‌ದ್‌ಚಿ. ಅಚ್ಚಕ್ ದಿನ ಸ್ಕೂಲ್‌ಕ್ ಪೋಕತ ಪೋಚೇಂಗಿಯೂ ಪರೀಕ್ಷೆಲ್ ಅಂವೊನೇ ಆದ್ಯತ್‌ರಂವೊನಾಯಿತ್ ಪಾಸಾಚಿ.

ದೀನದಯಾಳನೂ, ಮಾಂವಂಡ ಮೊಂವೊ ಬನವಾರಿಲಾಲನೂ ಒರೇ ಕ್ಲಾಸ್‌ಲ್ ಇಂಜಾಂಗ್ ದಂಡಾಳ್‌ಕೂ ಒರೇ ಪುಸ್ತಕ ಇಂಜಿಯೆ. ಬನವಾರಿಲಾಲ್ ಓದುವಾತ್ ಅಚ್ಚಕ್ ಚುರ್‌ಕಿಂಜಿಲೆ; ಪುಸ್ತಕ ಎಲ್ಲ ಅಂವನೇ ಬೆಚ್ಚವಯಿಂಜತ್. ಆಚೇಂಗೂ ಪುಸ್ತಕಕಾಯಿತ್ ದೀನದಯಾಳ್ ಜಗಳ ಮಾಡ್‌ಲೆ, ಬೇಜಾರ ಪಟ್ಟಂಡ್‌ಲೆ. ಬನವಾರಿಲಾಲ ವರೀತಿಪ್ಪಕ, ಇಲ್ಲೇಂಗಿ ಅಂವೊ ಓದತೆ ಇಪ್ಪಕ, ತಾನ್ ಓದುವಯಿಂಜತ್. ದೀನದಯಾಳ್ ಒಯಿಂಬದನೇ ಕ್ಲಾಸ್‌ಲಿಪ್ಪಕ ಅಂವಂಡ ತಮ್ಮಣ ಟೈಫಾಯಿಡ್ ಪನಿಲ್ ಚತ್‌ಪೋಚಿ. ಮೆಟ್ರಿಕ್ ಪರೀಕ್ಷೆಕಿಂಜ ಮಿಂಞ ದೀನದಯಾಳಂಗೂ ಸೌಖ್ಯ ಇಲ್ಲತಾಚಿ. ಆಚೇಂಗಿಯೂ ಅಂವೊ ಜಿಲ್ಲೆಕ್ ಆದ್ಯತ್‌ರಂವೊನಾಯಿತ್ ಪಾಸಾಚಿ. ಅಂವಂಡ ರೇಖಾಗಣಿತ ಉತ್ತರ ಪತ್ರಿಕೆನ ಒರ್ ಮಾದರಿ ಉತ್ತರ ಪತ್ರಿಕೆ ಎಣ್ಣೆತ್ ಸುಮಾರ್ ಕಾಲ ಬೆಚ್ಚಿತಿಂಜತ್‌ಲೊ. ಬುದ್ಧಿವಂತ ವಿದ್ಯಾರ್ಥಿಂತ್ ಅರ್‌ಂಜಿತ್ ಮಹಾರಾಜ ದೀನದಯಾಳ್‌ನ ಕಾಕ್ ಚಿಟ್ಟಿತ್ ನೀಕೆಂತ ಇನಾಂ ಬೊಂಡು ಕೇಳ್ ಎಣ್ಣೆ ಚಿಲೊ. ಅಕ್ಕ ಬಡವ ನಾಚೇಂಗಿಯೂ ಸ್ವಾಭಿಮಾನಿಯಾನ ದೀನದಯಾಳ್ ನಿಂಗಡ ಆಶೀರ್ವಾದ ಮಾತ್ರ ಮದೀಂದ್ ಎಣ್ಣೆ ಚಿ. ಅಕ್ಕ ರಾಜಂಗೂ ಇಂಞೂ ಕುಸಿಯಾಯಿತ್ ಒರ್ ಪೊನ್ನಾರ ಪದಕ, ಪುಸ್ತಕ ಎಡ್‌ಪಕ್ ಇರ್‌ನೂಯಿಟಿಯಿಂಬದ್ ಉರ್‌ಪಿಯ, ಪ್ರತಿ ತಿಂಗ ಪತ್ತ್ ಉರ್‌ಪಿಯತ್‌ರನೆಕೆ ಸ್ಕಾಲರ್‌ಶಿಪ್ ಕೊಡ್‌ತಿತ್ ಅಯೆಚತ್. ಕಾಲೇಜ್‌ಲ್

ಎಲ್ಲಾರ್‌ಕ್‌ಂಜ ಬುದ್ಧಿವಂತ ವಿದ್ಯಾರ್ಥಿ ಆಯಿತ್ ದಡ್ಡ ಮಕ್ಕಕ್ ಪಾಠ ಎಣ್ಣೆ ಕೊಡ್‌ಪಯಿಂಜತ್‌ಲೊ. ಇಂಟರ್‌ಮೀಡಿಯೆಟ್ ಪರೀಕ್ಷೆಲ್ ದಾರೊ ಅಂದಾಕಣೆ ಎಡ್‌ಕತಚ್ಚಕ್ ಮಾರ್ಕ್ಸ್‌ ಎಡ್‌ತಿತ್ ದಾಖಲೆ ಮಾಡ್‌ಚಿ. ಅದ್‌ಂಗ್ ಘನಶ್ಯಾಂದಾಸ್ ಬಿರ್ಲಾ ಒರ್ ಪೊನ್ನಾರ ಪದಕ ಕೊಡ್‌ತಿತ್ ಬಿರ್ಲಾ ಸಂಸ್ಥೆಲ್ ಕೆಲಸ ತಪ್ಪಿಂದ್ ಕಾಕುವಕ, ಪೂರ್ತಿ ವಿದ್ಯಾಭ್ಯಾಸ ತೇರತೆ ಕೆಲಸ ಬೋಂಡಾಂ ದೆಣ್ಣೆ ಚಿ. ಕಾನ್‌ಪುರತ್ ಬಿ.ಎ. ಓದಿತ್ ಆದ್ಯತ್‌ಲೇ ಪಾಸಾಚಿ. ಎಂ.ಎ. ಓದುವಕ್ ಆಗ್ರಾಕ್ ಪೋಚಿ. ಅಲ್ಲಿ ರಾಷ್ಟ್ರೀಯ ಸೇವಾ ಸಂಘಕ್ ಕೂಡ್‌ಚಿ. ಅಕ್ಕಣೆ ತಾಂಗ್ ದುಂಬ ಬೋಂಡಿಯಾನನ್ನತ ಬೆಂದ್‌ಕಡ ಪೊಣ್ಣಾಳ್ ಒಬ್ಬಕ್ ಕಾಯಿಲ ಆಯಿತ್ ಆಗ್ರಾಕ್ ಬಂದಿಂಜತ್. ಓದುವಾನ ಬುಟ್ಟಿತ್ ಬೈಟೂ ಪೋಲೂ ಅವಡ ಸೇವೆ ಮಾಡ್‌ಚಿ. ಆಚೀಂಗಿಯೂ ಅವ ಚಿತ್ತ್ ಪೋಚಿ. ಇದ್‌ಲಿಂಜ ಬೇಜಾರಪಟ್ಟಂಡ್ ಎಂ.ಎ. ಪರೀಕ್ಷೆ ಎಡ್‌ತಂಡ್‌ಲೆ. ಇದ್‌ನಗುಂಡ್ ಸ್ಕಾಲರ್‌ಶಿಪ್ ನಿಂದತ್. ಅಲ್ಲಿಂಜ ಕೆಲಸಕ್ ಕೂಡುವಕ್ ಪ್ರಯತ್ನಪಟ್ಟಿತ್.

ಅಕ್ಕ ಬ್ರಿಟಿಷ್‌ಕಾರಡ ಕಾಲ. ನಲ್ಲ ಕೆಲಸಕ್ ಸೂಟ್-ಬೂಟಾಯಿತೇ ಪೋಂಡುಯಿಂಜತ್. ಆಚೀಂಗಿ ದೀನದಯಾಳ್ ಇಂಟರ್‌ವ್ಯೂಕ್ ಧೋತಿ, ಕುರ್ತಾ, ತೊಪ್ಪಿಲೇ ಪೋಚಿ. ಎಲ್ಲಾರು 'ಪಂಡಿತ್‌ಜೀ'ಂದ್ ತಮಾಸಿ ಮಾಡ್‌ಚಿ. ಬಯ್ಯಂಜಿ ಅದೇ ಪೆದ ಖಾಯಂ ಆಚಿ. ಕೆಲಸ ಕ್‌ಟ್ವಾಚೀಂಗಿಯೂ, ಸರಕಾರಿ ಕೆಲಸ ಕುಸಿ ಇಲ್ಲತೆ ಪೋಯಿಲೆ. ಆರ್.ಎಸ್.ಎಸ್.ರ ಕೆಲಸವೇ ಮಾಡಿಯಂಡಿಂಜತ್. ಮಂಗಲಾಯಿತ್ ಸಂಸಾರ ಕಟ್ಟಿಯಂಡಕ ದೇಶಸೇವೆ ಮಾಡುವಕ್ ಕಯ್ಯುಲೇಂದ್ ಗೇನ ಮಾಡಿತ್ ಮಂಗಲ ಕಯಿಂಜಿಲೆ.

ಸುಮಾರೆಲ್ಲ ಪತ್ರಿಕೆ ಸುರು ಮಾಡ್‌ಚಿ. ಅದೆಲ್ಲ ದೇಶಭಕ್ತಿನ ಪ್ರಚಾರ ಮಾಡುವನ್ನತ ಪತ್ರಿಕೆ ಆನಾನಗುಂಡ್ ಅದ್‌ಂಗೆಲ್ಲ ಬ್ರಿಟಿಷ್ ಸರಕಾರ ನಿಷೇಧ ಮಾಡುವಯಿಂಜತ್. ಒಂದ್ ನಿಪ್ಪಾಚಿಡುವಕ, ಇಂಇ಼ೋರ್ ಪೆದತ್ ಪತ್ರಿಕೆ ಸುರು ಮಾಡುವಯಿಂಜತ್. ಅಧಿಕಾರತಾರ ಆಸೆ ಇಲ್ಲತೆ ದೇಶಸೇವೆ ಮಾಡ್‌ಚಿ. 1968ನೇ ಇಸವಿ ಫೆಬ್ರವರಿ 11 ಲ್ ಲಕ್ನೋತ್‌ಂಜ ಪಾಟ್ನಾಕ್ ರೈಲ್‌ಲ್ ದೀನದಯಾಳ್ ಪೊರ್‌ಟಿತಿಂಜತ್. ಪಿತ್ಯಾಂದ್ ಪೊಲಾಕ ಮೊಗಲ್‌ಸರಾಯ್ ರೈಲ್ವೇ ಸ್ಟೇಷನ್‌ಲ್, ಬಟ್ಟೆಲ್ ಸುತ್ತನ ಚಾವ್ ಒಂದ್ ಕಂಡಿತ್ ಉತ್ತಿತ್ ನೋಟುವಕ ಅದ್ ದೀನದಯಾಳ್ ಆಯಿತಿಂಜತ್. ಅಯಿಂಗಳ ದಾರ್ ಕೊಂದಿತಿಕ್ಕುಂದೆಣ್ಣವ ಪ್ರಶ್ನೆಕ್ ಉತ್ತರವೇ ಕ್‌ಟ್ವೆಲೆ.

ದೀನದಯಾಳ್ ಒರ್ ತಕ್ಕ್ ಎಣ್ಣುವಯಿಂಜತ್, "ಬುದ್ಧಂಢುಳ್ಳಯಿಂಗ ಕಲಿಯುಗಕಾರ, ಕಡಿಕೆ ಬುಟ್ಟಿತ್ ಎದ್ದಯಿಂಗ ದ್ವಾಪರಯುಗಕಾರ, ಎದ್ದ್ ನಿಪ್ಪಯಿಂಗ ತ್ರೇತಾಯುಗ ಕೆಟ್ಟುವಯಿಂಗ, ಮಿಂಞಾಕ್ ಮೊಟ್ಟೆಡ್‌ತ್ ನಡ್‌ಪಯಿಂಗ ಕೃತಯುಗತ್‌ನ ಮಾಡುವಯಿಂಗಾಂದ್. ಎಚ್ಚಕೇ ಕಷ್ಟ ಬರಡ್ ಬೊತ್ತತೆ ಧೈರ್ಯತ್ ಮಿಂಞಾಕ್ ಮೊಟ್ಟ್ ಇಡೊಂಡು ಎಣ್ಣುವದೇ ದೀನದಯಾಳ್ ಉಪಾಧ್ಯಾಯಂಡ ಜೀವನ ಸಂದೇಶ. ಅಯಿಂಗಡ ನಿಸ್ವಾರ್ಥ ಜೀವನ, ನಂಗಡ ಬದ್‌ಕಾರ ಆದರ್ಶ ಆಕಡ್. □



## ಪಂದ್ಯಂಡ ಬೊಳ್ಳಪ್ಪ

ಕೊಡಗರ ಗಾಂಧೀಂದ್ ಪದಪೋನ ಸ್ವಾತಂತ್ರ್ಯ ಪೋರಾಟಗಾರ. 1921 ಲಿಂಜಿ 1963 ಕೆತ್ತನೆ ಕೊಡಗು ವಾರಪತ್ರಿಕೆರ ಸಂಪಾದಕ. ಕೊಡಗ್ ಲೆಜಿಸ್ಲೇಟಿವ್ ಕೌನ್ಸಿಲ್‌ರ ಸದಸ್ಯ. ಬಯ್ಯ 1924 ಲಿಂಜಿ 1957 ಕೆತ್ತನೆ ಅದ್ ಲೆಜಿಸ್ಲೇಟಿವ್ ಅಸೆಂಬ್ಲಿ ಆಯಿತಿಂಜತ್. ಪ್ರಾವಿನ್ಸಿಯಲ್ ಕೊ-ಆಪರೇಟಿವ್ ಬ್ಯಾಂಕರ ಅಧ್ಯಕ್ಷ ಪಿಂಞ ಮಾರ್ಕೆಟಿಂಗ್ ಫೆಡರೇಶನ್‌ರ ಅಧ್ಯಕ್ಷನಾಯಿತ್ 25 ಕಾಲ ಸೇವೆ. ಚೆನ್ನ ಕಾಲ ಕೊಡಗ್ ಡಿಸ್ಟ್ರಿಕ್ಟ್ ಬೋರ್ಡ್‌ರ ಅಧ್ಯಕ್ಷನಾಯಿತಿಂಜತ್. ಬೊಳ್ಳಪ್ಪ ನಿಷ್ಠಾವಂತ ಕಾಂಗ್ರೆಸ್ಸುಕಾರನೂ, ಬಲ್ಯಕೇಳಿರ ಸಮಾಜಸೇವಕನೂ ಆಯಿತಿಂಜತ್. ಕೊಡಗಲ್ ಕಾಂಗ್ರೆಸ್ಸುಕ್ ಜೀವ ಕೂಟ್‌ನವು, ಭಾರತ ಸ್ವಾತಂತ್ರ್ಯ ಪೋರಾಟ ಕಾಲತ್‌ಲ್ ಸುರೂಲ್ ಜೈಲ್‌ವಾಸ ಅನುಭವಿಚಿಟ್ಟಿಂವೊ. 1933ನೇ ಇಸವಿಲ್ ಮಹಾತ್ಮ ಗಾಂಧಿ ಕೊಡಗ್‌ಕ್ ಬಪ್ಪಕ್ ಕಾರಣ ಬೊಳ್ಳಪ್ಪ. ಕೊಡಗನ ಪ್ರತ್ಯೇಕ ಆಯಿತೇ ಬೆಕ್ಕಂಡೂಂದ್ ಪೋರಾಟ ಮಾಡಿಯಂಡ್ ಬಂದವು.

ಇಯಂಡ ಪೊಣ್ಣ್ ಸೀತಾ ಬೊಳ್ಳಪ್ಪ ಭಾರೀ ಕೇಳಿರ ಸ್ವಾತಂತ್ರ್ಯ ಪೋರಾಟಗಾರ್ತಿ. ಕೊಡಗರ ಮೂಂದ್ ಪೊಣ್ಣಾಳನ ಅರೆಸ್ಪ್ಪ ಮಾಡ್‌ನ ಕೂಟ್‌ಲ್ ಸೀತಾ ಬೊಳ್ಳಪ್ಪನೇ ನಾಯಕಿ. ತಾಂಡ ದುಂಬನ ಕುಳಿಯಮೆಲ್ ಜೈಲಿಂಜಂಡ್ ಕುಂಞಿನ ಪೆತ್ತ ಧೀರ ಪೊಂಗ.

1921ನೇ ಇಸವಿಯಿ 1950ನೇ ಇಸವಿಕೆತ್ತನೆ ಕೊಡಗಾನ "ಬೊಳ್ಳಪ್ಪ ಯುಗ"ಂದ್ ಜನ ಪರಂದದುಂಡ್. ಗಾಂಧೀಜಿರ 18ರ ರಚನಾತ್ಮಕ ಕಾರ್ಯಕ್ರಮತ್‌ನ ಕೊಡಗಲ್ ಪ್ರಚಾರ ಮಾಡಿತ್ ಬಳಕೆಕ್ ಕೊಂಡ ಬಾತ್.

ಬೊಳ್ಳಪ್ಪಂಡ ಸಂಪಾದಕತ್ವತ್‌ರ ಕನ್ನಡ ಭಾಷೆರ "ಕೊಡಗು" ಪತ್ರಿಕೆ ಅಂದ್ ಕೊಡಗಲ್ ಜನಜಾಗೃತಿ ಮಾಡ್‌ಚಿ.

1952-56 ಅವಧಿಲ್ ಕೊಡಗ್ ಸಂಸ್ಥಾನತ್‌ರ ವಿರೋಧ ಪಕ್ಷತ್‌ರ ನಾಯಕ ನಾಯಿತ್ ಕೊಡಗಲ್ ಅಭಿವೃದ್ಧಿಕ್ ಭಾರೀ ನೈಚಿ ಜನನಾಯಕ. 1966 ಲ್ ಮರಣಪಟ್ಟತ್. ಶಿಸ್ತರ ಸಿಪಾಯಿ ಆಯಿತಿಂಜ ಬೊಳ್ಳಪ್ಪಂಡ ಬದ್‌ಕ್ ಇಕ್ಕತ ಬಾಲೆಕಾರಕ್ ಮಾದರಿ ಆಯಿತಿರಂಡು. □



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ



ಅಧ್ಯಕ್ಷಿಣಿ

ಶ್ರೀಮತಿ ಉಳ್ಳಿಯಡ ಡಾಟಿ ಪೂವಯ್ಯ

ಫೋನ್ : 08272 : 229074 (ಕ), 229178 (ಮ), 9845097500 (ಮೊ)

ರಿಜಿಸ್ಟ್ರಾರ್

ಶ್ರೀ ಕೆ. ದಾಮೋದರ

ಫೋನ್ : 08272 : 228490 (ಕ)

ಸದಸ್ಯಂಗ:

ಶ್ರೀ ಮುದ್ದಿಯಡ ಕುಶ ಪೊನ್ನಪ್ಪ	- 08274 : 255893 (ಮ)
ಶ್ರೀಮತಿ ಕೂಪದೀರ ಸುಂದರಿ ಮಾಚಯ್ಯ	- 08272 : 229580 (ಮ)
ಡಾ  ತೀತಿರ ರೇಖಾ ವಸಂತ	- 08274 : 244406 (ಮ)
ಶ್ರೀ ಕಾಳಿಮಾಡ ಎಂ. ಮೋಟಯ್ಯ	- 08274 : 249387 (ಮ)
ಶ್ರೀ ನಾಗೇಶ್ ಕಾಲುರ್	- 08272 : 265658 (ಮ)
ಶ್ರೀ ಬೊಟ್ಟೋಳಂಡ ಕಾಶಿ ಅಚ್ಚಯ್ಯ	- 08272 : 224240 (ಮ)
ಶ್ರೀ ನಾಣಮಂಡ ವೇಣು ಮಾಚಯ್ಯ	- 08274 : 234276 (ಮ)
ಶ್ರೀಮತಿ ಪಾಲೇರ ರಾಣಿ ಅಪ್ಪಣ್ಣ	- 08272 : 230728
ಶ್ರೀ ಹೆಚ್. ಮಂಜು	
ಶ್ರೀ ನಾಳಿಯಮ್ಮಂಡ ಉಮೇಶ್ ಕೇಚಮ್ಮಯ್ಯ	08274 : 231721
ಶ್ರೀ ಕಲಿಯಂಡ ಪಿ. ಅಯ್ಯಣ್ಣ	- 08272 : 237708
ಶ್ರೀ ಬಡ್ಡಿರ ಎ. ಸುಬ್ಬಯ್ಯ	- 08276 : 274207
ಶ್ರೀಮತಿ ಮುಕ್ಕಾಟರ ತಂಗಮ್ಮ ಉತ್ತಪ್ಪ	- 08276 : 275401(p.p.)



## ಅಪ್ಪಚೆಟ್ಟೋಳಂಡ ವನು ವಸಂತ

ಇವು ಬಲ್ಲಮಾವಟಿ ಗ್ರಾಮತಾರ  
ಅಪ್ಪಚೆಟ್ಟೋಳಂಡ ವಸಂತ ಅಯಿಂಗಡ ಪೊಣ್ಣ್.  
(ತಾಮನೆ : ಬಿ. ಶೆಟ್ಟಿಗೇರಿ ಗ್ರಾಮತಾರ ಚೇಂದಿರ  
ಕಾಳಯ್ಯ ಪಿಂಞ ಚೋಂದಮ್ಮ ದಂಪತಿಯಡ  
ಮೋವ) ಚಿಕ್ಕಮಗಳೂರ್‌ಎಸ್.ಟಿ.ಜೆ.

ಕಾಲೇಜ್‌ಲ್ ಬಿ.ಕಾಂ. ಡಿಗ್ರಿ,  
ಮೈಸೂರ್ ವಿಶ್ವವಿದ್ಯಾನಿಲಯತ್ ಎಂ.ಕಾಂ.  
ಡಿಗ್ರಿ ಪಡ್‌ಂದಿತ್. ಇವು ಪೆರ್ತ್ ಪತ್ರಿಕೆ,  
ಸಂಚಿಕೆಕ್ ಕಥೆ, ಕವನ ಎಳೊದಿತ್.

ಕೊಡವತಕ್ಕ ಎಳೊಕಾರಡ ಕೂಟತಾರ  
“ಪತ್ತ್ ಕಥೆರ ಪುತ್ತ್”ರ “ಪಡ್‌ಂದ ಬಂದದ್”;  
ಕೊಡವ ಸಾಹಿತ್ಯ ಅಕಾಡೆಮಿ ಪಿಂಞ ಮಡಿಕೇರಿ  
ಕನ್ನಡ ಸಾಹಿತ್ಯ ಪರಿಷತ್ತಾರ ಕೂಟಾದನೆಲ್  
ಬುಡ್‌ಗಡೆ ಮಾಡ್‌ನ “ಕಾವ್ಯ ಸಂಗಮ” ಕವನ  
ಸಂಕಲನತಾರ “ಮಾರ್ಗದರ್ಶನ” ಕವನತಾರ  
ಎಳೊಕರ್ತಿ.

“ಬದ್‌ಕಾರ ಬಟ್ಟೆಲ್” ಎಣ್ಣು ವ ಕತೆಗೂಡ್  
ಪುಸ್ತಕ ಅಕಾಡೆಮಿಂಜೆ ಪ್ರಕಟ ಆಯಿತ್.

ಇಯಂಡ ವಿಳಾಸ :

ಅಪ್ಪಚೆಟ್ಟೋಳಂಡ ವನು ವಸಂತ  
ಬಲ್ಲಮಾವಟಿ ಗ್ರಾಮ & ಪೋಸ್ಟ್  
(ವಯಾ) ನಾಪೋಕ್ಡ್ ಪೋನ್: 270006



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಮಡಿಕೇರಿ

